



© T.C. Kùltür ve Turizm Bakanlıđı
Kùtùphaneler ve Yayınlar Genel Mùdùrlùđù

Eser Adı: Mostarlı Hasan Ziyâ'î Divânı
Mùellifi: Mostarlı Hasan Ziyâ'î
Hazırlayan: Mùberra Gùrgendereli
Yayın Yılı: 2017
ISBN: 978-975-17-3409-9
Ana Yayın Numarası: 3195
Kùltür Eserleri Dizisi-446

Adres: Anafartalar Mahallesi, Cumhuriyet Caddesi,
No: 4, B-Blok, 06030 Ulus/ANKARA
Telefon: 00 90 312 3099001
Faks: 00 90 312 3098998
e-posta: yaphaz@kulturturizm.gov.tr

www.kulturturizm.gov.tr-
<http://ekitap.kulturturizm.gov.tr>

MOSTARLI HASAN ZİYÂ'Î DİVÂNİ

Hazırlayan

Dr. Müberra Gürgendereli

Ankara

2017

MOSTARLI HASAN ZİYÂ'Î

16. yüzyılda yaşamış olan Mostarlı Hasan Ziyâî, Boşnakların divan sahibi en eski klasik şairidir. Balkanlarda, özellikle de Bosna'da büyük bir şöhrete sahiptir. Eldeki tek nüshası, Edirne Selimiye Kütüphanesi Elyazmaları Bölümü 2127 numarada kayıtlı bulunan divanının ve Şeyh-i Sanân mesnevisinin incelenmesiyle, şairin hayatı ve eserleri gün ışığına çıkmıştır. Divanı ve Şeyh-i Sanân mesnevisinin yayımlanmasından sonra, bu eserler Bosna'da ve Türkiye'de yapılan pek çok çalışmaya kaynaklık etmiştir.

Edirne için önemli bir hazine olan ve ilk bağışlarını Sultan II. Selim'in bizzat yaptığı Selimiye Kütüphanesindeki elyazması Türkçe divanlardan biri olan Mostarlı Ziyâî'nin tek nüsha divanı, Boşnak araştırmacılar tarafından uzun yıllar aranmış, divanın Edirne'de bulunması Bosna-Hersek'teki Osmanlı edebiyatı araştırmacıları tarafından büyük ilgi görmüştür.

Balkanları sembolize eden en önemli mimari eserlerden biri olan Mostar Köprüsü'nün kitabesindeki tarih beyitleri de Mostarlı Ziyâî tarafından yazılmıştır (h.974-m.1566). Ne yazık ki bugün bu kitabe yerinde yoktur. Ziyâî, dünyada eşi benzeri olmayan bu köprüyü gökkuşağına benzetmiştir:

Kavs-i kuzahın aynı bir köprü binâ etti

Var mı bu cihân içre mânendi hey Allâhım

İbretle bakıp dedi târîhini bir ârif

El geçtiği köprüden biz de geçeriz şahım

(Divan/Tarih 1)

Ziyâî, şiirlerinde Balkanlar'da bulunan bazı şehir ve kasaba adlarına da yer vermiştir. Bunlar arasında; Hersek, Karadağ, Edirne, Eski Kiliselik, Akhisar Prusac, Benefşe Limanı gibi yer adları mevcuttur. Bir şiirinde şair; Hersek sancak beyi olduğunu bile hayal etmiştir.

Divanındaki bir nottan şairin adının Hasan, dedesinin ve büyük dedelerinin isimlerinin ise sırasıyla; Ali, Mahmud ve Yusuf olduğunu öğrenmekteyiz. Şiirlerinden anlaşıldığı kadarıyla hayatını, yokluk ve sıkıntılarla geçiren Ziyâî, çok eski, harap ve yıkık bir evde oturmaktadır. Bu ev; fare delikleriyle dolu, her taraftan yağmur ve rüzgâr alan, tahtaları gıcırdayan, sobası devamlı tüten yıkık dökük bir yapıdır. Şair bu eve "hâne- i vîrâne" adını vermiştir.

Meskenim oldu dirîgâ bir 'aceb mihnet yeri

Hâne-i vîrâneye koydı felek ben çâkeri

(Divan/Kaside 11-1)

Hayatının bir döneminde iftiraya uğradığını söyleyen ve şiirdeki yeteneğinden çok emin olan Ziyâî, yaşadığı devirde şiirlerinin itibar görmemesinin sebebini, hünerinin takdir edilmediği uzak bir vilayette kalmış olmasına bağlar. Şair İstanbul'a ulaşıp sanatını

sergileyememesine üzölmekte ve çektiđi maddi sıkıntılar yüzünden bildiklerini de unutmaktan korkmaktadır. Bu durum, Osmanlı döneminde idareciler tarafından sanatın teşvik edilmesinin sanata ve sanatçıya olan olumlu katkısının ve motive edici etkisinin bir göstergesi olarak karşımıza çıkmaktadır.

Hüner kadri bilinmez kaldım alçak bir vilâyette

Unutdum bildiđim dahi bu kıllette bu zillette

(Divan/Muaşşer 1-2)

Ziyâî, Şeyh-i Sanân mesnevisinde, fakirlikten kurtulmak için ailesiyle beraber gurbete çıktığını söyler. Burası deniz kenarında kayalık bir yerdir. Fakat gurbette de sıkıntıları devam edip ailesinin geçimini sağlayamayınca memleketine geri dönmeye karar verir. Bir beytinde ailesinin karnını doyuracak bir dilim ekmeđi bile bulamadığından şikayet eder.

Ziyâî'nin kaç çocuđu olduđu bilinmemektedir. Sadece “hâne-i vîrâne” adlı kasidesinde; sobanın dumanının tütmesi sebebiyle ağladıklarını söylemesinden şairin birden fazla çocuđu olduđu anlaşılmaktadır.

Gâh eve girdikçe bakıp gülerim bî-ihdiyâr

Hep düttün derdinden ağlar görsem ođlancıkları

(Divan/Kaside 11-21)

Ziyâî bir zaman sonra, şair ve âlimlere deđer verip onları koruyan, Balkanlar'ın meşhur Yahyâlı Beyleri sülalesinden gelen ve kendisi de bir Rumeli şairi olan Vusûlî Mehmed Beđ'in himayesine girer. Mehmed Beđ'in de ilgi ve teşvikiyle eserlerini daha rahat yazmaya başlayan şair, ona intisap ettikten sonra sıkıntılarında bir miktar kurtulur. Edebiyat tarihçileri; Mehmed Beđ'in cömertliğiyle tanındığını ve sırtındaki elbisesi de dahil olmak üzere bütün kıymetli giysilerini hediye edecek kadar devrinin edebiyatçılara deđer verdiğini yazar. Hatta Gelibolulu Ali, Mehmed Beđ'in elbiselerini sanatkârlara hediye etmesi sebebiyle ancak terzilerinin yeni elbiseler dikmesinden sonra sokađa çıkabildiğini söyler.

Ziyâî divanında, şairin ölümünden bir sene önce yani 1583'te(H.991) vâiz olduğunu gösteren bir tarih beyti de mevcuttur.

Ettikte Ziyâîyi takdîr-i Hudâ vâiz

Hâtif işitip dedi târîhini va'ziyye

(Divan/Tarih 14)

Ziyâî 1584'te, doğduđu kasaba olan Mostar'da veba hastalığından ölmüştür.

ESERLERİ

1.Divan:

Hasan Ziyâî'nin 1584'te Mostar'da tamamladığı hacimli, mürettep bir divanı mevcuttur. Bugüne kadar tek nüshası bulunabilen eser, Edirne Selimiye Kütüphanesi Elyazmaları bölümündedir.

Şair, divanın ön sözünde; gençlik günlerinde aşka meyl edip bu hevesle şiirler yazdığını, ihtiyarlığında da bunların müsveddede kalıp dağılmasını reva görmediğinden kaside, gazel ve diğer şiirlerden bir divan tertip ettiğini söyleyerek divanını yazma sebebini dile getir.

Divanda 12 kaside, 1 terki-bend, 1 terci-bend, 1 muaşşer, 1 müseddes, 4 muhammes, 510 gazel, 14 tarih, 12 muamma, 57 kıt'a, 29 müfred ve matla' bulunmaktadır. Divanın sonunda eserin H.992'nin Rebû'l-âhirinde Mostar'da yazıldığı kaydı bulunmaktadır.

Divanda Rumeli şairlerine has rintlik, kalenderilik, Hristiyanlık kültürü, Rumeli'ye ait yer adlarının mevcudiyeti, atasözleri ve deyimlere sıkça yer verme, halkın gelenek ve yaşayışını şiirine aksettirme, Rumeli söyleyişleri, halk söyleyişine yakın samimi ifadeler ve sadelik gibi belirgin özellikler mevcuttur. Bir gazel şairi olan Ziyâî, şiirlerinde sade, akıcı ve samimidir. Zarif ve tabii bir Türkçe ile söylenmiş gazellerin redifleri çoğunlukla Türkçe kelimelerden meydana gelmiştir. Sanat yapmak iddiasıyla yapmacıklığa düşmemiş, yalın ve anlaşılır bir ifade kullanmıştır. Kasidelerinde alışılmış kaside anlayışının dışına çıkan şair, süslü ifade ve abartılı övgülerden uzak durmuştur. "Hane-i Vîrâne" ve "Sengistân" kasideleri ise hem içerik hem de şekil özelliği bakımından klasik kasidelerden farklıdır. Bu kasideler, daha çok realist, sembolik ve mizahi anlayışla yazılmışlardır. Özellikle kasidelerinde ince espriler mevcuttur. O, bazen kendisiyle bazen de çevresiyle alay eder. Ziyâî, edebiyatımızda örneğine az rastlanan, şairlerin şahsi sıkıntılarını dile getirdikleri "hasb-i hâl" tarzı bir kaside de yazmıştır.

2.Kıssa-i Şeyh Abdürrezzâk (Şeyh-i San'ân) Mesnevisi:

Kıssa-i Şeyh Abdürrezzâk Mesnevisi, İslam ve tasavvuf felsefesi ile ilgili pek çok eserde zikredilen meşhur Şeyh-i San'ân hikayesini anlatır. Mesnevinin; biri Londra'da, biri Zagreb'de, ikisi İstanbul'da olmak üzere dört nüshası vardır. Mesnevinin sonunda eserin tamamlanışına 1583(H.991)tarihi düşürülmüştür.

Aşık olduğu Hristiyan kızın peşine düşerek dininden vazgeçen ve bu uğurda pek çok aşağılama ve eziyetlere katlanan meşhur Şeyh-i San'ân'ın kıssası, divan şiirinde sık kullanılan bir mazmun olarak yer almasının yanında, dini-tasavvufi nitelik taşıyan bir hikaye olarak mesnevilere de konu olmuştur. Ziyâî, mesnevîde konu olarak Attâr'ın Mantiku't-tayrı'ndaki Şeyh Sanân hikayesine sadık kalmakla beraber bazı ayrıntılarda ve hikayenin sonuç bölümünde değişiklikler yapma yoluna gitmiştir. Bu durum esere orijinal bir nitelik kazandırmıştır. Ziyâî'nin mesnevisini diğerlerinden ayıran en önemli özellik hikayenin sonuç bölümüdür. Attâr'ın hikayesinde Hristiyan güzeli, Şeyh'e kavuştuğu an Müslüman olur ve ölür. Ziyâî'nin eserinde ise Şeyh'in sevdiği kız hemen ölmez, Şeyh ile beraber Kabe'ye gelir, günlerini dua ve ibadetlerle geçirdikten sonra ölür. Bu farklılık; bir Rumeli şairi olan Ziyâî'nin eserinde, Balkanlarda yüzyıllar boyunca iç içe yaşayan Hristiyanlar ve Müslümanların dinlerinin karşılaştırılması olarak görülebilir. Şair bu eserinde Hristiyanlık ile Müslümanlığı mukayese etmiştir.

Tasavvufî bir nitelik taşıyan hikâyenin anlatmak istediği ana düşünce, aşkın insanın gönlünde olduğu fikridir. Aşk uğruna çekilen eziyetlere ve ayıplamalara alçak gönüllülikle katlanmak ve sabır göstermek gerekir. Aşk yolu, zorluklarla doludur ve gerçek aşka yani ilahi aşka ancak çekilen sıkıntılar neticesinde ulaşmak mümkündür.

3.Kenzü'l-esrâr:

Ziyâî, Nizâmî'nin Mahzenü'l-esrârına nazire olarak yazdığı 1565 beyitlik bu eserinde; ilim, namaz, aşk, kanaat, dünyanın faniliği, takva, haya, edep, yiğitlik, adalet, cimrilik ve günah gibi yirmi farklı konuda hikayeler anlatmış ve bu hikayelerle ilgili çeşitli nasihatlerde bulunmuştur.

4.Varka vü Gülşâh:

Ziyâî'nin bugüne kadar bulunamamış olan bu eseri yazdığını, Kıssa-i Şeyh Abdürrezzâk Mesnevisi'nde yer alan bir beyitten anlıyoruz. Şair Şeyh-i San'ân'ın hikayesini yazma sebebini anlatırken bütün güzel hikayelerin daha önce yazıldığını "Varka vü Gülşâh"ı da kendisinin kaleme aldığını dile getirir.

Şiirlerindeki yakıcı sözleri kendisinden önce hiçbir şairin söylemediğini dile getiren Ziyâî orijinallik iddiasında bulunur.

Ashâb-ı şevk içinde bu muhrik edâları
Evvel Ziyâ'îyâ hele bir şâ'ir etmedi
(Divan/Gazel 485-5)

Divanında, yeni tarzda şiirler yazdığını da söyleyen Ziyâî, bu yeni tarzın eski şairleri ve onların yazmış olduğu bütün şiirleri unutturduğunu ifade eder. Belki de şair, bu beyitle divan şiirinde yeni bir tarz meydana getirme arzusunda olduğunu dile getirmektedir.

Eski eş'ârı hep unutturdu
Ey Ziyâ'î bize bu tarz-ı cedîd
(Divan/Gazel 57-5)

Verimli ve kabiliyetli bir Rumeli şairi olarak Mostarlı Ziyâî; samimi, akıcı, orijinal şiirler yazması, Balkan kültürünü şiirlerine aksettirmesi, Rumeli şairlerinin karakteristik özelliklerini taşıması ve eserlerindeki orijinallik, renk ve canlılık sebebiyle XVI. yy.'da yaşamış önemli bir divan şairi olarak edebiyat tarihimizdeki yerini almıştır.

KAYNAKÇA

Çeltik, Halil (2000). “Rumeli Şairlerinde Yöresel Kültür”. *Bilig* 14: 99.

Çeltik, Halil (2004). *Divan Sahibi Rumeli Şairlerinin Şiir Dünyası*. Doktora Tezi. Ankara: Gazi Üniversitesi.

Gürgendereli, Müberra (hızl.) (2002). *Hasan Ziyâ’î Hayatı Eserleri Sanatı ve Divanı*. Ankara: Kültür Bakanlığı Yayınları.

Gürgendereli, Müberra (hızl.) (2007). *Mostarlı Ziyâ’î Şeyh-i San’ân Mesnevisi*. İstanbul: Kitabevi Yayınları.

Gürgendereli, Müberra (2014): “Ziyâ’î”. www.turkedebiyatilisimlersozlugu.com (Erişim Tarihi:25.05.2017).

Hasandediç, Hüziya. “Mostarlı Hasan Ziyai Çelebi”. *Çevren* 13: 113

İsen, Mustafa (1994). *Künhü’l-Ahbâr’ın Tezkire Kısmı*. Ankara: Atatürk Kültür Dil ve Tarih Yüksek Kurumu Yayınları.

Kafzâde Fâizî. *Zübdetü’l Eş’âr*. Süleymaniye Kütüphanesi. Şehit Ali Paşa- 1877/1.

Kâtib Çelebi (1941). *Keşfü’z-zünûn*. İstanbul: Maarif Matbaası.

Kavruk, Hasan (1998). *Eski Türk Edebiyatında Mensûr Hikayeler*. İstanbul: Milli Eğitim Bakanlığı Yayınları.

Köprülü, Fuat. *Türk Edebiyatında İlk Mutasavvıflar*. Ankara: Diyanet İşleri Başkanlığı Yayınları.

Kut, Günay (1979). “Edirne Selimiye Kütüphanesi’ndeki Türkçe Yazmalar Üzerine”. *In Memoriam Ali Nihad Tarlan*. V. 3. Ed. Şinasi Tekin ve Gönül Alpay Tekin. Cambridge.

Kut, Günay (2004). “Klasik Edebiyat: Osmanlı (Batı Oğuz) Sahası”. *Türk Dünyası Ortak Edebiyatı: Türk Dünyası Edebiyat Tarihi*. Ankara: Atatürk Kültür Merkezi Yayınları.

Nametak, Fehim (1989). *Pregled Knjizevnog Stvaranja Bosansko-Hercegovaskin Muslimana Na Turskom Jeziku*. Sarejevo: El-Kalem.

Ziyâ’î. *Divan*. Edirne Selimiye Kütüphanesi, T.Y:2127.

Ziyâ’î. *Kıssa-i Abdürrezzâk-ı Uşşâkî*. İstanbul Millet Kütüphanesi. Emîrî- Manzum 935.

Ziyâ’î. *Kıssa-i Şeyh Abdürrezzâk*. İstanbul Büyükşehir Belediye Kütüphanesi. M.Cevdet K.272.

Ziyâ’î. *Kıssa-i Şeyh Abdürrezzâk*. Londra British Museum. Or. 3291.

Ziyâ’î. *Kıssa-i Şeyh Abdürrezzâk*. Zagreb “Orientalna Zbirka” Arhiva HAZU (Hırvatistan Bilim ve Sanat Akademisi) Arşivi Şarkiyat Koleksiyonu:202

Zülfe, Ömer ve Fatih Başpınar (2011). *Mostarlı Ziyâ’î Kenzü’l-esrâr*. İstanbul: Semerkand Yay.

MOSTARLI HASAN ZİYÂ'Î DİVANI

DİBÂCE

Minnet ü şükr ol Mennân u Şekûra ve hamd ü senâ ol Sübhân u Gafûra ki zamân-ı evvelde ve rûz-ı pîrûz-ı ezelde ervâh-ı insânı halk idüp meydân-ı 'azamet ü celâlinde ve eyvân-ı kibriyâ-yı bî-zevâlinde tertîb-i dîvân-ı 'azîm itdükde vezâîf-i rızklarını defter-i "nahnü kasemnâ"da ve nefâis-i enfâs-ı 'ömr-i ma'mûrelerin "ellezi kaddere fehedâ" fehvâsınca takdîr idüp halâyıkun kimini lâyıık-ı ni'am-ı cennât-ı kerîm ve kimini müstehak-ı 'azâb-ı nâr-ı elîm eyleyüp "İnne'l-ebrâre lefî na'îm ve inne'lfüccâre lefî cahîm" hükmi mukarrer oldu ve ol cem'iyet-i 'uzmâda "Cennâtün tecri min tahtihe'l-enhâr" gül-istânında sürûr ile server-i sâhib-i serîr ve niçe 'âkıbetü'lemler 'ikâb-ı 'azîm ile mu'âkıb ve sicn-i siccînde esîr oldu. "Farîkun fi'l-cenneti ve farîkun fi's-sa'îr" âsârı zuhûr eyledi. Meger ki cumhûr-ı şu'arâ şu arada muntazır-ı fermân-ı hümâyûn olup hayretde ve müterakkıb-ı emr-i Hudâyî "kûn feyekûn" olup havf u haşyetde tururken nâ-gehân bir nidâ-yı mehîb ve bir sadâ-yı 'acîb gelüp "Ve's-şu'arâü yettebiühümü'l-gâvûn" âyeti istimâ' olındı. 'Acebâ bu nekbet ü zillete bâ'is nedür diyü birbirine su'âl iderken "Elem tere ennehüm fî külli vâdin yehîmûn" hitâbı ile muhâtab "Ve ennehüm yakûlûne mâ lâ yef'alûn" töhmeti ile müttehem olup 'aybları yüzlerine urıldı. Ve 'âkıbet başlarına ne gelecekleri âşikâre görüldü. Külliyyet ile hâtırlarına ye's ve şikeste dillerine havf-ı ye's 'arız olup tamâm nevmîd olduklarında nâ-gâh münâdî-i rahmet-i Rahmân âvâz-ı bülemlend ile "İlle'l-lezîne âmenû ve 'amilü's-sâlihâti" âyetin tilâvet idüp şu'arâ-yı ehl-i îmânı ve sulehâ-yı nev'-i insânı istisnâ eyledi. Ol istisnâ senâ-yı şu'arâ-yı ehl-i islâma bâ'is olup senâ-yı Hudâ-yı cihân-âferîne ve midhat-i Hâlık-ı âsumân u zemîne şurû' eylediler.

Kıt'a:

Kibriyâsı kulzüminden katredür bahr-ı muhîl
Bûstân-ı kudretinden berg-i sûsen âsumân
Zerredür nûr-ı cemâlinde anun şems-i münîr
'İzzeti sahrâsına dağlar uvak kumdur hemân
Mushaf-ı 'ilmine harf-i dâldur 'ilm-i beşer
Hân-ı lutfından eserdür hâsıl-ı bâg-ı cihân
Çâr 'unsur heft yemm nüv âsumân u şeş cihât
İki 'âlem birliginün şâhididür bî-gümân
Hâr u hasdan tut ki bir tıfl eylemiş cüz'î binâ
Mülkine nisbet anun mülk-i Süleymân-ı zamân

Ve salavât u selâm ol enbiyâyâ ki dîvân-ı kazâ-yı Rabbânîde töhmet-i şî'rden müberrâ kılınup "ve mâ 'allemnâhü's-şî're ve mâ yenbagî leh" teşrîfi ile müşerref kılındı. Ve eyvân-ı kibriyâ-yı sübhânîde şâ'irlik isnâdından mu'arrâ kılınup şân-ı şerîfde "ve mâ hüve bişâ'irin mecnûn" bürhânı nâzil olup nazm-ı Kur'ân-ı 'azîm ana mu'cize olduğu bilindi. Salâvatu'llâhi

aleyhi ve selâmühü.

Mesnevî:

Âfitâb-ı sipihr-i kün feyekûn
Vemâ hüve bişâ'irin mecnûn
Ene efsah bahârinun bâğı
Gül-sitân-ı şefâ'at ırmagı
Rahmet-i halk-ı âlemün sebebi
Fahr-ı âlem Muhammed-i Arabî

Ve çâr-yâr-ı güzîne ki beyt-i İslâmın çâr erkânıdır. Ve sâir âl u ashâba ki her biri asker-i ümmetün sultânıdır. "Rıdvânu'llâhi te'âlâ aleyhim ecma'in". 'Ale'l-husûs Hazret-i Hassân'a ki "şu'arâü'l-İslâm taht-ı livâuke" kerâmeti ile tekrîm olunmuşdur. "Ve'hcil'-müşrikîn feinne Cibrilü me'ake" sa'âdeti ile ta'zîm olunmuşdur.

Kıt'a:

Ne sa'âdetdür ögile Cebrâ'il
Ola nazm-ı suhanda ana mu'in
Niçe kez Şâh-ı enbiyâ vü rüsül
Hüsn-i tab'ına eyledi tahsîn

"Eş'şebâbü şu'betün mine'l-cünûn" hasebince dîvânelügüm deminde ve mest-ânelügüm âleminde aşk u mahabbet âlemine düşüp derd ü mihnet vâdîlerinde hayrân u ser-gerdân gezerken vuslat ümîdine heves idüp ol heves bâd-ı hevâ olup ömr-i nâzenîn bâd-ı hevâ-âsâ gelüp gitdi. Ve tab'-ı selîm ol hevâda kelâm-ı mevzûna meyl itdi. Ol sebebden niçe nazm-ı garîb ve niçe şi'r-i dil-firîb diyüp safahât-ı müsveddâtda kalmışdı. Âhirü'l-emr evrâk-ı hazân-misâl perîşân u zâyî' olmasın münâsib görmeyüp hurûf-ı hecâ tertîbince kasâ'id ü gazel ü gayrıdan bir dîvân cem' eyledüm. Mercûdur ki bu dîvânenün dîvânına nazar iden yârân-ı safâ ve ihvân-ı vefâ "El 'özü 'inde kirâmü'n-nâsi makbûl" muktezâsınca kusûrın ma'zûr buyuralar. Zîrâ dîvâne-i bî-akldan kelâm-ı ma'kûl istemek 'inde'l-'ukalâ 'akla mülâyim degüldür. Ve ekser ömr-i nâzenînüm belâ vü mihnetde ve 'anâ vü meşakkatde mürûr itmegin ba'zı evkâtta sanâyi'-i şi'riyyeye kasd itmeyüp kelâm-ı mevzûn ile mücerred hasb-ı hâl murâd olunmuşdur. Ve ba'zı eş'ârumuz ibrâm-ı yârân ile söylenüp mücerred hâtırları ri'âyet olunsun diyü nazm olunmuşdur. Ol sebebden kimi zülf-i dil-ber gibi musanna' ü muhayyeldür ve kimi ruhsâr-ı dil-dâr gibi bî-hatt ü hâl misâl-i sâde-rû güzeldür. Ammâ eş'âr-ı şu'arâ-yı zamâna nisbet her biri bir hâlden hâlî degüldür. Belki mahbûb-ı siyeh-çerde- mânend bakdugunca mütâla'a duyar. Ve ana gönül virüp meyl idene câzibesin izhâr ider.

Kıt'a:

Umarın kim ola nazmumda benüm
Ekser ebkâr-ı ma'ânî zâhir
Mâlik olmuş gibi tab'-ı pâke
Anladugum bu ki her bir şâ'ir
Vasf idenler sühan-ı matbû'ı
Yedhulü'l-izne bilâ izn dir

KASİDELER

1

Kasîde-i Deryâ Der Medh-i Hasan Paşa Yessera'llâhu mâyeşâ'

Fe'îlâtün Fe'îlâtün Fe'îlâtün Fe'îlün

1. Fi'l-mesel 'âşık-ı şûrîdeye benzer deryâ
Yârı koynına girer anun için her deryâ
2. Mevc mevc itdi anı sanma muhâlif yiller
Cünd-i a'dâya meger kim cebe satar deryâ
3. Üzerinden yine yol virdügiçün a'dâya
Dest-i bâd ile dögüp gögsini inler deryâ
4. Gömgök itdi denizün çehresini sille-i bâd
Ki olur keştî-i a'dâ ile hem-ser deryâ
5. Serverâ çün ele girdi bogazı deryânun
Umarın hasretüne ola musahhar deryâ
6. Su koyup ocagina düşmen-i dînün bârân
Umarın memleketin gark ide ekser deryâ
7. Göricek heybet-i şemşîrünü oldı sâkin
Nâ-sezâ eylemez oldı hareketler deryâ
8. Düşmen-i dîni helâk itse gerek sanma habâb
Gaybdan eyledi peydâ niçe çâder deryâ
9. Denizün gönline girdi bu vilâyet suları
Dâr-ı İslâma muhibb oldı mukarrer deryâ
10. Her kaçan görse esüp geldi nesîm-i rahmet
Şevk ile cûşa gelür ey şeh-i kişver deryâ
11. Tan degüldür ana dahl eylese her âb-ı revân
Yol virür 'asker-i küffâra bu ebter deryâ
12. Giderür cevşenini bâd-ı sabâ tâ ki çıkup

Ceng ide düşmen-i dîn ile mükerrer deryâ

13. Umarın olmaz idi iki yaka ıssı gelüp
Sürmeseydi yüzini dergehüne ger deryâ
14. Rûy-ı deryâda degüldür görinen zevraklar
Geldi der-gâhuna kâse ile ide cerr deryâ
15. Deniz itmez bu yakalarda temevvüc lîkin
Şevk-i mihrünle girîbânını yırtar deryâ
16. Heybetünden yüregi ditrer eyâ bahr-ı kerem
Sanma kim kıldı temevvüc bu hüner-ver deryâ
17. Rûzgâr içre diler tâ ki yaza midhatüni
Bâd-ı sarsarla çeker yüzine mıstar deryâ
18. Bu yakalarda seni seyr ideli düşmenden
Gönli bulanmadı olmadı mükedder deryâ
19. Rûy-ı deryâda habâb olmadı peydâ lîkin
İtdi a' dâna nazar hışm ile ejder deryâ
20. Akdenizden umarın kim elini yuya Frenk
Çün kudûmunla senün oldı muzaffer deryâ
21. Sen gelelden gözi açıldı şehâ deryânun
Her habâbını bilür çeşm-i münevver deryâ
22. Şöyle deryâyâ muhibb olmuş idi düzd-i la'în
Gûyiyâ başına olmuşdı berâber deryâ
23. Yiryüzinde çü 'adû 'askerine yol viridi
Yirlere düşdi yüzi oldı muhakkar deryâ
24. Şimdi baş kaldırıp a' dâ çü habâb-ı deryâ
Çıkıldılar karaya yol viridi bu ahkar deryâ
25. Düşmenün kanını dök cehd idüben eyle cihâd
Ki bu demlerde olur sana musahhar deryâ
26. Mevc-i deryâyı çeküben çevirür bâd-ı seher
Ki niçün yol vire a' dâya bu kem-ter deryâ
27. Hâsılı bâd-ı hevâdur denizün menfa'ati
Bir iki yüzlüdür ancak nene yarar deryâ
28. Bir yüzi hazretünün bir yüzi küffârundur
Oldı ma'nîde iki yüzlü mukarrer deryâ

29. Dil döker ana niçe nehr-i 'azîm ey server
Yohsa olmazdı iki yüzlü dil-âver deryâ
30. Leb-i deryâda binâ eyledüğün kal'a şehâ
Zann ider anı görüp sedd-i Sikender deryâ
31. Akdeniz dergehüne şöyle mahabbet kıldı
Der-kenâr eyledi ol kal'ayı benzer deryâ
32. Bir gazâlar kılıcısın sen eyâ seyf-i gazâ
Dökdüğün hûn-ı 'adû oldu bir ahmer deryâ
33. Görmez oldum karasın bahr-ı gamun Hızır ol kim
Beni gark itmeye nâ-gâh bu kâfir deryâ
34. Şöyle acıtdı bugün cânümüzü kahr-ı felek
Agladı hâlümüze ebr acıdı her deryâ
35. Bahr-ı nazmum ne 'aceb bahr-ı firâvân oldu
Oldı her kâfiyesi ey şeh-i ekber deryâ
36. Gevher-i bahr-ı kasîdüm sana lâyıkdur kim
Hazretün çün yiridür saklasa gevher deryâ
37. Şi'rümün bahrına tan mı su gibi aksa gönül
Kulzüm-i lutf-ı latîf oldu bu bihter deryâ
38. Âsitânunda Ziyâ'î ki du'â-gûyundur
Ol senün medhüni dimez mi mukarrer deryâ
39. Kaydefâ gibi Hudâ düşmenün gark itsün
'Ömrün oldukça ola sana musahhar deryâ
40. Nûh ömrin dilerin vire sana ol Bâkî
Tuta mâdâm ki dünyâyı ser-â-ser deryâ

Kasîde-i Berf-i Şitâ Der Medh-i Fahrü'l Ümerâ Hasan Beg

Fe'ilâtün Fe'ilâtün Fe'ilâtün Fe'ilün

1. Rûzgâr ile cihâna tagılup berf-i şitâ
Gösterür şimdî cihân sahnını bir ak deryâ
2. Yazda ısınmış idük zevkine bâg-ı dehrün
Geldi kış mevsimi sovutdı bizi serd-i hevâ
3. Hût burcını güneş var ise sayd itdi yine

Kazır anı dökülen pullarıdur berf-âsâ

4. Ag iderken yüzini dökdi sefid içini bâd
Zişt görünse bu dem pîre-zen-i dehr n'ola
5. Kar yagar sanma cihâna niçe zenbûr-ı sefid
Hâsılı bal yirine getürür oldı belâ
6. Karlar yagdıricak sun'-ı Hudâ-yı Cebbâr
Akça pul saçdı sanurdum şeh-i gerdûn gûyâ
7. Kar yagdukça düşer hâtıra bu turfe hayâl
Âsiyâb-ı felek un atdı ne gam yir fukarâ
8. Bilmezin kar mı yagar yohsa felek bâğında
Şecer-i Sidre bahârın mı döküpdür âyâ
9. Beyza-i mihr ü mehi var ise ekl itdi felek
Hurde yumurda kabıdur dökülüşler meselâ
10. Yırtup atdı var ise defter-i sayfî gerdûn
Hurde-i kâğda benzer dökilen berf-i şitâ
11. Kavs burcın ele mi aldı felek hallâcı
Penbesi mi dökilür sahn-ı zemîne 'acebâ
12. Tut ki ta'mîr oluyor hâne-i vîrâne-i dehr
Kirecin dökdi yaparken anı bennâ-yı kazâ
13. Ejder-i âhum ider tevsen-i gerdûnı zebûn
Berf sanma deheninün kefi saçıldı şehâ
14. Şimdi ak kara bakup baht-ı siyâhum anarın
N'oldı kim nesneye mâlik degülem ag u kara
15. Derdi mi dökdi saçın pîre-zen-i dehr yolar
Dökilen ak saçıdur berf degüldür hakkâ
16. Gördi dil-ber lebi esrârına hayrânem ben
Berf yagdursa felek hey'et-i sükkerde n'ola
17. Ben niçe ıssı sovuk çekmişem ey lutf ıssı
Dergehün oldı sovukdan bana âhir me'vâ
18. 'Arsa-i gussada kış basdı vücûd ise za'îf
Kurtar Allâh için ey menba'-ı ihsân u 'atâ
19. Mesnedüm yok bu cihânda işigünden gayrı
Dergehünde olur olursa bana zevk ü safâ

20. Sensin ol muhsin-i bî-misl Hasan Beg ki senün
Hüsn ü ihsânunı tahsîn ide Hassân şehâ
21. Menba‘ -ı cûd u kerem melce-i erbâb-ı hüner
Ma‘den-i lutf u sahâ mazhar-ı eltâf-ı Hudâ
22. Zulmet-i gamda kalurdum niçe ay u niçe gün
İrmese matla‘ -ı mihründen eger nûr-ı ziyâ
23. Serdlik yüzini gösterdi felek ta‘n itme
Vâki‘ olursa kelâmumda eger bâr dâdâ
24. Bagrumı deldi benüm tûşe-i derd-i tûşe
Gam-zâd itdi ziyâde elem-i dil peydâ
25. Ger azıktan azacık bana idersen ihsân
Birine bin vire gül-zâr-ı cinânda Mevlâ
26. Gerçi şermendeyem ihsân-ı safâ-bahşundan
Beni söyletdi zarûrî n’ideyin fakr u fenâ
27. Ârzû eyler iken tûşe-i ihsânundan
Kar yagsun başuna dir isen ey vây bana
28. Kûşe-i gamda sovukdan gice ditrerdi yürek
Hâtif-i gayb hemân eyledi bu resme nidâ
29. Ey Ziyâ’î ne umarsın bu sovuk sözlerden
Ol kemâl ü kerem ıssı bege var eyle du‘â
30. Beglerün gerçi yüzi ıssıdur ammâ var ümîd
Seni sovutmaya nevmîd idüp ol kân-ı sahâ
31. Zât-ı pâkı ola ıssı vü sovukdan mahfûz
Geldügince bu cihân gül-şenine sayf u şitâ
32. Ana Allâh nasîb ide yüz aklıklarını
Ola mâdâm ki ak berf ile rûy-ı dünyâ

Kasîde-i Bahâr Der Medh-i Mustafâ Beg

Mef‘ûlü Fâ‘ilâtü Mefâ‘ilü Fâ‘ilün

1. Masnû‘ -ı kâinâta sabâh eyledüm nazar
Lutf-ı Hudâyâ mazhar idi zâhirâ seher
2. Meydân-ı gül-sitânda çemân idi her çemen

Mânend-i Hızr hulle-i hadrâ geyüp şecer

3. Dendân-ı gonçe idi degül jâle görinen
Lutf-ı latîfe şâd olup eylerdi handeler
4. İrdi behişt eserleri ürd-i behişt irüp
Lutf-ı Hudâ eserleridür kim sabâ eser
5. Sahnında gül-şenün esen idi seher yili
Sıhhatde idi tfl-ı çemen cümle tâze ter
6. Rûşen bu kim cihân yüzi nûr u ziyâ idi
Hurşîd-i şevki şöyle ki göz nûrını basar
7. Hallâkına müsebbih idi zümre-i tuyûr
Dehşet virürdi halk-ı cihâna sadâ-yı mürğ seher
8. Bûy-ı bahâr irişdi seher cân dimâgına
Bu ise bûy-ı ter didükleri hep bu yiter
9. Şebnemden ayruk agramadı kimse çerhden
Her kanda baksa kişi cihânun yüzi güler
10. Esdikçe seherde nesîm-i sabâ latîf
Bir râyiha gelürdi ki cânlar safâ sürer
11. Bilmem bu râyiha ne idi yâsemen degül
Zülf-i nigâr açılalı düşmişdürür meger
12. Hod bûy-ı gülde böyle letâfet kaçan olur
Sünbülde yok bu râyiha bilmem neden irer
13. Tanlardum ana subh-dem âyâ nedür bu
N'oldı neden irişdi cihâna bu nûr u fer
14. Deşt-i 'ademde iken o gün zîver-i cihân
Şehr-i vücûda geldi be-nâ-gâh ser-be-ser
15. N'oldı sebep ki 'âlemi zeyn itdi lutf-ı Hakk
Bâ'is mi var ki irdi cihâna bu zîb ü fer
16. Tenhâda bunu fikr iderek nâ-gehân hemân
Tab'-ı selîme mülhem-i gayb eyledi haber
17. Hakk 'ömrini ziyâde ide Mustafâ Begün
Oldı Muhammed ümmetine mihr-i nâm-ver
18. Mâdâm kim ide bu cihân içre 'adl ü dâd
Lutf ide bize lâ-cerem ol Hâlik-i beşer

19. Kistrâ 'adâlet ile mu'âdil degül ana
Ba'de'n-nebî 'adâlet ile bir bu bir 'Ömer
20. Kalmadı ehl-i şirret ü müfsîd zamânedede
Eyyâm-ı devletinde umıduldı şûr u şer
21. Ümmîd odur ki kendüyi taşlardan uçurur
Ehl-i zarar görürse anun heybetin eger
22. Mümkün degül kemâli ile 'adl ü dâdını
Vasf eyleye Ziyâ'î anun olduğu kadar
23. Bu denlü var nazm-ı belîgüm güherlerin
Der-gâhına nisâr iderin eyleyüp güzer
24. Cüz'î sebep gerek ide küllî 'atâlar ol
Kadr-i kemâli yine kemâl ehli fehm ider
25. Ey Vâcibü'l-vücûd murâdum budur hemân
Devr eyledükçe dünyede hurşîd ile kamer
26. Rûz u şeb eyle devlet ü 'ömrini müstedâm
Eyle vücûd-ı düşmenine kahr ile zarar

4

Kasîde-i Güneş Der Medh-i 'Osmân Beg

Fâ'ilâtün Fâ'ilâtün Fâ'ilâtün Fâ'ilün

1. Mısr-ı çerhün 'izzet ile oldu sultânı güneş
Hüsn ile güyâ ki oldu Yûsuf-ı sâni güneş
2. Yûsuf-ı mâhı yitirmiş şûle sanman görinen
Dem-be-dem aglar nitekim pîr-i Ken'ânî güneş
3. Dem-be-dem ditrer felekde bâd-ı âhumdan benüm
Sidrenün güyâ ki oldu berg-i lertzânı güneş
4. Görmeyelden rûy-ı yârı tende yakdum dâglar
Sînemün oldu bugün her dâg-ı hicrânı güneş
5. Gelse ger gözüm terâzûsına ol Yûsuf-cemâl
Fi'l-mesel eyler müşerref burc-ı mîzânı güneş
6. Döne döne anı oynatsa n'ola cevğân-ı âh
'Arsa-i gerdûnun oldu gûy-ı galtânı güneş
7. Subha dek benzer ki dâgda büyümişdür âfitâb
Anun için beklemez der-gâh-ı cânânı güneş

8. Gamzesi cellâdı cânânun helâk eyler bizi
Göklere girse yiridür subh-dem kanı güneş
9. Gün yüzinden ayru düşsem ol meh-i tâbânumun
Tâli'ümdür kim yakar bu cism-i 'uryânı güneş
10. Zulmet-i şeb kâkül-i cânâna öykünmek diler
Dahl ider her gün anun çün ana nûrânî güneş
11. Yakmasun âhum seni öykünme rûy-ı dil-bere
Gâfil olma assı itmez son peşîmânı güneş
12. Çehre-i hurşîde muhkem sille urmuşdur kûsûf
Yüzüne öykünmiş ey dil hasteler cânı güneş
13. Hâle öykünmiş nitâkına meh-i tâbânumun
Gezdürür bâzâr-ı çerh içre müdâm anı güneş
14. Döne döne bezm-i cânâna kebâb olmak diler
Oldı ol Mirrîh çeşmün kulı kurbânı güneş
15. Sûre-i ve'ş-Şems yazmış safha-i gerdûna mihr
Ve'd-Duhâyı vird idinür itse seyr anı güneş
16. Sanurın tâvus-ı zerrîn-per salınur bâgda
Her kaçan kılsa felek bâğında cevânı güneş
17. Künbet-i çerh üstine bir şemse-i zerrîn yazar
Oldı gûyâ kim Nigâr-istân felek Mânî güneş
18. Bir kabâ geymiş felek 'îd-ı visâl-i yârda
Gûyiyâ zerrîn benekdür ana nûrânî güneş
19. Sanki bir berber dükânıdır sipihrün kubbesi
Asmış içinde anun mir'ât-ı rahşânı güneş
20. Gûyiyâ tolâb-ı çerhe baglu zerrîn kûzedür
Ab-ı nûr ile suvarur bâg u bûstânı güneş
21. Kubbe-i eflâke bir kandîl asar günden güne
Her zamân eyler münevver çerh-i devrânı güneş
22. Zümre-i küffâra 'arz eyler bu gün rûşen delîl
Safha-i çerhe yazar âyât-ı Kur'ânı güneş
23. Subh-dem bu matla'ı eflâke yazdı âfitâb
Safha-i çerhe çeküp bir hatt-ı nûrânî güneş
24. Şöyle zîbâ gösterür sahn-ı gül-istânı güneş

- Bâg-1 dehrün görünür her verd-i handânı güneş
25. Sûre-i Nûrî yazar eflâke her gün âfitâb
Ezber eyler gûyiyâ âyât-ı Furkânı güneş
26. Yine baş kaldırdı eflâk üzre şâh-ı hâverî
Tutdı gûyâ esb-i hüsn ile bu meydânı güneş
27. Terkiye asmaz sipihr üzre hilâli zerrece
Her kaçan öpse rikâb-ı mîr-i ‘Osmânî güneş
28. Âsitânında hilâl eksüklü kulıdur anun
Bir zavallı kimsedür der-gâhı der-bânı güneş
29. Halka-i bâb-ı serâyıdur hilâl-i âsumân
Tâkıdur kavs-ı kuzah her câm-ı rahşânı güneş
30. Âsitânun virmez eflâke ey şâh-ı zemîn
Zerre gelmez gözüme yanunda bu fânî güneş
31. Bilürin kendüm degirmendür bu devr-i âsumân
Olagelmişdür anun ey şâh mihmânı güneş
32. Hoş degirmende agarmışdur sakalı kim senün
Âsitânun beklemez ey lutf-ı ‘ummânî güneş
33. Mihrün ile gün başına pîr-i çerhün her seher
Yüregi oynar ferâhdan görse sen cânı güneş
34. Kapuna öykündügiçün kulb takdı çerhe mâh
Her gice encümle eyler nâr u nûr anı güneş
35. Yire basmaz ayagı şevkinden olur şâd-mân
Görse hurşîd-i cemâlün ey kerem kânı güneş
36. Hayli gün gördi felekler devr-i ‘adlünde senün
Devletünde görmedi bir zerre noksânı güneş
37. Dergehünde zeyn için bir şeb-külâh geymiş hilâl
Sarinur başına destâr-ı perîşânî güneş
38. Ni‘met-i in‘âmuna var ise öykünmek diler
Bir tabakdur âsumân bir sîb-i eyvânî güneş
39. Çerh bir dîvânedür zencîr-i mihrün sürmede
Nâr-ı şevkün birle yakılmakda pinhânî güneş
40. Âsitânun mâh irakdan gösterür barmağ ile
Hıdmetünde dâ’imâ yürür hırâmânî güneş

41. Hey ne 'âlemdür nazar kıl nazmuma ey Zü'l-kerem
'Arz ider der-gâhuna her mısra'-ı sâni güneş
42. Yiridür yazsa 'Utârid çerhe bu ebyâtı kim
Ola her bir kâfiye göklerde nûrânî güneş
43. Ey Ziyâ'î şûle hurşîdde sanma görinen
Çekdi mistar yaza bu nazm-ı dür-efşâmı güneş
44. Olalı perverde-i ebr-i sahâsı ben fakîr
Olmışam ol kân-ı ihsâna du'â-hân ey güneş
45. Dâ'imâ gönli murâdın vire Rabbü'l-'âlemîn
Virdügince 'âleme nûr-ı firâvânı güneş
46. 'Âlem-i sıhhatda seyrân itsün ol şeh muttasıl
İtdügince 'arsa-i 'âlemde nûrânî güneş

5

Kasîde-i Hazân Der Medh-i Mehmed Beg

Mefâ'ilün Fe'ilâtün Mefâ'ilün Fe'ilün

1. Cihâna vakt-i hazân irdi câna hüzn ü melâl
Cihâna berf-i şitâ yagdı câna derd-i zevâl
2. Degül degül ki 'umûmen havâdis-i gerdûn
Bi-esrihâ bana mahsûs oldu fi'l-âzâl
3. Çemen hazânesi şimdi hazân berginden
Olupdurur altunlar ile mâl-â-mâl
4. Çemende serv ayagında tutuldu yah lîkin
Yaraşur o kad-i mevzûna ol gümüş halhâl
5. Egildi anı arar fi'l-hakîka egmedi bâd
Düşürdi topraga altun varaklarını nihâl
6. Reh-i nigârda evrâkı seyr idenler dir
Nedür bu dâg-ı siyehle bu sîne-i abdâl
7. Meger ki tahta-i nerd oldu râh-ı yâr varak
Pul oldu zâr benem râh-ı yârda pâ-mâl
8. Üzüldi berg-i şecer şimdi kış kıyâmetdür
Görün ki yevm-i yefûrr oldu ma'nîde fi'l-hâl
9. Vefâda Rüstem iken Zâl-i dehri kış basdı
Harâmi gibi soyar berg-i bîdi bâd-ı şimâl

10. Tonandı jâle ile gitdi bergi eşcârı
Yaşın döküp benüm için meger yolındı cibâl
11. Çürür giderse n'ola yiryüzinde bunca varak
Sipihri yok yire dâ'im çürütmek ister mâl
12. Meger ki pîre-zen-i dehr başın itdi tırâş
Dökilen ak saçıdur yiryüzine berf-misâl
13. Çemen sarardı vü huşk oldu her giyeh meselâ
Fakîre sûzen olurdu garîbe anca hilâl
14. Enâr bergi sarardı vü egdi kâmetini
Zemîni çerh sanur gün vezni ana hilâl
15. Benüm de derd bilüm bükdi vü sarardı tenüm
Nazar kılan bana eyler enâr bergi hayâl
16. Beni miskîn-i kenâr-ı kasâvet itdi hemân
Kılan bu rûy-ı zemîni garîk-i mâl ü menâl
17. Bu deşt-i 'âlemde düşdüm garîb ü ser-gerdân
Ne bûy-ı vefâ irişdi ne geldi vahşî gazâl
18. Bu deşt-i fâkada dîvâneyem ki boynumda
Kuyûd-ı fakr u felâket selâsil ü aglâl
19. Ne hâl olur bu ki aslâ zamân-ı mâzîde
Bu denlü gussa bana itmez idi istikbâl
20. Ne denlü pür-zer ise âstîn-i devrânun
Cihân halkı senün âsitânuna meyyâl
21. Sahî vü ehl-i kerem Hazret-i Mehemmed Beg
Ser-i ekâbir-i âfâk u mefharü'l-emsâl
22. Emîn-i dîn ü diyânât u nâzır-i gurebâ
Sipihri 'adl u sahâ mihr-i devlet ü ikbâl
23. Emîr-i hayl-i efâzil sa'îd-i fi'd-dâreyn
Hûr-ı sipihri sa'âdât o sâye-i müte'âl
24. Mürekkebe olsa sirişküm cihân halkı debîr
Defâtir-i keremün yazmaya 'âle'l-icmâl
25. Dilümde midhat-i şîrînün oldu sükker-i ter
Der-i şerîfüne 'arz oldu hâl-i mâ-fi'l-bâl

26. Rızâ budur ki Ziyâ'îyi zulmet-i gamdan
'Atân rehber olup kurtara bilâ-ihmâl
27. Revâ mıdur ki ola kûşe-i melâletde
Hazân varakları gibi müşevveşü'l-ahvâl
28. 'Ale'l-husûs du'â kıla 'an samîmü'l-kalb
Devâm-ı devletüne bi'l-gudüvvi ve'l-âsâl
29. Cenâb-ı hazretüne her zamân du'âm oldur
Cihâna bereketi mâdâm ki saçarsa nihâl
30. Saçıla 'âleme lutfun diremleri bî-hadd
Sahânı artırı her bâr Kâdir-i müte'âl

6

Kasîde-i Kalem Der Medh-i Mehmed Beg

Fe'ilâtün Fe'ilâtün Fe'ilâtün Fe'ilün

1. Şâ'irâne geh olur kasd ider îhâma kalem
Geh misâl-i melek olur sebep ilhâma kalem
2. Kimde var bu hüner ü fazl u belâgat 'acebâ
Bî-bedel vasf yazar her sühan endâma kalem
3. Gösterür mu'cize mânend-i 'asâ-yı Mûsâ
Şekl-i ejder görünür a'yan-ı a'dâya kalem
4. Lûle-i çeşme-i hayvâna nem icrâ eyler
Cân-fezâ kâ'ideler hâsa dahı 'âma kalem
5. Negamât eyledi ney subh-dem eyle sandum
Oldı hengâm-ı seher eyledi hengâme kalem
6. Bu ne sırdur niçesin lâyıık-ı ikbâl eyler
Niçesin ugradur ammâ gam u âlâma kalem
7. Ne sorarsan dili ucında cevâbı hâzır
Lâyık oldı bu zekâvetle çok en'âma kalem
8. Niçe âzâdelerün yirlerin itdi tahrîr
Çün vilâyetde şurû' eyleye ikdâma kalem
9. Oldum engüştini bûs itmege yârun tâlib
Güldi yokdur didi dîvâne-i bed-nâma kalem
10. Ben iderdüm kadd ü zülfini nigârün ta'rîf
Dahı el urmamış idi elif ü lâma kalem

11. Bâg-bân-ı dil umar bûse yazup çeşmine vasf
Bitse şeftâlû n'ola aşladı bâdâma kalem
12. Vâsf-ı zülfin yazamam rûyını medh eyler iken
Rûmilinden hiç olur mı ki gide Şâma kalem
13. ' Âşıkam barmagunı öpmege men' itme didüm
Gülđi n'eyler didi mest-i mey-âşâma kalem
14. Her kaçan vesme çeke mîl ile ebrûya nigâr
Dir gören anı ki tigrâ çeker ahkâma kalem
15. Ser-nüviştüm gam-ı derd oldı ezel hiç bilmem
Ugradur mı dahı çok dürlü ser-encâma kalem
16. Bilmezin başa ne yazmışdur ezel kilik-i kazâ
Neler eyler dahı cân u a'zâma kalem
17. Puhte-i nâr-ı gamem olsa sözümde nola sûz
Bezm-i fazl içre sunulmaz gibi her hâma kalem
18. Kimse yazmaz umarın nazm-ı bedî'üm gibi şi'r
Gerçi irdi irişür dahı çok eyyâma kalem
19. Kasdum odur ki idem vâsf-ı cemîlün dâ'im
Bu cihân içre meger sehv ile bî-hâme kalem
20. Tab'-ı tûtî bu kasîdüm şeker-istân-ı sühan
Ney-şeker kâfiyeyi irdüren itmâma kalem
21. Yazamaz vâsfunı aklâm-ı ekâlim-i cihân
Ben yitem vâsfun idem yâ irem erkâma kalem
22. Her ne hıdmet buyurursan başı üstinde tutar
Müstehak oldı hakîkatde çok ikrâma kalem
23. Hâme-veş bagrı delinsün yine ehl-i hasedün
Girdi ol emrün ile mülket-i İslâma kalem
24. Çün vilâyetde emîn oldun emîn ol gamdan
Yazsun emrünle niçe defter ü ser-nâme kalem
25. Zulmet-i derd ü gama saldı Ziyâ'îyi hemân
Gerçi irgürdi çok ehl-i hüneri kâma kalem
26. Lutf-ı tab'um ide iş'âr ayagun topragına
Umarın yalvarıcak duymaya ibrâma kalem
27. Hâk-i pâya bu du'âyı yazup itsün iş'âr
Lutf idüp söyledüğüm başlasun i'lâma kalem

28. Dest-i lutfunda senün eylesün ey menba‘-ı cûd
Kahr-ı müfsidlere lutf u kerem eytâma kalem

7

Kasîde-i Ahvâl-i Rûzgâr Der Medh-i Hasan Beg

Fe‘ilâtün Fe‘ilâtün Fe‘ilâtün Fe‘ilün

1. Ey dirîgâ ki döner ‘aksine bu devr-i zamân
Düşdi bir hüsn-i gurûra yine nev‘-i insân
2. Bâşir-i şerr ü fesâd oldu beşer hây meded
Ne beşâret bula elünden ahâlî-i zamân
3. Niçe şâd ola gönül her ‘abese vü hubsa
Döndi şâdî yine hengâme-i meymûna hemân
4. Cisre girdi hased-i peykere toldı peygâr
Zirih-âsâ koyılır birbirine halk-ı cihân
5. Gıybet ü kizb ü mesâvîde müsâvî oldu
Merd-i merdûd ü zen-i zâniye vü pîr ü cevân
6. Şimdi yârânun eşedd oldu esedden hasedi
Şîr-i hûr-tıflı görürsin ki olur şîr-i jiyân
7. Başı göklerde bugün Tübâyâ hem-ser geçinür
Sâye-i serv gibi yüzi koyı yirde yatan
8. Bi’z-zarûrî didük el arkası yirde çün kim
Puşt olanlar geçinür n’eyleyeyüm puştî-bân
9. Kendü keyfiyyetini bilmez iken tiryâkî
Geçinür bengî gibi vâkıf-ı esrâr-ı nihân
10. Ma‘rifet râyihâsın tuymaz olur bir miskîn
Kibr ile burnı ucı göge irişür her ân
11. Dirlik ıssı olımaz olsa eger ehl-i hüner
Nûş idüp âb-ı hayât-ı keremi her hayvân
12. Işığa kimse gözün üzre kaşun var diyemez
‘Âlim olan çeker ammâ elem-i bî-pâyân
13. Degmede degme bir ehl-i hünere degmeye pây

Kısmet olinsa eger zevk ü safâ-yı devrân

14. Kendüzin gördi gurûr âyînesinde cehele
Gidiler var ki sanur kendüye yokdur akrân
15. Bilürin kendüm ucuz olduğını bugdayun
İrdi bir dem ki bulunmaz cev-i erzen erzân
16. Câh ile câhil olanlar buluşur zevk eyler
Kâm ile lîk bulışmaz n'ideyin kâmil olan
17. Şâ'ir-i fâzıla bir ragbet ider kalmadı hîç
Ne 'acebdür bu ki şâ'ir geçinür her nâdân
18. Yok mı ben bî-dili bir acıyacak şîrîn-tâb
Aglayup derd-i derûnum ideyin ana beyân
19. Kalduk ayakda bizi eyledi iller pâ-mâl
Başumuzda niçe endûh u gam u derd-i girân
20. Ta'n-ı nâdân ile dâna hasedinden hergiz
Bulmaduk devr-i zamân içre meded emn ü emân
21. Bana bu dehr-i denî zulm ider oldı hayfâ
Başladı kahr ile vîrânelige cânib-i cân
22. Cevr-i devr ile ki dil mülki harâb olmuşdur
Anladugum bu ki olmaya ebed âbâdân
23. Meger anı ide ma'mûr kemâl-i lutfun
Ey emîr-i kerem ey menba'-ı cûd u ihsân
24. Sensin ol muhsin-i ihsân Hasan Beg ki senün
Görse eltâfunı ahsente diyeydi Hassân
25. Kurtarursın niçe mazlûmı felek zulminden
Niçe müşgil iş olur hâk-i deründe âsân
26. Fukarâ zevk ü huzûr itmededür sultânun
Devr-i 'adlünde senün itmeyorur kimse figân
27. Haslet-i cûd-ı vücûdunda ki vaz' itdi Hudâ
Zâhir-i mazhar olur ana gedâyân-ı zamân
28. Bereket buldı zemîn oldı mübârek kademün
Geldüğün mülkete yagdı zararsız bârân
29. Geldüğün yirde çemen neşv ü nemâ buldı hemân
Sahn-ı firdevse şebîh oldı fezâ-yı bûstân

30. Zât-ı pâkûn niçe medh ide Ziyâ'î benden
Yokdur evsâfuna ey mîr-i mükerrerem pâyân
31. Hâr-ı âzârdan Allâh ide zâtun mahfûz
Olasın gül gibi gül-zâr-ı cihânda handân
32. 'Ömrünü devletüni dâ'im ide Hazret-i Hakk
İki 'âlemde sana vire mezâdun Yezdân

8

Kasîde-i Bahâr Der Medh-i Sinân Beg

Fe' ilâtün Fe' ilâtün Fe' ilâtün Fe' ilün

1. Dün gice olmuş idüm kûşe-i gül-şende mekîn
Niçe gül-şen ana reşk eyler idi 'adn-ı berîn
2. Leb-i cûy üzere kim hatt-ı leb-i yâr-sıfat
Safha-i gül-şene kâfî idi zîb ü tezyîn
3. Yâsemen şâhı ki yir yir suya tayanmış ola
Sûre-i Kevsere eyler el urup san ki yemîn
4. Âhir elden gider iş bu leb-i cûy u gül-zâr
Eylenüz zevk ü safâ elde iken fırsat-ı hîn
5. Bâga ferverd yiter gül-şen-i dehre nite kim
Ser-be-ser zîb yiter şimdi meh-i ferverdîn
6. Bâreka'llâh ne güzel demlere irdük bu zamân
Oldı havrâsı hemân cennet idi rûy-ı zemîn
7. Her giyeh şekl-i elîf katre-i şeb-nem nokta
Zevk ya'nî bir iken şimdi on oldı ta'yîn
8. Ne çemen sun'-ı Hudâ saldı yire sebz bisât
Her bahârıyla şecer çâder-i bâlâ vü güzîn
9. Kûşe kûşe çağırur bülbül-i gül-zâr-ı hezâr
Gitme gül-şenden irak hây sakın hây sakın
10. Göricek bâğı bu resme katı oldum magrûr
Şâdîlik eylemege başladı kalb-i gam-gîn
11. Anda bir mürğ-ı hoş-elhân işitdüm nâ-gâh
Giceden subha dek eyledi feryâd u enîn
12. Niçe feryâd-ı ferîd ü niçe efgân-ı bülend
' Âşıkâne niçe nâle niçe âvâz-ı hazîn

13. Didüm ey mürğ-ı hoş-elhân beyân eyle bana
Niye kıldun ‘acebâ böyle enîn ile hanîn
14. Ta‘n-ı a‘dâ mı ‘aceb yohsa hasûd itdi hased
Cânuna bunca cefâ kıldı mı eflâk-i berîn
15. Hicr-i cânân ile nalân mısın ey mürğ-ı garîb
Hem-demün yok mı seni böyle kim itdi gam-gîn
16. Gönlüne yohsa gelür bâga hazân irecegi
Yohsa olmadı mı cânun gam-ı cânândan emîn
17. Bu tereddüdde iken mülhem-i gâ‘ib nâ-gâh
Bülbül-i câna hitâb itdi didi ey miskîn
18. Gayre sormak ne ‘aceb kendüne gör n’eylediler
Bir iki müfsîd ü bed-kâr ü bed-endîş hemîn
19. İftirâ taşı ile şîşe-i ‘ırzun sıldılar
Gıtdi yüz suyu sevinmekde ‘adû-yı bî-dîn
20. Ugradun bir kurı bühtâna yaşun akmakda
Yiridür gark ola ger bahr-ı sirişkünde zemîn
21. Di yüri hâlünü ol sâhib-i cûd ü kereme
Ola kim merhamet ide komaya böyle hazîn
22. Müşfik ü ehl-i sahâ ya‘ni Sinân Beg kim anun
Menba‘-ı ceşş-i İlâh dergehîdür hısn-ı hasîn
23. Umarın bunu revâ görmeye kim ehl-i hüner
Pây-mâl ola zamânında olup kahra karîn
24. Dest-gîr ola ayakda komaya şefkat ide
Sana Allâh rızâsıyçün ola şimdi mu‘în
25. Zulmet-i gamda Ziyâ‘îyi melûl eylemeye
Bezl ide âb-ı hayât-ı keremin ana hemîn
26. Yâ İlâhî dilerin gönli murâdın viresin
İki ‘âlemde anun diyelüm âmîn âmîn

1. Nâ-gehân ‘âlem-i ‘işretde iken zevkde iken
Sîm-sîmâları gül-şende kenâr eyler iken

2. Rûzgâr atdı beni sâhil-i bahra nâ-gâh
Gel dinüz böyle belâ çekdi mi bir ehl-i sühan
3. Bir ulu taşda yüce kal'ada diz-dâr-ı felek
Beni habs itdi günâhum ne belâdur bilmen
4. Seng-dil bir sanemün derdini çekmek gibidür
Böyle bir seng-i siyâh üzere tutmak mesken
5. Bîsutûn üzre hemân Kûh-ken oldum gûyâ
Cân-ı Şîrînden usandurdu beni çerh-i kühen
6. Meskenet meskeninün sâkini oldum ammâ
Beni tahrîk iden âyâ ne hevâdur başdan
7. Şâhin-i tab'-ı bülendüm yine pervâz itsün
Kendüm uçurmaz isem şimdi eger taşlardan
8. Geh taşı başa gehî başımı taşa ururın
Ya'ni dîvâne-misâl oldu gönül derdinden
9. Dostlar kaldı taş altında benüm iki elüm
Dest-gîr ola meger seng-i siyâhı yaradan
10. Beni acun ki cihân başuma zindân olmuş
Kanı ol seyr-i sahârî kanı gül-geşt-i çemen
11. Böyle bir teng mekâna n'ite kim kalb-i hasîs
Beni dil-teng iden ey çerh-i felek sensin sen
12. Câmî'-i çerhe hemân minber-i kudretdür bu
Şimdi üstine çıkup tut ki hatîb oldum ben
13. Cânuma âteş-i gam düşdi dutuşdum cânâ
'Aceb olmaz eger âteş çıka katı taşdan
14. Taşda meskenden inen katı şikâyet kıluruz
N'idelüm başumuza pârelenür anca mihen
15. Bir ulu taşı mezârumda nişân eyleyesiz
Dostlar bunda ölürsem elem-i gurbetden
16. Bir Hudâyî kayalardur ki Hudâ ide halâs
Şâhin-i tab'umı bu yirde yuva tutmakdan
17. Âdem olan hele cennetden ider mi nefret
Seng-i ta'n ura yiridür bana yârân-ı vatan

18. Ger cenâzem çıkarup defnüme kasd eyleyeler
Korkum oldur ki ilişe kala taşlarda kefen
19. Çâr erkânı hatar-nâk iki yanı uçurum
Şart u erkânı budur kim gide âdem erken
20. Lâle-veş rızkunı taşdan çıkar olma dil-teng
Dâg-ı gam var ise sînende Ziyâ'î katlan
21. Dag u taşı yaradan Tanrıdan oldur maksûd
Çıkam âhir buradan bâd-ı sabâ gibi esen

10

Kasîde-i Hasb-i Hâl Der Medh-i Hasan Beg

Fe'îlâtün Mefâ'ilün Fe'ilün

1. Cân ezel düşmiş idi seyl-âba
Rûzgâr atdı şimdi girdâba
2. Rîsmân-ı ümîd ele girmez
Bir sebep yok el ire âsiyâba
3. Şevk gelmez karanu gönlüme hîç
Derdüm artar çıkınca meh-tâba
4. Dest-i mihnetde ten kemân oldı
Cân nişân oldı tîr-i pertâba
5. Hâb-ı gafletde geçdi 'ömr henüz
Varmadum râhat ile ben hâba
6. Zehr-i kahrı sunar bu dehr-i denî
Teşne-dil mâ'il olsa cüllâba
7. La'l-i dil-ber tahassüriyle bu dem
Gözyaşı döndi şimdi hûn-âba
8. İnledüp agladup yaşum akıdup
Beni döndürdi çerh dolâba
9. Ten mihnetde cân u dil lerzân
Benzedi fi'l-hakîka sîm-âba
10. Şöyleyem bakmaga yüzüm yokdur
Rûy-ı yârâna vech-i ashâba
11. Bâg-ı 'âlemde her dem aglar iken
Döndi 'aynıyla eşk 'unnâba

12. Pister-i hâki ideli me'vâ
Bakmazam câme-hâb-ı sincâba
13. Teşnedür dil zülâl-i şefkatüne
Bizi haml itme degme sîrâba
14. Rahmet itsün Rahîm o merhûma
Ki ider pendî böyle ahbâba
15. Devlet istersen arka vir arka
Bir ulu âsitâna bir bâba
16. Ka'beye virmeseydi arkasını
Kimse baş egmez idi mihrâba
17. Dil işidüp bu pend-i matbu'ı
İlticâ kıldı zıll-ı Vehhâba
18. Ya'ni muhsin Hasan Beg ki müdâm
İder ihsânı şeyh ile şâba
19. Mâlik itdi anı Hudâ-yı kadîr
Mülk-i dârât u dâr u dârâba
20. Lâ-cerem olmadı bu mülk nasîb
Cem ü Cemşîd ü Sâm u Sührâba
21. Gönli alçak su gibi kadri yüce
Meyli yok zerre kibr ü i'câba
22. Hâk-i pâyında bulunur kıymet
Var ümîdüm bu gevher-i nâba
23. N'ola nazmum begense meyl eyler
Kâmil olan kemâl-i kâm-yâba
24. Fi'l-hakîka selâset-i nazmum
Benzer ol pâk akup giden âba
25. 'Avn-i 'aynunla ey emîr-i kelâm
Nazar eyle bu nazm-ı nâ-yâba
26. Kâkül-i zülfî medh ider çokdur
Beni benzetme degme mû-tâba
27. Niçe kez deldi bagrumı gam-ı derd
Nazmum uyınca dürr-i hoş-âba
28. Şevke gâhî gelür Ziyâ'î gönül

Benzedi zulmet içre şeb-tâba

29. İtsün ol mîr için du'â dil ü cân
Yüz urup bâb-ı rabb-ı erbâba

30. Eyledükçe 'atâ vü lutfi zuhûr
Mazhar olsun 'atâ-yı Tevvâba

11

Kasîde-i Hâne-i Vîrâne

Fâ'ilâtün Fâ'ilâtün Fâ'ilâtün Fâ'ilün

1. Meskenüm oldı dirîgâ bir 'aceb mihnet yiri
Hâne-i vîrâneye koydı felek ben çâkeri
2. Hâne-i vîrâne-i kalbüm midür yâ meskenüm
Zâhirâ yohsa kazâ-yı âsumân-ı mazharî
3. Beyt-i şî'ri böyle nâ-sâz olmasun bir şâ'irün
Yohsa Beytu'llâh hakkı dünyede kalmaz yiri
4. Bir fenâ kâşânedür ammâ o da mülküm degül
Gerçi yokdur hânenün 'âlemde bundan bed-teri
5. Kâmetüm yay olsa tokınmam kiriş agacına
Ok gibi togrulsam ammâ sorma hiç derd-i seri
6. Kasr-ı Kayserdür ana nisbet Ebû Derdâ evi
Böyle ev yapılmamışdur devr-i Âdemden beri
7. Anlamaz hâlüm meger hem-hânem olan 'ankebûd
Ol benümle yelde yagmurda çeker mihnetleri
8. Anı üstâd-ı fenâ hayli musanna' eylemiş
Binsekizyüz revzeni var ikiyüz elli deri
9. Şöyle evdür mâl-ı meyyîtden mezâd olınsa ger
Bir pula teklîf olınsa kimse olmaz müşteri
10. Var ise eyler temâşâ çekdüğüm zahmetleri
Tahtadan başın çıkarmış yekserinün ekseri
11. Korkarın çâh-ı cehennemdür temâşâ eylesek
Evdeki mâr u çıyân u 'akreb olmuş bir çeri
12. Ol kadar evde yakışsun bu evün mi 'mârı çün

İhtiyâr itmiş degül yapmakda tarz-ı âheri

13. Câ-be-câ çekmiş müşebbek zarların bir ‘ankebûd
Perde-dârumdur benem iklîm-i fakrun serveri
14. Dem-be-dem derd ü belâdan dürlü sûret gösterür
Câ-be-câ dökmiş suyu âyîne-i İskenderî
15. Raht-ı fülk-i Nûh ile hem-‘asrdur her tahtası
Cerr idüpdür anı ‘Ûc İbn-i ‘Unukdan dülgeri
16. Tahtalar feryâd ider sarsar der ü dîvârı hep
Rûzgârın her kaçan dokınsa bâd-ı sarsarı
17. Ocaga yansun odun bâzâra gelmez bir gice
Rahtını yaksam gerekdür gör belâ-yı digeri
18. Her taraftan yel nüfûz itdükde âteş-dândan
Dagıdur külliyyet ile cem‘ olan hâkisteri
19. Müslümânlar n’eyleyem mânend-i destâr-ı Yehûd
Katrelerden câ-be-câ dülbendüm olmışdur sarı
20. Dem-be-dem agladugum bu kim duhân-ı bî-amân
Göz göre nergis gibi bî-nûr ider çeşm-i teri
21. Gâh eve girdükçe bakup gülerin bî-ihtiyâr
Hep düttün derdinden aglar görsem oglancıkları
22. Hazret-i Ya‘kûba döndüm meskenüm Beytû’l-hazen
Gözsüz eyler korkarın âhir felek ben çâkeri
23. Âteşi yel dagıdur su kaynağıdur toprağı
Çâr ‘unsur mecmu‘ idur fi’l-hakîkâ her yiri
24. Fi’l-mesel ser-çeşmedür dîvârınun her bir taşı
Sîne dögmek kasd eyler gâlibâ her mermeri
25. Perdesi açık vilâyet ehline benzer hemân
Perdesin yıllar harâb itmiş açılmış her yiri
26. Fareler yir yir deliklerden çıkarmış başını
San temâşâ idüp istihzâ ider ben ahkarı
27. Fareler çün pâreler olanca esbâbum meded
Bir kedi yok mı ki görsün hayfumı gelsün beri
28. Hânenün bagrı delinmiş sanmanuz sūrâh-ı mûş
Yâ dehendür itmege şekvâ ya mihnet sâgarı

29. Tozlıdır dîvârı ammâ yil eserse gör tozu
Hânenün sakfin yıkarsa gör belâ-yı ekberi
30. Ebr-i mihnetdür duhânı iş bu mihnet-hânenün
Âteşinün her şerârı bir nuhûset ahteri
31. Zâhidâ sen de kömür çiyner deli sanma beni
Bilürin küllî cehennem ahkerîdür ahkerî
32. Mezbeyleyle ev önün toldurdılar hem-sâyeler
Mezbele gibi gedik olsun İlâhî yirleri
33. Ey Ziyâ`î kalb-i fâsık gibi zulmetdür içi
Taşra çık görmek dilersen âfitâb-ı hâveri

MUSAMMATLAR

TERKİB-BEND

-1-

Fe`ilâtün Mefâ`ilün Fe`ilün

- 1 Ey dirîgâ bu `âlem-i fânî
Agladur her dem ehl-i `irfânı
- 2 Kişi kasr-ı ümîde çıkmış iken
Ân-ı vâhidde ol yakar anı
- 3 Niçesi râhat u safâda iken
Toldı ey vâdan âhir eyvânı
- 4 Koyalum gayrı `ayn-ı `ibretle
Hele seyr eyle şimdi insânı
- 5 Birbirine zirih gibi koyilup
Geçirür ceng ile bu devrânı
- 6 Hüner ehline bî-hünerler hep
Âşikâr itdi ba`zı pinhânı
- 7 Nâkısü'l-`aklı kâmil anlarlar
Zann iderler kemâl noksânı
- 8 Togrılar ok gibi yabana düşüp
Egriler tutdı şimdi meydânı
- 9 Togrusu niçe togru egri çıkar
Niçe cânî halâs ider cânı
- 10 Emr ber-`aks olup cihân içre
Togrılar kalmadı zamân içre
- 2
- 1 Şûm tâli`den ideyin her gâh
Bülbül-âsâ hezâr nâle vü âh
- 2 Gördi hâlüm harâb mâtem için
Kara geydi meger ki baht-ı siyâh
- 3 Geçdi `ömrüm belâ vü zilletde
Tutalum mülk-i nazma oldum şâh
- 4 Ma`rifetden cihânda fâ`ide yok

5 Rahmet itmezse âhiretde Allâh
Nef` görmem kemâlden ammâ
Ba`zı yârânı görürin her gâh
6 Tâlib olsam eger ki câha fakîr
Vâki` olur yolumda bir ulu çâh
7 Dirlük itsem ricâ beni bu felek
Dirlüğümden usandurur nâ-gâh
8 Olmasun hiç kimse bencileyin
Böyle bed-baht u `âciz ü güm-râh
9 Der-i bahtum güşâde olmayorur
Feth-i bâb ile yâ Kerîm Allâh
10 Senden olmazsa bir `inâyet eger
Bâd-ı mihnet vücûd dalın eger

3
1 Hâlüm i`lâm için benüm her ân
Câ-be-câ çâk câmum oldu hemân
2 Çıkmagiçün yâ dûd-ı sûz-ı derûn
Revzen açıldı yer yer oldu `ıyân
3 Yâ belâ tîgi çâk kıldugına
Zâhirüm bâtınumdan oldu nişân
4 Kudreti geh kalka çıka gide
Za`fdan anlanur tenümdeki cân
5 Ta`n-ı ervâhdan hicâb kılup
Mahbes-i tende yâhud oldu nihân
6 Kanı ol gün ki mihr-i lutf-ı Latîf
Şeb-i zilletde iken ola `ıyân
7 Kalmış iki elüm taş altında
Dest-gîr ola rahmet-i Rahmân
8 Kaldum ayakda dest-gîrüm yok
Başda ise belâ-yı bî-pâyân
9 Bir görünmez belâya düşdüm ben
Hakdan olur olursa bir dermân
10 Ey viren âfitâb u mâha ziyâ
Zulmet-i gamdan eyle cânı rehâ

4
1 Ey gönül fârig ol şikâyetden
Ne biter hâsılı kasâvetden
2 Bir dem olmaz mı sâkî-i rahmet
Mest ide cânı râh-ı râhatdan
3 Ne kadar kim mukadder itdi kader
İrişür herkese okıtmadan
4 Ne bilürsin ezel güninde sana
Ne nasîb oldu rızk u ni`metden
5 Tulum anca mülke mâliksin
Devlet ü `izzet ü sa`âdetden
6 `Âkıbet bu cihân-ı fânide
Haberün yok mı yohsa rihletden
7 Gözün aç bûstân-ı `âlemde

8 Nergis-âsâ bu hâb -ı gafletden
Sana yetmez mi ey gönül bürhân
Âyet-i küllü men ‘aleyhâ fân

5
1 Ey gönül gel berü du‘â eyle
Hazret-i Hâlika nidâ eyle
2 Kendü lutfundan ey Hudâ-yı Kerîm
Sen gönül derdine devâ eyle
3 Kendü dârü’ş-şifâ-yı ‘avnünden
Cân-ı bîmârı pür-safâ eyle
4 Eyle dermândeyem bana dermân
Derd-mendem bana şifâ eyle
5 Cânı yâd eyle rahmetünle meded
Dili lutfunla âşinâ eyle
6 Kalbüm âyînesin mücellâ kıl
Jeng-i endûhı bir yana eyle
7 Ben gedâyı kemâl-i lutfundan
Mülk-i cennetde pâdişâ eyle
8 Beni ahvâl-i rûz-ı mahşerden
Yâ İlâhî meded rehâ eyle
9 Kaldı kulun Ziyâ’î zulmetde
Dil ü cânını pür-ziyâ eyle
10 Mihr ü mâhun ziyâsı sendendür
Derd-mendün devâsı sendendür

TERCÎ‘-BEND

-1-

Mefâ‘îlün Mefâ‘îlün Mefâ‘îlün Mefâ‘îlün

1
1 Diyâr-ı gurbete düşdüm gam u derd oldı yârânım
Bu fânî ‘âlem içre ne serâyum var ne dükkânım
2 Mekîn olmaga asla bir mekânda yokdur imkânım
İrişdi anca dürlü devlete emsâlüm akrânım
3 Benüm ser-pençe-i muhtelle çâk oldı girîbânım
Usandum tatlu cânımdan benüm ey mâh-ı tâbânım
4 Hisâb olmak ne mümkindür benüm derd-i firâvânım
Benüm derdüm bana kâfidür ey pâkîze-dâmânım
5 Gözüme karşı her nâ-ehle uyma sen de sultânım
Koşlama her pelîd ile benüm serv-i hırâmânım
6 Kalursa böyle derd-i ‘aşk ile hâl-i perîşânım
Helâk olur belâ vâdîlerinde cism-i ‘uryânım
7 Gelürsen öldüğümde kabrüm üstine benüm cânım
Mukadderdür işitmen cân kulagıyla bu efgânım
8 Revâ mıdur gidem zulm ile boynunda kala kanım
Umarken lutfunı ihsânımı devletlü sultanım

2

1 Gezerken gül-şen-i ‘âlemde ser-gerdân u âvâre
Dil-i âvâre düşdi şimdi sen yâr-ı cefâ-kâra

2 Nedür mâhiyyetün hîç görmedüm bu resme meh-pâre
Kimün cânısın ey rûh-ı mücessem başla güftâra
3 Ne bâgun servisisin gel salun nâz ile reftâra
Hezârân işve ile salınup geldükçe gül-zâra
4 Esirge şefkatünden bir nazar kıl ben siyeh-kâra
Ya derdünden helâk oldum ya eyle bana bir çâre
5 Senün vaslun olur dermân olursa derd-i bîmâra
Gözüm pür-nem gönül pür-gam belâ çok tâli'üm kara
6 İşüm kaldı hemân şimdi kemâl-i lutf-ı Settâra
Za'îfem pâdişâhum kıyma inen ben günâh-kâra
7 Yazukdur zulm ile kan eyleme mazlûm-ı nâ-çâra
Peşîmân olasın itdüklerine sonra elvere
8 Revâ mıdur gidem zulm ile boynunda kala kanum
Umarken lutfunı ihsânunı devletlü sultânun

3
1 Cihânda görmemişdür kimse şîrîn lebünden dâd
Kıya bakışlarun derd ehline cânâ yeter cellâd
2 Vefâyı itmesün ben bî-vefâyâ kimse hîç isnâd
Cefâ resmini yohsa sen mi itdün ibtidâ îcâd
3 Bu vîrân olası gönlüm ebed olmayorur âbâd
Meger sen dest-i lutfunla esâsın idesin bünyâd
4 Hevâna gerçi ey servüm düşen gamdan degül âzâd
Hevâ-dâr oldum uşta ben de sana herçi-bâd-âbâd
5 Sana 'âşık olan olmak gerek derd ü gama mu'tâd
Mutî' olmak gerek cevri-i zamâna derdüne münkâd
6 Vücûd hırmenini hâsılı itmek gerek ber-bâd
Gamunla âşinâ olan olur hayr ile âhir yâd
7 Keserken Bî-sütünü derd-i dilden eyleyüp feryâd
İşitdüm kim dem-i âhirde Şîrine dimiş Ferhâd
8 Revâ mıdur gidem zulm ile boynunda kala kanum
Umarken lutfunı ihsânunı devletlü sultânun

4
1 Küdûret var ziyâde şimdi kalb-i pür-melâlümde
Sana derd-i derûnum dimege yokdur mecâlümde
2 Bugün ey âfitâbum geldi yaklaştı zevâlümde
Şehâdet var şehîd olmaga şimdi eşk-i alümde
3 Belâ budur beni 'aşkun komayur kendü hâlümde
Cihân zevk ü safâda ben günâh ile vebâlümde
4 Hele başdan çıkar bir gün vücûd-ı pây-mâlüm de
Ser-i zülfün tezekkürdür muhassal kıl u kâlümde
5 Cihânda bundan ayruk fâide yokdur kemâlümde
Sana iller dolaşur muttasıl ben infisâlümde
6 İrişen vuslatunda ben kemâl-i infi'âlümde
Gönül mihnetde fikrüm şehr-yâr-ı bî-misâlümde
7 Ümîdüm var hemân lutf-ı Kerîm-i lâ-yezâlümde
Gice gündüz bu beyt eglencem olmuşdur hayâlümde
8 Revâ mıdur gidem zulm ile boynunda kala kanum
Umarken lutfunı ihsânunı devletlü sultânun

5

1 Vücûdum külliyâ hâkister itdi nâr-ı hicrânun
Yüzüme gülmedi bir gün senün ruhsâr-ı handânun
2 Helâk itdi beni âşûb ile ol çeşm-i fettânun
Perişân eyledi ahvâlümü zülf-i perişânun
3 Benüm âlıyla kanum dökdi la'l-i gevher-efşânun
Tutam Hak kâdî oldukda yarın mahşerde dâmânun
4 Cenâb-ı Hakka 'arz idem senün zülf-i firâvânun
Benümle lâ-cerem söyleşmege olmaya imkânun
5 Bugün sulh it benümle var iken ıslâha dermânun
Diger-gûn olmadın hâlün 'ikâba düşmedin cânun
6 Bana çok zulm idersin hep cevâbın viresin anun
Beni nevmîd kıldı vuslatundan tîg-i bürrânun
7 Benüm hışm ile bagrum deldi ol peykân-ı müjgânun
Cihânda görmedim ben zerre denlü lutfun ihsânun
8 Revâ mıdur gidem zulm ile boynunda kala kanum
Umarken lutfunı ihsânunı devletlü sultânun

6

1 Cemâlün bâğı olmazsa cehennemdür bana gül-şen
Ruhun hurşîdini görmezsem olmaz hâtırum rûşen
2 Müjensiz çeşmüme hançer görünür gonçe-i sûsen
Yüzün seyr itmesem müjgânun olur çeşmüme sûzen
3 Bana sensiz olur kendü vücûdum dostum düşmen
Senün 'uryânunam n'eyler benüm cismümde pîrâhen
4 Gül-istândur bana fikr-i ruhunla kûşe-i külhen
Beni gördükçe mihnetde niçün rahm eylemezsin sen
5 Dil-i pâkün cibilli seng-i hârâdan yahûd âhen
Makâm-ı hasret olmuşdur dil-i miskînüme mesken
6 Bulursın sen de bir gün hep bana itdüklerün katlan
Bugün nâr-ı firâkunla beni sensin helâk iden
7 Gidersem bâg-ı firdevse olup nevmîd vaslundan
Gelicek hâlet-i nez'a okuyam iş bu beyti ben
8 Revâ mıdur gidem zulm ile boynunda kala kanum
Umarken lutfunı ihsânunı devletlü sultânun

7

1 Gice meclisde seyr itdüm o mâh-ı meclis-ârâyı
Münevver eylemiş hurşîd-i ruhsârı her arayı
2 Unutdurmış yüce 'ünvân ile dârât-ı Dârâyı
İder 'aşk ehline her lahzada yüz bin müdârâyı
3 Bir özge bezm-i hâs itmiş getürmüş bezme sahbâyı
O sahbâ ile mest itmiş ser-â-ser halk-ı dünyâyı
4 Duhûl itdüm o şâhun bezmine aglayı aglayı
Düşüp ayagına itdüm visâlinden temennâyı
5 Tehevvür itdi bakdı hışm ile ol mâh-ı hercâyı
Didi cellâd-ı hûn-rîzine katl eylen bu şeydâyı
6 Hemân kasd itdi hışm ile çeküp tîg-i mücellâyı
Hayâtumdan ümîdüm kesdüm andum nâm-ı Mevlâyı

7 Çekerken 'âlem-i bâtında bu havfı bu gavgâyı
Uyandum nâ-geh okurken bu beyt-i hasret-efzâyı
8 Revâ mıdur gidem zulm ile boynunda kala kanum
Umarken lutfunı ihsânunı devletlü sultânım

8
1 Rakîbün muttasıl sohbetde ülfetde meveddetde
Belâ-keş 'âşıkun hayretde hasretde hasâretde
2 Muhassal halk-ı 'âlem ser-be-ser envâ '-ı devletde
Benüm hâlüm sorarsan şimdi derd-i bî-nihâyetde
3 Gönül mihnetde cân hasretde ten dürlü meşakkatde
Dil ü cân u tene cevrun elemeler virdi gâyetde
4 Senünle söyleşem Hak kâdî oldukda kıyâmetde
Belânı ben çekem lâyıık mı eller cümle vuslatda
5 Kimi eyvân-ı rif'atde kimi bûstân-ı 'işretde
Hemân tenhâ benem derdün çeken iklim-i gurbetde
6 Düşelden 'aşkuna günden güne oldum kasâvetde
Revâ mı böyle bed-haslet ola Şâh-ı velâyetde
7 Kulun her biri ihsânun görür devletde 'izzetde
Döküldi kahr ile kanum benüm meydân-ı zilletde
8 Revâ mıdur gidem zulm ile boynunda kala kanum
Umarken lutfunı ihsânunı devletlü sultânım

9
1 Cihânda sana benzer cevri çok bir bî-vefâ olmaz
Gamun katl eylemez vaslundan ise bir ricâ olmaz
2 Muhassal derd-mendün hâli hergiz bir yana olmaz
Hele hercâyî dil-ber sevmeden müşgil belâ olmaz
3 Seni ammâ gören kimdür yüzün kim mübtelâ olmaz
Cihânda sana benzer kullarıçok pâdişâ olmaz
4 Ziyâ'î gibi der-gâhunda muhlis bir gedâ olmaz
Senün bir zerre ammâ lutfun ihsânun ana olmaz
5 Anı yâd eylemezsin hazretünle âşinâ olmaz
Kadîmî derd-mendündür ana senden devâ olmaz
6 Tabîb-i cân u dilsin senden ammâ bir şifâ olmaz
Ümîdüm var idi vaslundan ammâ gâlibâ olmaz
7 Hemân öldür beni bana bu dirlikden safâ olmaz
Egerçi zulm ile kan eylemen dahi revâ olmaz
8 Revâ mıdur gidem zulm ile boynunda kala kanum
Umarken lutfunı ihsânunı devletlü sultânım

MU'ASŞER

-1-

Mefâ'îlün Mefâ'îlün Mefâ'îlün Mefâ'îlün

1 Dirîgâ geçdi 'ömr-i nâzenînüm derd ü mihnetde
Ne yârân ile sohbetde ne ihvân ile ülfetde
2 Hüner kadri bilinmez kaldum alçak bir vilâyetde
Unutdum bildüğüm dahı bu killetde bu zilletde

3 ' Acebdür kâdirem bir beyt-i nazma niçe müddetde
Felekden midür âyâ kaldugum böyle felâketde
4 Kalur mı tâli '-i şûmum benüm 'ömrâ nuhûsetde
Mezelletde meşakkatde melâletde melâmetde
5 Yazuklar bana ger 'ömrüm geçerse böyle gurbetde
Gehî nâ-cins ile sohbetde geh tenhâ kasâvetde

2
1 Neler gördüm seher Hakkun fezâ-yı mümkünâtında
Ki zevk esbâbı mâl-â-mâl dehrün şeş-cihâtında
2 Safâ ehli salınur gül-şen-i cennet sıfâtında
Oturmuş gark-ı girdâb-ı belâ fülk-i necâtında
3 Safâda ehl-i 'aşkun her biri mahbûbı kâtında
Safâdur ser-be-ser mahbûblar hod hadd-i zâtında
4 Hele bî-behre kalmış yok bu 'ömr-i bî-sebâtında
Bulup bir kûşe tenhâ zevk ider herkes hayâtında
5 Yazuklar bana ger 'ömrüm geçerse böyle gurbetde
Gehî nâ-cins ile sohbetde geh tenhâ kasâvetde

3
1 Şikeste kalbüme bir gün gelür efkâr gûn-â-gûn
Benümle başladı ceng ü cedele tâli '-i meftûn
2 Didüm ey kara bahtum n'oldı olmuşsun kara magbûn
Didi bilmez misin kim dûn-perverdür ezel gerdûn
3 İderken 'arbede bahtumla ben hâl ise diger-gûn
Tesellî buldı kalbüm kıssa-i Kaysı anup ol gün
4 Meger sahrâda bir gün kendü hâlin fikr idüp mahzûn
Gezerken vahşî âhûlarla sahrâda dimiş Mecnûn
5 Yazuklar bana ger 'ömrüm geçerse böyle gurbetde
Gehî nâ-cins ile sohbetde geh tenhâ kasâvetde

4
1 Ziyâ'î zulmet-i gamda ne kara günlere kaldum
Döküldi yüz suyu ben câm-ı nâmûsı yire çaldum
2 Götürdüm kendümi deryâ-yı derd ü mihnete saldum
Halâs olmak ne mümkündür belâ girdâbına taldum
3 Dür-i maksûd ümîdiyle dirîgâ bagrumı deldüm
'Aceb-vâr yollara düşdüm 'aceb sahrâlara geldüm
4 Safâsından cihânun bi'z-zarûrî cümle vaz geldüm
Tehî destem ne dünyâdan ne 'ukbâdan murâd aldum
5 Yazuklar bana ger 'ömrüm geçerse böyle gurbetde
Gehî nâ-cins ile sohbetde geh tenhâ kasâvetde

MÜSEDDDES

-1-

Müseddes-i Matla '-ı Pîrî Çelebî
Fe'îlâtün Mefâ'ilün Fe'îlün

1 Dökülüp hâk-i zillete külümüz
Kalmasa elde akçamuz pulumuz

2 Olmasa mihnete tahammülümüz
Ursalar âteşe tecemmülümüz
3 Göge savursalar eger külümüz
Hazret-i Hakkadur tevekkülümüz

2
1 Dutuşup derd ile vücûdum eger
Yansa nâr-ı belâda ser-tâ-ser
2 Kara toprakda bu ten-i lâgar
Olsa külliyet ile hâkister
3 Göge savursalar eger külümüz
Hazret-i Hakkadur tevekkülümüz

3
1 Yele virse hevâ karârumuzı
Kara toprağa karsa varumuzı
2 Eşkiyâ çignese mezârumuzı
Tagıdur taglara gubârumuzı
3 Göge savursalar eger külümüz
Hazret-i Hakkadur tevekkülümüz

4
1 Sâbıkân şer‘-i Ahmed-i Muhtâr
Çünkü Mansûrı eyledi ber-dâr
2 Yakmaga kasd idince âhir-i kâr
İşidüp söylemiş o şeyh-i kibâr
3 Göge savursalar eger külümüz
Hazret-i Hakkadur tevekkülümüz

5
1 Ey Ziyâ’î sen itme tedbîri
Var gözet muktezâ-yı takdîri
2 Nazm idüp bu kelâm-ı dil-gîri
Gör ne dir tekve-i hüner pîri
3 Göge savursalar eger külümüz
Hazret-i Hakkadur tevekkülümüz

MUHAMMESLER

-1-

Muhammes-i Gazel-i Vusûlî Beg
Mefâ’îlün Mefâ’îlün Mefâ’îlün Mefâ’îlün

1

1 İlâhî şefkatünden sen dil-i dil-dâra şefkat vir
2 Habîr olmağa bu derd-i derûnumdan ferâset vir
3 Dil-i pâkine ilhâm eyle âsâr-ı mahabbet vir
4 *Mahabbetden İlâhî ol meh-i nâ-mihre hâlet vir*
5 *Beni yakdı ana da zerre denlü bir harâret vir*

2

1 İlâhî bu vücûdum cübbesini çâk çâk eyle
2 Ya gark-âb it ya pür-sûz it ya berbâd it ya hâk eyle
3 Ya dermân eyle derde haşre dek ya derd-nâk eyle
4 *Ya vasl ile sevindür ya firâk ile helâk eyle*
5 *Yahûd şevk ile gönlüne anun dahı mahabbet vir*

3

1 Dil-i şeydâya pertev salmaz ol hurşîd-i rahşânum
2 Güzer kılmaz mahabbet bezmine ol şem'-i tâbânum
3 Yanup yakılmak ister meclisinde cân-ı sûzânum
4 *Cemâl-i şem'ine pervâne-veş yâ Rabb ya yak cânum*
5 *Ya insâfa getür anı ya bana sabr u tâkat vir*

4

1 Kemân ebrûlarun derdiyle mâned-i hilâl oldum
2 N'ola başdan çıkarsam râh-ı gamda pâ-y-mâl oldum
3 Garîb ü bî-kes ü âvâre vü şûrîde-hâl oldum
4 *Belâ-yı 'aşkı çekmekden hele ben bî-mecâl oldum*
5 *Bu bir bâr-ı girândur sen hemân yâ Rabbi kuvvet vir*

5

1 Ziyâ'î gibi bir mehcûra zulm ile uzatma el
2 Ümîdi var vusûl-i vasl-ı dil-berden husûsâ gel
3 Bu gün sabr eyle hâl anla şitâbun aslı var vaz gel
4 *Vusûlî dest-i hicrândan halâs olsun hele evvel*
5 *Kerem kıl ey ecel bir lahza ârâm ile mühlet vir*

-2-

Muhammes-i Gazel-i Emrî Çelebî
Fâ'ilâtün Fâ'ilâtün Fâ'ilâtün Fâ'ilün

1 Zâhide kûyun unutturdı behiştün meskenin
2 Hâsılı virdün hevâya sabr-ı 'âşık hırmenin
3 Şîven ile arturursın 'andelîbün şîvenin
4 *Vaz' idelden bâg-bân-ı sun' hüsnün gül-şenin*
5 *Hâr-ı gayret güllerün sad-pâre kılmışdur tenin*

2

1 'Âşık olan cân virür ol mâh-ı ruhsâr üstine
2 Muttasıl tan mı düşerse derd-i düş-vâr üstine
3 Şevk-i rûyunla düşer pervâneler nâr üstine
4 *Gül gam-ı haddünle düşmüş hançer-i hâr üstine*
5 *Gül-şen içre kan bulaşık buldılar pîrâhenin*

3

1 Bu ne hikmetdür ki Bârî nûr u zulmet halk ider
2 Bu ne kudretdür ki 'âlem zulmet iken ser-be-ser
3 Kâinâta nûr bahş olmaga nâ-geh gün togar
4 *Gün togar sanman melâik hâne-i çerhün seher*
5 *Âfitâbı hüsnüne karşı açarlar revzenin*

4
1 Hasret-i haddünle gitdi dün gice benden sürûr
2 Derd-i dilden âh idüp oldum ziyâde bî-huzûr
3 Kıldı âhum sarsar-ı çerh-i mu'allâdan 'ubûr
4 *Görđi kasr-ı dehrde âhum yelinden söyünür*
5 *Eyledi hâle çerâg-ı mâha perde dâmenin*

5
1 Hasret-i Şîrîn ile kûh-sâra 'azm itdi seher
2 Yâd idüp derd-i derûnın dilden âh itdi meger
3 Âhı bünyâdı serây-ı 'âleme virdi zarar
4 *Görđi kim her dem sûtûn-ı hâne súzından yanar*
5 *Bî-sûtûn itdi varup Ferhâd-ı miskîn meskenin*

6
1 Eşk-i çeşmüm 'aks-i la'l-i dil-sitândan sürh olur
2 Sînede kalb-i hazînüm dahı andan sürh olur
3 Dilde peykân-ı müjen dirsene ki kandan sürh olur
4 *Sanma kim peykân-ı gamzen dilde kandan sürh olur*
5 *Âteş-i gam tâbıdur anun kızardan temrenin*

7
1 Subh-dem derd-i firâk-ı yâr ile âh eylesek
2 Âh-ı mazlûmânedür 'arşa güzâr itmek gerek
3 Gâ'ib olur gûyiyâ andan firâr eyler melek
4 *Sanma encüm tîr-i âh-ı Emrî vehminden felek*
5 *Bile yatur gice egninden çıkarmaz cevşenin*

-3-

Muhammes-i Gazel-i Bâkî Efendi
Mefâ'ilün Fe'ilâtün Mefâ'ilün Fe'ilün

1
1 Şarâb mey-gede içre müdâm alınmakda
2 Harâmî-veş kadeh el içinde tutulmakda
3 Sebûya kulb takıldı oturdı alçakda
4 *Metâ'-ı bâde-i gül-reng şimdi ayakda*
5 *Kumâş-ı zühđ ü riyâ turmayup satılmakda*

2
1 Çü bahr-ı gamda buluşduk 'adû-yı gussa ile
2 Şarâb peyki bu deryâda gönderilse dile
3 Çü rûzgâr virür fülk-i 'ömri bunda yile
4 *Kenâr-ı 'ayş u safâya geçilse tolmuş ile*

5 *Yine pür olsa mey-i hoş-güvâr zevrakda*

3

1 Çü muhtesîb mey içürmez bize zebânî degül
2 Nihânî içelüm anı hele 'ıyânî degül
3 Dil uzradur bize sofî velî zebânî degül
4 *Şarâbı zevrak ile içmenün zamânı degül*
5 *Efendi keştîyi kâğıdda suyu zevrakda*

4

1 Gönülde sûz-ı nihânîyle kaynayup vâ'iz
2 Hevâya jâle-i gül gibi sıçrayup vâ'iz
3 Çün oldı mey-mûn uyanup vâ'iz
4 *Behişt şevkına şâdilik eyleyüp vâ'iz*
5 *Miyân-ı meclise atıldı yek mu'allakda*

5

1 Şarâbı sâgar ile sun berü gel ey sâki
2 Gör imdi bezm-i cihânda nic'oldı 'uşşâkı
3 Ziyâ'î tig-i zebân ile tutdı âfâkı
4 *Semend-i tab'a süvâr oldı 'azm ider Bâkî*
5 *Belâgat ehline yâ Hû gönüller alçakda*

-4-

Muhammes-i Gazel-i Bâkî Efendi

Mefâ'îlün Mefâ'îlün Mefâ'îlün Mefâ'îlün

1

1 Fakîr itdi beni iklîm-i derde gam emîr itdi
2 Sürûrum var ki server eyledi sâhib-serîr itdi
3 Süleymânlar zebûn idüp ne Âsaflar esîr itdi
4 *Şarâb-ı bezm-i gam zevkin ne mîr ü ne vezîr itdi*
5 *Anun keyfiyyetin benden su'âl eylen fakîr itdi*

2

1 Cihânda 'âkil oldur kim ola 'aşk ile dîvâne
2 İçüp bezm-i mahabbet bâdesinden ola mest-âne
3 Hadîs-i 'aşkı ey sofî sakın sanma bir efsâne
4 *Saçıldı cür'a-i câm-ı mahabbet bâg-ı Rıdvâna*
5 *Suyın Kevser nebâtın ney-şeker hâkin 'abîr itdi*

3

1 Ne gâfildür şular kim kâr-ı 'âlemden hazer kılmaz
2 İrür seyl-i fenâ nâ-geh gelüp kimse haber kılmaz
3 Mahabbet kasrını dîvânedür şol kim ki her kılmaz
4 *Binâ-yı 'aşka tûfân-ı havâdis kâr-ger kılmaz*
5 *Esâsın gûyiyâ bennâ-yı Kudret kâr-gîr itdi*

4

1 Menâl-i kaddümi bâd-ı fenâ ditrettdi hem çü teb

2 Gelür cân agzuma ol dem ol yâr ile leb-ber-leb
3 Derûn-ı dilden olunca seher virdüm budur her şeb
4 *Cevânlık 'âlemi gitdi ne vaktin togrılam yâ Rab*
5 *Egildüm bâr-ı 'aşk-ı yâr kaddüm bükdi pîr itdi*

5
1 Gül umarken Ziyâ'î gibi kaldı ayagum gilde
2 Dirîgâ gitmedi kaldı belâ vü derd ü gam dilde
3 Mezellet şimdi 'aşk ehlinde devlet şimdi câhilde
4 *Ne gam endîşe-i zilletden ey Bâkî bu menzilde*
5 *Hidâyet reh-beri lutfın ana kim dest-gîr itdi*

GAZELLER

-1-

Mefâ'îlün Mefâ'îlün Mefâ'îlün Mefâ'îlün

Salup dil zevrakını ma'rifet deryâsına cânâ
Didüm 'aşk ile "Bismi'llâhi mecrâhâ ve mürsâhâ"

Gönül kim cûşa geldi teşne-i feyz-i mahabbetden
Talazlandı nesîm-i rahmet-i Rahmân ile deryâ

Gelün feth eylen ey erbâb-ı hikmet bu mu'ammâyı
Gönülde 'aşkı peydâdur gönül 'aşkında nâ-peydâ

Güzeller derdini çekmekdedür dermânı her derdün
Bana keşf eyledi seyrümde bu sırrı Ebû Derdâ

'Azâb olur gönül başka mahşer ehline
Ana kim ferd olup mahşerde yarın bulmaya ferdâ

Nice demdür ki vasl-ı dil-rübâyâ irmedi kaldı
Erenlerden umar himmet anunçün bu dil-i şeydâ

Kasâvetden helâk oldu Ziyâ'î bezm-i zilletde
"Elâ yâ eyyühe's sâkî edir ka'sen ve nâvilhâ"

-2-

Fe'îlâtün Fe'îlâtün Fe'îlâtün Fe'îlün

Ol perî çehrede yâ bir bu ki yok resm-i vefâ
Yâ anagelmedi bir kimse benüm hâlüm ana

Togrusu çok bulunur serv-i sanevber-kâmet
Yokdur illâ n'ideyin böyle güzel müstesnâ

Korkarın 'âr ide benden seg-i kûy-ı dil-ber

Yohsa ben kendüm olurdum katı çokdan rüsvâ

Yüzünü görse umar ni‘met-i vaslun diller
Nev-bahâr olsa gam nâni yir artuk fukarâ

Ey Ziyâ’î hele ben gussadan öldüm gitdüm
Ki niçün ol leb-i ‘Îsâ beni itmez ihyâ

-3-

Mefâ‘ilün Mefâ‘ilün Mefâ‘ilün Mefâ‘ilün

Yaşam birdür hevâ-yı zülf-i yâr ile habâb-âsâ
Anunçün bezm-i gamda kaldum ayakda şarâb-âsâ

Ben ol ‘uryân-ı deşt-i mihnetem kim tâli ‘ümdendür
Beni ey mâh-ı tâbânun yakarsın âfitâb-âsâ

Revân olsa yaşam her sûya cânâ sû-yı zann itme
Akar dîdârun ister ‘aşıkundur çünki âb-âsâ

Veda‘-ı hicie nâfidür anunçün ey tabîb-i cân
Sirişkümle toludur şîşe-i çeşmüm gülâb-âsâ

Meger tab‘-ı Ziyâ’î şâh-bâz-ı evc-i ma‘nâdur
Ki vehm eyler zamânun şâ‘iri andan gurâb-âsâ

-4-

Fâ‘ilâtün Fâ‘ilâtün Fâ‘ilâtün Fâ‘ilün

Derdün ile taglara düşsem gerek didüm şehâ
Yürî hey Mecnûn didi ol saçları Leylâ bana

Sahn-ı dünyâ gözüme dar oldu derd-i yâr ile
Hak dimişlerdür izâ câe’l-kazâ zâka’l-fezâ

Seyre alup gitdiler ol mâhı tenhâ bu gice
Tanrıya ısmarladum fa’llâhu hayrun hâfizâ

Mihre bakdumsa ‘izârun terk idüp gün görmeyem
La‘lünü koyup mey içdümse harâm olsun bana

Lutfun ile yine yâd itdün Ziyâ’î bendeni
Merhabâ ey âşinâ-yı cân-ı şeydâ merhabâ

-5-

Mefâ‘ilün Mefâ‘ilün Mefâ‘ilün Mefâ‘ilün

Niçün bir zerre mihrün görmez ey meh bu dil-i şeydâ

Niçün ahvâl-i Mecnûna terahhum eylemez Leylâ

Niçün cem'iyet-i hâtır ola ellerde sultânım
Hevâ-yı sünbülünle ben perîşân-hâl olam tenhâ

Bana ta'n eylemek yokdur benüm de var idi 'aklum
Beni dîvâne kıldı 'aklum aldı bir perî-sîmâ

'Arak-rîz olur ol mâhun yüzi gâhî hicâbından
Küsûf irse güne olur nücûm-ı âsumân peydâ

Ziyâ'î baş açık dîvânedür sahrâ-yı 'aşkunda
Başında tâc idinmez âşiyân-ı mürğü Kays-âsâ

-6-

Fe'îlâtün Fe'îlâtün Fe'îlâtün Fe'îlün

Alma şeftâlümü dir ol lebi hurmâ eyvâ
Kays-ı nâr-ı gama âlûde kılur san Leylâ

Sıdı peymâne-i kalbüm çün o peymân-şiken
Dîdeden hûn-ı ciger akmaga yüz tutsa n'ola

Yâ büküldüm çekerek bâr-ı gam-ı cânânı
Fikr-i ebrûsı bilüm bükdi kemân eyledi yâ

Leb-i cân-bahşun ile ey sanem-i sîm-beden
Sünnet-i Hazret-i Îsâyı idersin ihyâ

Gerçi agyâra leb-i la'lün olupdur şeker-âb
Oldı bî-çâre Ziyâ'î kuluna zehr ammâ

-7-

Fâ'îlâtün Fâ'îlâtün Fâ'îlâtün Fâ'îlün

'Ârız-ı cânâna düşdi sanmanuz zülf-i dü-tâ
Gâfil olman Rûmiline geldi iki ejdehâ

İki kâfir Mısra gelmiş sükker almak kasdına
La'line sarkar ruhında sanman ol zülf-i dü-tâ

Cân dimâğın bu seher gâyet mu'attar kıldılar
Su kenârında iki sünböldür anlar gâlibâ

Gice gündüz var ise fikr-i dirâzumdur benüm
'Âşıkun 'ömri tavîlidür ya anlar zâhirâ

Gice zulmetde Ziyâ'î şevk-i gîsû-yı nigâr
Bu muhayyel sözlerin tesvîdin itdi iktizâ

-8-

Mef'ûlü Mefâ'îlü Mefâ'îlü Fa'ûlün

İtdüm kamu Rûm illerini gerçi temâşâ
Va'llâhi sana bulmadum ey mugbeçe hem-tâ

İki gözümün yaşı biribirine akdı
Buluşdı Sitanbul'da sanasın iki deryâ

Kûyun var iken dünyede ey hûr-ı cinânum
Gönlüm dilemez şehri Sitanbulda Kalatâ

Ben bulmadum câmi'-i hüsnün gibi ma'bed
Meşhûr-ı cihân olmuş egerçi Ayâsofyâ

Habs olsa Ziyâ'î Yedikullede sekiz yıl
Virmezdi sekiz cennete dîdârını cânâ

-9-

Fe'ilâtün Fe'ilâtün Fe'ilâtün Fe'ilün
Geydi ol şûh-ı cihân egnine zîbâ dîbâ
Oldı her küşede şimdi gül-i beydâ peydâ

Devr-i gül dâim ü cânâne mülâyim ammâ
İdemez Zâl-ı zamân ile müdârâ Dârâ

Tâ'at-ı Hakkı koyup mâ'il-i hûbân oldum
Kimsede var mı ola bunca hatâ yâ âyâ

Beni ferdâya salup derdümi arturdı habîb
Cânuma eyledi te'sîr bu ferdâ derdâ

Hây şevk ehli Ziyâ'î gazelin ezberlen
Sözi rengîn ü edâsı ter ü ma'nâ rânâ

-10-

Mef'ûlü Fâ'ilâtü Mefâ'îlü Fâ'ilün

Uyar cünûn u 'aşk u hevâ muttasıl bana
Ko her ne dirse pâdişehüm disün il bana

Agyâr bî-huzûr ise gamunı çekmeden

Cevr ü cefânı pâdişehüm sen de kıl bana

Agyâra seng-i işveni atmak neden gelür
Bir iyügün tokınmadı ey seng-dil bana

Sebze vü benefşe vü sünbül ü reyhân u yâsemen
Zülf-i nigâr olsa velî muttasıl bana

Benzetdün ey Ziyâ'î meye leblerin diyü
Gice surâhî bezmde uzatdı dil bana

-11-

Fâ' ilâtün Fâ' ilâtün Fâ' ilâtün Fâ' ilün

Gice seyründe leb-i cânânı bûs itdün dilâ
Zulmet içre çeşme-i hayvânı buldun vâkı'â

Mürde idün düşde Rûhu'llâh ihyâ eyledi
Sanma bûs itdün leb-i dil-dârı seyründe dilâ

Câm-ı la'linden gice şerbetler in'âm eyledi
Haste idün bir tabîb-i dil irişmişdür sana

Teşne idük uyanup lâ-ya'kıl oldum var ise
Leb diyü sahbâ-yı aşkından kadeh sundı bana

Buna hayrânem ki nâ-geh bengî-i hicrân iken
Gice helvâlar iderdi la'l-i nâb-ı dil-rübâ

Lâl iken gûyâ benüm tûtî-i tab'um bu gice
Câna lâyık sükker-i ter sundı bir dil-dâr ana

Rûh-ı sâni idi çün kim la'l-i nâbı dil-berün
Ey Ziyâ'î cân-ı şîrînün ne var kılsan fedâ

-12-

Fâ' ilâtün Fâ' ilâtün Fâ' ilâtün Fâ' ilün

Dîde dîdârun temâşâ itmek olmazsa n'ola
Rûyumu rü'yâda seyr itmek de hoşdur vâkı'â

Âşık-ı dil-hasteye hoş gelmese derdün senün
Ey tabîb-i cân ezelden olmaz idi mübtelâ

Hâme yonsam kaşlarun vasfını yazmak kasdına
Gösterür şekl-i hilâli her tıraşum gâlibâ

Ey Hicâza 'azm idenler Merve hakkı var mı din

Ka'be-i kûyın tavâf itmek gibi zevk ü safâ

Kara zülfünden şikâyet kıldı sanursın hemân
Eylese baht-ı siyâhına Ziyâ'î bed-du'â

-13-

Mef'ûlü Mefâ'îlü Mefâ'îlü Fa'ûlün

Olmasan eger dil mi virürdüm sana cânâ
Dil-dâr u dil-efrûz u dil-ârâm u dil-ârâ

Ben şimdi belâsın mı çekerdüm ezel anun
Ger olmasa sevdâsı süveydâda hüveydâ

Çok çekdi çevirdi anı ol kaşı kemânum
Cevvâr eline düşdi gönül eyle olur yâ

Kanum dökesin bir dem ola ey gözi hûnî
Ol demler i çün mi bizi saklar felek âyâ

Bir derde düşürdi bizi ol âfet-i devrân
Ödürse gelüp olmaz idi böyle tesellâ

Dirdüm beni ihyâ ide bilmem hîç olur mı
Bir mugbeçe-i mu'cize-i Hazret-i 'Îsâ

Kuçmağı umar kulzüm-i hicründe Ziyâ'î
Girdâba düşen sanma kenâr uma nigârâ

-14-

Mef'ûlü Fâ'ilâtü Mefâ'îlü Fâ'ilün

Gerçi ki cânâ 'ârız olur dâimâ kazâ
Ammâ firâk-ı yâr gibi olmaya kazâ

La'lün yanında bûse-i şîrîn telh olur
Zülfün yanında gîsû-yı Leylâ kara kazâ

Hâlât-ı 'aşk ider beni geh kûh gâh kâh
'Ârız olur vücüduma yâ vecd yâ kazâ

Yir gök götürmez eşküm ile âhumı benüm
İrse kaçan ki firkatün ile bana kazâ

Her demde kanlu yâş akıdursın Ziyâ'iyâ
Sabr eyle çünki böyle ider iktizâ kazâ

-15-

Mefâ'îlün Mefâ'îlün Fa'ûlün

Saçun Mecnûnidur gîsû-yı Leylâ
'Îzârun 'özü-hâhı rûy-ı Leylâ

Bahâ-yı hâk-i pâyun olmaz altun
Efendi sîmde yokdur bu sîmâ

Leb-i la'lün şekerdür câna lâyık
Zebânun tûtîdür ey yâr gûyâ

Geyersen pâdişâhum gey yaraşur
Ser-â-ser atlas u dîbâ-yı zîbâ

Ruhun lâle dişün lü'lü-i lâlâ
Dilün seng ü libâsun dahı hârâ

Eyâ şem'-i cihân bezmünde olmaz
Ziyâ'î gibi bir şevk ehli peydâ

Serây-ı midhatünde bu yedi beyt
Beneynâ fevkaküm seb'an şidâdâ

-16-

Fe'ilâtün Fe'ilâtün Fe'ilâtün Fe'ilün

Bugün ol şûh-ı cihân nâ-geh elün saldı bana
Çin seher pençe-i hurşîd hemân kaldı tana

Şöyle şevk irdi bana el salıcak cânânum
Yed-i beyzâyı 'ıyân itdi sanurdum Mûsâ

Gâh olur el salar ol yâr bana âh itsem
Gül-i gül-şen salınur bâd-ı sabâdan gûyâ

Kim bakar yâsemenün bâgda salındugına
Nâ-gehân el salıcak ol sanem-i bî-hemtâ

El salar gerçi Ziyâ'îye işâretler ider
Salınur eller anun iki yanında ammâ

-17-

Mefâ'îlün Mefâ'îlün Mefâ'îlün Mefâ'îlün

N'olaydı bir gice gün gibi çıksa ol kamer tenhâ
Ana derd-i derûnumdan diyeydüm bir haber tenhâ

Ne 'âlemdür bu kim seyrümde ol mâh-ı cihân-ârâ
Girer 'uryân olup koynuma her şeb tâ-seher tenhâ

Ayıklarda anuñün kalmışam kim ol ser-i hûbân
Vefâdan el çeker el virmez ellerle gezer tenhâ

Yüzün gün görmez iken genc-i Kârûnun gibi âhir
Kara toprakda kalmış anca sîm-endâmlar tenhâ

Ziyâ'î şevke geldi gönli bir fânûs-ı hikmetdür
Ki anda rûz u şeb 'aşk âteşi turmaz yanar tenhâ

-18-

Fâ'ilâtün Fâ'ilâtün Fâ'ilâtün Fâ'ilün

Gamzen ile kâkülün zulm-i mehîn eyler bana
Gözlerünle kaşların sihr-i mübîn eyler bana

Dostlar lutf eylen adum anman ol hercâyiye
Hem sizi düşmen sanur hem hışm u kîn eyler bana

Gitdi 'aklum gitdi fikrüm gitdi sabrum gitdi dil
Dostlar bu zulmi hep ol nâzenîn eyler bana

Gönlüm aldı cânuma kasd itdi bed-nâm eyledi
Kim bilür şimden girü cevr idici n'eyler bana

Ey Ziyâ'î şevk ile hicr âteşine düşdügüm
Nûr-ı Mevlâ hakkı hep ol meh-cebîn eyler bana

-19-

Fe'ilâtün Fe'ilâtün Fe'ilâtün Fe'ilün

Hasret-ı 'ârız-ı yâr ile ölürsem hayfâ
Berg-i gülden tenüme bir kefen eylen peydâ

'Aşk-ı ve'l-Leylîsi başında idi Mecnûnun
Âşiyân eylemedi yohsa gelüp mürğ-ı belâ

Gönlümün hânesine revzen olupdur çeşmüm
Pertevün girse n'ola gönlüme ey şems-i Duhâ

Serve benzer dir isem kaddün eger incinme
Togrısı bu ki yalancı olur ekser şu'arâ

Ey Ziyâ'î buluruz menzil-i maksûdı ne gam

Zulmet-i gamda çü şevk-i ruhıdur râh-nümâ

Râh-ı 'aşkıyla diyâr-ı gama çün 'azm itdüm
'Adem iklîmine varmak bi-tarîki'l-evlâ

-20-

Fe'îlâtün Mefâ'ilün Fe'îlün

Hûn-ı eşküm şarâbdur gûyâ
Gözüm iki habâbdur gûyâ

Zekanınun hayâli çeşmümde
Câm-ı mülde habâbdur gûyâ

Vasf-ı zülfinde şî'r-i manzûmum
Bir mutavvel kitâbdur gûyâ

Meclis-i gamda eşk ile cigerüm
Mey-i nâb u kebâbdur gûyâ

Ey Ziyâ'î ziyâ-yı mihr-i ruhı
'Âleme âfitâbdur gûyâ

-21-

Fe'îlâtün Fe'îlâtün Fe'îlâtün Fe'îlün

Bana reng itdi ruh u la'lün ki âl oldu bana
Sâkiyâ dîvânenem bilmem ne hâl oldu bana

'Âlem-i rü'yâda seyr itdüm o mâhı bu gice
Vâkı'â seyr itdügüm özge hayâl oldu bana

Bâg-ı mihnetdür vücudum bûstânı gûyâ
Dâglarla şerhalar gülden nihâl oldu bana

Böyle taksîm eyledi var ise Kassâm-ı ezel
'İşret ü şâdî sana hüzn ü melâl oldu bana

Ey Ziyâ'î zulmet-i firkatde kaldum yalnız
Menzil-i maksûda yol bulmak muhâl oldu bana

-22-

Mefâ'ilün Fe'îlâtün Mefâ'ilün Fe'îlün

Ne derd olur bu ki bu derd başa düşmüş ola
Bi-esrihâ ben esîre belâlar üşmüş ola

Düşürdi bend-i belâya bu ben fütâdeyi 'aşk
Cihânda az bulunur ki böyle düşmüş ola

Bu dem bilâd-ı belâda turup belâ çekerin
'Aceb kim ola bu derd ile turuşmuş ola

Kad-i nigârdan ırak belâları göririn
Belâ budur benüm ile belâ görüşmüş ola

Ziyâ'iyâ gamumı kimse bilmez âh benüm
Meger şu kim bu belâ ile ol buluşmuş ola

-23-

Fe'îlâtün Mefâ'ilün Fe'ilün

Şol siyeh çeşmüni gören şeydâ
Mest-i 'aşk olsa tan degül cânâ

Nakd-i cânâ metâ'-ı vaslunı vir
Bey'i döndürmese 'ayb olur zîrâ

Ey perî yok yire dehânun için
Müdde'ilerle iderüz gavgâ

Vasf-ı tigünde kıt'alar yazarın
Vâcibü'l-katl isem de farazâ

Zîr-i zülfindedür yüzi yârun
Sanki zulmetdedür Ziyâ'î ziyâ

-24-

Mef'ûlü Fâ'ilâtü Mefâ'ilü Fâ'ilün

Dirsın riyâzetünde riyâ yok çü zâhidâ
Bir bûriyâ geyersin olur sana bu riyâ

Cânâ garîk-i bahr-ı gamun yâd idüp 'aceb
Dimez misin ki kandadur o eski âşinâ

Çerh-i felek bu seb'a-i seyyâresiyle âh
Oldı helâk-ı halka yedi başlu ejdehâ

Akıtdı bahr-ı eşki Sikender-sıfat o şâh
Gark eyledi vücudumı çün mülk-i Kaydefâ

Manendi yok sanurdum o mihr-i kamer-ruhun
Gördüm nazîrin âyînesinde Ziyâ'iyâ

-25-

Fe‘ilâtün Fe‘ilâtün Fe‘ilün

Çeşm ü ebrûn ile kaddün sanemâ
Görinür gözümüze ‘ayn-ı i‘nâ

Nukl-ı meclis lebüne öykünmiş
Anun için mezelendi zurefâ

Terk idüp la‘lün içerssem bâde
Bezm-i ‘âlemde harâm ola bana

Karanulukda ne göz kıpdugını
Bilürin encümün ey mâh-likâ

Âsumân encümen-i encümini
Seni hıfz itmege gönderdi şehâ

Ehl-i ‘aşkı ne için yakdı diyü
Nâr-ı hicrûnle tutuşdum cânâ

Gül-şen-i kûyun içinde ey gül
Bülbülündür bu Ziyâ’î gûyâ

-26-

Mef‘ûlü Mefâ‘ilü Mefâ‘ilü Fa‘ûlün

Kasdi bizedür n’idelüm ey dil o dil-ârâ
‘Uşşâkı helâk itdi ‘umûm üzre husûsâ

Agyâr temâşâ ideyor hüsnini her ân
Bin cehd ile biz göremezüz özge temâşâ

Ey ‘aşk bize sen dahı bir bâr-ı girânsın
Ta’llâhi lekad âsereka’l-Allâhu ‘aleynâ

Başumda yuva derd-i serümdür didi Mecnûn
Üstâdlarun başı agrımaz didi Leylâ

Yagmada gözi yaşı Ziyâ’înün o zâlim
Rahm itmedi itdi dil ü cân mülkini yagmâ

-27-

Fe‘ilâtün Fe‘ilâtün Fe‘ilâtün Fe‘ilün

Ey tabîb eyle didüm vaslunla derdüme devâ
Didi karın agrısı ol gözleri bîmâr bana

Zülfün altında ne hoş yaraşur ol hâl-i siyeh
Cîmün altında konan noktaya benzer gûyâ

Âfitâb-ı ruhun arturdu bugün şevkümüzü
İnnehu lutfu latîfin ce'ale's-şemse ziyâ

Mey içüp lebleri şevkine gelüp kapusına
Eyler ol şâha dil-i mest senâ-yı müstesnâ

Görse Hassân ile Selmân Ziyâ'î şî'rün
Biri ahsente diyeydi birisi sellemnâ

-28-

Mefâ'ilün Fe'ilâtün Mefâ'ilün Fe'ilün

Bize vefâ ider oldı ol âfet ahyânâ
Emâtenâ elemün v'el-habîbü ahyânâ

Yüzün görüp yire düşdi yüzüm hicâbumdan
Ne secdedür bu da sübhâne rabbiye'l'alâ

Yiridür âb-ı zer ile mezâr-ı Mecnûna
Yazılsa âyet-i İsrâ bi'abdihi Leylâ

İki eli taşun altında kaldı Ferhâdun
Terahhum itmedi Şîrîn gelüp yazuklar ana

Beyân ider gam u derdi Ziyâ'î her beytün
Sanur görenler anı hâne-i Ebû Derdâ

-29-

Mef'ûlü Fâ'ilâtü Mefâ'ilü Fâ'ilün

Kaçkın kulun kapuna gelüp izn ider ricâ
İhsânuna ne lâyıık ise anı kıl şehâ

Almakda bûse-i leb-i şîrînünü rakîb
Ben görmedüm dahı ola mı Hüsrevâ revâ

Girdâb-ı bahr-ı derde düşüp dil meded umar
Ol derd-mendi yâd ide yok mı bir âşinâ

Aldum metâ'-ı vaslunı cân nakdini virüp
Yâr ile böyle itsün iden bey'-i bi'l-vefâ

Şevk-i 'izâr-ı yâr ile her söyleyen gazel
Böyle latîf ü hûb gerekdür Ziyâ'iyâ

-30-

Fâ‘ilâtün Fâ‘ilâtün Fâ‘ilâtün Fâ‘ilün

Çünkü nevr-rûz ola dirler zerre kalmazmış sehâb
Gün yüzünde zülf ebr-âsâ neden ay âfitâb

Dest-gîr olmazsan ey serdâr-ı hûbânım bana
Derd-i ‘aşkun pâ-y-mâl eyler beni hâlüm harâb

Gel gubâr-ı cismi kaldur ayakdan ey bâd-ı sabâ
Âsitânına nisâr olsun ‘Alînün bu türâb

Dem-be-dem agyâr ile tenhâda tek çift olmasun
Meclis-i cânâneye bagrum kebâb eşküm şarâb

Hâbda seyr eyledüm dün gice ol meh-pâreyi
Ey Ziyâ’î çok zamân olur ki böyle düşe hâb

-31-

Mefâ‘ilün Fe‘ilâtün Mefâ‘ilün Fe‘ilün

Nedür o gizleniş âyâ nedür o şerm ü hicâb
Nedür o hüsn ü edâ ile âh o gizlü hitâb

Nedür o lutf-ı hafî ol tekellüm-i mahfî
O ‘ahd-i bî-hûde ol nâz u şîve ile cevâb

O söyleyiş o gülüş o tevâzu‘ ile selâm
O salınış o reviş ol kirişme ile şitâb

O göz ucıyla bakışlar o kaşların çatmak
Ol inciniş o söğüş âh o zâlim-âne ‘itâb

Ziyâ’iyâ nedür ol gice gelmege ikrâr
Meded meded ya nedür intizârda bu ‘azâb

-32-

Fâ‘ilâtün Fâ‘ilâtün Fâ‘ilâtün Fâ‘ilün

Hazz iderse kesret-i ‘uşşâkdan tan mı habîb
Lâ-cerem kim hasteler çok olsa hazz eyler tabîb

Fi’l-hakika cevr-i cânânı görüp incindüğüm
Pâdişâha incinür gûyâ ki bir merd-i garîb

Goncenün gönli açılmış gül güler hikmet bu kim

Nâr-ı hicrâna yanup hâkister olmuş ‘andelîb

Kurtarur gamdan bu gün ehl-i kubûr eyler bizi
Ol kemân ebrû atarsa tîg-i hışmın yâ nasîb

Görmeyince ‘ârızın ohşamayınca gabgabın
Bakma ey dil verd-i ra’nâyâ elüne alma sîb

‘Ârızunda ey sanem zülf-i perîşânun senün
Sanki su içre kilîsâda komışlardur salîb

Tûtî-i tab‘-ı Ziyâ’îyi kuçarsın sayd idüp
Şâh-bâz-ı evc-i istignâ mısın ey dil-firîb

-33-

Fe‘ilâtün Fe‘ilâtün Fe‘ilâtün Fe‘ilün

Minnet Allâha ki irdi yine ‘îd-i vuslat
Vuslat-ı yâr ile buldı dil-i bîmâr sıhhat

Sıhhat olursa rakîbi komayam sıhhat ile
Eyle bed-nâm ideyin anı olursa tâkat

Tâkatüm tâk olur görmeyeli hâk-i derün
Derüni mesken ideyin bulur isem fırsat

Fırsat el virse öpeydüm elini yârun ben
Ben kulıyla n’ideyin eylemez ol şâh ülfet

Ülfet eyler seg-i kûyunla Ziyâ’î her gün
Bir gün ey âhû seni sayd ider ol bî-minnet

-34-

Fe‘ilâtün Mefâ‘ilün Fe‘ilün

İtdün ey seng-dil beni katı saht
Bilmezim kim sitâremi yâ baht

Yok dime söyle ey dehân-ı ‘adem
Gonce-âsâ taralmasıun dil-i saht

Var ise itdi Bânî-i ezelf
Hâne-i ‘aşka derd-i gamdan raht

Şâhıdur mîr-i ‘âşıkân-ı bagun
Tâcı beg borkidür çemen ana taht

Gel şeh-i ‘aşka kulluk eyleyelüm

Ey Ziyâ'î ya taht ola yâ baht

-35-

Fâ'îlâtün Fâ'îlâtün Fâ'îlâtün Fâ'îlün
Çünkü cânundur güzeller zâhidâ cânun gözet
Uymasun dîv rakîbe ya'ni cânânun gözet

Ey şeh-i mülk-i cemâle dînüm îmânun diyen
Uydu yâr agyâra var sen dînün îmânun gözet

Her dem ol Yûsuf-likâ gözüm terâzûsındadır
Hâce-i bâzâr-ı 'aşk ol sen de mîzânun gözet

Dest-i hasret çekdi çâk itdi girîbânun dilâ
Kûy-ı dil-ber seglerinden bârî dâmânun gözet

Bir devâsız derde düşmişdür Ziyâ'î derd-mend
Ey dil-i haste yûri sen kendü dermânun gözet

-36-

Fâ'îlâtün Fâ'îlâtün Fâ'îlâtün Fâ'îlün

Câm-ı 'aşk ile beni itdi ezel sâkîsi mest
Bezm-i hâs itdükde ervâh-ı beşer rûz-ı elest

Sâyesi düşdüğü toprakdan düzilse bir sanem
Zannum oldur cümle 'âşıklar olurdu büt-perest

Göricek mescidde agyâra mahabbet kıldugun
Hûn-ı eşk-i çeşm ile 'âşıklar aldı âb-dest

Eşk-i çeşmüm seyl olup akmazdı zâhir dem-be-dem
Şîşe-i dil bulmasa seng-i havâdisten şikest

Râz-ı 'aşkun dilde saklardı Ziyâ'î lik çerh
Sille-i mihnet urup söyletdi anı çarb-ı dest

-37-

Mef'ûlü Mefâ'îlü Mefâ'îlü Fa'ûlün

Kendümde sanurdum var imiş kuvvet ü şevket
Meydân-ı belâya getürüp basdı kasâvet

Ta'n eylemen ol yârı seversem nazar eylen
Ol çeşm ü ol ebrû nedür ey ehl-i basîret

Son demde görürsem yüzün ol şâhid-i cânun

Ben mürde-i 'aşka yeter ol denlü şehâdet

İki gözümün şîşesi kumlarla pür olsun
Ger kuhl-ı gubâr-ı derün irmezse bu sâ'at

Cân virmededür derdünle haste Ziyâ'î
Ey gözleri bîmâr cihânda sana sıhhat

-38-

Fe'îlâtün Mefâ'ilün Fe'îlün

Olalı kâkülün şehâ zulmet
Tutsa dil mülkini dilâ zulmet

Tan mı havf itse dil şeb-i gamda
Korkuludur çü vâkı'â zulmet

Şeb-i hicründe hayâl-i lebün
Âb-ı hayvâna oldu câ zulmet

Göricek turra-i siyeh-fâmün
Tan mıdur kalsa ger tana zulmet

Zülfi sevdâsı ile hâne-i dil
Olsa tan mı Ziyâ'iyâ zulmet

-39-

Mef'ûlü Fâ'ilâtü Mefâ'ilü Fâ'ilün

Zevk ü safâ gelür bana derd ü belâ-yı dost
Mihr ü vefâdurur bana cevri ü cefâ-yı dost

Ey dil ümîd-i vashı ko bâtlı hayâl imiş
Çekmek gerek firakı budur muktezâ-yı dost

Ben hasteden dinüz ki etibbâ elin çeke
El virmedi murâdum idem merhabâ-yı dost

İnsâf idün ki himmetüm a'lâ degül midür
Bu geldi yâduma ki olam âşinâ-yı dost

Hîç Hakk revâ görür mi ki ben derdini çekem
Agyâr ile safâlar ide ey Ziyâ'î dost

-40-

Fâ'ilâtün Fâ'ilâtün Fâ'ilâtün Fâ'ilün

'Aklumı eyler perîşân kâkül-i hoş-bûy-ı dost

Cenneti unutturur âhir ümîd-i kûy-ı dost

Bu libâs-ı sebz ile bu şîve-i refât ile
Râstî şimşâda benzer kâmet-i dil-cûy-ı dost

‘Îd-ı vasla irmedin kurbân-ı cânân olmadın
Öldürür bizi eyâ bu ejder-i gîsû-yı dost

‘Akl u dil gitdi nigârâ kaldı ancak cân u ten
Kanda ise gözedür anlar da her dem sûy-ı dost

Râstî kaddüm Ziyâ’î bükdi bâr-ı derd-i yâr
Var ise sihr eylemişdür sâhir-i ebrû-yı dost

-41-

Mef‘ûlü Mefâ‘îlü Mefâ‘îlü Fa‘ûlün

Dendânunı vasf itmege her kim kıla niyyet
Bagrı delinür ey dür-i deryâ-yı letâfet

Mecnûn-ı ezel ‘aşk işini başa iletdi
Nevbet bize degdi sanemâ kâr-be-nevbet

Minnet iderem vuslatun ey ârzû-yı cân
Yohsa gam-ı hicrânuna ‘âlemde ne minnet

Bir gün umaram mihrüni ey mâh-ı dil-efrûz
Rü’yâda bana Şeyh-i Vefâ eyledi himmet

Nazmın had-i i‘câza iletmezdi Ziyâ’î
Ey mugbeçe olmasa ger ümmetde kerâmet

-42-

Mefâ‘îlün Mefâ‘îlün Mefâ‘îlün Mefâ‘îlün

Rakîbünle kıtâlüm kalmadı her dândan mîrâs
Gazâ bezminde şem‘ olmak bana Şem‘ûndan mîrâs

Belâ deryâsınun mâhîleriyle âşinâ oldum
Kalupdur bu kerâmet Hazret-i Zü’n-nûndan mîrâs

Benümdür şimdilik esbâb-ı derd-i ‘aşk-ı cânâne
Bana kalmışdur ol Ferhâd ile Mecnûndan mîrâs

Meger ey ehl-i dünyâ bu gurûr u bu enâniyyet
Size kalmış hemân Hâmân ile Kârûndan mîrâs

Dehânunla miyânun sırrını ma‘lûm idinmişdür

Ziyâ'îye bu hikmet kaldı Eflâtûndan mîrâs

-43-

Fâ'îlâtün Fâ'îlâtün Fâ'îlâtün Fâ'îlün

Eyledüm ol gül-ruhun kûyında agyâr ile bahs
İşidenler didi bülbül eylemez hâr ile bahs

Ol gözi hûnî beni eyler diyü âhir helâk
Eyledüm ben haste bir mest-i dil-âzâr ile bahs

Ey dil-i şürîde gel bahs eyleme agyâr ile
Mü'min olan eylemek câ'iz mi küffâr ile bahs

Mest-i aşkem yanuma gelmen beni âlemde kon
Müşkil olur meclîs-i sahbâda mey-hâr ile bahs

Ol dehân-ı gonce vasfında Ziyâ'î rûhumuz
Eylesün mülk-i âdemde Hâce Attâr ile bahs

-44-

Fe'îlâtün Fe'îlâtün Fe'îlâtün Fe'îlün

Şâh-ı aşkem virilür bana gam u gussa harâc
Başum üzre alev-i âteş-i âh altun tâc

Gice agyâr ile mescidde ne kıldun bilmem
Tanladum subha dek ol işüne ey hûb-mizâc

Dostum ugrayıcak kabrûme düşnâm ile
Ki olur mürdelerün rûhı du âya muhtâc

Ey tabîb-i dil ü cân derdüne düşdüm gitdüm
Şerbet-i la'lün olur bana ger olursa ilâc

Ümriü'l-Kaysa kıyâs itme Ziyâ'î şî'rün
Ki budur azb ü furât ol birisi milh-i ücâc

-45-

Mef'ûlü Fâ'îlâtü Mefâ'îlü Fâ'îlün

Uşşâka vir bâde-i sâfi safâ-yı rûh
Ashâb-ı zevke câm-ı mücellâ cilâ-yı rûh

Yok yok hatâ didüm leb-i sâkî murâd-ı dil
Ol bî-bedel izâr-ı musaffâ safâ-yı rûh

Cândur çeken belâ-yı leb-i la'l-fâmunı

Gam yok belâ-yı tende belâdur belâ-yı rûh

Pervâz-ı ney hemîşe bülend eylesün meded
Tâ evc-i kibriyâya irince hümâ-yı rûh

Erbâb-ı şevk anı okıdukca bulur hayât
Te'lîfün olsa tan mı Ziyâ'î gıdâ-yı rûh

-46-

Mef'ûlü Fâ'ilâtün Mef'ûlü Fâ'ilâtün

Hâlet-i firkat olmaz vasl-ı nigâra râcih
Fasl-ı hazân olur mı evvel bahâra râcih

Fikr-i visâlün olmaz kuçmak gibi miyânun
Olmaz miyân-ı deryâ zevk-i kenâra râcih

Hüsn ü cemâl ü nâz u reftâr u işve ile
Hübân-ı âlem olmaz ol şîve-kâra râcih

Ta'n itmen ehl-i aşka rüsvâ-yı âlem olsa
Aşk ehli aşkın eyler nâmûs u âra râcih

Rûşen bu kim Ziyâ'î aşk ehlinün yanında
Olmaz behişt-i âlâ dîdâr-ı yâra râcih

-47-

Fe'ilâtün Mefâ'ilün Fe'ilün

Sâkiyâ sun berü şarâb-ı sabûh
Ola meksûr gönlümüz meftûh

Lâ-cerem gark ideydi zevrakını
Salsa eşk-i çeşmüme Nûh

Ey sanem söyle fikr-i la'lün mi
Âsumân üzre cism-i İsâya rûh

Aşk yanında ol mehün mezmûm
Kendü âlemde hüsn ile memdûh

Vasf-ı la'lün Ziyâ'î şerh ide ger
Bir mutavvel kitâb olur meşrûh

-48-

Fa'ülün Fa'ülün Fa'ülün Fa'ül

Ferâmûş olunmaz safâ-yı kadeh
Hebâ ola mı hiç bahâ-yı kadeh

Tolar ehl-i bezmün sadâsıyla dehr
Okırlar meger kim du‘â-yı kadeh

Niçün imtizâc idemez sûfiler
İnen hoşdur âb u hevâ-yı kadeh

Bu devr içre sâkî bizi yâd itdün
Varup olalum âşinâ-yı kadeh

Çü şevke gelür içecek sâkiyâ
Ziyâ’îye lâzım ziyâ-yı kadeh

-49-

Fâ‘ilâtün Fâ‘ilâtün Fâ‘ilâtün Fâ‘ilün

Rind şûh u şem‘ şûh u sâkî vü peymâne şûh
Tan mı olsa yanuben yakılmada pervâne şûh

Kûh-ken gibi virürsem cân-ı Şîrînüm ne var
Oldı çün kim dostlar ol gözleri mest-âne şûh

Böyle küstâhâne kâfirlikler itme ey sanem
Vechi yok kim diyeler sen âfet-i devrâna şûh

Adı Mecnûn olmag ile ‘âşık olur mı kişi
Gitdi sahrâya hevâyaya uydı bir dîvâne şûh

Deşt-i şevk içre Ziyâ’î gibi Mecnûn olmaya
Çün dil-i şûrîde sevdi bir güzel cânâne şûh

-50-

Mef‘ûlü Mefâ‘îlü Mefâ‘îlü Fa‘ûlün

Çün hüsn ile ‘âlemde yok emsâl-i Muhammed
Olsa n’ola dil cân ile meyyâl-i Muhammed

‘Âlemde yeter mu‘cize-i bâhire bî-şekk
Ashâb-ı gam-ı ‘aşka ruh-ı âl-i Muhammed

San Bedr gazâsında ol ‘ârız-ı bedr ay
‘Uşşâkı şehîd eylemedür hâl-i Muhammed

San Ka‘be tavâfında Bilâl-i Habeşîdür
Ol ‘ârız-ı ra‘nâda hâl-i Muhammed

Kurbân-ı visâlinde beni eylese kurbân
Olmasa Ziyâ'î ne var ihmâl-i Muhammed

-51-

Mefâ'îlün Mefâ'îlün Mefâ'îlün Mefâ'îlün

Niçe bir çâh-ı gamda habs olam dil-haste vü nâ-şâd
Beni bu gamdan ey servüm idersen vaktidür âzâd

Reh-i mey-hânedede düşdüm gice kan mest-i hâk-âlûd
Meded gelsün beni pîr-i harâbât eylesün irşâd

Bana öykündi benzer 'âşık oldu cümle bu 'âlem
Ki feryâd u figânumdan ider halk-ı cihân feryâd

Gel insâf idelüm hiç böyle olmaz 'âşık-ı Şîrîn
Keserken Bî-sütûnı kesmedi ümmîdini Ferhâd

Ziyâ'î zulmet-i gamda gezer şâdân olup nâdân
Giriftâr-ı kafes bülbül yürür zâg u zagan âzâd

-52-

Fe'îlâtün Mefâ'îlün Fe'îlün

Âsitânundan ideli beni redd
Mededüm yok figâna dahı meded

Haddün üstinde hâl-i müşğînün
Yaraşur ziyâde fevk-al hadd

Bâde-i 'aşkun ile mest oldum
Gamun urdı bana hadd-i bî-hadd

Tan mı mecmû'-ı hâlüm anlatsa
Ol ferîd-i cihâna bir müfred

Menzili 'âkıbet Ziyâ'î'nün
Zekanun hasretinden oldu lahd

-53-

Fâ'îlâtün Fâ'îlâtün Fâ'îlâtün Fâ'îlün

Pâdişâhum ser-güzeştüm yazmak idündüm murâd
Eşk-i hûn-âlûd ile gördüm mürekkebdür midâd

Derd ü gamda âşinâlar anmaz olmuş hâlümü
Hiç olur mı kim ide ben hasteyi bî-gâne yâd

Ehl-i 'aşka zulm olur hergiz 'adâlet kalmadı

La'l-i şîrînünde vardur var ise 'âlemde dâd

Söyle ey kâfir o la'l-i şekkerînün meşrebin
Bî-halel midür 'akîdün idelüm mi i'tikâd

Ber-murâd olsa Ziyâ'î nâ-murâd olmaz 'aceb
Çün zaman oldu zamân-ı devlet-i Sultân Murâd

-54-

Mef'ûlü Fâ'ilâtün Mef'ûlü Fâ'ilâtün

Ey 'ırzı saklayan kişi var eyleme 'inâd
'Âşık degülsen eyleme derd-i serüm ziyâd

'Aşk ile 'ırzı bir yire yazsam da vechi var
Makbûldür gazelde begüm san'at-ı tezâd

'Aşk âteşi yakupdur şu resme hazrâyî kim
Gül-şende sanur anı gören tûde-i remâd

Agladugum budur ki dirîgâ vü hasretâ
Ümmîd var iken beni yâr itdi nâ-murâd

Kimdür diyen bana şeh-i hûbân dir isen
Kulun Ziyâ'î 'abd-i fakîr ez'afû'l-i bâd

-55-

Fe'ilâtün Mefâ'ilün Fe'ilün

'Aşk-ı Şîrîn ile kazandun ad
Şânîyem şimdi sana ey Ferhâd

Dest-i zulmünle pây-mâl itdün
Dâd elünden şeh-i cihânum dâd

Bûy-ı zülfün getürdi bâd-ı sabâ
Vâkıf olan didi mübârek bâd

Dâm-ı zülfünde mürg-ı diller çok
Cümleten saydunuz mı ey sayyâd

Nerm olmaz çü seng kalb-i nigâr
N'eyler imdi Ziyâ'iyâ feryâd

-56-

Fe'ilâtün Mefâ'ilün Fe'ilün

Kalmadı ben fakîre hây meded
Ne kapunda ricâ ne sende sened

Bülbül-i bâga bakma ey nergis
Getürür dîdeye remâd remed

Nâme gamz eylemiş beni yâra
Siyeh it yüzün ey midâd meded

Sana gönlüm kalur benüm cânım
Eyler isen beni kapundan red

Vardı dîvânelik yolın tutdı
Oldı şimdi Ziyâ'î ehl-i hired

-57-

Fe'îlâtün Mefâ'ilün Fe'ilün

Kaşun alnunda ey habîb-i ferîd
Âfitâb üzre şekl-i medd-i medîd

Subh-dem 'ârızun görüp ey mâh
Tarf-ı magribde tanlamış hurşîd

Tig-i cân-bahş-ı dil-rübâdan biz
'Âşıkuz idelüm mi kat'-ı ümîd

Düşeli câna zülf-i sevdâsı
Eyledüm bir niçe gazel tesvîd

Eski eş'ârı hep unutturdu
Ey Ziyâ'î bize bu tarz-ı cedîd

-58-

Fe'îlâtün Mefâ'ilün Fe'ilün

Hem-ser oldı o serv-kadde pelîd
Reşk-i nîze çekdi üstine bîd

Nâlesin dinle ben sitâresizün
Ne çalarsın yanumda ey Nâhîd

Ey gönül her nagamda inlersin
Neye eyler bu nâleler taklîd

Bilmeyen kadr-i cennet-i vaslun
Dûzah-ı hicride kalur câvîd

Görelî şevk-i mihr-i ruhsârın
Şevke geldi Ziyâ'iyâ hurşîd

-59-

Fâ'îlâtün Fâ'îlâtün Fâ'îlâtün Fâ'îlün

Seyr idem seyrümde dirdüm yârı dutardum ümîd
Gözlerümden uyhu dahı gitdi oldı nâ-bedîd

Bûse-i la'lin dirîg itdi dirîgâ ol sanem
Kat' idersem tan degüldür tatlu cânımdan ümîd

Kat' -i da'vî kılmaga 'uşşâka bir şâhid yeter
Tîg-i gam kâfîdür âhir itmege anı şehîd

Gönlümi habs itdi zindân-ı zenahdânında yâr
Zülfini zencîr kıldı 'aşkını muhkem kilîd

Ben helâkem buna kim düşmen bugün oynar güler
Ey Ziyâ'î rûz-ı mâtem olmasun mı rûz-ı 'îd

-60-

Mefâ'îlün Fe'îlâtün Mefâ'îlün Fe'îlün

Ciger-i gam sanemün bezmine kebâb-ı lezîz
Lebi hayâli ile eşk-i ter şarâb-ı lezîz

Çü cân virürdüm o la'l-i lezîzi yâd itdüm
Acun beni ki eceldür bana şarâb-ı lezîz

'Aceb mi yursam elüm çeşme-i hayâtımdan
Çü haste olana acı gelür her âb-ı lezîz

Gamundan eşküm akar gör zamân-ı bârândur
Bu hâb-ı mevtüm olur şimdi bana hâb-ı lezîz

Ziyâ'î ol sanemün sormadın lebini henüz
Ecel irişdi almadın dahı hâb-ı lezîz

-61-

Mefâ'îlün Mefâ'îlün Mefâ'îlün Mefâ'îlün

Mezârumda açılmış lâle sanman 'aks-i dâgumdur
Ricâlü'l-gayb kabrümde komış yâhûd çerâgumdur

Bi-hamdi'llâh ki başum pârelendi seng-i dil-berden
Karanfillerle zeyn olmuş benüm ra'nâ kabagumdur

Mahabbet bezm-gâhında sakınsun müdde'î benden
Derünüm âteşinden her 'alev yalun yaragumdur

Reh-i kûyunla tâk-i âsitânun tek bana kalsun

Hilâl ü keh-keşân asla ne çiftüm ne oragumdur

Bana bu 'âlem-i vâsi' de yir yok ana dil-tengem
Ziyâ'î şimdi ancak zulmet-i mihnet duragumdur

-62-

Mef'ûlü Fâ'ilâtü Mefâ'ilü Fâ'ilün

Dîvânelik zamânıdur eyyâm-ı nev-bahâr
Zencîre girdi sahn-ı çemenlerde cûy-bâr

Gûş-ı güle irişmez odur nâle kılduğı
Gül-şende bülbülitse eger nâle-i hezâr

Cân istemezdi şimdi 'avâm ihtilâtını
Bulsa eger ki kendüye mahsûs bir kenâr

Dûd-ı derûnum itdi felek sakfını siyâh
Âteş bıraktı gönlüme tâb-ı ruh-ı nigâr

Hüsrev gibi diyâr-ı sühanda Ziyâ'iyâ
Ben dahı bir ocak arayum şimdi nâm-dâr

-63-

Fâ'ilâtün Fâ'ilâtün Fâ'ilâtün Fâ'ilün

Hâkim-i hüsne gönül cân nakdini rüşvet virür
Vaslunı hükm eyleyüp hattun hemân hüccet virür

Cân virürdüm yolına makbûli olmaz korkaram
Katlüm isterdüm velî kattâlüme zahmet virür

Kâr-ı Ferhâdı begenmez niçeler yetmez mi kim
Kûh-ı gamda itdüğü 'âşıklara gayret virür

Anman eyyâm-ı firâkı işidenlerden ırak
Adın işitmek ne denlü âdeme heybet virür

Nazm-ı şîrînüm okursam şevk-i vaslunla n'ola
Eyle dirler dostum tuz ni'mete lezzet virür

Bengîler hayrân olurdu ger temâşâ kılısalar
Bana esrâr-ı leb-i dil-ber ne keyfiyyet virür

Hâlden hâlî degül nazm-ı selef ammâ benüm
Ey Ziyâ'î her sözüm çok şevk ü çok hâlet virür

-64-

Mefâ'ilün Mefâ'ilün Mefâ'ilün Mefâ'ilün

Kudûmı nev-bahâr u mevsim-i ‘ayşa ‘alâmetdür
Benefşe fi’l-mesel miftâh-ı bâb-ı bâg-ı cennetdür

Gel ey sâkî bahâr irdi getir câm-ı musaffâyı
Safâ kesb idecek demdür bu fırsat-ı ganîmetdür

Ben ol dîvâneyem zencîr-i zülfeynünledür fahrum
Bana ‘akl ehline uymak cihânda hayli zahmetdür

Senün cism-i latîfun bahr-ı behçetdür kenârı yok
Senün nâfun meger girdâb-ı deryâ-yı letâfetdür

Bu şi‘r-i âb-dârun görse ger Câmî sekâhu’llâh
Diyeydi kim Ziyâ’î sâkî-i bezm-i belâgatdur

-65-

Fâ‘ilâtün Fâ‘ilâtün Fâ‘ilâtün Fâ‘ilün

Yolına ‘âşıklar anun cân virür dörder beşer
Dir görenler ol melek-sîmâyı mâhirü’l-beşer

‘Âlem-i ‘işretde cûş itdi mahabbet çeşmesi
Câm-ı mey sanman müdâm anun ayagıdur akar

Bendeni giryân iden su‘bân-ı zülfeynün gibi
Görmedi düşünde Dahhak ey şeh-i Cemşid-fer

Savma kût-ı gussanı sâ‘im-i hicrânunı
‘Îd-i vaslunla sevindür ey hilâl-ebrû kamer

Va‘de eyler vaslın ammâ bî-vefâ itmez vefâ
Virmek Allâhun Ziyâ’î görelüm âhir n’ider

-66-

Mefâ‘ilün Mefâ‘ilün Mefâ‘ilün Mefâ‘ilün

Bugün lâleyle nergisden çemen pür zîb ü zîverdür
Biri Cem câmıdur sâkî biri tâc-ı Sikenderdür

Getür câm-ı sürür-encâmı sâkî devr-i güldür bu
Sabâ hem-pâ safâ hem-dest ü sahbâ hem-ser-i terdür

Görelen rûy-ı zîbân ile gîsû-yı perîşânun
Benüm ey hüsn-i nev-rûzum günüm gicem berâberdür

Erâzil pây-mâl itse beni incinmezem hergiz
Ki zîrâ bilürem gerdün ezelden dîn-perverdür

Beni şeh-i selâmetden bugün men‘ itdiler ammâ

Varup kûy-ı melâmetde karâr itmek mukarrerdür

Görinen üstühân-ı sîne sanman hây derd ehli
Tokınmış cevri-i dil-berden bana her biri hançerdür

İşitdüm ey şeh-i 'âlem ki câhillerle yâr oldun
Ziyâ'îyi unutma ol dahi bir câhil ebterdür

-67-

Mef'ûlü Fâ'ilâtü Mefâ'ilü Fâ'ilün

Ol şâhun itdügi bana zulm-i 'azîmdür
Bilmem günâhum da nedür Hakk 'Alîmdür

Her dem rakîbe mihr ü vefâ eyleyüp bana
Cevr ü cefâlar eylesen Allâh Kerîmdür

Râh-ı belâ misâfirinün derd ü mihnetin
Bilmez o kim diyâr-ı safâda mukîmdür

Mey meclisinde ol sanem-i mey-perestümün
Gûyâ dehân-ı bî-bedeli meyde mîmdür

'Ayn-ı 'adûya görünür ejder Ziyâ'iyâ
Gûyâ kalemi elde 'asâ-yı Kelîmdür

-68-

Fâ'ilâtün Fâ'ilâtün Fâ'ilâtün Fâ'ilün

Didüm ey sâkî meded gönlümde bir gam var gider
Câm-ı mey sundı didi huz mâ safâ da' mâ keder

Agır altun degerdi ol şeh-i mısır-ı bahâ
Kıymetin bilmezlere kendin satar ucuz düşer

'Ârızun üzre perîşân eyleme zülfeynüni
Lâ-cerem firdevs-i 'âlâ içre olmaz giceler

Müşkil-i 'aşkı soran gelsün ki destümde kalem
Dili ucında cevâbın her zamân hâzır dutar

Ey Ziyâ'î ekser eş'ârun beşer beyt eyledün
Pençe-i hurşîd-veş âfâkı tutsun ser-be-ser

-69-

Mefâ'ilün Mefâ'ilün Mefâ'ilün Mefâ'ilün

Derûnumda benüm sanman ki derd-i 'aşk dâğıdur
Melâmet tekyesidür hâne-i kalb ol çerâğıdur

Gönülden eksük olmaz fikr-i zülf ü çeşm ü müjgânun
Bu vîrân olası benzer harâmîler yatagıdır

Beden mihnet hisârı cân ise diz-dârıdır anun
Dikilmiş cismüm üzre yâreler birkaç yamağıdır

Gönül geçdi güzeşte dil-rübâlardan bugün ammâ
Hele ben bildüğüm ol serv-kaddün râst çâğıdır

Ziyâ'î târik-i târik cân-ı çâhîdür şimdi
Yirin anun sorarsan kasr-ı istignâ turagıdır

-70-

Fe'îlâtün Fe'îlâtün Fe'îlâtün Fe'îlün

Bana bir gün umarın vuslat-ı cânân virür
Ol Hudâ kim bir avuc topraga îmân virür

Ten-i zerdümde görüp 'illet-i 'aşkı didi yâr
'İllet ile dirilen mihnet ile cân virür

Dâğın ihsân idicek şöyle sevâb itdi nigâr
Bir yetîme sanasın şefkat ile nân virür

Derd-i 'aşka olalum râzı ki çün Hazret-i Hakk
Kimine derd virür kimine dermân virür

Yüri gam çekme Ziyâ'î ki ezel Kassâmı
Kimine vasl virür kimine hicrân virür

-71-

Fâ'îlâtün Fâ'îlâtün Fâ'îlâtün Fâ'îlün

Hasret-i gîsû-yı müşgînünle kaddüm dâl olur
La'l-i rengînün ümîdiyle bana çok âl olur

Câm-ı hasret sunma hey âfet helâk itdün beni
Bu mahabbet meclisinün bâdesi kattâl olur

Yâ irem bâğ-ı visâle yâ virem derdünle cân
Râh-ı 'aşkunda ümîdüm var bana bir hâl olur

Bir bir eylerdüm beyân agyâra işler kıldugum
Korkarın kim kıssa-i Seyyîd gibi Battâl olur

Zühd makbülümdür ammâ ey Ziyâ'î n'eyleyem
Leblerin yâd itdüğümce dil meye meyyâl olur

-72-

Mefâ'îlün Mefâ'îlün Mefâ'îlün Mefâ'îlün

Hevâ-yı kâkülünde raks ider gönlüm kebûter-vâr
Safâlar kesb ider cân âteş-i gamda semender-vâr

Gazelde lâm-elifdür Zülfekâr u tab' Düldüldür
Dilriyem bugün meydân-ı nazmun ben de Haydar-vâr

Harâba virmesün su' bân-ı âhum mülk-i dünyâyı
Yiridür ger çekilse cânib-i eflâke ejder-vâr

Ruhun terk eylesün bu reng ü âli Kaydefâ-âsâ
Sirişküm üstüne deryâ çeker yohsa Sikender-vâr

Kazıtdum kaşımı tavk eyledüm gîsûnı boynumda
Efendi baş açık abdâlundam ben de kalender-vâr

İrürsem Ka'be-i vasluna kıblem ömre sa'yum yok
Ki la'lün zezemimde Merve hakkı çok safâlar var

Nişânımdan sorarsa sûz-ı elfâzum görüp dil-ber
Çerâgundur Ziyâ'î dirler aydun bir sühan-ver var

-73-

Fe'ilâtün Fe'ilâtün Fe'ilâtün Fe'ilün

Dimem ey sûfi sana 'âşık olup dil-ber gör
Söz güherdür kulagun tut bir iki gevher gör

Olma keyfiyyet-i esrâr-ı gamun hayrânı
Ne gubâr-ı reh-i yâr ol ne leb-i dil-ber gör

Bülbül-i bâg-ı fenâ gibi ne feryâd eyle
Ne gül-istân-ı melâhatde gül-i ahmer gör

Ne leb-i la'line cân vir ne hayâl eyle saçın
Ne uyu makberelerde ne kara düşler gör

Dil-berün derd ü belâsın ko Ziyâ'î çeksün
Yüri sen savma'ada nûr-ı kerâmetler gör

-74-

Fâ'ilâtün Fâ'ilâtün Fâ'ilâtün Fâ'ilün

Yüzine tutar elini bakdugumca nâz ider
Âh elinden ol şeh-i hüsnün ki çevre yüz tutar

Ol perînün şîve ile yüzine el tutduğı
'Âşık-ı şûrîde-hâtırdan hicâb eyler meger

‘Ârızı hurşîd ü desti pençe-i hurşîddür
Yâsemenle gül-şen-i hüsn içre yâhûd verd-i ter

Fi’l-mesel oldı yed-i beyzâ-yı Mûsâ âşikâr
Anun için ehl-i ‘aşkun gönli şevk ile tolar

Bûse-i ruhsârı hayfâ kim nasîb olur ele
Zulmet-i gamda Ziyâ’î muttasıl derdin çeker

-75-

Mefâ’îlün Mefâ’îlün Mefâ’îlün Mefâ’îlün

Gönül âhlar ider feryâdın eflâke uçurmuşdur
Gözüm kan aklamaga başladı bilmem ne görmüşdür

Metâ’-ı bâde-i gül-reng inen satılmadı kaldı
Harâbâtîler ey sâkî meger ayaga urmuşdur

Leb-i cân-bahşın urdum mürde ihyâ kıldı cânânım
Gice var ise düşde Hazret-i ‘Îsâyı görmüşdür

Mahabbet şâhınun bir gözi baglu şâh-bâzıyam
Ecel murgın henüz avlatmayup koldan uçurmuşdur

Seher kaftânun açmış gül gibi bâga salınmışsın
Sanevberler Ziyâ’î gibi hep hayretde durmuşdur

-76-

Mefâ’îlün Mefâ’îlün Mefâ’îlün Mefâ’îlün

Dem-â-dem derd ile kan içdüğüm la’l-i lebündendür
Başum tob olduğu meydân-ı ‘aşka gabgabundandır

Egerçi hûrîler cennetdedür Allâh bilür ammâ
Benüm hûr-ı cinânım ey mu’allim mektebündendür

Güzel dil-ber sevüp sen bâde-i gül-reng içermişsin
Üşenme sûfî ‘aşk ehlinden anlar mezhebündendür

Hilâl eksüklüğün bildi görünce na’lçen nakşın
Ziyâsı kevkübün göklerde ‘aks-i kevkübündendür

Ziyâ’inün efendi şevki rûy-ı meh-veşündendür
Gam-ı hicrân ile zevk itdüğü yâd-ı lebündendür

-77-

Mefâ’îlün Mefâ’îlün Mefâ’îlün Mefâ’îlün

Saçun vasf itmede cânâ ne mihnetler çekilmişdür
Beyâza çıkmada hattun ne zahmetler görilmişdür

Senün râz-ı dehânun fehm idüp hıfz itmiş anunçün
Mu‘ammâ kısmınun ey nükte-dân adı çekilmişdür

Gice kasd eylemiş âheng-i âhum çıkmaga çerhe
Senün kûyun koyup yabana gitmişdür yanılmışdur

Bugün mey-hânededen mescid temâşâ kılmaga vardum
Kanâdîl adına gördüm ki bî-hadd câm asılmışdur

Hevâ-yı zülf-i dil-berde Ziyâ’î berg-i ümmîdüm
Gül-i gül-şen gibi ber-bâd olup gitmiş tagılmışdur

-78-

Mefâ‘ilün Mefâ‘ilün Mefâ‘ilün Mefâ‘ilün

Hevâ-yı kâkülünle ger olursam ‘âkıbet ber-dâr
Ümîdüm bu ki dünyâ halkı dirler ni‘me ‘ukbe’d-dâr

Düşelden çârsû-yı ‘aşka yandur nâr-ı ‘aşkunla
Hadîs-i hâce-i ‘âlemdür ehlü’s-sûkı ehlü’n-nâr

Firâkunda ümîd-i vuslatun endîşem olmuşdur
‘Aceb mi hastelikde sıhhat itse ârzû bîmâr

Reh-i ‘aşkunda dil gitdi belâ bu derd-i dil gitmez
Gider başum da gitmez başdan ammâ ‘aşkun ey dil-dâr

Ziyâ’î ‘âşık olmak çâr ‘unsurdan ferâgatdür
Vücûdum mahv kıldum ‘âşık oldum ben dahı nâ-çâr

-79-

Fâ‘ilâtün Fâ‘ilâtün Fâ‘ilâtün Fâ‘ilün

Sanma dellâlı ki ol mahbûb-ı dellâl gezdürür
Çârsû-yı ‘aşk-ı Yûsufda hemân cân gezdürür

Çârsû-yı ‘aşkda zülfün hayâliyle gönül
Tıfıldur gûyâ girüp bâzâra reyhân gezdürür

Var iken la‘lün zülâli kimse bakmaz sükkere
Sükkeri bâzârîler dükkân-ı bed-kân gezdürür

Biz ırakdan baksak eyler bize ta‘n ehl-i cihân
Dil-berün ra‘nâların hep şimdi nâdân gezdürür

Dil Ziyâ’î ol leb-i rengîni medh eyler yürür
Çârsû-yı mihnetün dellâlı mercân gezdürür

-80-

Mef'ûlü Fâ'ilâtü Mefâ'ilü Fâ'ilün

Âhum ki bir nefesde felekde vatan bulur
Kendin sakîm bâd-ı sabâyı esen bulur

Hicründe cân viren sevinür çün kefen geye
Müflis gibi ki yolda yeni pîrehe bulur

Her dem bana 'azâb u 'ikâb u 'itâbunı
İtme efendi çün ki cihânda iden bulur

Bulsam seni bu derd-i derünüm disem sana
Ammâ bulan sen âfeti kendin kaçan bulur

Mahv itdi derd-i 'aşkun efendi vücûdını
Bilmem Ziyâ'î bendeni gussan neden bulur

-81-

Mefâ'ilün Mefâ'ilün Mefâ'ilün Mefâ'ilün

'Adem mülkin bana seyr itdüren yârun dehânıdır
Benüm cism-i nahîfüm kıl gibi kılan miyânıdır

Beni gark itse tûfân-ı sirişke bin yaşar dil-ber
Hakîkatde bana ol rûh-ı sâni Nûh-ı sâni'dür

Degüldür penbe-i dâgum görinen başum üstinde
Benem Mecnûn-ı 'aşk ol mürğ-ı mihnet âşiyânıdır

Kanı sâkî-i sîmîn-sak ile câm-ı sürûr encâm
Cevânlık 'âlemi gül devri şeydâlık zamânıdır

Mahabbet kulzûminün sâhilinde kûh-ı mihnetde
Beden bir kal'adur kim derd ü hasret pâsbânıdır

Beni âvâre-i deşt-i cünûn iden nedür âyâ
Cevânun derdi mi yohsa cevânlık 'unfuvânıdır

Yüzün ak gül gibi ra'nâ lebün berg-i gül-i hamrâ
Cemâlün gül-şeni gûyâ letâfet gül-sitânıdır

Senün kurbânun olmak ey kaşı yâ geçdi gönlümden
Hedef olmak hadeng-i gamzene devlet nişânıdır

Sefîne keştî-i hikmet dür-i manzûmdur nazmum
Ziyâ'î şî'rümün her bahrı deryâ-yı ma'ânıdır

-82-

Fâ'ilâtün Fâ'ilâtün Fâ'ilâtün Fâ'ilün

‘Ârızun hicrinde eşk-i dîde Nîlün ‘aynıdur
Fi’l-mesel ‘aynen tusemmâ Selsebîlün ‘aynıdur

Derdden sûz-ı derûnum âteş-i Nemrûddur
Eşk-i çeşmün gussadan ‘ayn-ı Halîlün ‘aynıdur

‘Aynı ile dâguma benzer gül-i hamrâ-yı bâg
Nergis-i gül-zâr bu ‘ayn-ı ‘alîlün ‘aynıdur

‘Aynı ile ‘ârızun mânendidür mâh-ı münîr
Zât-ı pâkün gökde hurşîd-i cemîlün ‘aynıdur

Şevküm artar cismümi yakdukça nâr-ı nâz-ı yâr
Ey Ziyâ’î şem‘de yanan fetilün ‘aynıdur

-83-

Fe‘ilâtün Fe‘ilâtün Fe‘ilâtün Fe‘ilün

Bâgda bâd-ı hazân bulduğı eşcârı soyar
Şol harâmî gibi kim zulm ile tüccârı soyar

Pîrehensiz kodı ‘uşşâkı hayâl-i çeşmün
Muhtesib tut ki bulup zecr ile mey-hârı soyar

Nâ-gehân kadre irüp gönli murâdın buldı
Câme-hâb-ı şeb-i vuslatda şu kim yârı soyar

Bir yana şeyh soyar sûfî ider zühd ehlin
Bir yana pîr-i mugân fâsık-ı bed-kârı soyar

Gam-ı gamzen kodı ‘uryân Ziyâ’î kulunı
Tut ki cellâd-ı şehin-şâh güneh-kârı soyar

-84-

Mefâ‘ilün Mefâ‘ilün Mefâ‘ilün Mefâ‘ilün

Şolar kim bendeni gamz eyleyüp dîvânedür dirler
Senün çün ey perî-rû ‘akl alur cânânedür dirler

Mukayyed olduğu çün dil saçı zencîrine yârun
Niçe yirden işitdüm kim bana dîvânedür dirler

Mahabbet kulzümüne gark olanlar ittifâk idüp
Vefâ-yı dil-berân için ‘abes efsânedür dirler

Senün çün ser-be-ser ehl-i sivâ ey yâr-i gendûm-gûn
Melâhat hırmeninde hâsılı bir dânedür dirler

Harâbat erlerinden hâlini sordum Ziyâ’înün
Şarâb-ı bezm-i ‘aşk-ı yâr ile mest-ânedür dirler

-85-

Fâ'îlâtün Fâ'îlâtün Fâ'îlâtün Fâ'îlün

Derdün ile gönül cânâ geh aglar geh güler
Nite kim gurbet çeken şeydâ geh aglar geh güler

Gâh derd-i firkatünle gâh ümîd-i vasl ile
Dergehünde 'âşık-ı rüsvâ geh aglar geh güler

Gâh şebnemle tolar geh açılır gül-zârda
Şevk-i rûyunla gül-i ra'nâ geh aglar geh güler

Câm-ı 'aşkun mesti geh handân u geh giryân olur
Bezm-i meyde mest olan zîrâ geh aglar geh güler

Şevke gelmişdür Ziyâ'î gibi 'âşıkdur meger
Meclisünde şem'-i bezm-ârâ geh aglar geh güler

-86-

Mefâ'îlün Mefâ'îlün Mefâ'îlün Mefâ'îlün

Benüm cânân ile rûz-ı ezelde ittihâdum var
Visâl ile firâkun farkı yokdur i'tikâdum var

Vücûdum hırmenin bâd-ı fenâ mahv itdi ser-tâ-ser
Muhassal bu ki 'âlemde benüm ancak bir adum var

Bana ta'n itme ey zâhid eger âh idüp aglarsam
Benüm ol Kâsimü'l-erzâk işiginde murâdum var

Elem çekmem belâdan derd ü gamdan zerre derdüm yok
Benüm takdîr-i Mevlâya ezelden inkıyâdum var

Ziyâ'î herkesün bir mesnedi vardur bu 'âlemde
Benüm der-gâh-ı Gîti-âferîne istinâdum var

-87-

Fe'îlâtün Fe'îlâtün Fe'îlâtün Fe'îlün

Gören agyârı der-i yârda hannâs sanur
Seyr iden mekr ile telbîsini vesvâs sanur

Medh ider pîr-i mugânı o men'-i bâde-fürüş
Her kişi kendü atasın Hızır İlyâs sanur

Rûz u şeb halk uyımaz nâle vü feryâdumdan
Beni kûyunda görenler zarar-ı nâs sanur

Rûz-ı Hızır itdi kara cismümi taşlarla nigâr
Benzedüp kara libâsa anı il yâs sanur

Ey Ziyâ'î gam-ı 'aşk ile ganîdür dil-i pâk
Gören ammâ bizi gark-ı yemm-i iflâs sanur

-88-

Mefâ'îlün Mefâ'îlün Mefâ'îlün Mefâ'îlün

Be hey zâlim mahallen toprağı kan ile tolmuşdur
Misâl-i Kerbelâ hûn-ı şehîdân ile tolmuşdur

Benüm de kûy-ı cânân itlerine bergüzârum var
Seherde kâse-i kalbüm ciger kanıyla tolmuşdur

Bana rahm eylemen firdevs-i kûyından görüp münfekk
Derûnum hep hayâl-i vasl-ı cânân ile tolmuşdur

Belâ vü derd ü gam gönlümedür sen ey ferâh var git
Sana va'llâhi yir yok hücre yârân ile tolmuşdur

Ruhun vasfındaki şi'rüm ser-â-ser dehri tutmuşdur
Vilâyet Şeyh Sa'dînün Gül-istânıyla tolmuşdur

Gül-i fazl ey Ziyâ'î hiç bilür misin niçün yitmiş
Cihân gül-zârı hâr-istân-ı nâdân ile tolmuşdur

-89-

Fe'îlâtün Fe'îlâtün Fe'îlâtün Fe'îlün

Rûy-ı sıhhat görür ol haste geh yanagun öper
Tâze cân bulur o bîmâr geh tudagun öper

Gûşuna gizlü haber dir gibi olur mahzâ
Güsvârun eğilüp görünce kulagun öper

Pây-mâl-ı ser-i gîsû-yı perîşânundur
Dil-i âşüfte ki dâmen gibi ayagun öper

Mâlik-i mühr-i Süleymân olur ol 'âşık kim
Fırsat el virse ana bir gice tırnagun öper

Ey sabâ yâr Ziyâ'îyi sorarsa diyesin
Hâk-i râh-ı ser-i kûyundur o başmagun öper

-90-

Fâ'îlâtün Fâ'îlâtün Fâ'îlâtün Fâ'îlün

Bir 'aceb dîvâneym kendü sözümden bî-haber
Olmışam mest-i mey-i engür özümden bî-haber

Rûy-ı yârı görmedüm hâlin dahı seyr itmedüm
Tâli 'ümden gâfil oldum yıldızumdan bî-haber

Ol iki gözüm beni aglatmak ister hicr ile
Dem-be-dem kan agların iki gözümünden bî-haber

Yüzümi topraga sürdüm eyledi yüzbin cefâ
Olmışam her vech ile kendü yüzümünden bî-haber

Geldi cânân ey Ziyâ'î kendüm idrâk itmedüm
Yârdan gâfil dirîgâ kendüzümünden bî-haber

-91-

Mefâ'ilün Mefâ'ilün Mefâ'ilün Mefâ'ilün

Hurûş-ı bî-hûde erbâb-ı 'aşka nâ-münâsibdür
Ne çâre bu dil-i şeydânun ammâ 'aşkı gâlibdür

Revâ mıdur bana tenhâ cefâ-yı bî-hisâb itmek
Be hey sultân-ı 'âlem cümle 'âlem vasla tâlibdür

Bizi mahrûm kılmak vuslatundan nehy-i hâzırdur
Dehânun bûsesin teklîf kılmak emr-i gâ'ibdür

Senün gâr-ı zenahdânundaki diller belâ-keşdür
Okunmak kıssa-i Ashâb-ı Kehf ammâ 'acâ'ibdür

Münevver kıldun ey nûr-ı musavver bezm-i âfâkı
Çerâgun çak Ziyâ'ide çerâg olmak münâsibdür

-92-

Mefâ'ilün Fe'ilâtün Mefâ'ilün Fe'ilün

Firâk-ı yâr ile bî-hadd kasâvetüm vardur
Hezâr deftere sıgmaz hikâyetüm vardur

Visâl-i yâra irişdükde cür'et idemedüm
Zamân-ı haşr irişince nedâmetüm vardur

Şikâyet eylemezin kimseden benüm ammâ
Bu baht-ı şûmdan özge şikâyetüm vardur

'Îtâba müstahak olmagıçün el üzreyin dir
Benüm güzellere gâhî zerâfetüm vardur

Ziyâ'î şî'rine dahl itmesün 'inâdı kosun
Kelâmum anlamayan şahsa minnetüm vardur

-93-

Fe‘ilâtün Fe‘ilâtün Fe‘ilâtün Fe‘ilün

Ey açık kaşlu hayâli kaşınun şâm u seher
Kasr-ı ‘aşkunda yeter gözlerüme medd-i basar

..... safha-i sînemde gamun metni durur
Ehl-i derd olmayan anı bilimez şerha bakar

Şehre meşhûr olalı hüsn ile ol mâh-ı münîr
Rûy-ı hurşîde bugün eyleyemez kimse nazar

Zülfine gönlüm asar yâr günâhın sormaz
Gerçi Mansûrî sebepsiz bilürüz asmadılar

İltifât eylemez efgân-ı Ziyâ’îye habîb
Kulagum aldı diyü bülbüle bakmaz gül-i ter

-94-

Mefâ‘ilün Mefâ‘ilün Mefâ‘ilün Mefâ‘ilün

Dilâ bûs-ı leb-i cânâna magrûr olma firkat var
Bilürsin âhirinde bezm-i sahbânun nedâmet var

Ümîdün kes temennâ itme vaslın ehl-i derd ol kim
Cefâ-yı dil-beri çekmekde ey dil özge hâlet var

Gönüller nakdini almakda eyler hîleler peydâ
Zen-i dünyâya aldanma er isen erde gayret var

Ruhun bâgın temâşâ itmede ‘ömrüm safâ yokdur
İdiecek bir mesîre seyrini dilde meserret var

Bu Sa‘dî gör ki Fettâhî Ziyâ’îye mu‘în oldı
Kemâlinden Zahirün sözlerinden yeg selâset var

-95-

Mef‘ülü Fâ‘ilâtü Mefâ‘ilü Fâ‘ilün

Agyârdan şu dem ki sana yâr ola üç er
Tîrûnle bize bâl-ı belâ hep üçer üçer

Her bir melek yanında birer dîv var gezer
Yanında ol perî-ruhun ammâ beşer beşer

Şîr-i ner oldı disem o cellâda tan degül
‘Âşıkların çü katl ider onar onar

Bahr-ı gamun degüldür bir iki şinâveri
‘Âşıklarun bu bahrda cânâ yüzer yüzer

Kulun Ziyâ'î dirler efendi bu lü'lüyi
Bu bahr içinde nazm idici birer birer

-96-

Mefâ'ilün Mefâ'ilün Mefâ'ilün Mefâ'ilün

Gözümden yaş akar her dem gönülde bunca gussam var
Benüm iki gözüm çün dünyede bilmem dahı nem var

Niçe bir âteş-i hicrâna yakdun merhamet kıl kim
Benüm rûhum bilürsin dâr-ı 'ukbâda cehennem var

Dem-â-dem seyr ider hüsnün rakîb-i dîv-şekl ammâ
Cinân-ı kûyunı 'ömrinde görmez bunda âdem var

Ne denlü cevri iderse ol perî hiç ihtizâr itmez
Elem çekmekte hey dîvâneler bir özge 'âlem var

Ziyâ'î korkarın ter düşmesün gâyet de nâzıkdür
Güli ruhsâr-ı cânâna şebîh itmekte şübhem var

-97-

Fe'ilâtün Fe'ilâtün Fe'ilâtün Fe'ilün

Şâd ol ey sâim-i hicrân yine bayrâm gelür
Salını salını ol serv-i hırâmân gelür

'Ahd ü peymândan inen dönme inen ey rakkâs
Devrdür böyle bu kalmaz geçer eyyâm gelür

Gelse ger raks iderek bezme o hurşîd-i cihân
Tenüme cân irişür cânuma ârâm gelür

Merhabâ eylesin ola ki devlet vire el
Ey kalan rûze-i gamda gör e bayrâm gelür

Ey Ziyâ'î niçe kırılmaya halk-ı 'âlem
Çünkü ol piste-dehen gözleri bådâm gelür

-98-

Mef'ûlü Fâ'ilâtü Mefâ'ilü Fâ'ilün

Cellâd-ı çerh hey ne 'aceb hûn-rîz olur
Her ay başında mâh-ı nevi tîg-i tîz olur

Ger şimdi kurtulursa bu zindân-ı gussadan
Mısr-ı vücûd içinde begüm cân 'Azîz olur

Kanum dökerse bezm-i belâda gözün ne tan

Mest-i şarâb-ı 'işve olan cür'a-rîz olur

Leylâ işigini kodı sahrâya yüz tutup
Mecnûn-ı dest-i 'aşk 'aceb bî-temîz olur

Kaçsa Ziyâ'îden o vefâsız 'aceb degül
Âdemden işi vahşî gazâlun girîz olur

-99-

Mef'ûlü Fâ'ilâtü Mefâ'ilü Fâ'ilün

Çeşmi harâmîdür işi hep tutma urmadur
Mu'tâdı dâm-ı kâkülünün hîle kurmadur

Yıksak nihâl-i 'ömri n'ola emr-i yâr ile
Maksûdumuz murâdını anun bitürmedür

Ey hâk-i pâyı dîde-i 'uşşâka tûtiyâ
Bu âsitânededen garazun bizi sürmedür

Leylî-i zülfüne güzelüm ben mukayyedom
Mecnûnun işi dünyede bî-kayd oturmadur

Şeh-bâz-ı tab'a bu gazel-i ter Ziyâ'iyâ
Bi'llâhi hîç yalan degül ancak uçurmadur

-100-

Mef'ûlü Fâ'ilâtü Mefâ'ilü Fâ'ilün

Mahcûbdur hicâb ider ol yâr-ı şîve-kâr
Vaslına irmege nice yüz bin hicâb var

Gizlenme ey melek gel e göster cemâlünü
Derd-i derûnum eyleyesin bir bir âşikâr

Allâh ne şâh-bâz imiş ol hâl-i 'ârızun
Sîmurg-ı tab'um eyledi bir lahzada şikâr

Mâ'î geyen nigâra gönüller akar gider
Enhâr bahre nite ki fi'l-leyli ve'n-nehâr

Öpdî rakîb la'lüni olmaz mı bârî hîç
Bahr-ı gamun garîki Ziyâ'îye bir kenâr

-101-

Mefâ'ilün Mefâ'ilün Mefâ'ilün Mefâ'ilün

Mahabbet meclisinde bilürüz Mecnûmî 'âkildür
Melâmet san'atında Kûh-ken üstâd-ı kâmindür

Riyâ ile cemâlün mushafına nâzır olmuşdur
Senün zülf-i siyâhun Hak bilür kim kara câhildür

Leb-i la'lün ki anun teşnesidür Hızr u İskender
Rakîbe rûh-ı sânidür bana semm-i helâhildür

Görürler turrası tarrârdur hem gamzesi gammâz
'Acebdür ol gözi cellâddan bu halk gâfildür

Ziyâ'î subh-dem böyle işitdüm bir müfessirden
Habîbün rûy-ı hûbı hakkına ve'ş-Şems nâzildür

-102-

Fâ'ilâtün Fâ'ilâtün Fâ'ilâtün Fâ'ilün
Kâh olur şevk-i ruhun dil micmerinde od olur
Âhum ana dûd olur cân-ı hazînüm 'ûd olur

Defter-i 'uşşâk içinde vâsıl-ı vasl olanun
İsmi mevcûd olur ammâ cismi nâ-mevcûd olur

Sen melek-sîmâya zemm itmiş bizi bir müdde'î
Lâ-cerem şeytânlık iden 'âkıbet merdûd olur

Ey yüzi gül la'li mül dirsen gice mey içmedüm
Nergis-i mestün nedendür böyle hâb-âlûd olur

Gerçi eylersin Ziyâ'îye cefâ-yı bî-hisâb
İ'tikâdum var hisâb-ı mahşer-i mev'ûd olur

-103-

Fâ'ilâtün Fâ'ilâtün Fâ'ilâtün Fâ'ilün
Niçe vasl olam ki cânım cevr-i dil-berden kaçır
Bir yana cânân ise feryâd u âhumdan kaçır

Şâd ol ey dil cevrini çekmekde hâs oldun yine
Zulmini gören 'umûmen pâdişâhumdan kaçır

Didüm ey meh rûyunı seyr itmesün gîsûlarun
Didi gör dîvâneyi zülf-i siyâhumdan kaçır

Tagılursa jâleler yelden benüm de ey felek
Encüm-i seyyâre âh-ı subh-gâhumdan kaçır

Ey Ziyâ'î korkarın bir gün Kirâmen Kâtibin
Yazmada izhâr-ı 'acz eyler günâhumdan kaçır

-104-

Fâ'ilâtün Fâ'ilâtün Fâ'ilâtün Fâ'ilün

Var ise bî-çâre bülbül 'âşık-ı dîdârdur
Gicelerle nâle eyler subha dek bîdârdur

Bûy-ı ümmîd-i visâlünle senün dil hânesi
Ey gül-i gül-zâr-ı cennet külbe-i 'attârdur

La'î-i rengînünde ey meh-rû yine tebhâle var
Berg-i verd-i ahmer üzre şebnem-i gül-zârdur

'Ârız-ı cânâneye meyl eyledi gönlüm benüm
Lâleye konmuş hemân zenbûr-ı bî-mikdârdur

Merhabâsız yârdan el çek Ziyâ'î fârig ol
Devlet el virince sabr it bunda hikmet vardur

-105-

Mef'ûlü Fâ'ilâtü Mefâ'ilü Fâ'ilün

Âh itdügümce dil-bere te'sîr ider mi gör
Âhen mi gönli ol sanemün yâ hacet mi gör

Gamz itdi bülbül-i dili yâra rakîb-i zâg
Suç olmayınca ol gözi şâhin tutar mı gör

Salındı gitdi gül-şene dirler o serv-kadd
Ey dil teccüs eyle bu togru haber mi gör

Câm-ı zücâc içinde 'aceb reng bağladı
La'lünden utanup kızarur meyde şermi gör

Sevdi beni Ziyâ'î diyü taş uram didün
Evvel nazar kıl üstine anun düşer mi gör

-106-

Fâ'ilâtün Fâ'ilâtün Fâ'ilâtün Fâ'ilün

Yine cândan sevgilü ol şâh-ı hûbânum gider
Bir yana cânım gider bir yana cânânum gider

Gitdi rûz-ı vuslat irişdi şeb-i firkat yine
Cânib-i garba bu gün ol mihr-i rahşânum gider

Dagıl ey sabr u karâr ey gam harâmî-veş iriş
Mülk-i dil hâlî kalur devletlü sultânum gider

Ayrılık bilmem nedür hakkâ eceldür bu bana
Ey müselmânlar acun kim dînüm îmânum gider

Ey Ziyâ'î göz açup bir dahı bakmam 'âleme
Çün gözüm nûrı gider hem nûr-ı Yezdânum gider

-107-

Fâ'îlâtün Fâ'îlâtün Fâ'îlâtün Fâ'îlün

Ey dil-i pejmürde müjde şâh-ı hûbânım gelür
Ol leb-i 'Îsâ irişür seyrine cânım gelür

Dostlar tan mı kıyâmet kopsa düşmen başına
Tarf-ı magribden benüm hurşîd-i rahşânım gelür

Başladı cân u gönül iklimi ma'mûr olmaga
'İzzet ile şehrine sultân-ı hûbânım gelür

Ol sanem kâfirlik itmez ey müselmânlar bilün
Dînüm için i'tikâd eylen ki îmânım gelür

Zulmet-i hicre düşenler âb-ı hayvân istesün
Ben Ziyâ'îyem benüm ol nûr-ı Yezdânım gelür

-108-

Fe'îlâtün Fe'îlâtün Fe'îlâtün Fe'îlün

Germ olup olma inen ey meh-i garrâ magrûr
Ne kadar olmuş isen hüsn ile şehre meşhûr

Bedenüm kal'asını yıkdı harâmî-i gamun
Ezel olduğu gibi olmaya 'ömren ma'mûr

Bir perişânlığı var başın asar her tarafa
Mey-i şebnemden olupdur gül-i hamrâ mahmûr

Dil-berün derd ü gamı cânumuza minnetdür
Vâmika sorsan olur 'işve-i 'Azrâ ma'zûr

Zulmet-i gamda Ziyâ'îyi ferâmûş itme
Germ olup olma inen ey meh-i garrâ magrûr

-109-

Mef'ûlü Fâ'îlâtü Mefâ'îlü Fâ'îlün

Çün ol perî cemâl ilinün serveri çıkar
Ey nergis imdi başdan o zer efseri çıkar

Aylarca ben yüzün göremem lîk her gice
Ol âfîtâba encüm iken müşterî çıkar

Dîv rakîbi öldürecek var ümîdümüz
Bir gün bu dehr-i pîre-zenün bir eri çıkar

Zindân-ı derde salınca kendüyi bir kişi

Mısr-ı mahabbetün görürin serveri çıkar

Gitsün bu 'akl kârbânı tagılsun Ziyâ'iyâ
Nâz ile çünkü karşumuza ol perî çıkar

-110-

Mef'ûlü Fâ'ilâtü Mefâ'ilü Fâ'ilün

Bir haste yok cihânda ki benden beter düşer
Tîr-i kazâ efendi bana ol kadar düşer

'Âlemde bundan özge elem var mıdur 'aceb
Kim vasl ümîdi var iken ansız sefer düşer

Her kim sorarsa 'âlem-i 'aşkun haberlerin
Bir hâlet irişür ana kim bî-haber düşer

Mihmân olunca tekye-i derdünde dem-be-dem
Bu dâne-i sirişk önüme mâ-hazar düşer

Dirmiş rakîb gönli düşer bana dil-berün
Va'llâhi ibtidâ başına bir hacer düşer

Bilmem efendi kim bu ne sırr-ı 'acîb olur
Şi'r-i Ziyâ'î la'lün anıldukça ter düşer

-111-

Mefâ'ilün Mefâ'ilün Mefâ'ilün Mefâ'ilün

Bahâr şâd olur 'âkiller anca i'tibar eyler
Bizi dîvâne-i şehri belâ evvel bahâr eyler

Zer çehremle sîm-i eşküme mesrûr olur gönlüm
Gedâyı kîmiyâ-yı mâl-hulyâ mâl-dâr eyler

Ne hikmetdür bu kim 'aşk bakmaz vâ'iz ile şeyhe
Cihânda hıdmet-i pîr-i mugânı ihtiyâr eyler

Didüm la'lün umarken niçün oldı bâr-ı gam yirüm
Didi kim ârzû-yı mey kişiyi ehl-i nâr eyler

Ziyâ'î var ise perrîdür ol bizden kaçır dil-ber
Ya vahşî âhûdur insânı gördükçe firâr eyler

-112-

Mef'ûlü Fâ'ilâtü Mefâ'ilü Fâ'ilün

Allâh ki beşer şöyle turmayup gider
Gûyâ cihânda kimse safâ sürmeyüp gider

Biz 'ömre mâliküz dirüz ammâ görmezüz
Leyl ü nehâr kendümüzi sormayup gider

Ben hâzır olmayup yoluma gâfil iken âh
Gördüm ki 'ömr kâfilesi turmayup gider

Dirdüm ki şâd olam n'ideyin şâh-bâz-ı 'ömr
Mürg-ı melâletüm henüz uçurmayup gider

Acun Ziyâ'î hasteyi derd-i firâk ile
Mülk-i bekâya sevdüğünü görmeyüp gider

-113-

Fâ'ilâtün Fâ'ilâtün Fâ'ilün

Ehl-i 'aşkun virdi cânân ismidür
Haste diller cânı anun cismidür

Bilmezin kim cânâ keyfiyyet viren
Şevk-i la'lün mi mey-i meclis midür

Derdümi itmen benüm Kaysa kıyâs
Bana âhûlar görün mûnis midür

Füls-i eşk-i çeşm hadsiz var iken
Pâdişâhum her gedâ müflis midür

Duhter-i rezdür senün medh itdügün
Hey Ziyâ'î sevdüğün zen kısmıdur

-114-

Fâ'ilâtün Fâ'ilâtün Fâ'ilâtün Fâ'ilün

Tanlaman 'uryân isem ben 'ârı bilmem kandadur
Süst-i 'aşkem cübbe vü destârı bilmem kandadur

Ol vefâsız yârı ararken yitürdüm kendümi
Kendümi bulmak kanı dil-dârı bilmem kandadur

Derd-i dilden ta'n-ı düşmenden şikâyet kılmaga
Gösterün Allâh için hünkârı bilmem kandadur

Rub'-ı meskûnı bütün bahş itseler eksükliye
Hîçe saymam bilürem kim yârı bilmem kandadur

Gîsû-yı fettânı dil mülkini vîrân eyledi
Hey meded ol mekri çok 'ayyârı bilmem kandadur

Bilmezin ol gamzesi gammâzı kanda arayam

Hey dirîg ol turrası tarrârı bilmem kandadur

Kanum ier ey Ziyâ'î dem-be-dem geri hasûd
Ben henüz ol gözleri hûn-hârı bilmem kandadur

-115-

Fâ' ilâtün Fâ' ilâtün Fâ' ilâtün Fâ' ilün

Yirde yaşum katresin bahr-ı mükedder sandılar
Âsumân üzre şerâr-ı âhum ahter sandılar

Yandugınca nâr-ı gam derdinden irdi bûy-ı misk
Gönlümi erbâb-ı şevk Allâh ki micmer sandılar

Gönlümüz nâr-ı gamunla çok safâlar kesb ider
Anda bu hâlâtı görenler semender sandılar

Cân 'azîz olduğına bakmayup itdiler fedâ
Yûsuf-ı Mısra seni şâhum birâder sandılar

Dil-rübâlar mâ'il oldılar Ziyâ'î hasteye
Var ise anun sararmış yüzini zer sandılar

-116-

Mefâ' ilün Mefâ' ilün Mefâ' ilün Mefâ' ilün

Zemîne sanma kim zülzâl irişür nâ-gehân ditrer
Teb-i hicrândan ol şûhun bugün cümle cihân ditrer

Perîler şerrine ugramış âdem gibi vâveylâ
Görenler ol perî-ruhsârı cânım her zamân ditrer

Dilâ câm-ı ezel mahmûrısın kim dîde lertzânun
Mülâyim dil-berün câm-ı lebin tutsa hemân ditrer

Tabîb-i cânsın ihsân eyle la'l-i şerbetinden gel
Teb-i hicrânuna düşmüş bu cân-ı nâ-tüvân ditrer

Ziyâ'î katlüme kasd itse ol âfet sürûrumdan
Gözüm segrür nişânım deprenür cismümde cân ditrer

-117-

Mefâ' ilün Mefâ' ilün Mefâ' ilün Mefâ' ilün

Şeb-i firkatde şevküm arturan gün yüzli mâhumdur
Fürûg-ı çeşm-i 'âlem-bînem ol nûr-ı İlâhumdur

Cihân eyler şikâyet pâdişâha zulm-i zâlimden
Belâ bu kim bana zulm eyleyen ol pâdişâhumdur

Belâlar hırmeni yanında gelmiş kâh idüm şimdi
Tutuşdum 'aşk oduyla âh-ı dil dūd-ı siyâhumdur

Görinen keh-keşân ü mâh-ı bedr eflâkda sanman
Seher vakdinde âh itdüm benüm ol şekl-i âhumdur

Gice hurşîdümi gördüm Ziyâ'î mâh-ı nev sanma
Ki şevkümden sipihre atdum anı şeb-külâhumdur

-118-

Fe'îlâtün Fe'îlâtün Fe'îlâtün Fe'îlün

'Acebâ şebnem ü nergis mey ü peymâne midür
Devr-i gül irdi çemen 'arsası mey-hâne midür

Bûstân-ı ceberût-ı subhda çerh-i kebûd
Varak-ı sûsen olupdur ki Şüreyyâ nemidür

Bana bir çâre İlâhî ki zebûn eyledi gam
Haber-i vasl-ı şeyh efsûn mı efsâne midür

'Aklum aldıysa perîler bana dîvâne dimen
Her metâ'ın yitiren sehv ile dîvâne midür

Zulmet-i gamda Ziyâ'î niçe bir şevke gele
İntisâbı 'aceb ol nûr-ı dirahşâna midür

-119-

Fa'ûlün Fa'ûlün Fa'ûlün Fa'ûl

O bâlâ sanevber gedâdan kaçır
Meger kim belâdur du'âdan kaçır

Belâsı devâsızdurur var ise
Tabîbüm dil-i mübtelâdan kaçır

Ben ol zülfe irmek ricâsındayam
Egerçi cihân ejdehâdan kaçır

Koyan Ka'be-i kûyun â kiblem ol
Gider Merve hakkı safâdan kaçır

Gamun odına n'idügin dilemez
Ziyâ'î nedendür ziyâdan kaçır

-120-

Fe'îlâtün Fe'îlâtün Fe'îlâtün Fe'îlün

Şîveler kim bana ol şâhid-i Ken'ân satar
Nakd-i cânım da alursa kati erzân satar

Penbedür cism-i latîfi o şeh-i mısır-ı bahâ
Oturur kûşe-i dükkânda kettân satar

Zehr-i kahrın içirüp mihnet ile cân virürin
Ki leb-i şerbetin agyâra hüsn-i cân satar

Ehl-i 'aşka sanemâ sîm-tenün virme sakın
Akça üstine ölür her birisi cân satar

Kim ola tab'-ı Ziyâ'îye ki tahsîn itmez
Söyler ol medh-i hasen san'at-ı Hassân satar

-121-

Fe'îlâtün Fe'îlâtün Fe'îlâtün Fe'îlün

Kendüye dost beni kendüye bed-hâh bilür
Çekdügüm zahmeti bilmez henüz Allâh bilür

Gam usandurdu beni cân u cihân mülkinden
Yok mıdur kimse 'adem kişverine râh bilür

Yıkma gönlüm sakın ey âfet-i devrân sakın
Ka'be yıkmakça günâhı olur Allâh bilür

N'ola ger derdüne düşdiyse gönül gam yimezem
Ola kim vird-i tevekkeltü 'ala'llâh bilür

Saglar hâl-i Ziyâ'îyi n'ola bilmez ise
Ol gözi haste hele sellemehu'llâh bilür

-122-

Fe'îlâtün Mefâ'ilün Fe'îlün

İki şâhiddür ol iki ruhsâr
Da'vî-yı hüsn iderse vechi de var

Gül ruhın görsem gül-sitânda
Zehr-i kâtil gelür bana ezhâr

Gam siyâset-gehünde Mansûruz
Leyse fi'd-dâri gayruhû deyyâr

Nâr-ı ruhsârı yakdı cânumuzı
Ve kınâ rabbenâ 'azâbe'n-nâr

Zenahında Ziyâ'iyâ dil ü cân
Şânî isneyni iz humâ fi'g-gâr

-123-

Fe‘ilâtün Fe‘ilâtün Fe‘ilâtün Fe‘ilün

NaHS iden tâli‘ümi ol meh-i tâbânumdur
Bî-sitâre kılan ol mihr-i dırâşânımdur

Kanlu dâgum elemünden senün ey lâle-‘izâr
Bağ-ı sînemde açılmış gül-i handânımdur

Sâkiyâ teşne-dilem câmunı yâ lâlünü sun
Kangısın himmet idersen o benüm cânımdur

Kanın içdi cigerin deldi dilün gamze-i yâr
Acısam n’ola birâder cigerüm kanımdur

Ey Ziyâ’î şeh-i iklîm-i belâyem şimdi
Cümle şevk ehli benüm kâtib-i dîvânımdur

-124-

Mef‘ûlü Fâ‘ilâtü Mefâ‘ilü Fâ‘ilün

Ümmîd odur ki eyleyesin gâh geh nazar
Düşdükçe lutfunı umar ey şeh üftâdeler

Yaşum oluklar itdi ruh-ı zerdüm üstine
Ol Ka‘be-i cihâna bu altun oluk yiter

Ka‘be hakkı çün ehl-i mahabbet cemâlünü
Kıble idindiler sanemâ gör ne kıldılar

Kıblem hatundan irür âhir hüsnüne zevâl
Dirler esâs-ı Ka‘beyi âhir Habeş yıkar

Şevk-i ruhun bu çeşm-i pür-eşk-i Ziyâ’îde
Gûyâ fetîl-i âb-ı kanâdıldür yanar

-125-

Fâ‘ilâtün Fâ‘ilâtün Fâ‘ilâtün Fâ‘ilün

Meclis-i ‘aşka melûl olup gelen hürrem gider
Nite kim giden der-i mey-hâneden bî-gam gider

Mest-i ‘aşk-ı cân olup geçdüm cihân u cândan
Kanda kim keyfiyyet-i mey gelse andan gam gider

Didüm ey gül hüsnün açmış bâda virme jâlemi
Hande-i nâz eyleyüp didi yanımdan nem gider

Çok kişi olur helâk irince kasr-ı vasluna
Cennet-i kûyun makâm olunca çok âdem gider

Câm-ı Cem nûş it Ziyâ'î gibi 'âlemde müdâm
Bezm-i 'âlemdür bu şâhum câm kalur Cem gider

-126-

Mef'ûlü Fâ'ilâtü Mefâ'ilü Fâ'ilün

İçdüm şarâb-ı 'aşkunı mest-ânelik budur
Yandum çerâg-ı şevküne pervânelik budur

Görmek dilerse beydak-ı hâl-i ruhun rakîb
Açmaz ko şâhum arada ferzânelik budur

Zencîr-i zülf-i Leylâya Mecnûn esîr iken
Sahrâya kaçdı bir dahı dîvânelik budur

Deryâ-yı gamdaki ezeli âşinâların
Yâd eylemez o mug-beçe bî-gânelik budur

Gördün zen-i zamâne vefâ eylemez sana
Terk it Ziyâ'iyâ anı merdânelik budur

-127-

Mef'ûlü Fâ'ilâtü Mefâ'ilü Fâ'ilün

Âh ol dehen diyâr-ı dili ser-be-ser yakar
Bir şehri gâh olur ki düşer bir şerer yakar

Gönlüm yıkıldı cânuma od düşdi hak bu kim
Sultân-ı 'aşk kanda ki konya yıkar yakar

Seyyâre sanma kayyûm-ı kudret sabâha dek
Gör câmi'-i sipihre ne kandiller yakar

Gam külheninde yandı kül oldu vücüdümüz
Nâr-ı kazâ efendi bizi ol kadar yakar

Hâkister oldu bülbül ü âteş kırmızı gül
Benzer Ziyâ'î bülbüli bir verd-i ter yakar

-128-

Mef'ûlü Fâ'ilâtü Mefâ'ilü Fâ'ilün

Bindi semend-i nâzına ol şeh-süvârı gör
Sayd itdi mürg-ı cânımı didi şikârı gör

Âh eyleyüp didüm ni ki bu gubâr-ı hat
Güldi o gonçe-leb didi kim rûzgârı gör

Cânlar virür ol saneme yâdigâr için

Cân virmek ister engel yâdigârı gör

Çeşmi hayâli ile gözüm uykuya varur
Ey cân gelürse üstüme uyarıgör

Evvel mülâyemetle dil aldı Ziyâ'iyâ
Âhir ne kıldı n'eyledi ol şîve-kârı gör

-129-

Fe'îlâtün Mefâ'ilün Fe'ilün

Gördüm ol kadd-i muntehî salınur
Âh kim cânuma belâ salınur

Gül-şen-i dehrde o serv-i revân
Cânuma kılmaga cefâ salınur

Salar anca garîbi topraga
Nâz ile çün o dil-rübâ salınur

Rûzgâr-ı cihân muhâlifdür
Korkarın yâr bir yana salınur

Ruh-ı yârı Ziyâ'iyâ göricek
Kara gönlüme ziyâ salınur

-130-

Fâ'îlâtün Fâ'îlâtün Fâ'îlâtün Fâ'ilün

Hastalıklar cismüme ol çeşm-i şehlâdan mıdur
Bu belâlar başuma ol kadd-i bâlâdan mıdur

Zülfün ucından mıdur gönlüm perîşân olduğu
Her zamân derd ü belâ Mecnûna Leylâdan mıdur

Mahremündür gayrılar ben böyle mahrûm olduğum
Kara bahtumdan mıdur yohsa bu sevdâdan mıdur

Zülf ü 'ârız fikri uyutmaz beni leyl ü nehâr
Bilmezem dilden midür derdüm dil-ârâdan mıdur

Mey içer la'lün öper cânâ Ziyâ'î dem-be-dem
Şevki la'lünden midür câm-ı musaffâdan mıdur

-131-

Fâ'îlâtün Fâ'îlâtün Fâ'îlâtün Fâ'ilün

Sohbet eylen yâr ile vakt-i bahâr elden gider
Bâde nûş eylen kenâr-ı cûy-bâr elden gider

İledün pîr-i mugâna bir du‘â kılsun bana
Mest-i ‘aşkem korkarın kim ihtiyâr elden gider

Ey müselmânlar melâmet eylemen âh eylesem
Kûy-ı yâra varıcak nâmûs u ‘âr elden gider

Ey gönül cevri ni zevk anla cefâsını vefâ
Bir zaman olur ki yâr-ı şîve-kâr elden gider

Göricek yârun cemâlin ‘aklum olur târ u mâr
Bir belâdur görmesem sabr u karâr elden gider

Ey süvâr-ı esb-i nâz inende magrûr olma kim
Başuna sevdâ düşer bir gün mehâr elden gider

Ey Ziyâ’î mest olalum şevkine ol meh-veşün
Bir dem olur kim şarâb-ı hoş-güvâr elden gider

-132-

Fe‘ilâtün Fe‘ilâtün Fe‘ilâtün Fe‘ilün

Gül-şen-i dehrde zevk eyleyecek günlerdür
Ak şükûfeyle ağaçlar sanasın çâderdür

‘Üddur nâlelerüm sînede hod âteş-i gam
Kulzüm-i gamda gönül sandalı micmerdür

Hâne-i dil ki kızardur anı âteş-i gam
Fikr-i kalbünle hemân külbe-i âhen-gerdür

Gördi kan agladugum acıdı ol şîrîn-leb
Sevinüp kesb-i safâ eyleyecek demlerdür

Ey Ziyâ’î niçe gencîne olur vuslat-ı dost
Halka halka saçınun turreleri ejderdür

-133-

Fe‘ilâtün Mefâ‘ilün Fe‘ilün

Şevküm ol âfitâb-ı enveredür
İntisâbum meh-i münevveredür

Tan mı gün görmese belâlu gönül
Şâm-ı hicründe kaldı şeb-peredür

Koynuma gir esirge kuzucagum
Bedenüm başdan ayaga beredür

Fikr-i kalbünle revzen-i çeşmüm
Güyyâ bir demirli penceredür

Tâli'î nahs yıldızı düşkün
Rûy-ı bahtı Ziyâ'înün karadur

-134-

Mefâ'îlün Mefâ'îlün Mefâ'îlün Mefâ'îlün

Elinde kâse-bâzun kâse sanma ey dil-i meksûr
Yuvasın bülbül-i cân itdi şâh-ı servde ma'mûr

Elinde kâsedür sanman melâhat gül-sitânında
Açılmış tâze güldür gül budagında degül mestûr

Ayaguna iderdi ser-fürü çînî saçun gibi
Elünde devr ider görse bu kâşî kâse-i fagfûr

Güzellikde tatalum mâhı bir barmakda oynatdun
Gel ey hurşîd-i 'âlem-bînüm olma hüsnüne magrûr

Gözüm nûrî Ziyâ'î kabrine raks iderek gelsen
Mezârında görenler diyeler kim cilve eyler nûr

-135-

Fe'îlâtün Mefâ'îlün Fe'îlün

Hâl-i 'uşşâkı ehl-i hâl anlar
Gam-ı cânânı pür-melâl anlar

Leblerün kadrini benüm cânüm
Teşne-i çeşme-i zülâl anlar

'Alev-i sûz-ı sînem ol meh-rû
Sakf-ı eflâkda hilâl anlar

Kudretüm yok söze görünce yüzün
Yâr ben derd-mendi lâl anlar

Yüzün aydın Ziyâ'iyâ çün kim
Şevkün ol nûr-ı Zü'l-celâl anlar

-136-

Fâ'îlâtün Fâ'îlâtün Fâ'îlâtün Fâ'îlün

Niçe girdi destine cellâd-ı mevtün Sâmi gör
Dâmına düşdi ecel sayyâdınun Behrâmı gör

Turmasun devr eylesün meclisde sâgar sâkiyâ
Sür'at-i devr-i zamânı gerdiş-i eyyâmı gör

Ârzû-yı kevser ü firdevs idersen zâhidâ

Ol zülâl-i la'li seyr it ol ruh-ı gül-fâmı gör

Ey belâ deşinde Mecnûnı temâşâ kılmayan
Gel hemân hâmûn-ı gamda bu dil-i şeydâmı gör

Bilmek istersen eger ehl-i cahîmün hâlini
Nâr-ı firkatda Ziyâ'î çekdügi âlâmı gör

-137-

Fâ'ilâtün Fâ'ilâtün Fâ'ilün

İltifât itse bana ol serv eger
Gül-şen-i kalbüm ebed âbâd ider

Ol kaşı yâ tîr urursa sîneme
Kısmet-i gamdan bana sehmüm deger

Çîn-i zülfinde gice mihr-i ruhın
'Arz idince ol meh oldı çın seher

Dâg-ı sîne seng-i mihnetden nişân
Şerha-i ten tîg-i dil-berden eser

Ol saçı Leylâ beni Mecnûn idüp
Ser-güzeştüm ellere destân ider

Şevket-i hârı temâşâ eyle kim
Gül-sitânda bülbüle hançer çeker

Zâhid-i huşka kurı efsânedür
Ey Ziyâ'î gözden akan yaşlar

-138-

Mefâ'ilün Mefâ'ilün Mefâ'ilün Mefâ'ilün

Ne sükkerdür leb-i dil-ber ki diller ana mâ'ildür
Meger kim sûre-i Kevser anun hakkında nâzildür

Başum râh-ı mahabbetde ceresdür kim figân eyler
Sadâlar virmege gûyâ zebânum ana bir dildür

Bize 'arz itmeyelden 'ârızun bir aydur ey meh-rû
Yiler âhum yili kûyunda ammâ bir niçe yıldur

Leb-i şîrînüne cân meyl iderse anı men' itme
Lebün zevkin begüm sormak diler kapunda sâ'ildür

Eger bir bûsene cânın dilersen cân atar cânâ
Ziyâ'î dahı 'âkil kişidür ma'kûle kâ'ildür

-139-

Mefâ'îlün Mefâ'îlün Fa'ûlün

Fakîrem eyle ihsân ey cefâ-kâr
Visâlün meyvesinden bana her bâr

Hicâb itme kulundan kim figânum
İder âhir cemâlün perdesin zâr

Sovuk sözlü rakîbe degme lutf it
Sana kim dir ki el kar berfe ey yâr

Gül-i bî-hâridur çün kim behiştün
Kanı kimdür mahallende diken hâr

Ne var yanarsa şem'-i meclis-ârâ
Ziyâ'îyüz bezmde şevkümüz var

-140-

Fe'îlâtün Mefâ'îlün Fe'îlün

Ol meh efrâd-ı hüsni câmi'dür
Lîk agyâra gayrı mâni'dür

Cân u dil nakdine ziyân eyler
Ol ki esbâb-ı vasla mâni'dür

Ulu yoldur tarîk-i 'aşk-ı habîb
Gönlümüz ol tarîke şâri'dür

Bana lâzım mı bu ta'addîler
Hod günâhum da gayr-ı vâki'dür

Ey Ziyâ'î gül-âbdur eşküm
Ki sadâ-yı firâka nâfi'dür

-141-

Mef'ûlü Fâ'îlâtü Mefâ'îlü Fâ'îlün

Cânân çıkınca taşraya cânüm çıkar gider
Ger çıkmaya sipihre figânum çıkar gider

Âzâde ola dil çeh-i gamdan ki gayr ile
Gül-geşt-i bâga serv-i revânum çıkar gider

Dâr-ı fenâda çeşm-i pür-eşküm bekâ kalur
Çün subh-dem o mihr-i cihânum çıkar gider

Ok gibi togrı söyleyeyüm kaddümüz buker

Seyrâna çün ol kaşı kemânum çıkar gider

Yakdı derûnum âteş-i firkat Ziyâ'iyâ
Âhum degül sipihre duhânum çıkar gider

-142-

Mef'ûlü Fâ'ilâtün Mef'ûlü Fâ'ilâtün

Zülfün ruhunda cânâ cân üzre cîme benzer
Güyâ femün yüzünde mushafda mîme benzer

Hüsnün garîb-i 'âlem zülfeynün iki miskîn
Dendân-ı bî-nazîrün dürr-i yetîme benzer

Her kanda 'azm iderse yanınca cünd-i 'uşşâk
Şâhum bu şevket ile Sultân Selîme benzer

Kaddün dirahî-ı cennet tübâ l'imen re'âhu
Ey reşk-i hûr kûyun bâg-ı na'îme benzer

Mâlik degül Ziyâ'î kim deprede zebânı
Hicr odı hak budur kim nâr-ı cahîme benzer

-143-

Fâ'ilâtün Fâ'ilâtün Fâ'ilün

Cennet'ü-l mevâ cemâlün bâgıdur
La'l-i nâbun Selsebîl ırmagıdur

Dagılır 'akl u dil ü fikrüm benüm
Her kaçan kim şâne zülfün dagıdur

Bâg-ı kûyunda nigârâ lâleyüz
Bagrumuz yanıkları gam dâgıdur

Başum için dest-gîr olan bize
Bezm-i 'aşkun sâkiyâ ayagıdur

Bu Ziyâ'inün dolaşur gönline
Nüsha-i zülfün meger dil bağıdur

-144-

Mef'ûlü Mefâ'ilün Mef'ûlü Mefâ'ilün

Başumda gam-ı sevdâ bilmem neden olmuşdur
Ey yâr-ı siyeh-pûşem bana olan olmuşdur

Ben mülket-i firkatde çeşmün gibi bîmârem
Âhum yili kûyunda şimdi esen olmuşdur

Sen Mısr-ı melâhatde sultân idügün söyler
Ken'ânda çeh-i Yûsuf gûyâ dehen olmuşdur

Ser-cümle cihân halkın miskîn ider ol âhû
Bûy-ı ser-i zülfünden 'âlem Hoten olmuşdur

Her kim ki Ziyâ'î-veş vasf itdi leb-i la'lün
Hüsrev gibi 'âlemde Şîrîn-sühan olmuşdur

-145-

Mef'ûlü Fâ'ilâtü Mefâ'ilü Fâ'ilün

Gül-zâr efendi sanma ki kûyunda gül döker
Vaslun ümîdine yoluna akça pul döker

Bî-hûş ider beni o peri 'arz-ı cemâl iderse
Eşk-i ter acıyup yüzüme âb-ı gül döker

Kanlu yaşum dökersem efendi 'aceb degül
Meclisde mest olan kişi üstine mül döker

Görüp saçında çeşmini yandı kül oldu ten
Ugrı gözine 'ârif olan gice kül döker

İtdi Ziyâ'î yoluna kanlu yaşın nisâr
Şâhun yolına la'l ü güher san ki kul döker

-146-

Mef'ûlü Fâ'ilâtü Mefâ'ilü Fâ'ilün

Sâkî elinde rengi meyün çünki kandurur
Bilmem bu teşne cânım ana niçe kandurur

Cânâna hem-dem oldu rakîb âhirü'l-emr
Bu işler ile ol bizi cândan usandurur

Gam zulmetinde şevk virür bana sûz-ı âh
Cânım çerâgını bedenümde uyandurur

Vâ'iz bugün cehennemün evsâfın eyledi
Bildüm zerâfet ile anı bize yandurur

Vasf-ı lebün Ziyâ'î ne şîrîn edâ ider
Zevk ehlinün dehânın irakdan sulandurur

-147-

Mefâ'ilün Fe'ilâtün Mefâ'ilün Fe'ilün

O nûr-ı çeşmüm ayagın şu dîdeye ki basar
Cihânda nergis-i bâga ne yüzden ide nazar

Ne cânibe salınur gül-şen-i cihânda ‘aceb
O serv boyludan alsam n’olaydı togru haber

Cihânda lâl-i lebün var iken mezzûn
Ne fâ’ide ide şol kim varup taşdı güher

Zere sarılır imiş ol nigâr-ı sîm-beden
Eger ki ‘âşık isen zer gibi cihânda sarar

Efendi kolunı boynuma sal ki lâzumdur
Semend-i tab‘-ı Ziyâ’îye bir gümüşli kemer

-148-

Mef‘ûlü Fâ‘ilâtü Mefâ‘îlü Fâ‘ilün

Tîr-i gamunla gamzen okı câna degdiler
Bagrumı delmedi bir tîr-i kazâ-yı kader

Nâz uykusunda seher-geh-i kazâyı gör
Saf saf cemâ‘at-i müjesi hep kazâ ider

Mergûb olupdur elde sirişküm hikâyeti
Gözden geçürdüm anı hele ben de dostlar

Ölince komayam seni kûyun unutmayam
Şeddâd bâgına irem ey serv-kadd eger

Bezm-i cihânda câm-ı memâtı Ziyâ’iyâ
İçmek gerek ne çâre bu bir devrdür döner

-149-

Mef‘ûlü Fâ‘ilâtü Mefâ‘îlü Fâ‘ilün

Kûy-ı nigârda komaz agyâr bize yir
Cândan anı lutf kıl ey bî-zevâl ayır

Hâk-i der-i nigârı revâ görme ey sabâ
Çeşm-i rakîbe koymaga vâdîde kum kayır

İki nigâra bağlanamaz m’ola bir gönül
Bu hâtıruma tolanur oldı ikide bir

Vasl oldum ol mehe gice bu düş midür didüm
Gonçe gibi tebessüm idüp didi kim hayır

Eş‘âr dimede hele Hassân-ı sânîyem
Bana Ziyâ’î halkı cihânun Hasan mı dir

-150-

Fâ'îlâtün Fâ'îlâtün Fâ'îlâtün Fâ'îlün

Her kaçan kim yüzine ol saru kâküller düşer
Mülket-i İslâma san cünd-i benî asfer düşer

Mürg-1 tab'um ol gözi şeh-bâz öninde alınur
Ol ruh-1 zîbâyı görse eşk-i çeşmüm ter düşer

Na'çenle kebkebün nakşın gören ey âfitâb
Hâk-i pâyuna hilâl ile sanur Ülker düşer

Hâk-i pây-1 yârda eksük degül üftâdeler
Kulı olur halk-1 'âlem ol şehün ekser düşer

Merd-i 'aşk olalı sen dîvâne olmışsın diyü
Başına şimdi Ziyâ'î'nün niçe nâ-merd uşer

-151-

Mef'ûlü Fâ'îlâtün Mef'ûlü Fâ'îlâtün

Bâzâr-1 'aşk içinde derdün murâdı vardur
Bu nakd-i cânun ammâ gâyet kesâdı vardur

Dildür çeken belâsın Şîrîn-i bî-vefânun
Ferhâd-1 kûh-1 'aşkun ancak bir adı vardur

Bilmem niçün ta'addî kılur o şâh-1 hûbân
Şîrîn-leb olanun hod elbetde dâdı vardur

Âhumla çerh döner bir yildegirmenidür
Şâm u seherde tan mı turmazsa bâdı vardur

Şeh-bâz-1 evc-i ma'nî tab'undurur Ziyâ'î
Ammâ hasûd zâgun her dem 'înâdı vardur

-152-

Mef'ûlü Fâ'îlâtü Mefâ'ilü Fâ'îlün

Diller efendi kâkül-i meftûlüne gelür
Şeh-bâz-1 tab' kanda ise koluna gelür

Ey dil çekildi evc-i bekâya hümâ-yı rûh
'İkâb-1 merg lâşe-i maktûluna gelür

Şâhum sürûr-1 zevk ü safâ vü ferah sana
Derd ü belâ meşakkat ü gam kuluna gelür

Katl-i rakîb için koluna gelmediyse taş
Ey dil nigâra cânun at ol koluna gelür

Lutf it esirge 'âşık-ı bî-çâredür begüm
Redd eyleme Ziyâ'îyi kim yoluna gelür

-153-

Fâ'ilâtün Fâ'ilâtün Fâ'ilâtün Fâ'ilün
Dil ki dil-dârun müdâm ol la'l-i zibâsın sever
Rind-i derd-âşâmdur kim câm-ı sahbâsın sever

Zülfünü dil hâlünü cânım severse tan degül
Dünyede hâlince herkes kendi sevdâsın sever

Dostlar cismüm seg-i dil-dâra kurbân eylenüz
Çün ol âhû itlerün âşûb-ı gavgâsın sever

Sûfiye ümmü'l-habâis 'âşika rez duheri
Bir meseldür kimi kızın kimi anasın sever

Gerçi kim rüsvâ-yı 'âlemdür Ziyâ'î derd-mend
Lîkin insâf idelüm mahbûbun a'lâsın sever

-154-

Fâ'ilâtün Fâ'ilâtün Fâ'ilâtün Fâ'ilün

Bagrumun pergâlesi dil gül-şeninde lâledür
Her seher kan yutdugum derdünle gûyâ jâledür

Duhter-i rez kimseye el virmedi dirlerdi lîk
Sâkî-i bezme müdâm ayagını hinnâladur

Sanman altunlu kemer kuşatdı ol şâh-ı cihân
Âfitâb-ı âsumân-ı hüsne ol bir hâledür

Câma te'sîr eylemiş tâb-ı teb-i 'aşkun senün
Leblerinde şol habâb-âsâ meger tebhâledür

Sûfiyâ terk it Ziyâ'îyi kadeh sun sâkiyâ
Gıll u gışşdan pâk iden kalbi mey-i gassâledür

Kabrüm üstinde nişân-ı pây-ı kelbün gûyiyâ
Tûde-i hâk-i mezârumda açılmış lâledür

-155-

Fe'ilâtün Fe'ilâtün Fe'ilâtün Fe'ilün
Çıksa nâz ile bana ehl-i gamun cânı çıkar
Çözicek turrasını 'aklı perîşân eyler

Tolaşur gerdenine iki taraftan gîsû
Ezilür la'l-i şeker-bârına her bâr şekker

Sakınur keştî-i hüsnini muhâlif yilden
İndürür yelkenin ol şeh katı âh itsem eger

Haste-i 'aşk olurum kûy-ı nigâra varsam
Vardugunca sen esen oldun eyâ bâd-ı seher

Baglanaldan saçı zencîrine dil dil-dârun
Halk-ı 'âlem bana dîvâne Ziyâ'î dirler

-156-

Fâ' ilâtün Fâ' ilâtün Fâ' ilâtün Fâ' ilün

Zâr iden ben bülbüli ol ruhları gül-gündür
Mest ü rüsvâ eyleyen ol lebleri mey-gündür

Ger beni yârân sorarsa firkat ikliminde din
Ol saçı Leylâ hayâliyle dahı Mecnûndur

Üstühânım nây u kaddüm çeng idüp zâr eylemen
Ey güzeller şâhı yohsa eskiden kânûn mıdur

Zehr-i kahrından bu dehrün lâleye kan aglada
Görmedüm benden beter anun da bagrı hündür

Dest-i gamdan kurtarımadı girîbânın dahı
Gerdenin alan Ziyâ'înün meger gerdündür

-157-

Mefâ' ilün Mefâ' ilün Mefâ' ilün Mefâ' ilün

Gidelden ol perî-peyker firâkı câna gelmişdür
Dirîgâ kim gidüp 'ömrüm ecel gerdânım almışdur

Elüm tut sâkiyâ sun câm-ı Cem tâ şevk-i la'lünle
Vücüdüm cür'a-i sâgar gibi ayakda kalmışdur

Miyânundan nasîbüm alayın men' itme ben benden
Bilürsin pâdişâhum kim alan bir kıldan almışdur

Şikâyetler kılur bî-çâre dil baht-ı siyâhından
Hayâl-i zülfi yârânı meger sevdâya salmışdur

Ziyâ'î dürlü sözler vasf ider dendânı vasfında
Mahabbet bahrına gavvâs olup 'aşk ile talmışdur

-158-

Fe' ilâtün Fe' ilâtün Fe' ilâtün Fe' ilün

Câm-ı gam meclisine bu dil-i nâ-kâm okınur
Güyyâ bezm-i meye rind-i mey-âşâm okınur

Vuslatun ni‘metin agyâra kaçan vasf itsem
İncinür mevtine san sûre-i En‘âm okınur

Andı agyâra ne reng itdügümi yârânum
Gûrum üzre sanasın kıssa-i Behrâm okınur

Urdı bir tîg-i sefid ugrayıcak kabrûme yâr
Görinür anda o mahbûb-ı dil-ârâm okınur

Ey Ziyâ‘î yazarum hatt-ı lebi evsâfın
Lâ-cerem meclis-i sahbâda bu erkâm okınur

-159-

Fe‘ilâtün Fe‘ilâtün Fe‘ilâtün Fe‘ilün

Râh-ı kûyunda şu kim terk-i dil ü cân eyler
Ana firdevs-i berîn içre ‘aceb câ n’eyler

Tan degül subh gibi sâdık ise ‘uşşâkun
Her biri mihr-i güle çâk-ı girîbân eyler

Berg-i gül gibi tenün nâzûk ü terdür cânâ
Bülbül-i tab‘umı ammâ niçe nâlân eyler

Bezm-i gamda n’ola ‘uşşâkun iderse feryâd
Meclis içre yaraşur olsa hoş âvân eyler

Zârum uyıtmaz iken halkı der-i dil-berde
Ey Ziyâ‘î ‘acebâ ney neye efgân eyler

-160-

Fe‘ilâtün Fe‘ilâtün Fe‘ilâtün Fe‘ilün

Hat degüldür leb-i dil-berde dilâ itme hazer
Lebine sâye-i ebrûsı düşüpdür benzer

Ya şekerdür lebi üşmişdür ana mûr u mekes
Ya yeşil tûtüdüdür hattı lebi sükker-i ter

Hüccet-i hüsnine imzâdur o hatt-ı miskîn
Ya benüm defter-i cürmümdür o hatt-ı dil-ber

Yine ben vâsıf-ı hatt-ı leb-i cânân oldum
Levh-i yâkûta yazılsa yiridür bu sözler

Hatt-ı müşgîni görenler leb-i cânânumda
Cânuna düşdi Ziyâ‘î didiler yine keder

-161-

Fâ'îlâtün Fâ'îlâtün Fâ'îlün

Gûş-ı cânânı görenler sandılar
Gül takınmış zülfüne ol sîm-ber

İki cânibden degüldür iki gûş
Anı bekler iki şakk olmuş kamer

Sîmden mengûşdur sanur gören
Gûşı şöyle görünür zîbâ vü ter

‘Âşıkun başında yir yir kanlu dâg
Gûşı yârun san ki ra'nâ lâleler

Ey Ziyâ'î dürr-i nazmun gûş ider
Gûşına tan mı sadef dirlerse ger

-162-

Fâ'îlâtün Fâ'îlâtün Fâ'îlâtün Fâ'îlün

Sanma cevründen kaçup dil sevmeden bî-zâr olur
Her ne mikdâr olsa cevrün ‘aşkum ol mikdâr olur

Bâg u cûya şimdi bir hâlet virür devr-i bahâr
Şîve-i cennâti tecrî tahtehe'l-enhâr olur

Tâli'ümdür bir güneş yüzlüyi sevsem dostlar
Hem beni düşmen bilür hem düşmenümle yâr olur

Düşmene düşnâm idersem yâra bî-pervâ senâ
Kimse ta'yîb itmesün dîvânelügi ‘âr olur

Hîn-i vuslatda Ziyâ'î bûs idem dil-ber lebin
Buna hayrânem ne yüzden vâkîf-ı esrâr olur

-163-

Fe'îlâtün Fe'îlâtün Fe'îlâtün Fe'îlün

Rind isen ‘ârif isen bezmümüze gel meyi gör
Zühd da'vâsı dilünde var ise gelmeyigör

Mey habâbı gibi var ise hevâ başında
Ey dil ayakda sakın cür'a-sıfat kalmayıgör

Dil ü cân u ten efendi sana kurbân olsun
Tek rakîbün dil-i nâ-pâkin ele almayıgör

Ey sabâ şâm u seher seyr-i gül-istân eyle
Ak gülün şebdeki dülbendini tek çalmayıgör

Sayd olur sanma Ziyâ'î o hümâ-pervâzı
Şâhin-i tab'-ı bülendün sen ana salmayıgör

-164-

Fâ'ilâtün Fâ'ilâtün Fâ'ilâtün Fâ'ilün

Otlıdur keyfiyyet-i kudretle şimdi sebze-zâr
Ey sabâ degme otına itme teklîf-i gubâr

Sebze-zâr-ı bâga bir ot virdi dehr-i nev-bahâr
Ol sebebden hâtır-ı hâmûna düşmüşdür gubâr

Halk-ı âlem vâ'iz ü şeyhe giderler ben dahı
Eyledüm mey-hânede pîr-i mugânı ihtiyâr

Pîşe-i nazm içre çok vahşî kaçırmışdur selef
Ben erenler himmetinde eyledüm bir bir şikâr

Rûy-ı zerdümle Ziyâ'î bir hazân yapragıyam
Bâg-ı mihnetde beni topraga salmış rûzgâr

-165-

Fâ'ilâtün Fâ'ilâtün Fâ'ilâtün Fâ'ilün

Muttasıl tıfl-ı dili ol mihr-i enver söyledür
Mu'cizeyle tıflı san Yûsuf peyamber söyledür

Söyledür tab'um benüm ol şâh-ı hûbân fi'l-mesel
İlm ü hikmetden Aristoyı Sikender söyledür

Hep güzeller derdidür tab'-ı selfmüm söyleden
Mücrimi iskencelerle tut ki begler söyledür

Ârzû-yı vuslatundur söyleden âşıkları
Tûtî-i gûyâları gûyâ ki sükker söyledür

Ey Ziyâ'î söylemekden geçe tûtî-i zamân
Ol şeker-güftâr anı va'llâhi söyler söyledür

-166-

Mefâ'ilün Mefâ'ilün Mefâ'ilün Mefâ'ilün

Mahallende gören ben hasteyi gâyet zebûn anlar
Ezelden pây-mâl-ı dest-i kahr-ı dehr-i dîn anlar

Benüm sûz-ı derûnum anlamaz nâ-puhte ahmaklar
Gamum anlarsa ancak Kays-ı sahrâ-yı cünûn anlar

Kilîsâ-yı bedende cân-ı zâr inler sanemlerden
Rakîb-i gebr işitdükce sadâ-yı erganûn anlar

Yolunda çekdiğüm zann itme kim ma' lûmun olmuşdur
Benüm hâlüm hemân ol 'âlim-i râz-ı derûn anlar

Ziyâ'î biz edânî-i zamâna pâ-y-mâl olduk
Kemâl ile ma'ârîf ehlin ancak zü-fünûn anlar

-167-

Fâ'îlâtün Fâ'îlâtün Fâ'îlâtün Fâ'îlün

Hâne-i dehrün gönül bir onmaduk evbâşıdır
Kahr-ı derd ü gam 'ıyâlidür o da ev başıdır

Bir gice dünyâyâ gelmiş Leylîyle kâkûli
Ol şeker-leb yâr ile Şîrîn süd kardaşdır

Derd ile rûz-ı ezelde bile giryân oldılar
Çeşmümün Ferhâd ile iki yaşdaşdır

Câmi'-i pâk u mu'azzamdur sipihr-i nüh-kıbâb
Ey melek âh-ı derûnum her seher ferrâşdır

Pâdişâh-ı kişver-i 'aşkem Ziyâ'î şimdi ben
Şehr-i gamda mürde cismüm benüm subaşdır

-168-

Mefâ'îlün Mefâ'îlün Mefâ'îlün Mefâ'îlün

Benüm ol gözleri fettân meftûn olduğum bilmez
Meded ol saçı Leylâ kara magbûn olduğum bilmez

Benüm agladugum âh itdüğüm budur ki 'âlemde
Henüz ol zülfî Leylâ böyle Mecnûn olduğum bilmez

'Aceb mi mâ'il olsa kıssa-i Mecnûn u Leylâyâ
Çün ol vahşî gazâlüm Kays-ı hâmûn olduğum bilmez

Sipihr-i bî-vefâ-âsâ cefâ eyler meger ol şûh
Ezelden pâ-y-mâl-ı kahr-ı gerdûn olduğum bilmez

Ziyâ'î acıduğum bu ki her bir tâlib-i ma'nî
Belâgat kulzümünden dürr-i meknûn olduğum bilmez

-169-

Fâ'îlâtün Fâ'îlâtün Fâ'îlâtün Fâ'îlün

'Âşık-ı dil-dâr olaldan râh-ı gurbet beklerüz
Geçmişüz biz 'ârdan kûy-ı melâmet beklerüz

Biz hilâl-i na'l-ı esb-i yârı her dem gözlerüz

İRmege 'îd-i murâda dâll-ı devlet beklerüz

Pâdişâh-ı 'aşka kul olalı bu 'âlemde biz
Mâlik-i mülk-i gamuz başka velâyet beklerüz

Bâd-ı kahr ile felek girdâba salmışdur bizi
Bahr-ı firkatda henüz fülk-i felâket beklerüz

Görelî ruhsâr-ı yârı kıpkızıl dîvâneyüz
Lâle gibi daga düşdük kûh-ı mihnet beklerüz

Leylî-i zülf-i nigârün biz dahı Mecnûnıyuz
Kalmışuz yabanda sahrâ-yı firkat beklerüz

Ey Ziyâ'î olmuşuz 'âlemde bî-nâm u nişân
Biz 'adem 'Ankâsıyuz Kâf-ı kanâ'at beklerüz

-170-

Fe'îlâtün Fe'îlâtün Fe'îlâtün Fe'îlün

Şâh-ı 'aşk olmayana ehl-i hîred şâh dimez
'Aşk eri câh-ı cihâna a begüm câh dimez

Nat'-ı dilden kaçarum bârî diyü beydak-ı cân
Niçe ferzâne olur şâhı görür şâh dimez

Elif-i kaddün ile hâ gözünü sultânüm
Kimse yok mı göricek derd ile bir âh dimez

Dir dimez halk-ı cihânı kul ider kendüzine
Şâh-ı hüsn oldugunu gâh dir ü gâh dimez

Tekye-i gamda Ziyâ'î hele dervîş olalı
Câhile minnet ile yarıcun Allâh dimez

-171-

Mefâ'îlün Mefâ'îlün Mefâ'îlün Mefâ'îlün

Gören ol çehre-i gül-gûnı hergiz alını bilmez
Belâ-yı kadd-i bâlâsın çekenler balını bilmez

'Aceb ol mihr-i meh-peyker niçün kendüye gadr eyler
Olur nâ-cins ile hem-ser bugün emsâlini bilmez

Pelîd ile olur hem-ser cihân bâgını geşt eyler
Niçün ol serv-kadd dil-ber bizümle salınıbilmez

Saçın gerdânına salmış günâhum boynına almış
Bu mihnet-hânedede kalmış garîbün hâlini bilmez

Tabîb-i cân imiş çün kim leb-i cân-bahşî dil-dârun
Ziyâ'î gibi bîmârun niçün ahvâlini bilmez

-172-

Fâ'îlâtün Fâ'îlâtün Fâ'îlâtün Fâ'îlün

Ol kıyâmet yâr ile haşr olabilse cânumuz
Tarf-ı magribden çıkagelse hûr-ı rahşânumuz

Tâli'üm yok kim ben ol hurşîd-i rahşânî görem
Ol sitârem yok ki çıka mâh-ı 'âlî-şânumuz

Meclis-i gamda gözüm yaşın görüp mânend-i mey
Âteş-i hicrûn kebâb itdi bizüm büryânumuz

Bunca yıldur 'aşk-ı pâki cânumuzda saklaruz
Zâhidâ dil-ber seversek yok mîdur îmânumuz

Ey Ziyâ'î ol şeh-i 'aşkuz cihân mülkinde kim
Haşr olunca lâ-cerem tagılmaya dîvânumuz

-173-

Fe'îlâtün Fe'îlâtün Fe'îlâtün Fe'îlün
Sihri-gamzenden efendi katı gâfil degülüz
Bilürüz fitne-i zülfün kara câhil degülüz

Çekerüz bâr-ı gamun bârî bizi denk itme
Nâ-tüvânuz hey efendi mütehammil degülüz

Kîl ü kâl eylesün kimse saçun vasfında
Kılca ey zülf-i siyeh biz buna kâ'il degülüz

Seni ey serv-i gül-istân-ı tarâvet her gâh
Togrulukla severüz gayruna mâ'il degülüz

Leb-i dil-ber bizi her demde kılur kan hayrân
Şevk-i câm ile Ziyâ'î gibi kanzil degülüz

-174-

Mef'ûlü Fâ'îlâtün Mef'ûlü Fâ'îlâtün
Seng-i cefâsı yârun bir dem başumdan inmez
Devlet günü başuma togdı ebed tolinmaz

Ol serv-kadd nigârı togrilug ile sevdüm
Derdi bilüm büküpdür togrilugum bilinmez

Gördükde eşk-i âhum dil-ber terahhum itmez
Âb u hevâya benzer ol seng-dil tanınmaz

Nâr-ı mahabbetine düşdüm bir âfitâbun

Gerçi sovuqluk eyler ammâ ol od soyınmaz

Göstermedi Ziyâ'î ol mâh gün yüzini
Hem tâli'ün açılmaz hem yılduzun görünmez

-175-

Mef'ûlü Fâ'ilâtün Mef'ûlü Fâ'ilâtün
Didüm 'izarun üzre hattun neden belürmez
Didi kim yansa âteş anda çemen belürmez

Râh-ı mahabbetünde dil zahmetin sorarsan
Gam cânuma geçüpdür ammâ geçen belürmez

Mecrûhunam 'ilâc it ey kaşları kemânum
Tîrûn tokınmayınca derd-i beden belürmez

Va'llâhi 'âlem içre yokdur senün nazîrûn
Bilün hayâle gelmez hîç ol dehen belürmez

Rûm içre pâdişâhum çokdur egerçi şâ'ir
Ammâ Ziyâ'î gibi ehl-i sühan belürmez

-176-

Mef'ûlü Mefâ'ilü Mefâ'ilü Fa'ülün

Manend-i leb-i la'li Bedehşânda bulunmaz
Hemtâ-yı ser-i zülfi Karamanda bulunmaz

Mısr içre bunun gibi şeker-leb ele girmez
Hîç böyle güzel mülket-i Ken'ânda bulunmaz

Kat'â o gözi kâtil ü hûn-rîz nigârûn
Şemşîr-i cefâsı gibi Kîrmânda bulunmaz

Ey gözlerümün nûrı beni sürme tapundan
Hâk-i kademün kuhlı Sıfehânda bulunmaz

Bu tarzda bir şi'r-i dil-âvîz Ziyâ'î
Hakkâ bu ki Şîrâz ü Horâsânda bulunmaz

-177-

Fe'ilâtün Mefâ'ilün Fe'ilün

Mübtelâ-yı belâ-yı mahbûbuz
Müstehak-ı cefâ vü âşûbuz

Dîde meftûh u gönlümüz meksûr
Biz belâ 'âleminde mansûbuz

Başdan ayaga pây-mâl olduk

Eller içre bununla mergûbuz

Rüstemüz tatalum şecâ'atde
Gâlibâ Zâl-ı dehre maglûbuz

Zulmet-i gamda böyle kalmayalum
Biz Ziyâ'î ziyâyâ mensûbuz

-178-

Fe'îlâtün Fe'îlâtün Fe'îlâtün Fe'îlün
Râh-ı gamda n'ola korkarsam efendüm câ'iz
Yolda her ehl-i sefer kılsa tevehhüm câ'iz

Niçe yıl gurbet-i hicründe belâlar çekdüm
Bir garîb 'âdeme olmaz mı terahhum câ'iz

Göricek hatt-ı ruhun niçe figân eyleyeyin
Lâ-cerem olmadı Kur'ânda terennüm câ'iz

'Ârızın görmez isen var ayagı toprakına
Su bulunmazsa türâb ile teyemmüm câ'iz

Seg-i kûyun göricek oldu Ziyâ'î handân
Kişi yârânını gördükde tebsüm câ'iz

-179-

Mefâ'îlün Mefâ'îlün Mefâ'îlün Mefâ'îlün

Dem-â-dem cânımı korkutma idüp hançerün ser-tîz
O demler kanı kim kanum döke ol hançer-i hûn-rîz

Acırdı Bî-sütün-ı gamda düşmiş haste Ferhâdı
'Aceb Şîrîn-sühandur Hüsrev-i Dehlû gibi Pervîz

Gamundur Bî-sütûnum tîşem âhumdur benem Ferhâd
Lebün Şîrîn ruhun Gül-gûn saçundur Hüsrevâ Şeb-dîz

Sabâ kûyundan irdi çın seher kıldı tesellâyı
Perîşân hâtırum cem' eyledi ol bâd-ı zülf-âmîz

Ziyâ'î sînemüz külhan rakîb-i seg cehennemlik
Felek hammâmına câm oldu encüm kehkeşân kâriz

-180-

Mefâ'îlün Mefâ'îlün Mefâ'îlün Mefâ'îlün

Didiler giderek ol cevri çok dil-ber cefâ itmez
Cefâyâ sabr iderdüm korkarın 'ömrüm vefâ itmez

Gözi yaşını zenzem itmeyen 'âşıklar â kiblem

Mahallen Ka‘besinde Merve hakkı çün safâ itmez

Yiridür ol meh-i bî-mihre dirsem bî-vefâdur ger
Ki ‘ahd itdi beni katl itmege ammâ vefâ itmez

‘Aceb niçün tabîb-i cân u dil dirler o cellâda
Dil-i bîmâruma rahm eyleyüp çün kim şifâ itmez

Beni giryân idüp agyârı handân itdün ey gerdün
Ziyâ‘îye bu kahrı derd-i hicr-i Mustafâ itmez

-181-

Fe‘ilâtün Fe‘ilâtün Fe‘ilâtün Fe‘ilün

Kays benden gam-ı hicrânunı yigrek bilmez
‘Âşıkun çekdügi âlâmını muḍhak bilmez

Halkı her gice felek sufresine da‘vet ider
‘Arz ider encüm ile mâhı tuz etmek bilmez

Hâr-ı hicrânda niçe bülbüli nâlân eyler
Tâzedür ol gül-i nevreste sevmek bilmez

Görür âyîne-i kalbinde nigârı nakşın
Kendüden ‘âşık olan yârını münfek bilmez

Pây-mâl itdi bizi ellere el virdi nigâr
Vasf-ı dest ü kef ü engüşkini dirsek bilmez

Kadrini bilmeze yâr oldı belâdur dil-ber
Bir belâ bu biz anun kadrini bilsek bilmez

Bilmez ol yâr didüm şî‘r yalan olduğımı
Ey Ziyâ‘î işidenler didi gerçek bilmez

-182-

Fe‘ilâtün Fe‘ilâtün Fe‘ilâtün Fe‘ilün

Ben gubâra nazar ol yâr-ı dil-ârâmum itmez
Kabrüm üstine kadem basmaga ikdâm itmez

Meskeni kûy-ı nigâr olmayıcak miskînün
Gönlümüz bâg-ı İremde dahı ârâm itmez

Leb-i dil-ber ki bizi mest-i müdâm itmişdür
Rind-i mey-hâreye çok böyle mey ü câm itmez

Böyle rüsvâ-yı cihân olduğuma ta‘n itmen
İhtiyâr ile kişi kendüyi bed-nâm itmez

Diyemez şî'r-i Ziyâ'î gibi her bir şâ'ir
Lâ-cerem Rûh-ı Kudüs herkese ilhâm itmez

-183-

Mefâ'îlün Mefâ'îlün Mefâ'îlün Mefâ'îlün

Gedâ-yı kâm-bîn ü kâm-rân ü kâm-yâbuz biz
Edânî kısmına meyl itmezüz 'âlî-cenâbuz biz

Kıyâs itme bizi her ahmak u nâ-cins ü nâdâna
Karadag gibi sultânım bugün hâzır cevâbuz biz

Hevâ-yı 'aşkun ile 'âkıbet baş terkin itmekdür
Bizüm maksûdumuz deryâ-yı gamda bir habâbuz biz

Bizi her dem erâzil pây-mâl itmekdedür zîrâ
Ayakda kalmış ednâ alçaga düşmüş türâbuz biz

Ziyâ'î nesne bilmez dir işitdüm ba'zı câhiller
Açılmaz degme bir nâdâna bir müşkil kitâbuz biz

-184-

Fe'îlâtün Fe'îlâtün Fe'îlâtün Fe'îlün

Şerbet-i lâlünü sun hastene ey âfet-i nâs
Oldı çün hatt-ı lebün fihi şifâün li'n-nâs

'Ömrümün hâsılı sensin benüm ey rûh-ı revân
Kâmetüm mezra'-ı 'âlemde gamun eyledi dâs

Kavl-i şârih ile şerh olabilür şerhalarum
Ne kazâyâ-yı kazâ-yı dil olur Kaysa kıyâs

Küşte-i tîg-i gamem mâtemüm tutdı nigâr
Ne belâ-yı siyeh oldı bana ol kara libâs

Dehenün sırrını keşf itdi Ziyâ'î ammâ
Kanı bir hurde bilür râz duyar râz-şinâs

-185-

Fâ'îlâtün Fâ'îlâtün Fâ'îlâtün Fâ'îlün

Fikr-i ruhsârım dil-i şeydâya olmuş mün'akis
Fi'l-mesel hurşiddürür deryâya olmuş mün'akis

Hamrımı lâlünden almış gâlibâ rûz-ı ezel
La'l-i gül-rengün mey-i hamrâya olmuş mün'akis

Hüsn-i bî-hemtâ görüp karşunda hayrân olma kim
Tal'atun âyîne-i garrâya olmuş mün'akis

Seng-i hârâdan çıkan nârı cibillî sanmanız
Sûzî Ferhâdun ezel hârâyâ olmuş mün'akis

'Aşkumuz fâş oldu dehre her güneş söyler yürür
Ey Ziyâ'î şevkümüz dünyâyâ olmuş mün'akis

-186-

Mefâ'îlün Mefâ'îlün Mefâ'îlün Mefâ'îlün

Külâlendür gül-istân-ı ruhunda cilve-ger tâvûs
Bulmaz gül-şen-i firdevs içinde böyle ter tâvûs

Kaşun vasfını tâvûsî mürekkeblerle zeyn itdüm
Sanur anı görenler bir mu'anber mu'teber tâvûs

Gül-i rengîn ile her şâh-ı gül gül-zâr-ı 'âlemde
Ziyâdan cilve eyler sanasın cevân ider tâvûs

Gül-istânda salınsa ol melek zerrîn kabâ ile
Görenler dir ki cennet bûstânında gezer tâvûs

Ziyâ'î bâg-ı nazmun bir müzeyyen gül-sitândur kim
Kenârında anun her kâfiye bir cilve-ger tâvûs

-187-

Fâ'îlâtün Fâ'îlâtün Fâ'îlâtün Fâ'îlün

Niçe 'Ankâlar şikâr olurdu mânend-i mekes
Düzseler hâşâk-ı kûy-ı dil-rübâdan bir kafes

Sallanur durmaz dili çalar figân eyler müdâm
Var ise câm-ı mey-i 'aşkunla kanzildür ceres

Çok bu denlü zulm-i bî-hadd bunca derd-i bî-kıyâs
Pâdişâhumdan Hudâ bilür degüldi mültemes

Hep ser-i agyâr içündür itlerünle da'vâmuz
Tîg-i 'adlünle şehâ lutf eyle ol da'vâyı kes

Gel Ziyâ'îden şikâyet kılalum dil-dârına
Bizi uyutmaz anun âh u figânı bir nefes

-188-

Mefâ'îlün Mefâ'îlün Mefâ'îlün Mefâ'îlün

'Aceb midür yüzün gördükde itse her gedâ meclis
Bilürsin mevsim-i gülde olur ey şeh revâ meclis

Yine rahm eyleyüp şem‘-i ruhun gösterdün ey meh-rû
Şeb-i firkatde anun çün olupdur pür-ziyâ meclis

Ney ü kanûnı inler mesti feryâd u figân eyler
Gam-ı hicr-i nigâra benzer olmuş mübtelâ meclis

Melek sâkî şafak mey nukl encüm mâh-ı nev sâgar
Güneş şem‘-i safâ kavs-i kuzah çeng ü semâ meclis

Gelelden meclise ol yüzi Ka‘be lebleri zemzem
Ziyâ‘î Merve hakkıyçün olupdur pür-safâ meclis

-189-

Fâ‘ilâtün Fâ‘ilâtün Fâ‘ilâtün Fâ‘ilün
Mevsim-i güldür döşendi meclis-i sahbâya nâs
Destine destâr merhûn olmada câma libâs

Bezm-i gülde yâr ile agyâr i er turmaz müdâm
Zehr-i kahr-ı dehri nûş itsem n’ola ben tas tas

Ey cefâ-cû muttasıl senden bana eksük degül
Derd-i bî-hadd cevri-i bî-pâyân cefâ-yı bî-kıyâs

Sîm-tenler vaslın eyler hâtır-ı şeydâ ricâ
Bir gedâ devletlülerden akça eyler iltimâs

Şevkin artursa dilün şî‘r-i Ziyâ‘î tan degül
Mushaf-ı rûyundan itmiş anca yirde iktibâs

-190-

Mef‘ûlü Fâ‘ilâtü Mefâ‘ilü Fâ‘ilün

Hakkâ ki bezm-i bâg güzel bezm-gâh imiş
Ey ehl-i ‘işret âhiri ammâ ki âh imiş

Gam tekyesi ki erbâb-ı menzil-i ‘aşkdur
Şehr-i mahabbet i re ulu hân-gâh imiş

Uzun gice belâları zülfün hayâli hem
Baht-ı siyeh dahı ne belâ-yı siyâh imiş

Gâh mahallen i re rakîb-i seg âh ider
Ammâ ki nagmesi de makâm-ı segâh imiş

Girdi sipâh-ı eşk ile şehr-i melâmete
Derd ehline Ziyâ‘î meger pâdişâh imiş

-191-

Fe‘ilâtün Fe‘ilâtün Fe‘ilâtün Fe‘ilün
Hüb-ı mergûb idi bu ‘âlem-i fânide güneş

Şevk-i mihrünle senün olmasa şûrîde güneş

Şevki artar yüzini der-gehine sürse gedâ
Her seher kapuna yüz sürer ol ümmîde güneş

Hânemüz rûşen ola hâtır-ı hoş-hâl misâl
Ger şebân-geh gele ol mâh-sıfat gide güneş

Sâye-perver boyı serv âfetüme benzeyemez
Şîr-i şehrdür iki pîr-i cihân-dîde güneş

Ne yüzün gösterür ol meh ne gönül şevke gelür
Ne o meh-pârede ay var ne Ziyâ'ide güneş

-192-

Fâ'îlâtün Fâ'îlâtün Fâ'îlâtün Fâ'îlün

Dostlar rüsvây u bed-nâm olsam itmen serzeniş
İtdi dîvâne beni ol cilve ol nâz ol reviş

Bâg-ı hüsn içre nihâl-i nahl-i bâlâ-yı habîb
Bâg-bân-ı lutf-ı Yezdân ile bulmuş perverîş

Hâne-i dilde hemân Erjeng nakşıdur hayâl
Çîn-i ebrû-yı nigâr olmışdur elde muntekîş

Olmaya bî-gâne dirsene yâd ide dil-ber seni
Âsitânında var evvel âşinâsıyla biliş

Hışm ider zülfün Ziyâ'îye gazabdan küfr olur
Söyle ey 'âşıklarun kim sana n'itmiş n'eylemiş

-193-

Mefâ'îlün Mefâ'îlün Mefâ'îlün Mefâ'îlün
Bu mürde cisme sanman bir niçe yirden kefen gelmiş
Fakîre gâlibâ devletlülere pîrehan gelmiş

Gönül geldikçe bîmâr oldu kûyunda belâ bu kim
Mahallenden sabâ haste gidüp girü esen gelmiş

Cefâsından kaçup dil girü lutf ümmîdine geldi
Sorup ol bî-vefâlar serveri didi kaçan gelmiş

Ziyâ'î turmayup bu fânî dünyâyâ gelen gitdi
'Aceb bu kim haber virüp dimez kimse giden gelmiş

-194-

Mefâ'îlün Mefâ'îlün Mefâ'îlün Mefâ'îlün
Gamı ol tâze dil-dârun dil-i gam-nâke sarmaşmış
Nihâl-i tâzesi engûr-ı bâgun tâke sarmaşmış

Vücûd-ı hâk-sâre sarmaşan regler mahallende
Tamarlardur ki servün sâyesinde hâke sarmaşmış

Hayâl-i vuslatun rûhumla sandum imtizâc itmiş
Görüp pîrâhenün kim ol vücûd-ı pâke sarmaşmış

Bugün gurbetde gördüm âşinâlar birbirin bulmuş
Seg-i kûyun sanurdum 'âşık-ı bî-pâke sarmaşmış

Edânîye zarûretten Ziyâ'î ilticâ eyler
Garîk-i bahr-ı gamdur bulduğı hâşâke sarmaşmış

-195-

Mefâ'îlün Mefâ'îlün Mefâ'îlün Mefâ'îlün

Çemende sarmaşık gördüm gül-i bûstâna sarmaşmış
Sanurdum kim Züleyhâ Yûsuf-ı Ken'âna sarmaşmış

Sarılmış Yûsufun pîrâhenine Hazret-i Ya'kûb
Açılmış yâsemen berg-i gül-i handâna sarmaşmış

Sarılmış câme-hâb-ı vuslat içre 'âşık u ma'sûk
Görenler dir ki tendür hasret ile câna sarmaşmış

Gönül tıflı yapışmış rîsmân-ı kâkül-i yâra
Görenler dir ki cân-bâz oğlanı urgana sarmaşmış

Ricâ eyler dil-i sengîni dil-berden vefâ 'âşık
Sanasın sarmaşıkdur dagda seng-istâna sarmaşmış

Esîr olmuş yitürmüş tıfl-ı maksûmın girü bulmuş
Zen-i dünyâ mahabbetle dil-i nâdâna sarmaşmış

Ziyâ'î ehl-i dünyâ sarmaşup kalmış bu dünyâyâ
Sanasın sarmaşıkdur kal'a-i vîrâna sarmaşmış

-196-

Mef'ûlü Mefâ'îlü Mefâ'îlü Fa'ûlün

Bilmem ne ki sihr itdi bana ol yüzi meh-veş
Çeşmümde sular zâhir oldı sînede âteş

'Aklum takınık yâr vefâsız rakibân çok
Bilmem n'ideyin n'eyleyeyin hâl müşevveş

Yanında siyeh-rûlar o sengîn dilün çok
Ey bülbül-i dil gam yime bin kargaya bir taş

Dünyâda beni Yûsufumun vaslına irgür

Ey sũfî gel ol âhîretün çün bana kardaş

İnsâf idelüm şimdi Ziyâ'î gibi yokdur
Bir gam-zede vü zâr u dil-figâr u belâ-keş

-197-

Fâ' ilâtün Fâ' ilâtün Fâ' ilâtün Fâ' ilün

Hışm-ı çeşmün cânımı ey yâr bîmâr eylemiş
Başuma bu dâr-ı dünyâyı benüm dar eylemiş

Tahta-i tâbutum üzre inledür dil-ber beni
Tahta-i nerd üzre gûyâ ben kulın zâr eylemiş

Çâr 'unsurdan yaradaldan tenüm Cân-âferîn
'Aşk-ı cânânda beni gâyetde nâ-çâr eylemiş

Bizi gam öldürdi öldürmez diyü ol bî-vefâ
Gerçi kim öldürmege evvelde ikrâr eylemiş

Firkatün çok çekdi kim her bir günü bin yılcadur
Bu Ziyâ'î'nün Hudâ 'ömrini bisyâr eylemiş

-198-

Fâ' ilâtün Fâ' ilâtün Fâ' ilâtün Fâ' ilün

Gel beni zecr ile öldür kâkülün dârına as
Kıssa-i derdüm gibi bulunmasun beyne'l-kasas

Tîr-i gamzen şöyle kılmışdur müşebbek sînemi
Seyr idenler sanur anı cism-i câna bir kafes

Halka-i bezm-i şarâb oldı mahabbet hâtemi
Câm-ı la'lîndür ana yakutdan gûyâ ki fas

Fikr iderdüm kim niçe biçem melâmet câmesin
Karşudan gördüm pür-şevküm getürür bir makas

Ey Ziyâ'î nûr-ı Yezdân olduğına ol sanem
Ehl-i îmâna kaş ile kirpigi yetmez mi nas

-199-

Mef'ûlü Fâ' ilâtü Mefâ'îlü Fâ' ilün
Lâzım mı derd-i 'aşkı sana eylemek luhûs
Mir'ât-ı dilde 'aks-i ruh-ı yâr-ı ter nusûs

'Uşşâkı haste kodı mahabbet yüzükleri
Şol kehrübây çehreleridür meger fusûs

Mir'ât-ı dilde 'aks-i ruh-ı yârı seyr kıl

Yog ise anda jeng-i riyâ var ise hulûs

Âdem bu mülk-i fânîye itsün mi 'itimâd
Çekmekdedür gumûmı 'umûmen 'ale'l- husûs

Nazm-ı Ziyâ'î gibi gerek şî'r-i âb-dâr
Tâ beytine gelüp od urmaya lüsûs

-200-

Mefâ'îlün Mefâ'îlün Fa'ûlün

Dilâ ol yüri bahr-ı 'aşka gavvâs
Leb-i dil-berdür anda gevher-i hâs

Benem Mansûr-ı meydân-ı mahabbet
Hemân cânâ saçun zencîrine as

Cemâdâtı gamun tahrîk iderdi
'Aceb mi sûfiler olursa rakkâs

Biçerken câme-i 'aşkı rakîbe
Bugün hayyât elinde sındı mikrâs

Halâs olmaga kizb-i müdde'iden
Ziyâ'î okuruz sıdk ile İhlâs

-201-

Fâ'ilâtün Fâ'ilâtün Fâ'ilâtün Fâ'ilün

Lâyık-ı vasl olmadur bu eşk-i dîdemden garaz
Bir safâ sürmekdür âhir şimdiki demden garaz

Cân virüp cânâna derdüm 'âkıbet vasl olmadur
'Âlem itmekdür hemân bu iki 'âlemden garaz

Câm-ı Cem efsânedür kim rindler söyler yürür
La'l-i nâbun câmdan sensin begüm Cemden garaz

Böyledür iz'ânumuz zevk ü elem efsânedür
Vasl u hicrânundur ancak sûr u mâtemden garaz

Vuslatundur anlarum firdevs-i 'alâdan murâd
Var ise nâr-ı firâkundur cehennemden garaz

Ka'beden kiblem senün dîdâr-ı pâkündür murâd
Gabgabun çâhıdır ey meh çâh-ı zemzemden garaz

Ey Ziyâ'î hâlüm i'lâm itmedür der-gâhına
Gice gündüz böyle feryâd ile nâlemden garaz

-202-

Mef'ûlü Fâ'ilâtü Mefâ'ilü Fâ'ilün

Firkatda la'l-i dil-beri anmak melâl-i mahz
Anun dehânı bûsesin almak muhal-i mahz

Teşne-dilüz harâret-i hicrûnle yanmışuz
Unutma bizi ey leb-i la'li zülâl-i mahz

Gîsûlarun dile katı zulm ider dirîg
Boynunda ol degül 'ömrüm illâ vebâl-i mahz

Bu sa'di gör ki nûş idicek câmı hüsrevâ
Şöyle hasen dirüm sözi olur kemâl-i mahz

Hâlin Ziyâ'inün ne sorarsın ki ol garîb
Ey mûmiyân gamunla olupdur hayâl-i mahz

-203-

Mefâ'ilün Mefâ'ilün Mefâ'ilün Mefâ'ilün

Dirîgâ derd-i 'aşk irdi irişdi cânuma emrâz
Yanumdan girdi yârânım ehibbâm eyledi i'râz

Şu derde mübtelâyem kim etibbâ idemez dermân
Ecel gibi güzel sıhhat müyesser eyle ey Feyyâz

'Aceb mu'tâd imiş gönlüm belâ-yı 'aşkı çekmede
Zebûn olurdu gerdûna eger yüklense bu a'râz

Görüp tîg-i cefânı nefret itmez kimse kapundan
Meger cânâ yolunda cânı kurbân itmedür agrâz

Ziyâ'inün efendi boynın ur şevkin ziyâd eyle
Ziyâsı şem'un artukdur kesince boynını mikrâz

-204-

Fe'ilâtün Fe'ilâtün Fe'ilâtün Fe'ilün
'Ârızunda degül ol hatt-ı perîşân galat
Hiç olur mı ki ola âyet-i Kur'ân galat

Şerbet-i ârzû-yı la'lüni dil sundı bana
Meye göndermiş idüm eylemiş oğlan galat

Vasl ile firkati fark itmiş işitdüm agyâr
Bilsem âyâ ki neden eyledi nâdân galat

Kâm-rân itdi edânîyi e'âliyi hem-pây
Muttasıl itmededür târum devrân galat

Ey Ziyâ'î şeh-i nazmem sühanum togrusı râst
Korkum oldur ki ide kâtib-i dîvân galat

-205-

Fâ'îlâtün Fâ'îlâtün Fâ'îlün
Var ise çehrende tan mı hâl ü hat
Yaraşur mushafda i' râb ü nukat

Ârızun seyr itmek ister mürg-ı cân
Su kenârın ârzû itmez mi batt

Hayra kalmışdur umûr-ı aşkda
Her kimün oldu murâdı ol vasat

Anladugum bu ki râh-ı dil-bere
Başımı galtân iden itmez galat

Ey Ziyâ'î başumuz beş vaktde
Nîl ü Ceyhûn u Fırât u Dicle Şatt

-206-

Fâ'îlâtün Fâ'îlâtün Fâ'îlâtün Fâ'îlün

Hâne-i kalbe o şeh saldı bisât-ı inbisât
Tayy olındı bûriyâ-yı zevk ü bâlin-i neşât

Vasf-ı âh-ı âteşînüm yazdılar sanman fişek
Göklere mektûb uçurdılar ki kılsun ihtiyât

Tan mı ser-gerdân yürürse yollar üzre gird-i bâd
Böyle eyler hâk-i pâ-yı yârda kalan ihtiyât

Mihr ü meh iki şafakdur tevsen-i çerhün meger
Şol licâm-ı keheşânına kılmış irtibât

Ey Ziyâ'î ol kıyâmet yâr ile haşr olmaga
Derd ü gam gûyâ terâzûdur reh-i aşkı sırât

-207-

Mefâ'îlün Mefâ'îlün Mefâ'îlün Mefâ'îlün

Belâlu âşık itmez dime lutf ile vefâdan haz
Tabîbüm yohsa bîmâr olan itmez mi devâdan haz

Nazar kıl hışm ile râ kaşların çat ey hilâl-ebrû
Gönül kesb-i safâ eyler ider cânım bu râdan haz

N'ola gam kişverinde dil severse ger seg-i kûyun
Garîb iklim-i gurbetde ider çün âşinâdan haz

Bana yir gösterür kâşânesinde bir hasîr üzre
Anı bilmez mi zâhid ‘âşık itmez bûriyâdan haz

Yüzün göster Ziyâ’îye görür çâh-ı firâkunda
İderler zulmet-i zindânda kalanlar ziyâdan haz

-208-

Mef‘ûlü Fâ‘ilâtü Mefâ‘îlü Fâ‘ilün

Gİtdüm diyâr-ı gurbete cânânım elvedâ‘
Düşdi sefer çü bendene sultânım elvedâ‘

‘Aklum tagıldı ‘ârîyüm ey mâh ‘ârdan
Bilmem ki n’oldum ey gözi mestânım elvedâ‘

Bülbül gibi hezâr figân eylesem gerek
Ben ey yanagı verd-i gül-istânım elvedâ‘

Sünbülleründen ayru perîşân hâtırum
Cem‘ olımadı ey saçı reyhânım elvedâ‘

La‘l-i leb-i habîb görünmez Ziyâ’iyâ
Kan aglasun bu dîde-i giryânım elvedâ‘

-209-

Fâ‘ilâtün Fâ‘ilâtün Fâ‘ilâtün Fâ‘ilün

Olalı gönlüm gibi âşüfte-i dil-dâr şem‘
Subha dek göz yummaz olur tâ-seher bîdâr şem‘

Ger kafasından çekerlerse zebânun bir şerer
Sûz-ı ‘aşkun nüktesinden eylemez izhâr şem‘

Ben du‘â-gûyın sögerse tan degül ol mâh-rû
Dil uzadur kendüye cân virene her bâr şem‘

Kaddünün bir dikmesidür serv-i gül-zâr-ı cihân
Bir çerâğıdur senün ruhsârunun ey yâr şem‘

Rûşen eyler miydi bezmi mihr-i ‘âlem-tâb-veş
Böyle pür-şevk olmasa her şeb Ziyâ’î-vâr şem‘

-210-

Mef‘ûlü Fâ‘ilâtü Mefâ‘îlü Fâ‘ilün

Tab‘um serâya mâ’il ider ıztırârî bâg
Sâkî getür meyi kamu ıztırır gayr-ı bâg

Didüm göreyin müjeni kaçma didi yâr
‘Âkil virür mi destine dîvânenün bıçâg

Şevk-i ruhun yakar ser-i kûyunda cânımı
Hayr itdi yakdı kûşe-i meclisde bir çerâg

Yakdı memâlik-i gazeli sûz-nâk ile rûhum
Ezelde hüsrevâ uyarmış gibi ocâg

Gören ziyâ-yı mihr-i ‘izârın Ziyâ’iyâ
Eyler fûrûg-ı şems-i cihân-tâbdan ferâg

-211-

Fe‘ilâtün Mefâ‘ilün Fe‘ilün

Bâg-ı sînemde her dem ey gül-i bâg
Şol ki ol gonca itmedi beni sag

Gül-sitân-ı cemâl-i cânânun
Oldı dil mürginun ayagina bag

‘Ârızun üzre hâl ü zülfünle
Sayd-ı mürg-ı dil eyledün yüzün ag

Sâkiyâ bizi şöyle mest itdün
El dutuldı dutulmaz oldı ayag

Meclis-i meyde mâh-ı tâbânun
Şevke geldi Ziyâ’î gibi çerâg

-212-

Fe‘ilâtün Fe‘ilâtün Fe‘ilâtün Fe‘ilün

Bâg-ı sıhhatde gezerken ferâh u zevk ile sag
Yakdı tâb-ı teb-i hasret işidenlerden ırag

Haste dillerde egerçi niçe ‘illet bulunur
Hîç lâyıık degül ammâ ki yolından sapa sag

Var iken eşk-i revânun neme yarar cûlar
Hüsn-i dil-ber var iken bana ne kayd olsun bâg

Bülbül-i tab‘uma cevlân-geh olur bâg-ı kemâl
Âşiyân eylemez anda umarın zâg u kelâg

Yâr-ı sâdik arayup bulmaga çekdüm çok elem
Ey Ziyâ’î aramaktan idelüm bârî ferâg

-213-

Fe‘ilâtün Fe‘ilâtün Fe‘ilâtün Fe‘ilün

Kaşına karşı dizilmiş niçe müjgân saf saf
Karşı mihrâba turur san ki müselmân saf saf

Kırmızı gülleridürür bâg-ı cûdun yir yir
Sînem üstinde olan dâg-ı firâvân saf saf

Bâgı ol serv-i hırâmân güzer itmez mi görün
İntizâr üzre turur serv-i gül-istân saf saf

Ha sakın terk-i cefâ eyle şikâyet kılurın
Rûz-ı mahşerde kaçan kim turur insân saf saf

Gel Ziyâ'îyi halâs eyle beden kaydından
Çünkü eksük degül ey şâh du'â-hân saf saf

-214-

Fe'îlâtün Fe'îlâtün Fe'îlün

Yok mıdur şefkatün ey bî-insâf
Bendenün eyle günâhını mu'âf

Gayrılar gördüğü lutf u keremün
Görmedüm nisfini hakkü'l-insâf

Umarın sana beni gamz ideni
Âşikâr ide hafıyyü'l-eltâf

Görse ger tîg-i gam-ı cânânı
Cebeli olur idi kulle-i Kâf

Ey Ziyâ'î gam-ı cânânun ile
Fahrlar kıl uyar şâ'ire lâf

-215-

Mefâ'îlün Mefâ'îlün Mefâ'îlün Mefâ'îlün

Miyânuna yakışdı zer kemer hûb oldu ortalık
Libâs-ı nâzı geydün vir lebünden bûse helvâlık

Bugün cevrünle gönlüm yıkdun aslâ virmedün sûret
Gamunla ey sanem dil hânesi Eski Kilisâlık

Miyâncı olmayınca bilini kuçdurmaz ol âfet
Cihân aksine döndi şimdi ortalık temâşâlık

Güzeller mübtelâsı derd-i 'aşkun pâ-y-mâlyem
Yaradaldan berü cism-i za'îfüm Hazret-i Hâlîk

Ziyâ'îyi nazardan dûr idüp agyâra yâr oldun

Umulmazdı benüm iki gözüm senden bu rüsvâlık

-216-

Fâ'îlâtün Fâ'îlâtün Fâ'îlâtün Fâ'îlün

Mülk-i nazm içre bana benzer bugün vassâf yok
Degme bir dîvânda elfâzum gibi evsâf yok

Sayd-gâh-ı deşt-i 'aşkun ben de bir sayyâdıyam
Saydum olur lîk bir âhû-yı müşgîn-nâf yok

Kanı kimdür bu cihân içre 'Ankâ yok diyen
Ben de bir 'Ankâyem ammâ bana kûh-ı Kâf yok

Fi'l-hakîka gevher-i nâ-yâbum insâf eylesen
Bir zamândur şimdi ammâ kimsede insâf yok

Derd ile benzüm sararsa ey Ziyâ'î gam degül
Ben zer-i hâlis-vücûdem n'eyleyem sarrâf yok

Hâlümi yârân sorarsa bî-cihet kaldum fakîr
Şeş-cihet vîrân muhassal hâsıl-ı evkâf yok

-217-

Fe'îlâtün Fe'îlâtün Fe'îlâtün Fe'îlün

Sünbüli zülfi hevâ ile perîşân bulıcak
Rahm idüp yâr didi bu dahı miskîn ancak

Rûzgâr atdı gönül fülkini girdâb-ı gama
Kurtarursa beni kurtarur efendi zevrak

Kâfir agyârı helâk itmege bir demde hemân
Üstine peyk-i ecel gibi bıçakla varsak

Dil-rübâlar göricek gönlümi zülfünde esîr
Didiler hây n'olaydı o esîri tutsak

Ey Ziyâ'î su gibi taşdı gönül cûş itdi
'Özr-i leng eylemeyüp yâr ayagina aksak

-218-

Fâ'îlâtün Fâ'îlâtün Fâ'îlâtün Fâ'îlün

Safha rûyum dûde eşkümdür müjem aklâm-ı 'aşk
Serde hatt-ı ser-güzeştümdür benüm erkâm-ı 'aşk

Dâm-ı tesbîh-i riyâyâ biz mukayyed olmazuz
Ehl-i 'aşkuz zâhidâ zülf-i sanemdür dâm-ı 'aşk

Râh-ı 'aşkunda elif gibi olurdu müstakîm
Kaddümi lâm itmese ey serv eger âlâm-ı 'aşk

Dil kesildi 'ayş-ı dünyâdan kazâ kestirdi yol
Zâhir oldu bu mu'ammâdan bize bir nâm-ı 'aşk

Gerçi kim dirler şarâb içmez Ziyâ'î derd-mend
Dostlar va'llâhi mest itmişdür anı câm-ı 'aşk

-219-

Fe'îlâtün Fe'îlâtün Fe'îlâtün Fe'îlün

Gice pervâne gibi şevkden ârâmum yok
Benüm eyyâmum gibi dünyede eyyâmum yok

Elüm irişmedi ol zülfe yüzün görmedüm âh
Kadre kâdir degülem bir yana bayrâmum yok

Gül-i bâğı n'ideyin sünbülünü toplayayın
Bir boyı serv yüzi gül semen endâmum yok

Giderin âhiret iklîmine yâ hû yâ hû
Gönül eglencesi bir yâr-ı dil-ârâmum yok

Açmaga kalb-i perîşânı Ziyâ'î geh geh
Bir saçı sünbül-i ter 'arız-ı gül-fâmum yok

-220-

Mef'ûlü Mefâ'îlü Mefâ'îlü Fa'ûlün

Dîvâneyem ahvâl-i cihâna nazarum yok
Mest-i mey-i engûrem özümnden haberüm yok

Benden olalı pâdişâh-ı mülk-i gam oldum
'Aşkunla ganîyem sanemâ sîm ü zerüm yok

Şol tapdugum Allâh hakı deyr-i cihânda
Bir gönlümü eglersanem-i sîm-berüm yok

Cennet 'amelin işleyemem derd ü gamdan
Andan berü kim kûy-ı nigâra güzerüm yok

Cennetdür anun kûyı Ziyâ'î lebi kevser
Ol cennete uçmaga velî bâl u perüm yok

-221-

Fe'îlâtün Fe'îlâtün Fe'îlâtün Fe'îlün

Ey gönül 'ârif isen iç yûri câm-ı Cem-i 'aşk
Ki deger iki cihân zevkine bir 'âlem-i 'aşk

Felek üstinde melek emrine râm olmuş idi
Olsa engüşt-i Süleymânda eger hâtem-i 'aşk

Mihrüni görmediler çün ki sipihrün giceler
Geydiler zulmet-i firkatde kalup mâtem-i 'aşk

Çeşm ü hâl ü dehenün fikri gönülden gitmez
Eksük olmadı derûnumdan efendi gam-ı 'aşk

Bâg-ı 'âlemde hayâl-i gül-i ruhsârun ile
Dem-be-dem çeşm-i Ziyâ'î akıdur şebnem-i 'aşk

-222-

Mefâ'îlün Mefâ'îlün Mefâ'îlün Mefâ'îlün

Cebînine kodı uyurken ol meh nâ-gehân barmak
Ben anı sandum engüşt-i Nebî kim mâhı kılmış şak

Görenler eyle sanur sûre-i Şems ü Kalem yazduk
O mâhun ayasıyla barmagı vasfın kaçan yazduk

'Aceb havz-ı müdevverdür kef-i sîmîni cânânun
Ki teşne dillere karşı diler beş lûleden akmak

Şafak hınnâsı hurşîd ayası engüşt mâh-ı nev
Elinde hûşe-i pervînesidür ol mehün tırnak

El elden üstün olduğın işitdi var ise hurşîd
Sipihre agdı destünle berâber olmaga el-hak

Yaraşur pençe-i sîmîni gül-zâr-ı cemâlinde
Gül-istâna virüpdür fi'l-hakîka revnak

Ziyâ'î sen gül-istân-ı cemâl-i yâra bülbülsin
Kefi ak güldürür beş gonçedür yanında beş barmak

-223-

Mef'ûlü Fâ'ilâtü Mefâ'ilü Fâ'ilün

Gitdün yalnız ey meh-i tâbânun el-firâk
Târîk-i gamda kaldı dil ü cânun el-firâk

Dil mürdesine ol leb-i 'îsâyı bulmaga
Çıksa sipihre yiridür efgânun el-firâk

Ben el yudum hayat suyından meded meded
Zulmetde kaldı çeşme-i hayvânun el-firâk

Ben künc-i gamda haste-i dil-bestenem senün
Bulunmadı bu derdüme dermânun el-firâk

Bildüm Ziyâ'î şimdi yanumdan çıkup giden
Yâ 'ömrüm idi kalmadı yâ cânım el-firâk

-224-

Mefâ'îlün Mefâ'îlün Mefâ'îlün Mefâ'îlün

Gözüm yaşından özge elde 'âlemde nükûdum yok
Ne gam mâl u menâlüm yog ise bârî hasûdum yok

Ne aldum ben ne satdum nesnesin bu fâni dünyânun
Bugün 'âlem metâ'ından ziyânun dahı sûdum yok

Niyâz idüp yire urmam yüzüm bâb-ı erâzilde
Ganî-i Lem-yezelden gayra 'âlemde sücûdum yok

Mukadder bir kazâ gelse rızâdan gayrı fikrüm yok
Cihânun nef'ine çokluk sürûrum yok sürûdum yok

Ziyâ'î ben kemâl ü ma'rifet Kâfında 'Ankâyem
Anunçün câhilân-ı dehr öninde hiç vücûdum yok

-225-

Fe'îlâtün Fe'îlâtün Fe'îlâtün Fe'îlün

Ey dil ü cân gam-ı cânân ile mihnetde olun
Ta'n-ı agyâr ile zilletde meşakkatde olun

Sizi ismarladum Allâha didüm cân u dil
Didi anlar dahı sıhhatde selâmetde olun

Göriccek 'âşıkı kuyunda kilâb-ı kûyun
Didi hıdmetde olalum didi 'izzetde olun

Rindler pîr-i harâbâta diyince yâ hû
Didi lutf ile hemân devlet ü rif'atde olun

Vasl-ı cânâneye ikdâm idün ihmâl itmen
Ya Ziyâ'î gibi her-bâr mezelletde olun

-226-

Mefâ'îlün Mefâ'îlün Mefâ'îlün Mefâ'îlün

Bugün ey mihr-i rahşân ol meh-i tâbânun andurdun
Gice ey mâh-ı bedr ol âfet-i devrânun andurdun

Cihân bâğında senden umdugum bu mıdur ey bülbül
Perîşân-hâtır itdün zülf-i müşg-efşânun andurdun

Gice meclisde bir hâl itdün ey pervâne bi'llâhi
Yanup yakıldugum nâr-ı gam-ı hicrânum andurdun

Gül-istânda seher şol denlü feryâd itdün ey bülbül
Ki âh u zâr ile derd ü dil-i nâlânım andurdun

Ziyâ'îye seherde ey sabâ bir nükte açdun kim
Derûnum hûn idüp ol gonca-i handânım andurdun

-227-

Mefâ'îlün Mefâ'îlün Mefâ'îlün Mefâ'îlün

Egerçi hüsn içinde ol perî-ruhsâr olupdur beg
N'olaydı olmasa yanında anun kimse bizden yeg

Ola kim mâ 'il olup iltifât ide bu ben hâke
Var ey bâd-ı sabâ gül-şende ol serv-i revânı eg

Ten-i 'uryânıma cellâd-ı gam hîle 'ikâb itdi
Gögermiş tâziyâne yiridür cismümde sanman reg

'Adû-yı gussa vü gam kal'a-i câna hücûm itse
Gönül burc-ı bedenden çığırur Allâh yegdür yeg

Kaşun çîn eyleyüp hışm eyledün miskîn Ziyâ'îye
Yanundan gitmez ey âhû bakışlu hiç rakîb-i seg

-228-

Mefâ'îlün Mefâ'îlün Mefâ'îlün Mefâ'îlün

Gönül derdine bakman şûh-ı derd-efzâyı seyr eylen
Cünûn-ı Kaysa bakman behcet-i Leylâyı seyr eylen

Mahabbet şevkine ey müdde'îler eylemen inkâr
Vukûf-ı hâl için bir sûret-i zîbâyı seyr eylen

Hevâ-yı 'aşk-ı yâr ile sirişküm cûşa gelmişdür
Bu rîh-i sarsar ile mevc uran deryâyı seyr eylen

Ezelden gönlüm ol Yûsuf-likâyı düşde görmişdür
Beni 'aşk ile ser-gerdân iden rü'yâyı seyr eylen

Şeb-i vuslatda ol mâhı temâşâ itmek olmazsa
Hevânun i'tidâlinde çıkun bedr ayı seyr eylen

Sular çağlar hevâlar mu'tedil güller açılmışdur
Bahâr eyyâmıdır dîvâneler sahrâyı seyr eylen

Ziyâ'înün derûnı dâğınını görmek ne mümkindür
Beyâbân-ı fenâda lâle-i hamrâyı seyr eylen

-229-

Fe'îlâtün Fe'îlâtün Fe'îlâtün Fe'îlün

Yâr agyârdan olmadı dirîgâ münfek
Anı ol segden ayırmaga ne kılsak n'itsek

Beglügüm varur kabâ cem'ine mîrem gûyâ
Rûmilinde bana sancak virilmiş Hersek

Geymeden efser-i zerrîni mukaddem kuşanur
Nâz ile câmesin ol vahşî gazâlum geyicek

Vezne gelmez şu'arâ-yı şî'r bu nazma nisbet
Tob-ı âhumla çakışmaz dahı çatlarsa tüfek

Ey Ziyâ'î bize rahm itmek elinden gelmez
Ne kadar vasf-ı kef ü sâ'id ü destin dirsek

-230-

Mefâ'îlün Mefâ'îlün Mefâ'îlün Mefâ'îlün

Zerün zerd oldı cismi hasretinden sîm-sîmânun
Teni bir yana sîm ü zer gamından ehl-i dünyânun

Temevvüc sanma deryâ sînesin derdünle çâk eyler
Kenâr özler meger bir derdi var elbetde deryânun

Femün bir nükte-i müşkildürür kim zerre anlatmaz
Benüm cânun hemân bir adı var ancak mu'ammânun

Lebün zülfeyn ü ruhsârunla hoş zîbâ yaraşmışdur
Şeb-i meh-tâbda gâyetde hoşdur nûşı sahbânun

Sabâvet 'âleminde itdügün hâlâtı terk eyle
Sabâ bir târına degme o zülf-i 'anber-efşânun

Ölürsem cevr-i cânân ile taş dikmen mezârumda
Nişânun kalmasun kûyında ol bî-rahm cânânun

Ziyâ'î sen belâgat mülkinün sultânısın şimdi
Bozılmaz lâ-cerem haşre dek âyîn-i dîvânun

-231-

Mefâ'îlün Mefâ'îlün Mefâ'îlün Mefâ'îlün

Yiridür terk-i cân itsem çü sen terk-i diyâr itdün
Sıdun ahdi bizi gâyetde şimdi dil-figâr itdün

Beni ey lâle-ruh câm-ı mey-i 'aşkunla mest itdün
Tenümde dâg-ı hasretler kodun hoş yâdigâr itdün

Dutalum kim bilüm yâ gibi bükdün ey kemân-ebrû
Niçün yâ ok gibi ta'cîl ile benden firâr itdün

Zamâne hûbınun 'ahdine hîç inanmasun kimse
Sıdun 'ahdi bana sen çünkü böyle ey nigâr itdün

Mahallen mesken olmuşdı Ziyâ'î derd-mendüne
Efendi turmadun ikrâra anı bî-karâr itdün

-232-

Mefâ'ilün Fe'ilâtün Mefâ'ilün Fe'ilün

Degül mi 'arş-ı mu'allâ likâsı Mahmûdun
Degül mi Sidre kad-i müntehâsı Mahmûdun

Benâni mâh-ı nev-i 'iddür hakîkatde
Meh-i münevvere benzer ayası Mahmûdun

Dem-â-dem akıdur oldı eşk-i hûnînüm
Boyandı kana kırmızı libâsı Mahmûdun

Cefâ vü cevriyi yıllarca çekdüğüm bu kim
Gönülde vardur ümîd-i vefâsı Mahmûdun

Ziyâ'iyâ şeh-i mülk-i belâ olur 'âşık
Olinca cân u gönülden gedâsı Mahmûdun

-233-

Fâ'ilâtün Fâ'ilâtün Fâ'ilâtün Fâ'ilün

Togrısı bu kim senün bir serv-i bâlâdur kadün
Yâ behişt-i hüsn içinde şâh-ı Tûbâdur kadün

Her pelîde hem-ser olma ey boyı serv-i revân
Bir nihâl-i tâzesin gâyet de 'âlâdur kadün

Hem letâfet bûstânında saçun reyhândur
Hem melâhat gül-şeninde serv-i ra'nâdur kadün

Togrüyam yolunda didüm Hak bilür ey serv-kad
Didi bâr-ı derdüm ile şimdi dü-tâdur kadün

Kahr ile çün kim elif kaddün kemân itdi rakîb
Ey Ziyâ'î yiter âhun urmaga yâdur kadün

-234-

Mefâ'ilün Mefâ'ilün Mefâ'ilün Mefâ'ilün

Rakîb-i kâfire niçün sen ey nûr-ı Hudâ geldün
Gelem sana rakîbi anmayam dirdün anageldün

Meded kurtar garîk-i bahr-ı hicrân olmadın çün kim
Gamun deryâsinun gavvâsına ey âşinâ geldün

Niçe gün hân-kah-ı şeyheynün irşâdın bekâ kıldun
Anun çün meclis-i 'uşşâka ey sûfî fenâ geldün

Kudûmun Merve hakkıyçün hayât-ı câvidânumdur
Benüm Ka'bem benüm kiblem benüm 'ömrüm safâ geldün

Dü-tâ ol bâr-ı hicrüm çekmede ol yâr-ı zâlim dir
Dimek olsun Ziyâ'î emr-i cânânı dutageldün

-235-

Mefâ'îlün Mefâ'îlün Mefâ'îlün Mefâ'îlün

Dem-â-dem gözleründen kanlu yaşlar dök elemler çek
Güzeller şâhıdur yâr ana lâyıık dürr ü gevher çek

Gözün sâkî gözün yaşı şarâb-ı la'ldür ey dil
Şeh-i iklîm-i hicrânsın belâ bezminde sâgar çek

Gönül var müntakim der-gâhına çok çok şikâyet kıl
Ki agyâr ile 'işretde sen ol dürlü belâlar çek

Vefâ umma o şehden hadd-i zâtından cefâ-cûdur
Seversen sev gidersen git belâlar çek cefâlar çek

Ne lâzım yolına cân vir ne kasd it ey gözi cellâd
Gönül maktûl-i hicründür ne hışm eyle ne hançer çek

Hatun gelsün görüp agyâr-ı bî-gayret nüfûr itsün
Güzeller mülkinün sultânısın a'dâya 'asker çek

Ziyâ'î râstî ol serve lâyıık vasfa kudret yok
Yalan dirlerse şi'r-i dil-güşâyâ aslı var gerçek

-236-

Fâ'îlâtün Fâ'îlâtün Fâ'îlâtün Fâ'îlün

Esb-i nâz ey pâdişeh çâbü-k-semendündür senün
Elde zülf-i cân-figen ra'nâ kemendündür senün

Ey şeker-leb içüren zehri mükerrer cânuma
Ol nebât-ı hatt ile lâlünde kandündür senün

Sâ'id-i sîmînünün vasfında şi'r-i pür-güher

Ey perî gel gör ki ra'nâ bâzû-bendündür senün

Bana zülf ü kadd-i yârı anduran ey bûstân
Sünbül-i hoş-bü ile serv-i bülendündür senün

Gönlini al cânına kasd eyle kıl cevri ü cefâ
Eyle n'eylersen Ziyâ'î derd-mendündür senün

-237-

Fâ'ilâtün Fâ'ilâtün Fâ'ilâtün Fâ'ilün

Gayra çâre kalmadı agyâr ile gavgâ gerek
Sen güzeller pâdişâhısın kulun rüsvâ gerek

Kendüzin pervâne gibi nâr-ı kahra salmaga
Ehl-i şevk ey şem'-i cân 'aşkunda bî-pervâ gerek

Kahr-ı dünyâyı ferâmûş eyleyüp 'ayş itmege
Mey gerek meclis gerek mahbûb-ı müstesnâ gerek

Baş giderse gitmeye sevdâ-yı 'aşkun başdan
Lâ-cerem her âdemün başında bir sevdâ gerek

Suda od gizlenmez ammâ ey Ziyâ'î lâ-cerem
Âb-dâr elfâzda muhrikçe bir ma'nâ gerek

-238-

Fe'ilâtün Fe'ilâtün Fe'ilâtün Fe'ilün

Böyle mest-âne bakış vahşice âhûda gerek
Böyle 'işveyle reviş kebk ile tîhûda gerek

Sünbül-i zülf ü gül-i 'ârızuna meyl iderüz
Bâg-ı hüsn içre begüm o da gerek bu da gerek

Ne ise âh-ı dili itmege teskîn biraz
Mey gerek bâg gerek vahşice âhû da gerek

Şol gubâruz ki leb-i dil-bere hayrânuz biz
Ol leb-i la'li şeker ol teni pâlüde gerek

Vaslun isterse Ziyâ'î sakın alınma begüm
Çünkü dîvânelerün sözleri bî-hûde gerek

-239-

Mefâ'ilün Mefâ'ilün Fa'ülün

Cefâlar itmesün dil-dâra söylen
İnen zulm itmesün hünkâra söylen

Niçe bir pâreye atsun bizi yâr
Terahhum eylesün bir pâre söylen

Bu sînem zahmınun zahmetlerinden
Ne denlü zahmet ise yâra söylen

Ne bilsün böyle hayrân olduğum yâr
Gamum bir vâkıf-ı esrâra söylen

Cünûnumdan su'âl itmen bana hîç
Varun ol gözleri sehâra söylen

Yakasın yırtup eylen 'aybın izhâr
Açılmasun gül-i gül-zâra söylen

Şarâb-ı la'linün keyfiyyetinden
Ziyâ'î gibi bir mey-hâra söylen

-240-

Fâ'ilâtün Fâ'ilâtün Fâ'ilâtün Fâ'ilün
'Aş için zevk ehline bir gül-şen-i hurrem gerek
Gönderün bâg-ı behiştî görmege âdem gerek

Mest-i 'aşk olmak gerekdür tâlib-i dîdâr olan
Bezm-i Cemşîd itmege 'âlemde câm-ı Cem gerek

Müdde'iler dir ki hemm ü gam gerek 'uşşâkda
Her ne dirlerse disünler gam degüldür hem gerek

Subh-dem gül-zâr-ı kûyunda beni aglatdı yâr
Bilmezem kim ol gül-i bâg-ı behişte nem gerek

Der-gehünde hîç olmazsa şehâ derd ehline
Macerâ-yı eşk-i çeşmin dimege bir dem gerek

Zülfün ile leblerün evsâfını dîvânuma
Hatt-ı reyhân u hat-ı Yâkût ile yazsam gerek

Beklemez kimse Ziyâ'î gibi kûy-ı dil-beri
Kıymet-i kûy-ı cinânı bilmege âdem gerek

-241-

Mef'ûlü Mefâ'îlü Mefâ'îlü Fa'ûlün

Nâz uyhusına var idi dün meyli nigârun
Gözi henüz açılmadı uyhudan uyarun

Çiyner dilin inanman ana dilde kemik yok
Agyâr-ı seg emdüm dirse dilini yârun

Mahsûlini taksîm ide ger gül-şenün eşcâr
Pâyına hemân âb düşer serv ü çenârun

Cân bülbüli gül-geşt iderek bâg-ı cemâlin
Açıldığını göremedi zülf-i nigârun

Bahr-ı gamuna ol ki Ziyâ'î gibi düşmez
Bilmez bilürin kıymetin ey yâr kenârun

-242-

Fâ' ilâtün Fâ' ilâtün Fâ' ilâtün Fâ' ilün

İftihârumdur beni bu resme rüsvâ kıldugun
İştihârumdur cihânda böyle şeydâ kıldugun

Ey kaşı mihrâb ışığı kible her şâm u seher
İstemem agyâr ile seyr-i musallâ kıldugun

Kaçma ey vahşî gazâlum budur ol miskîn kulun
Vâlih ü şûrîde vü âşüfte şeydâ kıldugun

Gördüğün dîvâne-i zencîr-i zülfündür senün
Kays-ı sahrâ-yı mahabbetdür temâşâ kıldugun

Ey Ziyâ'î şevkidür bir şem'-i bezm-ârânun ol
Subha dek pervâne-âsâ yandugun yakıldugun

-243-

Mefâ' ilün Mefâ' ilün Fa' ulün

İşigin gözedirken dil-rübânun
Dilâ bir gün çıkar elbetde cânun

Ümîdüm var analar yâra derdüm
Düşersem yâdına bir âşinânun

Vefâ yüzini görmezsem gamum yok
Yüzün tek göreyin ol bî-vefânun

Cinânı kûy-ı yâra nisbet itme
Be hey zâhid kusûrı var cinânun

Ziyâ'î aşınur anca kalemler
Yazınca vasf-ı engüştin ben anun

-244-

Fâ' ilâtün Fâ' ilâtün Fâ' ilâtün Fâ' ilün

Bir tokuz gözli kemerdür nehr-i eşkümde felek
Korkuluktur kehkeşân u şu'le-i hâver direk

Şehr halkı birbirine gösterür barmagıla
Sen hilâl itdün beni derdünle benzer ey melek

Zâhidâ çün yüz çevirdün sübha-i sad dânededen
Bu riyâdan yeg degül miydi ferâgat eylemek

Ol mehün kaşı hayâlinden çü hazz eyler gönül
Şekl-i mâh-ı nev ser-i etfâle bağlanmak gerek

Ey Ziyâ'î şâh-ı hûbân olduğına ol sanem
Zülfi dâll ü hüsnî şâhiddür ne hâcet söylemek

-245-

Fe'îlâtün Mefâ'ilün Fe'ilün

Çâh-ı Yûsufdur ey sanem zekanun
Hem Süleymân mühridür dehenün

Boynuma almışum senün tîgün
Kanını dökmeye belâ çekenün

'Âkıbet çünki var ümîd -i vefâ
Kim ola çekmeye cefânı senün

Vir metâ'-ı vücûdunu evvel
Ger muhibbi isen o sîm-tenün

Yıkar ol şeh Ziyâ'iyâ âhir
Tob-ı cevri ile kal'a-i bedenün

-246-

Fe'îlâtün Mefâ'ilün Fe'ilün

Kulı olalı şâh-ı hûbânun
Şâhı oldum diyâr-ı hicrânun

'Aynına almayan senün elemün
İtmedi 'âlemin bu dünyânun

Bâg-ı 'âlemde benzemez boyuna
Râstî kaddi serv-i bâlânun

Karanu gönlümüzde fikr-i hatun
Bir mu'ammâsıdur Şeb-istânun

Bu güzelliğe ey büt-i tersâ
Yâra söz söyle var ise cânun

Bana zilletde bakma kim ey şâh

Mûr olur hem-demi Süleymânun

Sûz-ı sînen Ziyâ'î âhir-i kâr
Korkarın kim yaka girîbânun

-247-

Fe'îlâtün Fe'îlâtün Fe'îlâtün Fe'îlün

Râh-ı 'aşk içre ol ey 'âşık-ı şeydâ müdrik
Sefer-i bahr-ı mahabbet mi degüldür mühlik

Umarum vuslatunı lîk yok imkân-ı vusûl
Didüm ol âfet-i cân didi te'emmül tûdrik

Firkatünden eger ey servüm olursa âzâd
'Ömri oldukça dil olmaz reh-i 'aşka sâlik

Yûsuf-ı Mısr-ı melâhatsin eyâ cân-ı 'azîz
İtsen olurdı beni genc-i visâle mâlik

Cân nisâr eyle Ziyâ'î yûri râh-ı yâra
Gel kerem eyle ganîlerle olma mümsik

-248-

Müstef'îlâtün Müstef'îlâtün

Oldun rakîbün pendiyile münfek
Hâzâ firakun beynî ve beynek

Eller ayagun tozı olurlar
Ol sâ'idün biz vasfını dirsek

Güftâra gelse olmaz mı la'lün
Mümkin degül mi sudan tuz itmek

Kasr-ı visâle irmek dilersen
Sahrâ-yı gamda var çok belâ çek

Pend-i seleftür dinle Ziyâ'î
Câ'iz degüldür hercâyî sevmek

-249-

Mefâ'ilün Fe'îlâtün Mefâ'ilün Fe'îlün

Sabâ cihânı mu'attar kıl ol külâleye deg
Yahûd Vefâ tarafına sanevber kaddin ek

Eger ki cân hazer eylerse mekr-i düşmenden
Beden hisârına çıksun çağırsun Allâh yek

Didüm ki şâ'iri koyup rakîbe yâr oldun

Ol âhû didi ki gerçek yalancıdan it yeg

Hayâl-i kâkülün ile şeb-i firâkunda
Sarıldı cismüme mârân-ı gam degüldür reg

Ziyâ'î gibi seherde rakîb âh itmez
'Aceb degül ki uyurmuş seherde dirler seg

-250-

Fâ'îlâtün Fâ'îlâtün Fâ'îlâtün Fâ'îlün

Servlerdür câ-be-câ bu şerha-i sînem degül
Tâze güller yir yir açılmış bu dâg-ı gam degül

Seyl-i eşk-i 'âşıkı akıtma ey sultân-ı 'aşk
Çok ziyân eyler binâ-yı hüsn inen muhkem degül

Kim ki tercih itmeye cennetden ey şeh kûyunı
İ'tikâdum bu ki bu 'âlemde ol âdem degül

Âsumân-ı hüsn sen hurşîd-i 'âlem-tâbsın
Zerreze benzetmek ey gonçe dehânun kem degül

İki 'âlem gussasın çekme Ziyâ'î fârig ol
Ger gam-ı cânân olursa hâtırunda gam degül

-251-

Fâ'îlâtün Fâ'îlâtün Fâ'îlâtün Fâ'îlün

Dil görüp ruhsârun eyler ârzû-yı hatt u hâl
San Gül-istân okuyup başlar Şeb-istân-ı hayâl

Ârzû-yı cân u dilsin ey gül-i gül-zâr-ı hüsn
Hâsıl-ı 'ömrümsin ey nev-bâve-i bâg-ı cemâl

Harf okurken hâce-i gamdan bu cân-ı sûhte
Geldi ey maksûd-ı dil dersinde bâb-ı infi'âl

Mekteb-i gamda meger bir tıfl-ı kâbildür rebâb
Kıssa-i ders okudup eyler mugannî gûşmâl

Derd-i hicrünle Ziyâ'îyi za'îf itmek neden
Sen anı 'âşık hayâl itmekle itmişsin hayâl

-252-

Mefâ'îlün Mefâ'îlün Mefâ'îlün Mefâ'îlün

Bilüm bükdi gamun pîr eyledi hey nev-cevânum gel
Hırâmun birle hurrem kıl benüm serv-i revânum gel

Senün derdünden öldüm hey meded ey cân-ı müştâkân

Yetiř cân var iken cismümde hey rûh-ı revânum gel

Yine Tâtâr-ı gam târâc idüp yıkdı gönül şehrin
Harâb olmaga yüz tutdı meded řâh-ı cihânum gel

Firâk-ı tâk-ı ebrû tâkatüm tâk itdi va'llâhi
Gamunla kıl gibi kıldun beni hey mû-miyânnum gel

N'olaydı bir gice meclisde germ olup o meh-tal'at
Dise mihr-i nihân idüp Ziyâ'î nâ-tüvânnum gel

-253-

Fe'îlâtün Mefâ'ilün Fe'ilün

Gönlüm itdi zülâl-i yâr hayâl
Ârzû itdi haste-hâtır bal

Kûşe-i gamda fârigü'l-bâlem
Bulmadum kand-i la'lüni çü mecâl

Ben perîřân-hâli sultânnum
Kâkülün gibi eyleme pâ-mâl

Bilmezem kim ne çâre n'eyleyeyin
Mekr ider saçların lebün bana âl

Güzer itmez mezâr-ı Mecnûna
Leylînün pây-pendidür halhâl

Ey Ziyâ'î kemâle sa'y eyle
Ki gerek erde yâ kemâl yâ mâl

Mâ'il-i mâl olurdu ehl-i hired
Olmaz ammâ ki mâl gibi kemâl

-254-

Fâ'îlâtün Fâ'îlâtün Fâ'îlâtün Fâ'ilün

Âřık olmışdur kulakdan yâra düşmişdür gönül
Bir kulagı küpelü dil-dâra düşmişdür gönül

Bir belâyâ ugramış bir derde düşmiş derd-mend
Kullarına zulmi çok hünkâra düşmişdür gönül

Eski derdüm tâzelendi tâze dil-ber mi sever
Bilmezin n'oldı neden âvâre düşmişdür gönül

Bir vefâ umardum eyler yâr bin dürlü cefâ
Cevri bî-hadd dil-ber-i mekkâra düşmişdür gönül

Tîg ile bin pâre eylerse Ziyâ'î bendesin
Gayrına meyl itmez ol gaddâre düşmüşdür gönül

-255-

Fâ'îlâtün Fâ'îlâtün Fâ'îlâtün Fâ'îlün

La'lin aldum agzuma var gerçi hicre ihtimâl
Çıkmayan cândan ümîdin kesmez ammâ ehl-i hâl

Kaddin anup gül-şen-i 'âlemde dir dil bülbüli
Yâ haliyye'l-bâl kad belbelet bi'l-bâli bâl

Mülket-i gamda ne tedbîr eylesün cân-ı za'îf
Çeşm mestî fitne kaşî mekr ider ruhsâr-ı âl

Yâ unutmış tâli'üm yâhûd yitirmişdür beni
Ey melekler andurun Allâh için şûm oldı hâl

Ey Ziyâ'î gerçi evvelde hüner makbûl imiş
Şimdi bir demdür kişiyi pâ-y-mâl eyler kemâl

-256-

Fâ'îlâtün Fâ'îlâtün Fâ'îlâtün Fâ'îlün

Yanılp öykünmese ruhsâre-i dil-dâra gül
Hacletinden eylemezdi cismini sad pâre gül

Yâra 'arz itmek dilerdüm kanlu yaşum kıssasın
Tuhfe diyü gönderem dirdüm vefâsız yâra gül

Sanma şeb-nemdür görinen hasretinden haddinün
Aglayugelmişdürür ey lâle-ruh gül-zâra gül

'Ârizun göster didüm ey bî-vefâ nâz eyleme
Handeler kılup didi n'eyler 'aceb bîmâra gül

Nâ-murâd ol ey Ziyâ'î ber-murâd olsun rakîb
Virülür agyâra yâr u mâra genc u hâra gül

-257-

Fâ'îlâtün Fâ'îlâtün Fâ'îlâtün Fâ'îlün

Sûretâ Yûsufdur ol gül lîk Ken'ânî degül
Pâdişâh-ı mülk-i cândur Mısır sultânı degül

Dişleri dürr-i semîn ammâ 'Adenden çıkmamış
Cân deger la'î-i lebi illâ Bedahşânî degül

Vahşî âhûdur Hoten sahrâlarından gelmemiş
Bir şekerdür lebleri kim Mısır anun kânı degül

Bir nigâr-ı lâle-ruhdur mülket-i Rûm içre bu
Benleri Hindî degül zülfi Karamanî degül

Pister-i gamda Ziyâ'î bir ölümlü hastedür
Şerbet-i lâ'lün dirîg itme beşer cânî degül

-258-

Mefâ'îlün Mefâ'îlün Mefâ'îlün Mefâ'îlün

Cefâ bî-hadd vefâ hergiz hayâl-i dil-rübâ müşkil
Dirilmek derd-i dil-berle degül midür bana müşkil

Koyup gitmek belâ cevri ni çekmek derd-i bî-dermân
Firâkı bir yana düşvâr u cevri bir yana müşkil

O meh gün yüzini yıllarca göstermez nedür bu derd
Vefâsız yârı sevmek gibi var mı bir belâ müşkil

Nedür ol seyr-i dîdâr u temâşâ-yı ruh-ı dil-dâr
Olurdu her kişi 'âşık sonı ger olmasa müşkil

Ziyâ'î yâr ile agyâr nihânî 'ayş u 'işretde
Degül mi ayrılık derdi bana vâ-hasretâ müşkil

-259-

Fe'îlâtün Fe'îlâtün Fe'îlâtün Fe'îlün

Ben ölince olurun sana efendi mâ'il
Zecr-i hicrûnle gerekse beni sen bir mû kıl

Sa'y idüp Ka'be-i kûyunda safâlar sürmek
Şimdi olmazsa a kiblem gelecek yıl kâbil

Hâl-i ruhsârünü örter sanemâ zülf-i siyâh
Oldı tan yıldızına kara bulutlar hâ'il

Gönli var mı sana meyl itmege zühhâdun
Zülf-i 'ayyârünü gönder ki getürsin bir dil

Mezra'-ı dilde ricâ tohmını tahsîl idemem
Kendüm ancak bu kadar ekilmişüm ve'l-hâsıl

Gonce tıflına meger göz degirüpdür nergis
Togru başın tutamaz hâli be-gâyet müşkil

Firkatin gerçi Ziyâ'îyi za'îf itdi velî
Cânını kılca koyan fikr-i miyânundur bil

-260-

Mefâ'ilün Fe'ilâtün Mefâ'ilün Fe'ilün

Saçunla eyleyemez dil-berâ cedel sünbül
Gamunla perîşândurur ezel sünbül

Saçunla olmasa hem-ser begüm niçe müddet
Bu reng ü bûyı bulur mıydı mâ-hasal sünbül

Yüzünde zülfün efendi inen güzel yaraşur
Egerçi âteşe karşı bulur hanel sünbül

Dilâ ko seyr-i gül-istânı çün yeter yârun
Yanağı âb-ı revân zülfî bî-bedel sünbül

Degül mi nazm-ı Ziyâ'î efendi bâg-ı latîf
Bitürdi ziynet için câ-be-câ güzel sünbül

-261-

Fâ'ilâtün Fâ'ilâtün Fâ'ilâtün Fâ'ilün

Minnet Allâha ki kıldum şâh-ı hüsne 'arz-ı hâl
Gitti eyyâm-ı firâk irişdi eyyâm-ı visâl

İtmiş iken bana sensiz gül-şeni nâr-ı cahîm
Ey halîlüm gül-şen itdi nâr-ı hicri Zü'l-celâl

Şevkün elden komadum irince burc-ı devlete
Olmış iken âsumân-ı gussada kaddüm hilâl

Pây-mâl itmişdi gam ayakda kalmışdum velî
Dest-gîr oldun bana ey hüsrev-i mülk-i cemâl

Ey Ziyâ'î togrusı kurtarmasa ol serv-kad
Kılmış idüm bâr-ı derd altında kaddüm ana dâl

-262-

Fe'ilâtün Fe'ilâtün Fe'ilâtün Fe'ilün

Yalvarup düşme dilâ ayagina nite ki seyl
Serv ser-keşdür inen eylemez üftâdeye meyl

Varıcak kûyuna dendân-ı segün dâmende
Eylesem 'azm-i Gül-istân ilişür hârına Zeyl

Şimdi ümmîd-i visâlün var efendi dilde
Dûzah-ı hicrüne tekrâr düşer isem vâveyl

Leb-i rengînüne öykündüğü için mahzâ
Renkler virdi 'akîk-i Yemene necm-i Süheyl

Dil-i pür-şevk-i Ziyâ'î şeb-i hicrânunda
Sanki şeb-tâbdur şevke gelür çün ire leyl

-263-

Fâ'îlâtün Fâ'îlâtün Fâ'îlâtün Fâ'îlün

Şimdi yanumdan gidüp agyâra yâr olmazdı dil
Tolasam nâzun miyânuna mukaddem ben de kol

Yüz bulup ruhsârına öykünmek istersin yine
Ey gül-i ter yâr elinde olmazsın sag sol

Dîde-i cânâna çün öykünmedi ey bâg-bân
Sana kim dir gül-şen içre nergis-i bî-râh yol

Kimse bâzâr-ı mahabbetde ziyân itmiş degül
Ger murâdun cân virüp derd almag ise 'âşık ol

Rûh-ı sânidür Ziyâ'îye şarâb-ı erguvân
Gönlümüz şevk ile tolsun sen de ey peymâne tol

-264-

Müstef'îlün Müstef'îlün Müstef'îlün Müstef'îlün

Ey âşinâ-yı cân u dil ben bendeni yâd eyle gel
Vîrâne gönlüm hânesin lutfunla âbâd eyle gel

Gönlüm ihâta kıldı gam yaşum akıtma dem-be-dem
Ey serv-i bûstân-ı İrem derdünden âzâd eyle gel

Bir serv-i kadd-âzâdesin bu dergehün üftâdesin
Her dem niçün agladasın ey hande-rû şâd eyle gel

Yaşum suladı gül-şeni âhum eritdi âheni
Zulm itdi acıtdı beni gamlar şehâ dâd eyle gel

Gam 'askeriyle nâ-gehân toldı Ziyâ'î mülk-i cân
Şimdi zamanıdur hemân ol şâha feryâd eyle gel

-265-

Fâ'îlâtün Fâ'îlâtün Fâ'îlâtün Fâ'îlün

Sen bezerdün bezmümüz ey şem'-i bezm-ârâ ezel
Şimdi bizden bilmezsin niçün bezersin bezme gel

Goncadur peykân-ı tîrün bâg-ı dilde câ-be-câ
Serv-i sahn-ı sînemüzdür darb-ı tîgün fi'l-mesel

Ol hilâl-ebriî işitdi böyle şeydâ oldugum
Derd ile cismüm hayâl itdi ki men yesma' yuhyel

Cânum aldı cebr ile la'linden ammâ rahm idüp
Bûse virürse bedel ol bî-bedel ni'me'l-bedel

Şevke gelsün okıyan bezm-i şarâb-ı nâbda
Vasf-ı la'linde Ziyâ'î yazdı bir rengîn gazel

-266-

Fâ'ilâtün Fâ'ilâtün Fâ'ilâtün Fâ'ilün

Mekr ider zülfün meger ey dil-ber-i Yûsuf-cemâl
Ehl-i şevke reng ider la'l-i ruh-ı rengînün al

Sâkî meşşâta mey-i gül-gündür gül-gûnesi
Sana bir reng olmasun meclisde ey sâhib-cemâl

Bâr-ı hicrün şöyle kılmış tevsen-i çerhi nahîf
Üstühân-ı sînesidür görinen sanma hilâl

Dost uymış düşmene düşmen hayâl itmiş beni
Dostlar bu hâl ile dil-berini eyler hayâl

Bendeyem ben de Ziyâ'î gerçi şâh-ı aşka lîk
Mâlik-i mülk-i kemâlem kâmil-i sadr-ı kemâl

-267-

Mef'ûlü Fâ'ilâtü Mefâ'ilü Fâ'ilün

Bülbül yanup yakılmaga gül-şende ey halîl
Saru gül oldu şem' meger goncalar fetîl

Bâg içre nergise yaraşur benefşeler
Gök dest-mâl ile silinür dîde-i 'alîl

Ey Mısr-ı hüsn-i Yûsuf rûz-ı hisâbda
Mîzânı yâd kıl yaşımı itme Nîl

Gönlüm çü bâz-pâre kılursın sakın hele
Gîsûna pâresi tokınur ey şeh-i cemîl

Ben şol Ziyâ'îyem ki belâ zulmetindeyem
Zâr u garîb ü bî-kes ü bî-çâre vü zelîl

-268-

Fe'ilâtün Fe'ilâtün Fe'ilâtün Fe'ilün

Meclis-i bâgda zerrîn kadehe bakma gönül
Mey-i şeb-nemle tolu bülbüledür gonca-i gül

Germ olup ‘ârız-ı cânânuma öykünmişsin
Şafak üstüne yürüdi tutul ey mâh tutul

Hâle sanma güneş ey mâh olıcak dîv anun
Takdı cellâd-ı felek gerdenine halka-i gûl

Ne aceb devr ider elden ele düşdi sâgar
Ragbeti kalmayup ayakda kalur cür‘a-i mül

Aglasun inlesün ey mâh Ziyâ’î her dem
Ne ziyân ide güle âh u figân-ı bülbül

-269-

Fe‘ilâtün Fe‘ilâtün Fe‘ilün

Lebüne benzedügiçün mey-i âl
Eli üzre tutar anı meyyâl

La‘l-i şîrînüne hayrân ancak
Özledi anun için hâtır bâl

Nakd-i cân ister ise la‘lün eger
Ben ana cân virürin nakdini al

Sîm-i eşk ü zer-i çehrem var iken
Mâl ile her tarafum mâl-â-mâl

‘Âşık oldur ki Ziyâ’î ola ol
Hâk-i râh-ı şeh-i iklim-i cemâl

-270-

Mefâ‘ilün Fe‘ilâtün Mefâ‘ilün Fe‘ilün

Yabana söylemege başladı yine bülbül
Meger ki mest ider şarâb-ı jâle-i gül

Gönülde çeşm ü ‘izâr u külâle fikri hemân
Konuldu şîşede san nergis ü gül ü sünbül

Çogalsa memleket-i İslâmda fitne
Tagıldı safha-i ruhsâr-ı yâra çün kâkül

Revâ mı kanumuzı kana kana nûş idesin
Şarâbı içme husûsâ ki diye Fahr-ı Resûl

Dil-i Ziyâ’î ki meddâh-ı hâl-i rûyundur
Çemende kumrıdur agzında dâne-i fülful

-271-

Mefâ'îlün Mefâ'îlün Mefâ'îlün Mefâ'îlün

Seherde çâk idem gül gibi şevkümden girîbânım
Gelürse seyr-i gül-zâra nigâr-ı pâk-dâmânım

Dil-i pür-hûn açılsun gonca-veş reftârını görsün
Seher taraf-ı gül-istâna salın serv-i hırâmânım

Niçün gelmez senün gül-zâr-ı kûyun seyrine bir gün
Dikenler mi batar pâ-y-ı güle ey verd-i handânım

Eger kim cân virürsem hasret-i bâlâ-yı dil-berle
Sanevber sâyesinde defn olınsun cism-i bî-cânım

Ziyâ'î tîşe-i gamla sıyam Ferhâd-veş başım
Er ol baş yar diyü Şîrîn-edâ eylerse cânânım

-272-

Mefâ'îlün Mefâ'îlün Mefâ'îlün Mefâ'îlün

Dem-i âhirde sanman menzilüm zîr-i türâb itdüm
Günâhum çoklugından yirlere girdüm hicâb itdüm

Dirîgâ kıymet-i 'ömr-i 'azîzi bilmedüm gitdüm
Ne kesb-i ma'rifet kıldum ne hayrına sevâb itdüm

'Îzâr-ı i'tizâr-ı yârı câ-y-ı ilticâya hiç
Komadum ben cenâb-ı ehl-i hakdan ictinâb itdüm

Koşuldum her har-ı lâ-yefheme nekbet gibi hayfâ
Murâdum menziline irmedüm çok ıztırâb itdüm

Ne dünyâdan murâd aldum ne oldum tâlib-i 'ukbâ
Ziyâ'î gibi dünyâmı vü 'ukbâmı harâb itdüm

-273-

Mefâ'îlün Mefâ'îlün Mefâ'îlün Mefâ'îlün

Gice yâd-ı lebünle eşk-i çeşmüm erguvân itdüm
Seher gül-ruhların gördüm hezâr âh u figân itdüm

Beni ey ehl-i dil anlan mezârum taşıdur sanman
Ben ol sengîn dilün derdinden öldüm bir nişân itdüm

Görüp la'l-i hayât-efzâ-yı cânânı hicâbumdan
Hemen n'itdümse itdüm cânı cismümde nihân itdüm

Dutalum sevdüğüm çün cevri ide ol mâh-ı hercâyî
Bana zulm eyleme sen ey felek bârî sana n'itdüm

Ziyâ'î gibi 'ömrüm nakdini harc eyledüm bir bir
Ticâret bilmedüm âhir tasavvurdan ziyân itdüm

-274-

Fe'îlâtün Fe'îlâtün Fe'îlâtün Fe'îlün

Gice ol meh gele diyü oyalanıgördüm
Durmadı 'ahdine âhir o yalanı gördüm

Sînem evvel hedef-i tîr-i belâ kılmış idi
Vazgeldi bu kez ol kaşı kemânı gördüm

Gerçi çok dil-ber-i ra'nâlar işitdüm ammâ
'Âlem içinde hemân hüsn ile ânı gördüm

Zerrece 'âşıkına merhameti şefkati yok
Bâg-ı 'âlemde ben ol gonca-dehânı gördüm

Seyr iden nazm-ı bedî'üm ne beyân eyledüğün
Ey Ziyâ'î ko disün ben de me'ânî gördüm

-275-

Fâ'îlâtün Fâ'îlâtün Fâ'îlün

Bulmaga kapunda efendi merâm
İdemedüm âh tamâm ihtimâm

Vuslatun ardınca irişür firâk
Olmadı bu derdüme dâ'im devâm

Olmasa hem-reng-i zülâl-i lebün
Gam-zedeler içmez idi mey müdâm

Didi kıyâm idüp o serv-i sehî
Kasd iderin cânuna bir gün kıyam

Kârı Ziyâ'î kulunun dâ'imâ
Sana du'â eylemedür ve's-selâm

-276-

Mefâ'îlün Mefâ'îlün Mefâ'îlün Mefâ'îlün

Gam-ı hicrünle her dem zehr-i kâtildür benüm nûşum
Belâ vü derd ü hasretdür hayâlünle hem-âgûşum

Cihânda ey perî-ruhsâr o hüsn-i 'âlem-ârânı
'Aceb dîvânelikdür gördüğümce mahv olur hûşum

N'olaydı mest-i câm-ı bezm-i nâr oldukda sultânım
Dise n'eyler mey-i 'aşkumla mest olan o medhûşum

Ben ol deryâ-yı 'îrfânem ki nazmum dürr ü gevherdür
Hevâ-yı 'aşk ile ancak olur cânâ benüm cûşum

Ziyâ'inün sorarsan zulmet-i hicründe ahvâlin
Senün sevdâna düşmüşdür benüm yâr-ı siyeh-pûşum

-277-

Fe'îlâtün Fe'îlâtün Fe'îlâtün Fe'îlün

Mekteb-i gamda elif öğredicek üstâdum
Yâduma geldi belâdur o boyı şimşâdum

Âh kim râz-ı nihânım duyulur nâlemden
Bana yirden göge dek zulm ideyor feryâdum

Reng ü âl ile dem-â-dem benüm ol kanım içer
Leb-i la'lünden efendi alabilsem dâdum

Altmış bûsene yitmişdür işitdüm agyâr
Bin belâ bu ki benüm seksene çıkdı adum

Ben Ziyâ'î gibi mülk-i 'ademe 'azm itdüm
Zâda'llâhu te'âlâ gam olupdur zâdum

-278-

Mefâ'ilün Mefâ'ilün Mefâ'ilün Mefâ'ilün

Esîr-i kayd-ı 'aşkem mahbes-i hicrâna mahbûsem
Ne 'irzun mübtelâsı ne esîr-i nâm-ı nâmûsem

Dili câm-ı mahabbet gıll u gışşdan pâk kılmışdur
Be-hakk-ı Hazret-i Râzık ne zerrâkem ne sâlûsem

Vücûdum mahv ider âhir hevâ-yı 'aşk u nâr-ı gam
Anunçün dürlü feryâd itmede mânend-i Kaknûsem

Hasûd-ı lâ-yesûdun bana bugzı bir zarar kılmaz
Murâdumdan ümidüm kesmişem bir merd-i me'yûsem

Ziyâ'iyem benüm nazm-ı bedî'üm şevke bâ'isdür
Muhîbb-i bî-riyâyem derd-i bî-dermâna me'nûsem

-279-

Fe'îlâtün Mefâ'ilün Fe'îlün

İştîyâkun bihâra benzettüm
Vaslun âhir kenâra benzettüm

Ruh-ı gül-gûnun ey gül-i handân
Ben bahâr-ı enâra benzettüm

‘Âşıkun kim sirişk-i dîdesi yok
Suyı yok çeşme-sâra benzettüm

Serv-kadler seven fakîri hemân
Eli yufka çenâra benzettüm

Ey Ziyâ’î selâset-i şî’rûn
Tîz akar cûy-bâra benzettüm

-280-

Mefâ’îlün Mefâ’îlün Mefâ’îlün Mefâ’îlün

Vücûdumdan usandum dehr-i fânîden güzer kıldum
‘Adem iklîmi dirler bir ‘aceb mülke sefer kıldum

Ben ol üstâd-ı nerrâdem ki pullar dâg-ı sînemdür
Beni nerd-i belâda zâr iden mâhı kamer kıldum

Kenâr-ı cûy-bâra cem’ olan zenbûra benzettüm
Kenâr-ı ‘ârızunda hâlüne çünki nazar kıldum

Elek asdı benüm fikr-i dakîküm hâleden mâha
Gice bahs-i ruhunda görsen anunla neler kıldum

Ziyâ’î gibi kûyun Ka’besini kıble-gâh itsem
Namâzumda bu fikri ben niçe şâm u seher kıldum

-281-

Fâ’îlâtün Fâ’îlâtün Fâ’îlâtün Fâ’îlün

Eyledi ‘aşkun beni sahrâ-yı hayretde mukîm
Bir yanı bâg-ı ümîd bir yanı hem deryâ-yı bîm

Didi vâ’iz koynuna girmek günâh inanmaduk
Hoş günâha girmişüz Estâgfuru’llâhû’l-‘azîm

‘Ömrümüz nakdin ümîd-i vasluna sarf eyledük
Bir kerem gelmezse senden n’idelüm Allâh Kerîm

Diyessin ümmîd-i vasl eylerdi gitdi nâ-murâd
Öldüğümde hâlümi yârân sorarsa ey nesîm

Ey dür-i pâkize ger kimdür Ziyâ’î dir isen

Bagrı derdünle delinmiş gözi yaşlu bir yetîm

-282-

Fe‘ilâtün Fe‘ilâtün Fe‘ilâtün Fe‘ilün

Nâmede sana yazardum gam u derd ü keselüm
Tıflı eyyâmı idügündür benüm ammâ ecelüm

Elif-i kâmet ü mîm-i fem ü lâ-m-ı zülfün
Oldı ey la‘l-i lebi sükker-i sâfî emelüm

Dest-gîr ol bana gel ey sanem-i sengîn-dil
Ki taş altında kalupdur bu zamân iki elüm

Ney gibi inledügi döne döne dolâbun
‘Aşk-ı cânân ile bir derdi mi vardur görelüm

Ka‘beye varup eger görmek ise nûr murâd
Yârı kûyında temâşâ kıl irak gitmeyelüm

Zülfî altında yüzi mushaf elifdür kaddi
Hakkı setr itmeyelüm togrusını söyleyelüm

Ey Ziyâ‘î saçına öyküne ger sünbül-i bâg
Sakin öykünme diyü ana piyâzı basalum

-283-

Fâ‘ilâtün Fâ‘ilâtün Fâ‘ilâtün Fâ‘ilün

Gül-şen-i ‘âlemde bir gonca-dehânum yok benüm
Mûya döndüm gussadan bir mû-miyânnum yok benüm

Bâr-ı gam бүkdi bilüm âhir beni pîr eyledi
Eski derdüm tâzeler bir nev-cevânnum yok benüm

Yâr ile agyârı görmekten ben ölmüş gitmişüm
Derdümi ‘arz itmege cânâna cânnum yok benüm

Ben güzeller vuslatından bî-nasîbem tâ-ezel
Derd-i dilden gayrı bir râz-ı nihânnum yok benüm

Ey Ziyâ‘î her sözün sükkerdür ammâ n’eyleyüm
Meyl ider bir tûtî-i şîrîn-zebânnum yok benüm

-284-

Fâ‘ilâtün Fâ‘ilâtün Fâ‘ilâtün Fâ‘ilün

Ey perî dîvânenem var ise yâ mest-i meyem
Kılurın zârî vü nâle bezmde bilmem neyem

Gamdan özge hem-demüm yok hergiz ey şem‘-i münîr
Kime yanam yakılam yâ kime derdüm söyleyem

Uslanur dîvâneler zencîr ile ben ey perî
Terk idersem zülfünün zencîrini dîvâneylem

Şâh-ı ‘aşk öninde hacletden yüzüm düşer yire
Ger koyup tâc-ı melâmet hırka-i ‘ârı geyem

Ben der-i dil-dâra düşdüm derdüm ammâ bî-kıyâs
Ey Ziyâ’î her zamân bu derde bilmem n’eyleyem

-285-

Fâ‘ilâtün Fâ‘ilâtün Fâ‘ilâtün Fâ‘ilün

Gül-şen-i kûy-ı nigâr imiş bugün bâg-ı İrem
Çâre yok ben bülbüle tâ kim o gül-zâra irem

Bâr-ı hicrân-ı nigârı çekmeseydi âsumân
Kâmeti her demde anun böyle olur mıydı ham

Bâg-ı ‘âlemde görüp ol servi şeydâ olmasa
Dîde-i nergisde olmazdı seher vaktinde nem

Kadd-i yârı görelî gönlümde bir gam var idi
‘Ârızunda gördüm üç ben bir iken on oldu gam

Ey Ziyâ’î câm-ı bezm-i yâra öykünmek diler
Meclis-i gamda dolar hûn ile çeşmüm dem-be-dem

-286-

Fâ‘ilâtün Fâ‘ilâtün Fâ‘ilâtün Fâ‘ilün

Kalmışum tîmârsız çün olmuşum bîmâr-ı gam
Kalmışum nâ-çâr çünki olmuşum efkâr-ı gam

Cismümi hâk ile yeksân eyledi bâd-ı firâk
Âb-ı dîdem olmasa yakardı anı nâr-ı gam

‘Aynuma gelmezdi mahmûr-ı mey-i ‘aşk olduğum
Özge ‘âlemdür velî keyfiyyet-i esrâr-ı gam

Hoş tahammül eyler idüm bâr-ı ‘aşkı çekmege
Âh eger yüklenmeseydi üstüme ser-bâr-ı gam

Âfitâb olursa ayruk sevmeyem şehr oğlanın
Şimdilik hercâyî sevmekden Ziyâ’î fârigam

-287-

Fe‘ilâtün Mefâ‘ilün Fe‘ilün

Benüm iki gözüm şarâb alalum
Cigerüm pâresi kebâb alalum

İçelüm birer ikişer sâgar
‘Ömrümüzden biraz hisâb alalum

Yanmışuz hicrün ile teşne-dilüz
Vuslatundan zülâl-i nâb alalum

Gel ki şîrîn kıssalar soralum
Lebleründen güzel cevâb alalum

Nâlemüz bezm-i yâra saz yeter
Yine yâ Rabbenâ rebâb alalum

Ola kim açılardı tâli‘ümüz
Ruh-ı cânâneden nikâb alalum

Mâl-hulyâ-yı vasl-ı dil-berden
Gel Ziyâ’î biz ıztırâb alalum

-288-

Fâ‘ilâtün Fâ‘ilâtün Fâ‘ilâtün Fâ‘ilün

Yâr elüm tutmaz elinden çekdi cânum çok elem
Gamze-i cânâne cânum dahı alursa ne gam

Yazmaga dilde miyânun nakşın eylerken hayâl
Bağladı cânâ nitâkun ol ümîde kıl kalem

Şâh-ı ‘aşkem lâciverdî çerh otagumdur benüm
Gam sipâhumdur benüm yanumca âhumdur ‘alem

La‘lünün dîvânesi olan libâsı n’eylesün
Câmesin nakd eylesün şevk ile itsün câm-ı Cem

Nûr inüp kabr-i Ziyâ’îye ziyâ vireydi ger
Ol gözüm nûrı ana ikdâm idüp bassa kadem

-289-

Fe‘ilâtün Mefâ‘ilün Fe‘ilün

Çok güzel var cihânda sultânüm
Sana kurbân olur velî cânüm

Seni tercîh ider güzellerden
Bu benüm hâtır-ı perîşânüm

Niçe bir bu cefâ vü cevri bana

Zulmi ko gel esirge sultânüm

Tana kalurdi kârvân-kırân
Görse Hâlik neler kılur cânüm

Zulmet-i zulmden Ziyâ'îyi
Gel halâs eyle mâh-ı tâbânüm

-290-

Mefâ'îlün Fe'îlâtün Mefâ'îlün Fe'îlün

Şu dem ki pâdişeh-i 'aşka ben vezîr oldum
Virüldi mülk-i mihnet bana emîr oldum

Büküldi bâr-ı gam-ı nev-cevân ile kaddüm
'Aceb degül mi cevânlık ya ben de pîr oldum

Nedür bu cevr ü cefâlar nedür bu derd-i belâ
Ne çâre n'eyleyeyin kâfire esîr oldum

Rakîb-i kâfire çün tîg-i âhumı çekerin
Başı yaragını görsün ki ben dilîr oldum

Ziyâ'iyâ kaluban zulmet-i şeb-i gamda
Meded ki muntazır-ı mâh-ı bî-nazîr oldum

-291-

Mefâ'îlün Mefâ'îlün Mefâ'îlün Mefâ'îlün

Seher vaktinde mâhum gün yüzün gördüm tanakaldum
Fenâ olur vücûdum diyü kapunda bakakaldum

Sanurdum vasla irdüm 'arz-ı hâl idem diyü bir bir
Hayâl-i dil-rübâyâ sadece derdüm sayakaldum

Cihânda vasl-ı yâra irmemiş kalmadı bir 'âşık
Yalunuz kûşe-i gamda hemân ben mübtelâ kaldum

Bu dem bir rûze irdüm togrusı kaddüm dü-tâ kaldı
Ne rûze rûze-i hicrân-ı cânânı dutakaldum

Saçup tohm-ı ümîdi mezra'-ı dünyâya bir kaç kez
Ziyâ'î hasılı kendüm yine derd-i firâk aldum

-292-

Fe'îlâtün Fe'îlâtün Fe'îlâtün Fe'îlün

Ehl-i insâf acır aglar bizi insâf idelüm
Sâde-rûlardan ayırmaga kıyarsa ecelüm

Hâlün ey yâr hayâlüm saçun endîşemdür
Kâkülün fikr-i dirâzum leb-i la'lün emelüm

Gitdi yâr irdi dem-i firkat esîr itdi beni
Nâzenîn 'ömr gelüp geçdi irişdi ecelüm

Soralum dîv rakîbe 'aceb el virmiş mi
Ol gözi haste girse ele nabzın turalum

'Alevi muhrik-edâ noktalar anun şereri
Vasf-ı hicrânda Ziyâ'î yanar oddur gazelüm

-293-

Mefâ'îlün Mefâ'îlün Mefâ'îlün Mefâ'îlün

Bu zulmi görmedüm ben çok meh-pâreler gördüm
Dil-i 'uşşâkı tîg-i hicrün ey meh yareler gördüm

Görüp sînemde zahm-ı tîg-i hicrün ey cefâ-kârum
Didi cerrâh böyle görmedüm çok yareler gördüm

Nazar kıldum sipihre dün gice ey mihr-i meh-peyker
Dizilmiş kûyuna seyrân ider seyyâreler gördüm

Meded bir dahı anman bana Ferhâd ile Mecnûnı
Yazılmış defter-i 'uşşâkda zen-pâreler gördüm

Ziyâ'î gibi hergiz görmedüm derd ehli hak bu kim
Egerçi ben dahı çok hasteler bî-çâreler gördüm

-294-

Mef'ûlü Mefâ'îlü Mefâ'îlü Fa'ûlün

Kanlar dökülür câm-ı lebün şevkine her dem
Cânlar virülür vaslına ey maksad-ı 'âlem

Cân gussa çeker cümle cihân vâsıl-ı cânân
Dil derdini çekmekte sürer zevkini 'âlem

Vâ'iz bana vasf itme cinânı ki cihânda
Kûyı gibi cennet mi olurmuş be hey âdem

Ol hüsn-i cemâli göricek gönlümi virdüm
Cânım da virürdüm anı ger bir dahı görsem

Seyr itmeyeli ol meh-i bî-mihri Ziyâ'î
Târîk-i şeb-i hicrde muhtâc-ı ziyâyem

-295-

Mefâ'îlün Mefâ'îlün Mefâ'îlün Mefâ'îlün

Bana ikbâl idelden derd-i dil-ber hoşdur ahvâlüm
Şeh-i mülk-i gamem hem devletüm vardır hem ikbâlüm

Ben ol derd ehliyem 'âlemde kim yokdur benüm hergiz
Ne vasl-ı yâra ümmîdüm ne cân virmekte ihmâlüm

Leb-i dil-ber hayâliyle tenüm gamda gubâr olsa
Buna hayrânem anlar yok benüm keyfiyyet-i hâlüm

Getürmen yanuma Ferhâd ile Mecnûnı lutf eylen
Bular sadr-ı mahabbetde degül emsâlüm akrânüm

Cinân-ı kûyuna uçmak diler cân mürgü bâl açmış
N'olaydı ey Ziyâ'î bilse ol zâlim benüm hâlüm

-296-

Fe'îlâtün Fe'îlâtün Fe'îlâtün Fe'îlün
Künc-i gamda dimezem kimseye kat'â keselüm
Rahm idüp tâ ki dutmaya nâkes elüm

Anduk âşnâ-yı kelâm içre ser-i agyârı
Kerem eyle sözüümüz burada cânâ keselüm

Kûy-ı cânâna esen geldi nesîm-i âhum
Didi ki bâd-ı seherde burda bî-pâk eselüm

Merhabâ itmek için ança du'âlar kıldum
Şâyed idem el uzunlugını şâhâ kes elüm

Ey Ziyâ'î ne za'îf itdi beni derd-i firâk
Künc-i gamda dimezem kimseye kat'â keselüm

-297-

Mefâ'îlün Mefâ'îlün Mefâ'îlün Mefâ'îlün

Dirîgâ kim giriftâr-ı 'adû-yı derd-i hicrânem
Cüdâyem pâdişâhumdan esîr-i kâfir-istânem

Ümmîdüm kesmezin kat'â visâlınden o cânânun
Kesildi gerçi tîg-i hicr ile bu cism-i bî-cânüm

Virelden cânımı cânân yolına tâze cân buldum
Kul olaldan şeh-i 'aşka gam ikliminde sultânem

Bugün iklim-i hicrân içre kimse hâlüme bakmaz
Bu dem yaşum silen yârüm kanı kim zâr u giryânem

Ziyâ'î bengî-i esrâr-ı 'aşk-ı dil-berem ammâ

Müeyesser olmadı helvâ-yı vaslı buna hayrânem

-298-

Fe‘ilâtün Mefâ‘ilün Fe‘ilün

Âh kim bir kamerden ayrıldum
Ne kamer sîm-berden ayrıldum

Gitdi sabr u dil ü dil-ârâmum
Râh-ı gamda nelerden ayrıldum

Tan degüldür felekden aglar isem
Jâleyem verd-i terden ayrıldum

Subh-dem hâb-ı gaflet aldı beni
Seher irdi seherden ayrıldum

Eşk-i çeşmüm gibi ben üftâde
Ey Ziyâ‘î nazardan ayrıldum

-299-

Mef‘ûlü Fâ‘ilâtün Mef‘ûlü Fâ‘ilâtün

Çık dum ‘adem ilinden mülk-i vücûda irdüm
Der-bend-i ‘aklı geçdüm şehr-i cünûna girdüm

Cânândan ayru câna ten mâ‘il idi
Ölüp dirilüp âhir cândan anı ayırdum

Bûs-ı dehân-ı yârı alınca çıkdı cânım
Hayfâ ki cân metâ‘in ben yok bahâya virdüm

Vâ‘iz didi günehdür koynına girme yârun
Hiç tutmadum sözini nâ-geh günâha girdüm

Olmışdur ey Ziyâ‘î gam tekyesinde yârun
Fikr-i visâli zikrüm verd-i cemâli virdüm

-300-

Fâ‘ilâtün Fâ‘ilâtün Fâ‘ilâtün Fâ‘ilün

Ey perî zülfün görüp niçe yakıldum bilmedüm
‘Aklumun nakdini başdan yavı kıldum bilmedüm

Sûre-i ve‘l-Leyl okurken dün namâz-ı şâmda
Zulmet-i zülfün anup ka‘bem ne kıldum bilmedüm

Ruhlarun ey mâh-rû bir şevk virdi bana kim
Tâb-ı mihrünle bugün niçe yakıldum bilmedüm

Dir Hicâza ‘azm iden râh-ı mahallen var iken
Egri gitdüm togrusı yolum yanıldum bilmedüm

Dest ü vasf-ı ‘ârızın su gibi ezber okurın
Ey Ziyâ’î ‘ilm-i ‘aşkı niçe bildüm bilmedüm

-301-

Fâ‘ilâtün Fâ‘ilâtün Fâ‘ilâtün Fâ‘ilün

Âşinâ-yı nefsi şeytân olduğum yâd eyledüm
Ol sebebdan togdugum demlerde feryâd eyledüm

Gördüm ol demde yahûd şeytân eline girdüğüm
Var ise anun elinde böyle feryâd eyledüm

Taş bagırlı dil-berün ‘aşkıyla gönlüm hânesin
Muhkem olsun diyü tâ evvelde bünyâd eyledüm

Mesnedümdür her gece der-gâhun ey meh-rû diyü
Kendüme bu töhmeti yok yire isnâd eyledüm

Zulmet-i zindân-ı hicrânda Ziyâ’î derd-mend
Kalmış ol serv-i sehî dimez mi âzâd eyledüm

-302-

Mef‘ûlü Mefâ‘ilü Mefâ‘ilü Fa‘ülün

Sünbül saçuna öykünür imiş yolayazdum
Ey kâküli Leylâ hele Mecnûn olayazdum

Bir vech ile ‘Attâr ruh-ı yârı ögermiş
Bülbülden işitdüm bugün anı güleyazdum

Korkutmış işitdüm bizi tîg-i gam ile yâr
Bi’llâhi bugün kesb-i safâdan öleyazdum

Ol turre-i müşgîne diyüp vasf-ı dil-âvîz
Gül-zâr-ı cihânda varak-ı sünbüle yazdum

Şi‘rümde Ziyâ’î ne tesellî bula ‘âşık
Ben anda hemân kâ‘ide-i gulgule yazdum

-303-

Mef‘ûlü Fâ‘ilâtü Mefâ‘ilü Fâ‘ilün

Sırr-ı dehânımı bile mi her rakîb-i şûm
Her bir sefihe keşf ola mı hikmet-i ‘ulûm

Meyl eyle bâd-ı âhuma ey şem‘-i bezm-i cân
Her cânibe çü mâ‘il olur bâd esince mum

Gencîne-i visâlüne kasd eyledüm gice
Nâ-geh kıldı ejder-i zülfün bana hüçüm

Dil yalunuz vilâyet-i firkatde n‘eylesün
Gam ‘askeri yürüdi husûsâ ‘ale‘l-ücüm

Gam zulmetinde koma belâlu Ziyâ‘îyi
Yâ dâfi‘ü‘l-gumûm ü ya râfi‘ü‘l-hümûm

-304-

Mefâ‘ilün Mefâ‘ilün Mefâ‘ilün Mefâ‘ilün

Olur zülf-i ruhun kaddünde ey dil-dâr ham-der-ham
Olur bâlâya gitdükçe duhân-ı nâr ham-der-ham

Meger tâk-ı derünle halka-i bâbun misâlidür
Ki bir hamdur felek kavs-i kuzah tekrâr ham-der-ham

Senün bâg-ı cemâlünden hicâb itmiş meger cennet
Anunçün böyle olmuş ol sekiz dîvâr ham-der-ham

Ne dem kim hâba varsan genc-i hüsnün bekler ejder-vâr
Kuşagun başun ucında olur ey yâr ham-der-ham

Yazar gömgök delüdür yâra ‘arz-ı hâli tûmârın
Ziyâ‘î goncasın sûsen ider her bâr ham-der-ham

-305-

Fe‘ilâtün Fe‘ilâtün Fe‘ilâtün Fe‘ilün

Ey kaşı yâ gam-ı hicrün niçe yıllar çekdüm
Ey şeker-leb n‘ideyin şimdi mükerrer çekdüm

Hasret-i zülfün ile dâra teveccüh kıldum
Hicr-i müjgânun ile sîneme hançer çekdüm

Lâm-ı zülfüne degince ne elemeler gördüm
Kadd-i bâlâna irince ne belâlar çekdüm

Dâg-ı pür-hûnı ki sundum dil-i mecrûha bu dem
Pâdişâh-ı gama bir tâze gül-i ter çekdüm

Sâkiyâ tan mı Ziyâ‘î gibi mest olsam eger
Hasret-i la‘l-i lebünle mey-i ahmer çekdüm

-306-

Mefâ‘ilün Mefâ‘ilün Mefâ‘ilün Mefâ‘ilün

Fenâ dünyâda ben çok serv-kâmet dil-rübâ gördüm
Belâdur görmedüm bâlâ-yı yârı çok bakagördüm

Umarken vaslın ol yârun kesdüm andan ümmîdüm
Beni yâd eylemez agyâra yârı âşinâ gördüm

O servün râst geldüm şevkine bir bûse ‘ahd itdi
Dehân-ı yârdan ben zerre mikdârı vefâ gördüm

Nesine aldanurlar bilmezsin bu fânî dünyânun
Fenâdan gayrı nesne görmedüm ben çok bekâ gördüm

Belâ deşinde ‘uryân olmak ben ihtiyâr itdüm
Ziyâ’î çün libâsı cism-i ‘âşıkda kabâ gördüm

-307-

Fe‘ilâtün Fe‘ilâtün Fe‘ilâtün Fe‘ilün

Hücreme geldi benüm ol boyı Tûbâ ahşâm
Bana keşf oldu hemân nükte-i tûbâü’ş-şâm

Bana dil-ber sever ol diyü varun ta‘n itmen
Âdemi aldamasun mı sanem-i sîm-endâm

Bir fakîrem bana bu ta‘n u melâmet ne revâ
‘Aşk idüpdür niçe sultân-ı be-nâmı bed-nâm

Dem-be-dem kanum içer sâkî-i bezm-i hicrân
Vara mâdâm ki agyâr ile yâr içe müdâm

Şi‘r-i pür-sûzumı seyr itse Ziyâ’î Hüsrev
Odlara yakmaga dîvânın iderdi ikdâm

-308-

Fe‘ilâtün Mefâ‘ilün Fe‘ilün

Gam-ı haddünle verd-i handânım
Gül gibi çâk olur girîbânım

Derde dermân arardum olsa eger
Haste cismümde derde dermânım

Cânım ise murâd-ı cevrunde
Ben dirîg itmezin benüm cânım

Akdeniz içre Şâhin Adasıdur
Fikr-i çeşmünle çeşm-i giryânım

Sen gözi nûrısın Ziyâ'ınun
Hey benüm âfitâb-ı rahşânım

-309-

Fe'îlâtün Fe'îlâtün Fe'îlâtün Fe'îlün

Gördüm ümmîd-i visâlünde ki yokdur sûdum
Terk-i cân oldu reh-i gamda hemân maksûdum

Atun âheste bu rây-ı şeh ki şerâr-ı na'li
Yakmasun nâr-ı gama ten-i hâk-âlûdum

Korkarın gökde melekler gözin eyler giryân
Subh-dem âteş-i endûh-ı dilümden dûdum

Seg agyâr ile ayrılmadugun görmeyeyin
Dilerin cânımı tenden ayıra Ma'bûdum

Bir du'â eyle Ziyâ'î ki Hudâ ide cüdâ
Rûh-ı mecrûhum ile kâlib-ı hâk-âlûdum

-310-

Mefâ'îlün Mefâ'îlün Mefâ'îlün Mefâ'îlün

Sabâ kıldı rivâyet gonçeden gonçe dehânından
Ki yok bûy-ı vefâ 'uşşâka 'âlem gül-sitânından

Yeni dîvâne oldum eski derdüm tâzelenmişdür
Kocaldum mihr umarken bu cihânun nev-cevânından

Ümîdüm riştesin kesdüm vücûdum der-miyân itdüm
Ki bir kılca haber duydum hayâlümde miyânından

Behiştî terk idem kendüm görürsem dâne-i hâlin
Bu hûrî gelmemişdür Hazret-i Âdem zamânından

Umardum kim düşümde seyr idem âhû-yı Ken'ânı
Gözüm uyku yüzün görmez Ziyâ'ınun figânından

-311-

Mefâ'îlün Mefâ'îlün Mefâ'îlün Mefâ'îlün

'Aceb midür çıkarsam 'akıbet 'aklum gibi başdan
Şikâyet baht-ı şûmumdan meded hâl-i müşevveşden

'Aceb derd ü belâ çekdüm 'aceb cevr ü cefâ çekdüm
Niçe bî-rahm dil-berden niçe bî-mihr meh-veşden

Vücûdum gibi vîrân olmasun bir gün kamu 'âlem

Dem-â-dem gözlerümden seyl-i hûn olup akan yaşdan

Günâhum çoklugından âteş-i derd-i derûnum var
‘Acebdür bahr-ı rahmet cûşa gelmezse bu âteşden

Ziyâ’î çekdüm anca derd ü mihnet i’ tikâdum bu
Beter çekmiş degül kimse belâyı ben belâ-keşden

-312-

Mefâ’îlün Mefâ’îlün Mefâ’îlün Mefâ’îlün

Dirîgâ kim cüdâ düşdüm ben ol sâhib-cemâlümden
Irak ben mübtelâ düşdüm benüm vahşî gazâlumdan

Ben andan düşeli ayru yüzüm saru tenüm sayru
Haber-dâr olsa ol meh-rû benüm bârî bu hâlümden

Başumdan aşdı mihnetler geçüpdür câna hasretler
Kime kılâm şikâyetler gönülden bu melâlümden

Cefâ kılar o cellâdum çıkar eflâke feryâdum
Meger Mevlâm ala dâdum benüm ol yâr-ı zâlimden

Ziyâ’î pür-melâl oldum gamından bî-mecâl oldum
İrıldum bir hayâl oldum ben ol kaşı hilâlümden

-313-

Mefâ’îlün Mefâ’îlün Mefâ’îlün Mefâ’îlün

Sanurdum haste-i ‘aşkunı vaslunla esirgersin
Çıkup gîtün benüm cânım gibi bî-mihr dil-bersin

Enîs idün ezel deşt-i mahabbetde bu Mecnûna
Neden kaçdun benüm vahşî gazâlum niçün ürkersin

Beni dîvâne kıldun ey melek ‘arz-ı cemâl idüp
Kaçarsın şimdi âdemden hemân perrîye benzersin

Gamun bârını evvel çekdirüp kaddüm kemân itdün
Niye ta’cîl ile ok gibi benden nefret eylersin

Ne buldun bir leb-i ‘Îsâ ne içdün âb-ı hayvânı
Ziyâ’î zulmet-i firkatda şimdi ölmek istersin

-314-

Fâ’îlâtün Fâ’îlâtün Fâ’îlâtün Fâ’îlün

Rûz-ı vuslatda unuttum nûş-ı la’l-i yârı ben
Hoş peşîmânem bugün fi’s-sayf-i dayy’atü’l-leben

Ka‘beye girdünse kûy-ı dil-beri terk eyleyüp
Yol yanıldun gitme gel yanlış döner Bagdâddan

Sîm ü zer harc itmek ister vuslat-ı Şîrîn için
Bî-sütûnda var ise ma‘den arardı Kûh-ken

Ehl-i bezme şevk virdi câm-ı mey mey-hânedde
San ki mescid rûşen oldu pertev-i kandîlden

Nâr-ı gamdan hep şikâyetdür Ziyâ‘î yazdugum
Anun için sûz-nâk olmuş kelâmum cümleden

-315-

Fe‘ilâtün Fe‘ilâtün Fe‘ilâtün Fe‘ilün

Ey sirişküm gül-i gül-zâr-ı gamun şeb-nemisin
Hey fütâde reh-i dil-berde kimün hem-demisin

Ey sabâ söyle ki bir hem-nefesün var mı senün
Harem-i kûy-ı habîbümde kimün mahremisin

Ey ‘arak yüzi suyu ‘ârız-ı yârun sensin
Sen gül-istân-ı letâfet gülünün şeb-nemisin

Zülf-i dil-dâr hevâsı yem-i firkatde benüm
Saldı girdâb-ı gama şimdi vücûdum gemisin

Ey Ziyâ‘î niçe bir ‘âleme rüsvây olasin
Zülfî zencîrine dil bağlama dîvâne misin

-316-

Fe‘ilâtün Fe‘ilâtün Fe‘ilâtün Fe‘ilün

Gerçi ey mug-beçe mahbûb-ı kilîsâsın sen
Tapdugum Tanrı hakı kible-i tersâsın sen

Sûretâ bir sanem-i sîm-bedensin ammâ
Leb-i cân-bahşunla ma‘nîde ‘Îsâsın sen

Deyre sûret viren ol hüsn-i dil-ârâmundur
Zülf-i bed-kîş ile hammâl-ı çelîpâsın sen

Yürî kâfirligi ko ey saçı zünnâr yürî
Ehl-i İslâma kıyar âfet-i ra‘nâsın sen

Öldürüp haste Ziyâ‘îyi gam-ı hicrünle
Yine cân virdün ana tut ki Mesîhâsın sen

-317-

Mefâ'îlün Mefâ'îlün Mefâ'îlün Mefâ'îlün

Revâ mı iltifâtun böyle kesmen derd-mendünden
Gel insâf eyle hey sultân-ı 'âlem kendü kendünden

Ne derde mübtelâdur bu dil-i dîvâne seyr eyle
Ne kapundan diler gitmek ne kurtulmak kemendünden

Za'îf oldum büküldüm firkatünle ey hilâl-ebrû
Yolunda fark olunmaz kâlibum na'l-i semendünden

Hevâ-yı firkatün gül-şende lertzân itdi endâmın
Ne hâlet geldi âyâ serve bâlâ-yı bülendünden

Nedür cevri eyleyüp çok böyle i'râz itmege bâ' is
Ne gördün hey gözüm nûrı Ziyâ'î müstemendünden

-318-

Fe'îlâtün Mefâ'îlün Fe'îlün

Leylî zülfüne benem Mecnûn
Eksükümdür benüm hemân hâmûn

Leylî zülfün işidüp cânâ
Olmış idüm cenîn iken Mecnûn

Kâmetüm çeng olur mey-i derdünle
Ney ki bezmünde sâkiyâ kânûn

Ben yaşum bâg berg-i zerdi döker
Bozılır tut ki akçaya altûn

Bezm-i yârı Ziyâ'î vasf itdüm
Döndü şî'rümde câm tasına nûn

-319-

Mefâ'îlün Mefâ'îlün Mefâ'îlün Mefâ'îlün

Murâdum bu ki gönlüm mürşîd-i 'aşka mürîd olsun
Yolında cânumuz ol şâhid-i cânun şehîd olsun

Degülse nükte-i râz-ı femün künhiyle mefhûmum
Vefâ-yı dil-berân-âsâ vücûdum nâ-bedîd olsun

Meger kim sâye-i perr-i hümâdur zülf-i şeb-rengün
Şeh-i mülk-i gam eyler bendeni ömrün mezîd olsun

Vefâ sende mürüvvet sende ihsân u sahâ sende
'Alî bâlum seni her kim ki sevmezse Yezîd olsun

Ziyâ'î gibi da'vâ-yı mahabbet eyleyen 'âşık
Vusûl-i vuslat-ı yârı unutsun nâ-ümîd olsun

-320-

Mefâ'îlün Mefâ'îlün Fa'ûlün

Şeb-i Kadr u şeb-i Mi'râc o zülfeyn
İki kaşun arası Kâbe kavseyn

Zer-i rûyumla sîm-i eşk hâzır
Metâ'-ı vaslun için uşta nakdeyn

Gül-istân-ı belâda pâdişâhum
Akar her dem iki çeşmüm iki 'ayn

Tenüm gerdûna döndürdüm nigârâ
Anı dâg encümiyle eyleyüp zeyn

Ziyâ'î haşre dek hicründe kalsun
Tek ol şân-ı şerîfe gelmesün şeyn

-321-

Fâ'ilâtün Fâ'ilâtün Fâ'ilâtün Fâ'ilün

Cânuma kasd itme ey 'Îsâ-nefes kâfir misin
Evvêlâ gör mürde ihyâ itmege kâdir misin

Bî-huzûr isen dilâ fikr-i dehân-ı yârdan
Gel 'adem iklîmine 'azm idelüm hâzır mısın

Dem-be-dem ol gözleri hûnî beni kan agladur
Eşk-i çeşmüm göricek ey bahr sen acır mısın

Gam metâ'ın alup olsam sîm-i eşkümde emîn
Yohsa bunca akçaya ey dîde sen nâzır mısın

Hasb-i hâlün nazm idüp dil-dâra arz itmek nedür
Bu hicâb ile Ziyâ'î sen dahı şâ'ir misin

-322-

Mefâ'îlün Mefâ'îlün Mefâ'îlün Mefâ'îlün
Cüdâyem dergehünden Merve hakkı bî-safâdur cân
İrişür Ka'be-i vasluna yâ Hannân u yâ Mennân

Benüm cânân yolına 'âkıbet cân virmedür borcum
Halâs it deynden 'âlemde her medyümü yâ Deyyân

Benüm yâr-ı 'Azîzüm mâlik-i mülk-i bahâsın sen

O hüsn ile ko varsun Yûsuf olsun Mısrda sultân

Lebünden dâd umarken ey güzeller şâhı 'âşıklar
Revâ mı eyleye hûnî gözün 'âlemde her dem kan

Seni vasf eylemekde tıfl-ı dil gâyetde mâhirdür
Efendi tab'a mâlik böyle kanda kopisar oğlan

Degülsin bir zamân da ey perî agyârdan münfek
Süleymânsın ki karşunda iderler dîvler dîvân

Şarâb-ı 'aşkun ile dem-be-dem cân-ı Ziyâ'î mest
Gönül hayrândur esrâr-ı lebünle hüsnüne her ân

-323-

Fe'îlâtün Fe'îlâtün Fe'îlâtün Fe'îlün

Ey sabâ benzer ki geldün hıtta-i Ken'ândan
Gel haber vir şâh-ı Mısra külbe-i ahzândan

Lezzet-i la'l-i lebün fehm itse ey şîrîn-dehen
Hızr elin yurdu mukarrer çeşme-i hayvândan

Kanlu yaşum katre katre dizilür müjgânuma
Sübhadur Allâhu Ekber dâne-i mercândan

Ehl-i derde hâlüm aglardum dökerdüm derdümi
Korkarın hazz itmeye yârân inen bârândan

Ugrasun bir derde ol zâlim Ziyâ'iden beter
Aldı çün 'akl u dil ü sabrı ne ister cândan

-324-

Fe'îlâtün Fe'îlâtün Fe'îlâtün Fe'îlün

Hasret-i çâh-ı zenahdânunla çâk olursa ten
Kabrümi lutf eylesün bir hoşça kazsun gûr-ken

Zâ'il oldı seyr-i kûyunla temennâ-yı cinân
Fikr-i zülfün yâda geldi gitdi sevdâ-yı vatan

Sarb idi der-bend-i 'aşk aslâ geçilmezdi eger
Açmasa tîşeyle bir mikdârını çün Kûh-ken

'Askerinde ol şeh-i hüsnün kızıl bayrak degül
Katli u şşâk itdi baglar fahr için kanlu kefen

Gitdi 'akl u sabr u dil dîdâra imkân olmadı
Ey Ziyâ'î n'eylemek n'itmek gerek gitdi giden

-325-

Mefâ'îlün Mefâ'îlün Mefâ'îlün Mefâ'îlün

Mesîhâ-dem sanemler derdine düşmüş zebûnem ben
Figân ile cihân deyrinde kalmış erganûnem ben

Nehâr u leyli Mecnûnun n'ola geçdiyse mihnetde
Garîbem bî-kesem âvâre-i deşt-i cünûnem ben

Degüldür Bî-sütûn ol kesdügi kûhsârı Ferhâdun
Ki deldi tagları tag-ı derûn-ı Şîrînem ben

Derûnum derdin iş'âr idemem mest olmasam yâra
Budur bâ'is ki meyyâl-i şarâb-ı lâle-gûnem ben

Ziyâ'î tan degül hûn-ı sirişke gark olursa ten
Şehîd-i tîg-i aşk olalıdan garîk-ı hûnem ben

-326-

Fe'îlâtün Fe'îlâtün Fe'îlâtün Fe'îlün

Dehenün gonca-i cennet gibi hem-vâr olsun
Bûse virdi bana hiç yok dîmedi var olsun

Cânumı zülf-i ruh u hâl u hatundan ayıran
Rub'-ı meskûnda murâdum bu ki nâ-çâr olsun

Kahr ile kanı dökülsün lebüne kasd idenün
Zülfüne el uzada zulm ile ber-dâr olsun

Cevrün arturdu meded anlaya mı hâlümü yâr
Dilerin bencileyin derde giriftâr olsun

Dir imişsin ki Ziyâ'î bana kurbân olmaz
Olsun ey şûh-ı cefâ-pîşe sitem-kâr olsun

-327-

Mefâ'îlün Fe'îlâtün Mefâ'îlün Fe'îlün

Dem-i bahârda bî-behreyem hazânda hazîn
Vücûdum olmadı bu devr-i bî-emânda emîn

Teferrüc eyleyelüm bâğı gel bile ey hûr
Ki döndi cennet-i firdevse bu zamânda zemîn

Senünle geşt idelüm kûh u deşti tenhâ gel
Revâ degül olasın şimdi bir mekânda mekîn

Garîbün oldu şehâ yanmayan firâk odına
Olaydı olsa eger cânını yakan da yakîn

Ziyâ'î'nün teni bunda dil ân-ı hüsnünde
Vücûdî âh ki hem bundadır hem anda hemîn

-328-

Fe'îlâtün Fe'îlâtün Fe'îlâtün Fe'îlün

Çünkü cennetde ecel olmaz eyâ sîm-beden
Ne münâsib ki kıla kûyunı agyâra vatan

Disen olurdu sunup la'lüni ey meh ma em
İtsen olurdu vefâ bendene meh-mâ-emken

Hastenün güneşe karşı olur za'fî kavî
Lîk ben haste cemâlün göricek oldum esen

Bilmezem n'eyleyem âhir ne kılam kanda gidem
Beni miskîn ider ol gözleri âhû-yı Hoten

Lâ-cerem lâyıık-ı firdevs ola rûh-ı Mecnûn
Ki ana sûre-i ve'l-Leyl ile yazılssa kefen

Havf-ı tîgünle şehâ kalmadı kan benzümde
Dem-be-dem gözde bu hûn-âb-ı sirişküm kandan

Elif-i kâmetün ile görüp üç nokta-i hâl
Bin belâ geldi Ziyâ'îye senün 'aşkundan

-329-

Fe'îlâtün Fe'îlâtün Fe'îlâtün Fe'îlün

Ni'met-i vaslunı bezl it var iken devlet-i hüsn
Dest-bûs eyleyelüm elde iken fırsat-ı hüsn

Gîsû-yı bî-bedelün şeh-per-i Cibrîl-i emîn
'Ârizun mushaf-ı lâ-reyb ü hatun âyet-i hüsn

Ne kazâyâ-yı gam-ı bî-hadd resm ide debîr
Kavl-i şârihle ne ta'rîf ola ol hüccet-i hüsn

Âfitâbum katı hercâyî güzelsin bildüm
Yog imiş sende bugün zerre kadar gayret-i hüsn

Zülfî zencîrine bağlandı Ziyâ'î miskîn
Anı dîvâne idüpdür meger ol hâlet-i hüsn

-330-

Mef'ûlü Fâ'îlâtün Mef'ûlü Fâ'îlâtün

Hurşîd-i sînen aç kim 'âlem münevver olsun
Kıl turranı perîşân dünyâ mu'attar olsun

Cân vaslesidür ey cân nâzik vücûdun ammâ
Ol vaslenün vusûli kime müyesser olsun

Tutdı karâr dilde takrîre gelmez endûh
İkrâr-ı vaslun âhir bârî mukarrer olsun

Dök dirhem-i sirişkûn 'arz eyle rûy-ı zerdün
Çift olmaga ne minnet tek sîm ile zer olsun

Terk eyledün Ziyâ'î bî-çâreni efendi
Ol bî-edeb rakîbe uydun edebler olsun

-331-

Mefâ'îlün Mefâ'îlün Mefâ'îlün Mefâ'îlün

Cüdâ düşdüm bugün Ahmed gibi bir şems-i enverden
Şikâyet naHS-ı tâlî'den meded bî-devlet ahterden

Helâkem Ahmed-i Muhtâr hakkıyçün ger olmazsa
'Înâyet Hazret-i Hakdan şefâ'at hem peyâm-berden

Cüdâyem derine Ahmedün ammâ rahm idüp bir gün
Beni yâd eylemez mi kimse bârî âşinâlardan

Cüdâyem gerçi Ahmedden bihamdi'llâh ümîdüm var
Nasîb olan gelür âhir bana kadr-i mukadderden

Ziyâ'îye delîl olmazsa nûr-ı Ahmed-i Muhtâr
Halâs olmaz ebed târîk-i derd-i hicr-i dil-berden

-332-

Fâ'îlâtün Fâ'îlâtün Fâ'îlâtün Fâ'îlün

Hazret-i 'Îsânun oldıysa mekânı âsumân
Lâ-cerem yiri benüm 'Îsâmun olmuşdur cinân

Cân virürken mürdeye 'âşıklar anun vaslına
Şimdi 'Îsâ cân virüp firdevse olmuşdur revân

Âhir ölüp dirilüp ol la'l-i cân-bahşum benüm
İdünüpdür gül-şen-i Dârü's-selâmda mekân

Gelse ger 'Îsâ kıyâmet kopa dirlerdi benüm
Başuma kopdı kıyâmet gidicek 'Îsâ hemân

Tatlu tatlu dirilürken ol leb-i cân-bahş ile
Ey Ziyâ'î cânım acıtdı bu çerh-i bî-emân

-333-

Mefâ'îlün Mefâ'îlün Mefâ'îlün Mefâ'îlün

Bana bir nâme gelmez çünkü yârân-ı vilâyetden
Ferâgât lâzım oldu bi'z- z arûrî mülk-i gurbetden

Kulundan 'âr idüp çün mescide gelmezsin â kiblem
Ferâgat eyledüm mescid hakıyçün ben imâmetden

Bana çün nerd-bân-ı kasrun olmadı bugün minber
Efendi hürmet-i cum'a hakı geçdüm hitâbetden

Eger da'vâya gelmezsen rakîb-i bed-fa'âl ile
Şerî'at hürmet-i hakkı hemân geçdüm niyâbetden

Ziyâ'î şimdi bir mîr-i kerîme intisâbum var
Bihamdi'llâh bir mikdâr kurtuldum kasâvetden

-334-

Fe'îlâtün Mefâ'îlün Fe'îlün

Gam u derd ü melâle düşdüm ben
Şimdi bir özge hâle düşdüm ben

Düşde gördüm bir âfeti sevdüm
Bir hayâl-i muhâle düşdüm ben

Sevdüm ol serv-i sîm-endâmı
Bülbülem kim nihâle düşdüm ben

Kâ'il oldum cefâ-yı cânâna
Lâ-cerem kîl u kâle düşdüm ben

Ey Ziyâ'î kenâr ümîdi mi var
Ka'r-ı bahr-ı hayâle düşdüm ben

-335-

Fe'îlâtün Fe'îlâtün Fe'îlâtün Fe'îlün

Niçe cân kurtaram ol gamzesi cellâdumdan
Niçe âzâd olam ol kâmet-i şimşâdumdan

Kimse yok mı ki beni öldüre kûyunda senün
Beni kurtara gamundan seni feryâdumdan

Tîr-i gamzen beni öldürse kasâvet gitse
Ey kaşı yâ bu geçer hâtır-ı nâ-şâdumdan

Bâg-ı vuslatda kimünle salınur bilmedüm âh
Almadum togrı haber ol boyı şımşâdumdan

Ey Ziyâ'î gam-ı cânânı ferâmûş idemem
Âşinâ-yı dil ü cânur gidemez yâdumdan

-336-

Fâ'îlâtün Fâ'îlâtün Fâ'îlâtün Fâ'îlün

Yâra söylen 'ârızın âh-ı gedâdan saklasun
Şem'ini lutf eylesün bâd-ı sabâdan saklasun

Vaslı bir gencînedür mâlik degüldür pâdişâh
Söylen ihsân itsün ammâ eşkıyâdan saklasun

Rîsmân-ı kâkülünde dir görenler gönlümi
Nev-heves cân-bâzdur Allâh hatâdan saklasun

Keştî-i gamdur vücûdum düşdi bahr-ı mihnete
Hak te'âlâ anı girdâb-ı fenâdan saklasun

Gül-sitân-ı hüsn içinde bir nihâl-i tâzedür
Ey Ziyâ'î Hakk anı bâd-ı belâdan saklasun

-337-

Mefâ'îlün Mefâ'îlün Mefâ'îlün Mefâ'îlün

Sana cân virmek ise borcum ancak ey büt-i sîmîn
Hemân kabz ile teslîm ideyin e'd-deynü şeynü'd-dîn

Sever dîni gibi dil cevrun insâf ile cevritsen
Ki dirler ey vefâsız yâr el-insâfu nısfü'd-dîn

Yanulmazsam hatâdur zülf-i yâra misk itlâkı
Gelüp kurbân ola hiss itse ol bûyı gazâl-i Çîn

Diraht-ı bâg-ı ümmîdüm ne hâsıl meyve-dâr olsa
Yıkar seng-i havâdisle anı gerdûn-ı bed-âyîn

Ziyâ'î kûh-ı gamda Hüsrevâ Ferhâdun olmuşdur
Ruh-ı Gül-gûn ü Şeb-dîz külâlen vasf ider Şîrîn

-338-

Fâ'îlâtün Fâ'îlâtün Fâ'îlâtün Fâ'îlün

Yârı görmez gözlerin derd ile giryân itmeyen
La'lin emmez dem-be-dem bagrın tolu kan itmeyen

Mâlik olmaz bir gül-i handâna ser-gerdân olur
Bülbül-âsâ kendüzin gül-şende nâlân itmeyen

Hâsılı bu Zâl-ı dünyâdan murâd almaz bugün
Nâmını Rüstem gibi âlemde destân itmeyen

Ey güzeller şâhı mahrûm itme vaslundan beni
Lâyık-ı ihsân degül insâna ihsân itmeyen

Ey Ziyâ'î yakası açılmaduk sözdür bu kim
Başa çıkmaz gül gibi çâk-ı girîbân itmeyen

-339-

Fe'îlâtün Fe'îlâtün Fe'îlâtün Fe'îlün

Niçe bir derdüni ey kaşı kemânum çekeyin
Şimdi müştâk-ı ecel muntazır-ı mehlekeyin

Kûy-ı dil-berde muhannes dir imiş bana rakîb
Câmesin hep ala kan eylemez isem lekeyin

Bana ekdî dir imiş mezra'-ı âlemde rakîb
Hâsılı ölmez isem ben anı bir gün ekeyin

Var şehâdet eseri câme-i hûnînümde
Ben ezel küşte-i şemşîr-i ser-i ma'rekeyin

Kûy-ı dil-berde asılmak diler imiş agyâr
Ey Ziyâ'î o belâyı dahı varup çekeyin

-340-

Mefâ'îlün Mefâ'îlün Mefâ'îlün Mefâ'îlün

Dilâ sen aşka düşdün derd-i bî-dermânı bilmezsün
Visâle tâlib oldun mihnet-i hicrânı bilmezsün

Dilâ gâfil gezersin sen bu der-bend-i mihnetde
Meger kanlar döken ol gamze-i fettânı bilmezsün

Kanı idrâkün ey dil yohsa kaldun mı tedârikden
Usandun tatlu cânundan henüz cânânı bilmezsün

Bilürsün göz ucıyla iltifâtun bir kez ey hûnî
Niçün yıllarca derdün çekdügüm devrânı bilmezsün

Sözi makbülün ammâ ragbet itmezsin Ziyâ'îye
Güher kadrin bilürsün ma'den-i irfânı bilmezsün

-341-

Fe'îlâtün Fe'îlâtün Fe'îlâtün Fe'îlün

Kalmış idi habs içinde şâh-ı hûbân-ı cihân
Düşmüş idi mahbes-i hicrâna cân-ı ‘âşıkân

Başladı halk-ı cihânı yine mecnûn itmege
Ol perî habs-ı Süleymândan bugün buldı emân

Hakka minnet kim yüzün gördi yine ashâb-ı ‘aşk
Mustafâ gâr-ı belâda gerçi dutmuşdı mekân

Pâdişâh olsa melâhat mısırına gâyet mahal
Çünkü zindân-ı belâdan çıkdı ol mahbûb-ı cân

Ey Ziyâ’î zulmet içre kalmış idi âfitâb
Başuna gün togdı nâ-geh çıkdı ol mihr-i cihân

-342-

Mef‘ûlü Fâ‘ilâtü Mefâ‘ilü Fâ‘ilün

Men‘ eyleyen visâlünü bayrâma irmesün
Zülfünden ayıran beni ahşâma irmesün

Râh-ı belâda eyleyen ârâmsız beni
Mülk-i safâda menzil-i ârâma irmesün

Mahrûm iden beni mey-i la‘lünden ey sanem
Bezm-i sürûr içinde tolu câma irmesün

Zülfün tağıtma ‘ârızun üzre benüm begüm
Kâfir çerîsi mülket-i İslâma irmesün

Bâg-ı cihân içinde murâdum Ziyâ’iyâ
Bâd-ı hazân ol semen-endâma irmesün

-343-

Fâ‘ilâtün Fâ‘ilâtün Fâ‘ilâtün Fâ‘ilün

Söyle ey mürğ-ı seher ey ‘andelîb-i gül-sitân
Var mı gül yüzlüler içre böyle bir gonçe-dehân

‘Aklumun nakdin metâ‘-ı ‘aşk-ı yâra vireli
Hâce-i ‘âlem hakıyçün görmedüm aslâ ziyân

Haste-i ‘aşkem vücûdum içre var iken ramak
Gel benüm rûh-ı revânım gel eyâ mahbûb-ı cân

Bu sirişk-i dîdemi bir dem temâşâ eylesün
Makberüm taşından özge kalmadı benden nişân

-344-

Mef'ûlü Mefâ'îlün Mef'ûlü Mefâ'îlün

Kıldun bu dil ü câna ey mug-beçe-i bî-dîn
Derd ü elemün tahmîn cevri ü sitemün ta'yîn

Ey bana su'âl iden zülf ü ruh-ı dil-berden
Bu yâsemen-i müşgîn ol berg-i gül-i nesrîn

La'î ü ruh-ı dil-dârı bi'llâhi temâşâ kıl
Biri şeker-i şîrîn ol biri gül-i rengîn

Zindân-ı firâkında çok derd ü belâ çekdüm
Rahm ide mi ol bî-dîn yâ mâliki yevmü'd-dîn

Gün yüzini ol meh-rû gösterdi Ziyâ'îye
Didi ki yüzün aydın gel şevke be hey miskîn

-345-

Mef'ûlü Fâ'ilâtü Mefâ'îlü Fâ'ilün

Terk eyle zulm ü gâreti şâh-ı cihân iken
'Adl eyle kullaruna ferîd-i zamân iken

Hicrûn güninde tâzelenür dâg-ı sînemüz
Şol gül gibi açıla vakt-i hazân iken

Hikmet nedür ki yoluna olmak diler fedâ
Mülk-i vücüdüm içre bugün cân revân iken

Ferhâdun oldu ay yüzi Gül-gün Ziyâ'î gör
Mülk-i sühandâ Hüsrev-i Şîrîn-zebân iken

-346-

Mefâ'îlün Mefâ'îlün Mefâ'îlün Mefâ'îlün

Kesilmez sâyesi gibi yanından ol mehün düşmen
Bana bir zerre mihri olmadı gün gibi rûşen

O servün zülfü zencîrin görelden bâg-ı 'âlemde
Olupdur kıpkızıl dîvâne gül gömgök delü sûsen

Görüp pervâneyi bâl u perin oda yakar sanman
Şarâb-ı 'aşkı mestîdür yakar meclisde pîrâhen

Henüz tohm-ı ümîd-i vaslı ekdüm mezra'-ı dilde
İnen seyl olma ey eşküm nem alursın bu mezra'dan

Hudâ bu dîde-i gam-dîdeme çok yaşlar virsün
Ziyâ'î dirhem-i eşkümle her dem toldurur dâmen

-347-

Fe'îlâtün Fe'îlâtün Fe'îlâtün Fe'îlün

İltifât itmedi ol âhû seg agyâra bugün
Şâdilik eyle dilâ tâli'ün oldı meymûn

Varayın hâk olayın kûy-ı dil-ârâda hemân
Yok mıdur kimse bana öğredek bir efsûn

Kûy-ı Leylâyı koyup kıldı beyâbânda karâr
İ'tikâd eyle ki bi'llâhi deliydi Mecnûn

Bana ta'n eylemenüz 'âleme rüsvây olsam
Kendü hâlümde komaz derd ü gam u 'aşk u cünûn

Şeker-istân budur tab'-ı Ziyâ'î tûtî
Kâfiye nûnı yuva beyzasıdur nokta-i nûn

-348-

Fâ'îlâtün Fâ'îlâtün Fâ'îlün

Togrısı ruhsârun ey serv-i çemen
Bâg-ı hüsne yâ semender yâ semen

Hüsnüne cân u cihân olmaz bahâ
Dîn ü dünyâ vasluna olmaz semen

Kâ'be kûyun rûy u zülfün Mısr u Şâm
Şehr-i dil Bagdâddur hâlüm Yemen

Kehkeşân ucında mâh-ı nev mi yâ
Tevsen-i gerdûn öninde bir saman

Ey Ziyâ'î lâ-cerem bulur emân
Her marazdan şerbet-i la'lün emen

-349-

Mefâ'îlün Mefâ'îlün Mefâ'îlün Mefâ'îlün

Şafakla mâh-ı nev gûyâ ki bir peymânedür pür-hûn
İçerler bunda 'âşık kanını mey-hânedür gerdûn

Dil-i 'uşşâka yokdur bend-i zülfün gibi dil bâğı
Ki hakkâ sihr bâtil nesnedür efsânedür efsûn

Ne bilsün kıymetini 'âlem-i vaslun bu 'âlemde

Mukayyeddür saçun zencîrine dîvânedür Mecnûn

Güzellik mülkine Hüsrevdür ol Ferhâdı ol ey dil
Lebi Şîrîn saçı Şeb-dîz ruh-ı cânânedür Gül-gûn

Ziyâ'î gibi sûretde gedâ şekl ise 'âşıklar
Hakîkat 'âlem-i 'aşk içre hep şâhânedür kânûn

-350-

Fâ'îlâtün Fâ'îlâtün Fâ'îlâtün Fâ'îlün

'Âşıkı mahzûn iden 'âlemde şâdân olmasun
'Andelîbi agladan gül gibi handân olmasun

Bize câm-ı gam rakîbe la'lüni sunmak neden
Ey gözi hûnî sakın devründe bir kan olmasun

Güller açıldıkça gülsün güllerün ey gonca-leb
Sünbül açıldıkça zülfeynün perîşân olmasun

Başumuz tob itmişüz meydân-ı 'aşk-ı yâra biz
Tutalum ol şeh-süvârun zülfi çevgân olmasun

İhtiyâr it zahmeti öldür beni ey nev-cevân
Bende gam sende cefâ kûyunda efgân olmasun

Müşterîyüz nakd-i cân ile metâ'-ı vasluna
Korkaruz bir gizlü yirde sonra hicrân olmasun

Bûsesini nakd-i câna virmege ahd eylemiş
Cân virürdüm ben hemân dil-ber peşîmân olmasun

Hâk u zer dirler berâberdür yanunda korkaram
'Âşık-ı zer-çehreler hâk ile yeksân olmasun

Katre-i eşk-i Ziyâ'îden sakın ey dürr-i pâk
'Âlemi gark itmesün bir demde 'ummân olmasun

-351-

Fâ'îlâtün Fâ'îlâtün Fâ'îlâtün Fâ'îlün

Gözümü hâb aldı cânân işiginde nâ-gehân
'Âlem-i rü'yâda kendüm Ka'bede gördüm hemân

Sînem üstinde elifle dâg şekl-i âhdur
Nite kim pehlû-yı gerdûn üzre mâh u kehkeşân

Kehrübâdur gözlerüm kirpik degüldür görinen
Kıl çeker bilün hayâliyle senün ey mû-miyân

Yoluna cân virmede bahs eylerüz agyâr ile
Tâlib-i vasluz bizi şemşîrûn itsün imtihân

Gönline girdi Ziyâ'î taş bağırlu dil-berün
Şâh-bâz-ı evc-i ma'nâ taşda yaptı âşiyân

-352-

Fe'îlâtün Fe'îlâtün Fe'îlün

Âlemün sanma bekâsın göresin
Ayn-ı 'ibretle bakasın göresin

Fânîdür Ka'be hakkıyçün bu cihân
Ömre dayanma safâsın süresin

Bî-vefâ sevme ki ma'kûl degül
Her zamân derd ü belâsın göresin

Cevr-i cânânı çekersin ey dil
Mümkün olmaz ki vefâsın göresin

Ey Ziyâ'î bu belâ kulzümünün
Umma ayruk ki karasın göresin

-353-

Mef'ûlü Mefâ'îlü Mefâ'îlü Fa'ûlün

Öldür beni zindân-ı gamunda koma gam-gîn
Rahm eyle giriftâruna gel ey me'a bî-dîn

Pervâne gibi kendümi yirden yire ursam
Şevküm var iken yanmaga ey şem'-i mesâkîn

Nâzundan inen gam yimem ey vahşî gazalum
Âhû bakışun eyledi ammâ beni miskîn

Dil muttasıl o yâra varup gelmede ammâ
Gözden ne aceb gâ'ib olur ol büt-i sîmîn

Bahr-ı günehe batmam eger menn-i Hudâdan
Dirhemce Ziyâ'î olunursa bana ta'yîn

-354-

Fâ'îlâtün Fâ'îlâtün Fâ'îlâtün Fâ'îlün

Kanı ol demler ki hûnî eşküm olmazdı revân
La'l-i yârı emdügümce ten bulurdı tâze cân

Devlet el virüp iderdüm merhabâ dil-dâr ile
Gitdi elden devletüm gör n'eyledi devr-i zamân

Gün yüzine bakdugumca kamaşurdi gözlerüm
Bakdugum demde olurdu eşk-i hûnînüm revân

Tatlu tatlu dirilürdüm ol leb-i Şîrîn ile
'Âkıbet acıtdı ben Ferhâdı câdû-yı zamân

Ol kamer-ruh söylese kalmazdı cânımdan ramak
Kendü kendümden giderdüm gelse ol mahbûb-ı cân

Hande kılsa nâz ile handân olurdu cân u dil
Baksa lutf ile bana kalmazdı cânımdan nişân

Ey Ziyâ'î âteş-i 'aşk ile sûzân oldugum
İş bu şî'r-i sûz-nâküm eylesün bir bir beyân

-355-

Fe'îlâtün Fe'îlâtün Fe'îlâtün Fe'îlün

Meyden ey dil haber-i la'l-i nigârı sorasın
Mey habâbında hevâsın anun ey şeh göresin

Ey rakîb ol meh-i hurşîd-likânun bilürüz
Yüzini görmege geldün o kadar gün göresin

Anma ey hâcî Hicâzun seferin Merve hakı
Ka'be-i kûyuna sa'y it ki safâlar süresin

Beni öldürmege tîgünle ezel 'ahd itdün
İntizârunla revâ mı ki bu dem öldüresin

Niçe demdür ki Ziyâ'î yoluna kan aglar
Bir mübârek dem olur mı ki anı güldüresin

-356-

Mef'ûlü Mefâ'îlü Mefâ'îlü Fa'ûlün

Gönlüm yıkar ol şûh-ı cefâ-pîşe firâvân
Bu dâr-ı fenâda bir evüm var o da vîrân

Anulsa zülâl-i lebi ol çeşme-i cânun
Agzı suyunı akıda ser-çeşme-i hayvân

Hûbân-ı cihânı koyup ol âfet-i cânun
Gönlüm çekinür câzibe-i hüsnine her ân

Ya'kûb-ı dili dem-be-dem aglatmaz idi
Ger olmasa vâris-i hüsn-i şeh-i Ken'ân

Hoşdur dem-i bârânda biraz uykuya varmak
Benzer ki Ziyâ'î virür agramagıla cân

-357-

Mefâ'îlün Mefâ'îlün Mefâ'îlün Mefâ'îlün

Bana bunca belâlar geldi ol mahbûb-ı ra'nâdan
Usandurdu beni cân u cihân u dîn ü dünyâdan

Mukarrer mi kalur bu derd ü mihnet böyle cânumda
Kıyâmet kopa şefkat gelmeye ol serv-i bâlâdan

Mahabbet kanda Leylâ kanda vaslı kanda sen kanda
Be hey Mecnûn be hey dîvâne kes ümmîdi Leylâdan

Cezâka'llâhu hayren ey sabâ bu çeşm-i giryâna
Getürdün tûtiyâ-yı hâk-i der-gâh-ı dil-ârâdan

Ziyâ'î mürdeyi her gice ihyâ eylemen cânâ
Leb-i cân-bahşuna mîras kalmış gibi 'Îsâdan

-358-

Fâ'îlâtün Fâ'îlâtün Fâ'îlâtün Fâ'îlün

Bilmezin 'aklumda dâ'im bu perîşânlık neden
Muttasıl dil hânesinde böyle vîrânlık neden

Gönlümi zülf-i siyâhundur perîşân eyleyen
Bilmezin zülfünde ammâ bu perîşânlık neden

Görelî dil-ber lebin ney ki bu esrâr 'aceb
Ben gubâr oldum henüz cânumda hayrânlık neden

Mâlik oldun tutalum ey dil belâ iklîmine
Şâh-ı hûbâna kul iken sana sultânlık neden

Kâfir olmadı severse bir büt-i sîmîn-beden
Böyle ta'n itmen Ziyâ'îye müselmânlık neden

-359-

Fe'îlâtün Fe'îlâtün Fe'îlâtün Fe'îlün

Ne revâdur o melek âhumı her ân alsun
Melekü'l-mevt ise gelsün ileri cân alsun

Rişte-i bârik tenüm katre-i eşküm mercân
Ol mehe din ki gelüp sübha-i mercân alsun

Zâhidâ gönlüm alursa o melek ta'n itme
Beni hâlümde ko var git seni şeytân alsun

Düşmişem derdine din yâra ki kanum döksün
Marazum var o tabîb-i dil ü cân kan alsun

'Arsa-i nazm Ziyâ'înün atı oynagıdur
Her kimün kim hüneri var ise meydân alsun

-360-

Mefâ'îlün Mefâ'îlün Mefâ'îlün Mefâ'îlün

Sana dil virdüğüm hep dîde-i giryemden anlarsın
Benüm iki gözüm derd-i derûnum nemden anlarsın

Bana râhm eylemezsin şimdi 'âşık olasın katlin
Gam-ı hicrünle kan agladugum bir demden anlarsın

Gözi yaşlu kulıdur bir begün ey verd-i handânım
Sirişk-i nergisi vakt-i seher şeb-nemden anlarsın

Lebinden bildün ey dil cümle hâlât-ı mey-i 'aşkı
Safâ-yı sohbet-i sahbâyı câm-ı Cemden anlarsın

Ziyâ'înün geçen 'ömrine yazuk hâk-i râhunda
Ne zecr-i hicri çekmişsin ne derd-i gamdan anlarsın

-361-

Fe'îlâtün Mefâ'îlün Fe'îlün

Hicrünü sanma az hâlel bilürin
Hây 'ömrüm hemân ecel bilürin

Darb-ı tîgünden olmasa havfum
Dir idüm misli yok mesel bilürin

Görmedüm Leylâ ile Şîrîni
Seni ammâ inen güzel bilürin

Cân virürdi işitmege 'Îsâ
Vasf-ı la'lünde bir gazel bilürin

Ey Ziyâ'î benümle hem-derd ol
Çekdüğün zecr-i hicri gel bilürin

-362-

Mef'ûlü Fâ'îlâtü Mefâ'îlü Fâ'îlün

Keyfiyyetini söyle ki ser-mestidür cihân

Sâkî buyur ki katre-i yemmîdür o dehân

Âb-ı hayâta irmedi ana ki saltanât
Sovuk suyun da içmedi İskender ey cihân

Ol gül- 'izâr ile bile salınmak isterin
Gül-zâr-ı kûyı içre benem mîr-i 'âşıkân

Ol hüsni bî-nazîre ki dil olmaz ansız
Hüsni hemân var dime hem hüsn hem ân

Eller ki pâ-y-mâlidür ol serv-i ser-keşün
Cân-ı Ziyâ'î su gibi olur ana revân

-363-

Mef'ûlü Mefâ'îlü Mefâ'îlü Fa'ûlün

Rahm itmege şâyet ola bir şevki varayın
Pervâne-veş ol şem'e yanayın yakılayın

Ben mest-i meyem mey-gedede kendümi bilmem
Mesciddedür ol kible-i kalbüm ne kılayın

Ol şîr-i şikâr-efgen ü merdüm-küşe yâ Râb
Âhû-yı Hotendür dimişem ehl-i hatâyın

Çün dâr-ı cihânda saçun agyâra sunılmış
Mansûr gibi ben bu sebebden asılayın

Zulm eyleme hey zâlim esirge ki kapunda
Ben dahı Ziyâ'î gibi mazlûm-ı gedâyın

-364-

Mef'ûlü Fâ'ilâtü Mefâ'îlü Fâ'ilün

Zeyn oldı sanma gökde nücûm ile keh-keşân
Çok dâg yakdı kolında hicrün ile âsumân

Âhumla tutuşup göge çıkmak diler rakîb
N'eylerse itsün işte ışık işte nerd-bân

Gönder efendi nîze-i müjgânı sîneme
Tâ kim derûndan ideyin cânımı revân

Haşr olmak isteyen ol kıyâmet nigâr ile
Derdini haşr olunca çeküp eylesin figân

Bahr-ı fenâyâ saldı Ziyâ'îyi rûzgâr
Tâbûtı zevrak u kefeni oldı bâd-bân

-365-

Mefâ'îlün Mefâ'îlün Mefâ'îlün Mefâ'îlün

Güzeller şâhınun dîvânına şâhâne çıkdum ben
Cünûnum gâlib oldu bir 'aceb dîvâne çıkdum ben

Çıkanlar bezm-i 'aşka şevkden yanar kül olurlar
Bu hâli var idi çün ittila'um yâ ne çıkdum ben

Gül ü sünbül bana ol 'ârız u ruhsârı andurdu
Beni aglatdı bâga çün seher seyrâna çıkdum ben

Bugün gam küşfî-gîrin hâke saldum pây-mâl itdüm
Senün şevk-i mey-i 'aşkunla çün meydâna çıkdum ben

Çıkup gıtdüm mahallenden Ziyâ'î gibi ey Leylâ
Yine Mecnûnlugum tutmuş gibi yabana çıkdum ben

-366-

Fe'îlâtün Fe'îlâtün Fe'îlâtün Fe'îlün

Hasteye dâr-ı şifâdur çü der-i şâh-ı cihân
Dünyede bâd-ı sabâyâ esen olmak âsân

Vuslatı umma gönül eyleme dîvânelügi
Bir gedânun ola mı hem-demi sultân-ı cihân

Cân virür gerçi senün her bir benden
Cân dirîg eylemezin ben de yokdur illâ mekân

Dilde günden güne artar mıydı bu 'aşk u cünûn
Olmasa hüsni terakkîde o mâhun her ân

Ey Ziyâ'î degülüz mest ü harâbât ehli
Olduk esrâr-ı leb-i dil-bere ammâ hayrân

-367-

Fâ'îlâtün Fâ'îlâtün Fâ'îlâtün Fâ'îlün

Gevher-i la'lünden ayru ey büt-i şîrîn-dehen
Dâne-i rümmân eger olsa akîk anı yemen

Kıssa-i hicrân-ı Leylâyı hikâyet kılmaga
Oldı Mecnûnun başında âşiyân gûyâ dehen

'Âkıbet tob-ı havâdis hâk ile yeksân ider
Kal'a-i derd ü belâyâ cismümi kıldum beden

Kâşki bassa kadem mülk-i kerâmâta rakîb
Boynına Mansûr-veş takılsa bir muhkem resen

Ey Ziyâ'î tutdı ebyâtum cihânı ser-be-ser
Ehl-i beytündür hakikatde bu dehr-i pîrezen

-368-

Fâ'ilâtün Fâ'ilâtün Fâ'ilün

Kandasın ey mâh-peyker kandasın
Kandasın ey mihr-i hâver kandasın

Bir pelîde hem-ser olmuşsın meger
Kandasın ey kaddi 'ar'ar kandasın

Gül-şen-i 'âlem cehennemdür bana
Sensiz ey hûr-ı münevver kandasın

Hâtırum sensiz perîşândur katı
Şimdi ey zülf-i mu'attar kandasın

Zulmet-i gamda Ziyâ'îyi kodun
Ey dudâğı çeşme-i ter kandasın

-369-

Fe'ilâtün Fe'ilâtün Fe'ilâtün Fe'ilün

Zâhir itdükçe ruh-ı yâr musaffâ 'arakın
Çerh nem-nâk kılur şeb-nemle gül varakın

Silinür âyîne-i dilde olan jeng-i gamum
Her kaçan kim sile ol mâh yüzinde 'arakın

Ne 'acebdür ruh-ı cânâne 'arak-rîz olıcak
Pür ider jâle ile lâle-i hamrâ tabakın

Ne hicâb eyledün ey gül ki 'arak-rîz oldun
Hâk-i pâyuna ben üftâdeyi gördükçe yakîn

Ey Ziyâ'î o perînün ili sudur 'arakı
Hâk-i pâyına yakın gelme anun hây sakın

-370-

Mef'ûlü Mefâ'ilü Mefâ'ilü Fa'ûlün

Gördükde senün 'âşık-ı şûrîdeni giryân
Sofî n'ola peşmînesine olsa peşîmân

Zevk itmek için ârzû-yı vasl ile oldum
Esrâr-ı leb-i dil-ber ile bengîce hayrân

Bin mihnet ile gitdi gönül yâra ko gitsün
Korkum bu ki bir gün gide bin hasret ile cân

Dil-ber ki seferden gelüp itmişdi ikâmet
Tekrâr sefer 'azmin ider yine mi hicrân

İrdi dil ü cân vasla Ziyâ'î bu ne sırdur
Dil dâğı bayagı elem-i hicr kem-â-kân

-371-

Fe'îlâtün Fe'îlâtün Fe'îlâtün Fe'îlün

Zerle mümkindür murâd almak visâl-i yârdan
Bu rivâyet nakl olındı Mâlik-i Dînârdan

Ben leb-i dil-ber gibi şîrîn müferrih bulmadum
Aslın asla bilmezem hayrânem ol esrârdan

Olmasun olmazsa meylün tek irak sürme beni
Çok sipâhî var sefer kılmaz geçer tîmârdan

'Ayš-ı gül-zâr itmege meşgûlüz ammâ bilmezüz
Kim neler peydâ olur tâ ki pes-i dîvârdan

Ma'rifetdür kesret-i cürme Ziyâ'î lîkin ol
Kesmez Allâh saklasun ümmîdin ol Gaffârdan

-372-

Fe'îlâtün Fe'îlâtün Fe'îlâtün Fe'îlün

Dâğlar kırmızı gül ü şerhalar serv-i revân
Gül-sitân oldı vücûdum gelün eylen seyrân

Fikr-i la'lünle ruh-ı âlün eyâ serv-i behişt
Birisi vird-i cinândur birisi verd-i cinân

Ey perî hattunı gördükde rakîb itdi nüfûr
Beni dîvâne kıllur câzibe-i hüsn el'ân

Âsitânunda kulıyam o şeh-i hûbânun
Eylesün her ne dilerse bana gönli sultân

Ey Ziyâ'î irişem vaslına ol mug-beçenün
Eger olursa bana himmet-i Şeyh-i San'ân

-373-

Mef'ûlü Mefâ'îlün Mef'ûlü Mefâ'îlün

Tob olsa gerek başum meydânda o gabgabdan
Ölsem de dirîg itmem ben cânımı ol lebden

Hâlât-ı mey-i ‘aşkı bilmez bilürin herkes
Ey sûfî-i sâfî-dil sen dahı bu şerbetden

‘Arz idüp elif kaddin kul itdi beni cânân
Men ‘allemeni harfen kadd sayyereni ‘abden

Haşr olur idüm bir gün mâhumla ümîdüm var
Ger haşre degin cânum ayrılmasa kâlebden

Cem‘ eyle Ziyâ’î gel eş‘ârı ki hatt olsun
Hem nazm-ı mürettebden hem cild-i müzehhebden

-374-

Mefâ‘ilün Mefâ‘ilün Mefâ‘ilün Mefâ‘ilün

Girersin kabre âhir kasr ile eyvânı n’eylersin
Ser-â-ser çün kefen geysen ya bu kaftânı n’eylersin

Nesine aldanursın bu harâb-âbâd dünyânun
Bu dârâtı bu tavr u tumturâkı kanı n’eylersin

Huzûrun uçurur zâg u zagan gibi ‘avâm ey dil
Gözet vîrânı bûm ol taşrada seyrânı n’eylersin

Tedârik kılmaga kâdir degülsin yokdur idrâkûn
Yıgarsın mâl-ı dünyâdan gidicek anı n’eylersin

Ziyâ’î turalum kim pâdişâh-ı mülk-i nazm oldun
Hüner kadrin bilür yok cem‘ idüp dîvânı n’eylersin

-375-

Fâ‘ilâtün Fâ‘ilâtün Fâ‘ilâtün Fâ‘ilün

Nâle eyler kâmetin yâd eyleyüp cân-ı hazîn
Serv-i gül-zâr üzre gûyâ ‘andelîb eyler enîn

Kûyuna benzetdüm anı işidüp evsâfını
Şimdi gitmez hâtrumdand fikr-i firdevs-i berîn

Kâtib-i kudret havâle yazdı çün ‘aşkun bana
Nâzır oldum lutfuna olmaga kahrundan emîn

Kimse duymaz öldüğüm yâ gayrı şehre vardugum
Niçe ay u gün geçer ey âfitâb-ı meh-cebîn

Ey Ziyâ'î geldi mektûb-ı nigâr itdi bizi
Kâm-yâb u kâm-bahş u kâm-rân u kâm-bîn

-376-

Fâ'îlâtün Fâ'îlâtün Fâ'îlâtün Fâ'îlün

‘Ârizun üzre tagılmış zülfün ey ârâm-ı cân
Su kenârında açılmış tâze sünbüldür hemân

Duhter-i rez şevk-i rûyun virdi benzer fikrûme
Birbirine iki kızlar yine virmiş armagan

San turunc efsûn ile düşmiş mahabbet nârına
Âteş-i firkatda yanan cism-i zerd ü nâ-tüvân

Haste düşdüm hasret-i la'lünle dün mey-hânedede
Su yirine agzuma mey tamzurur pîr-i mugân

Cism-i zârum cân-ı bîmârum ser-i bî-devletüm
Ey Ziyâ'î yâra kurbân olmak ister her zamân

-377-

Mef'ûlü Fâ'îlâtü Mefâ'îlü Fâ'îlün

Dil-ber odur ki ‘âşıkın eyleye imtihân
Sâdık bulursa şâm u sabâh ola mihribân

‘Âşık odur ki câzibe-i hüsne cân vire
Cânân cezâ-yı vasl ide ammâ be-şart-ı ân

Vaslun vücûdı var mı henüz cân inanmıyor
Gerçi ki vaslı ile bana bühtân ider cihân

Zevk iderek dehânuma aldum zebânını
İncindi eyledi beni ta'zîr-i bi'l-lisân

Öldükde ey Ziyâ'î helâk-i rakîb için
Peykân-ı tîr olur bedenümde her üstühân

-378-

Fâ'îlâtün Fâ'îlâtün Fâ'îlâtün Fâ'îlün

Serv-i bâlâna ider cennetde Tubâ ser-fürû
Mâh-ı nev ebrûna eyler gökde cânâ ser-fürû

Serv-i gül-şen karşuna saf saf turur ta'zîm ile
Zülfüne eyler benefşe ey dil-ârâ ser-fürû

Ey şeh-i ‘âlem sen ol şâh-ı bülend eyvânısın
Dergehün tâkına eyler çerh-i mînâ ser-fürû

Sâkinân-ı kûyun itse secde ebrûna ne tan
Sâkin-i mescid kılur mihrâba karşı ser-fürû

Gördi kim yâd-ı lebünle eller el üzre tutar
Sâgar-ı bezme surâhi itdi cânâ ser-fürû

Câm-ı 'aşkun mestiyem mahcûb olursam tan degül
Lâ-cerem mest olsa eyler rind-i rüsvâ ser-fürû

Gördi kim vasfında bir nazm-ı müselsel bağladum
Ey Ziyâ'î itdi ol gîsû-yı zîbâ ser-fürû

-379-

Mefâ'îlün Mefâ'îlün Mefâ'îlün Mefâ'îlün

Delüpdür bagrumı gamzen meger tîr-i kazâdur bu
Beni bîmâr ider çeşmün 'aceb 'ayn-ı 'anâdur bu

Rakîbün dîdesine çöp olupdur göz göre çeşmüm
Habîbün Ka'be-i kûyuna bir kible-nümâdur bu

Nigârâ bahr-ı eşkümde dil-i sengînünün 'aksi
Görinür ka'rdur ya da binâ-yı Kaydefâdur bu

Sanurdum mürğ-ı gam bir gönlüm egler şâh-bâzumdur
Leşüm üstine konmak kasd ider zâg-ı belâdur bu

Gelüp bir hayli söğmiş kabrüm üzre ol gözüm nûrı
Ziyâ'î derd-mende müstecâb olur du'âdur bu

-380-

Fe'îlâtün Fe'îlâtün Fe'îlâtün Fe'îlün

Levhaşa'llâh ne hoş vahşet ider ol âhû
Bâreka'llâh niçün nefret ider ol tîhû

Cân dimâgına ezel râyiha-i 'aşk irdi
Çekdiren şimdi belâyı bana hep budur bu

Ne dimekdür bu ki bir dil-ber-i pâlûde-beden
Ola bir gice gelüp 'âşıkına hem-pehlû

Hastelendi görüp ey gül lebüni gonca-i bâg
Tamzurur penbe ile ebr-i bahâr agzına su

Ser-i zülfün zenahunda katı sehhâr ancak

Zenahundur çeh-i Bâbil ser-i zülfün câdû

Didüm ey dil ki mahabbet kadehi var mı bana
Şevk ile içdi vü geçdi didi yâ hû yâ hû

Olalı ol gözümün nûrı gözümde gâ'ib
Gözüme cümle cihân oldı Ziyâ'î karânu

-381-

Fe'îlâtün Fe'îlâtün Fe'îlâtün Fe'îlün

Seng-diller arasında katı âfetdür bu
Serv-kâmetler arasında kıyâmetdür bu

Cân dimâğına senün râyiha-i sünbülünü
Getürür bâd-ı sabâ özge sa'âdetdür bu

Bûy-ı aşkun ireli câna sürûrum gitdi
Çok olur râyiha ammâ katı hikmetdür bu

Dâğlar sînede eksük degül ey gonca-dehen
Gül-i ra'nâ-yı gül-istân-ı mahabbetdür bu

Mey-i engûr içilür bezm-i Ziyâ'îde müdâm
Şemerât-ı şecer-i bâg-ı velâyetdür bu

-382-

Mef'ûlü Fâ'îlâtü Mefâ'ilü Fâ'îlün

Dirler yanar gider tavla çün kim bir ev 'alev
Hayfâ ki dilde âteş-i aşkun 'alev 'alev

Âhum sipihr sakfına od urdı dün gice
Seyyâreler şererdür ana mâh-ı nev 'alev

Her gice halka görünür encüm gibi benüm
'Ayyûka çıkdı sûz-ı derûnum 'alev 'alev

Meyl eyle ey gönül ruh-ı cânâna çünki sen
Pervânesin yanup yakılup bârî sev 'alev

Cânda ümîd-i vasla metâ'-ı dile kerev
Oldı Ziyâ'î nâr-ı gama ol kerev 'alev

-383-

Fe'îlâtün Mefâ'ilün Fe'îlün

Tutdı müşgîn saçını ol meh-rû
Didi dil dagıdıçı budur bu

Beni aglatmasun o kaşı kemân
Dökmesün âb-ı rûyum ol ebrû

Saru altuna meylini göricek
Cümle 'uşşâkun oldılar saru

Bu gice 'ahd kıldı seyre çıka
Çıkdı cânım çıkınca ol meh-rû

Kûy-ı gamdur yiri Ziyâ'inün
Ana yegdür felekden ol ser-i kû

-384-

Fe'ilâtün Mefâ'ilün Fe'ilün

Nâz ile geçdi ol gözi âhû
Neler itmişdürür bana âh o

Gerdeni gâyet ile nâzikedür
Korkarın anı incidür lü'lü

Bûy-ı zülfin duynca zâhid-i huşk
Didi bi'llâhi hoşça râyiha bu

Lebi âb-ı hayât ise mahzâ
Yâr-ı hercâyîden dilâ al bu

Misk-i Rûmî Ziyâ'î zülf-i nigâr
Hod gül-rû hemân gül-rû

-385-

Fâ'ilâtün Fâ'ilâtün Fâ'ilâtün Fâ'ilün

Ey kılanlar 'âlem içre vasl-ı yârı ârzû
Cân virün kim len-tenâlü'l-birre hattâ tenfikû

Sâgar-ı sahbâyı cânân ile leb-ber-leb görüp
Al kuşagina urup hayretde kalmışdur sebû

Gül-şen-i 'âlemde 'âlem eşün olurdu velî
Reng bu kim bizi magrûr itmek ister reng-i bû

İddi'â eylermiş âyîne nazîrün var diyü
Ey sanem gelsün beru olsun senünle rû-be-rû

Bî-vücûdem cümle halk unuttı sanurdum beni
Ey Ziyâ'î var imiş hakkumda ammâ güft ü gû

-386-

Fe‘ilâtün Fe‘ilâtün Fe‘ilâtün Fe‘ilün

Mest-i nâz olmuş ier mey yirine kanımı âh
Rindlik eylemege başladı ol eşm-i siyâh

Nie iş‘âr ideyin derd-i derûnum yâra
N‘ideyin kalmadı âh eylemege tâkatüm âh

İtmesün sana zarar didüm o şeytân rakîb
Didi lâ havle velâ kuvvete illâ bi’llâh

Kehrübâ sübhasın alur ele sâlûsî felek
Halkı aldamagiün her gice Sübhâna’llâh

Kıssa-i ‘aşkı Ziyâ’î yazup eylerdi beyân
Şâyet olmasa dırâz olsa bu kıssa kütâh

-387-

Fe‘ilâtün Mefâ‘ilün Fe‘ilün

Döndüm ey mâh âr deh sâle
Mûyeden mûye nâleden nâle

Oldı gûyâ habâb-ı âb-ı hayât
La‘l-i mey-gûnun üzre tebhâle

Eser-i dâg-ı hasret itdi zuhûr
Kabrüm üstinde sanmanuz lâle

Dem-be-dem dâg-ı dilde katre-i hûn
Gül-i hamrâda nite kim jâle

Pây-mâlündür ey ser-i hûbân
Dest-gîr ol Ziyâ’î pâ-mâle

-388-

Fe‘ilâtün Fe‘ilâtün Fe‘ilâtün Fe‘ilün

Derdümi Kaysa kıyâs itmen der-i cânânda
Ben cünûmı Kays-âsâ bulmadum yabanda

Mushaf-ı ruhsârun üstinde o hatt-ı nîl-gûn
Lâciverdî bir güzel ser-levhadur Kur’ânda

Gözde senün mûmiyânun kanlu yaş içre şehâ
Riştüdür sanur görenler sübha-i mercânda

Hâlümi gördi perîşân oldı zülfeynün senün
‘Ârızunda sünbül-i hoş-bû gibi bûstânda

Vasf ider bilün Ziyâ'î vasf-ı nâ-mesmû' ile
Yazılan ancak hayâl-i hâsıdur dîvânda

-389-

Fâ' ilâtün Fâ' ilâtün Fâ' ilâtün Fâ' ilün

Sanmanuz kuyruklu yıldız dūd-ı nâr-ı âh ile
Bir şererdür cânib-i 'ayyûka çıkmışdur bile

Seyr idün tokunduğı yirde ne tozlar kopduğun
Bu gice peykân-ı tîr-i âhum irmiş menzile

Dün gice anup sitârem derd ile âh eyledüm
Tutmış eyle nâr-ı dūd-ı âhum anı kim bile

Bir yalun yüzlü güzeldür başına sorkuc takup
Seyr ider sahn-ı sipihri mâh-ı şeb-ârâ ile

Bir melek-sîmâdur ol sünbül takup destârına
Ey Ziyâ'î çıkdı gökler seyrine ol şevk ile

-390-

Fâ' ilâtün Fâ' ilâtün Fâ' ilâtün Fâ' ilün

Ey kemân-ebrû okun gibi geçersin cânuma
Dem-be-dem ey yâr-ı hûnî girme bârî kanuma

Sen şikâyet eyle halka âh u zârumdan benüm
Ben şikâyet ideyin cevründen ol Sübhânuma

Ben umardum gül-i terden ire bir bûy-ı vefâ
Kandan ise hâr-ı mihnet irüşür dâmânuma

Kime yanam yakılam ey şem'-i tâbânım benüm
Derd ü gamdan özge hergiz kimse gelmez yanuma

Cevr kânûnın güzeller terk iderdi lâ-cerem
Ey Ziyâ'î baksalar bir gün benüm dîvânuma

-391-

Fâ' ilâtün Fâ' ilâtün Fâ' ilâtün Fâ' ilün

Gitmezem kaddün koyup cennetde Tûbâ seyrine
Sen melek-sîmânun olur gelse havrâ seyrine

Ol leb-i cân-bahş ile küfr ehli 'Îsâdur sanur
Ey sanem gel varalum bir gün kilîsâ seyrine

Aglamakdan yeg gelür vaslunla şâd olmak bana
Ben kenâra 'âşikem gönderme deryâ seyrine

Yandugum yakıldugum derdünle görmezler benüm
Kaysı 'âşıkdur sanurlar varsa sahrâ seyrine

Sen mehi görmüş Ziyâ'î anda bayrâm eylemiş
Varsa 'ayb itme benüm kiblem musallâ seyrine

-392-

Fe' ilâtün Fe' ilâtün Fe' ilâtün Fe' ilün

Bakma bağlanmayasın bend-i belâya nâ-gâh
Ey gönül pendümi gûş it nazarun eyle nigâh

Mâ'il olmazın dünyâya ki dil şâhid ola
'İffet-i şâhid-i Ken'âna sabî oldı güvâh

Hüsn-i zîbâna senün kimse bahâne bulımaz
Diyebilür mi cihânda kişi hiç kara siyâh

Ratb u yâbisten iderse n'ola düşmân kelimât
Ki hara lâzım olur gâh saman gâh giyâh

Tîb-i hâtırla eger kabrüne ugrarsa nigâr
Seng-i kabründe Ziyâ'î yaza tâbe serâh

-393-

Fe' ilâtün Fe' ilâtün Fe' ilâtün Fe' ilün

Öl diril yalvarıgör 'âşık isen 'Îsâya
Ola kim bu gice meyl ide gele ihyâya

Rûhdur cismi ser-â-pâ leb-i la'li cân-bahş
Yiridür olsa felek mesken o rûh-efzâya

Sandılar kopdı kıyâmet göricek 'Îsâyı
Gelmedi ol sanemün misli meger dünyâya

Beni öldürdi 'acebdür hod işitdüm 'Îsâ
Cân virüpdür niçe kez mürde-i nâ-peydâya

Deyr-i 'âlemde Ziyâ'inün odur maksûdı
Haşre dek 'ömr vire Hakk Hazret-i 'Îsâya

-394-

Fâ' ilâtün Fâ' ilâtün Fâ' ilâtün Fâ' ilün

Ey dil aldanma o şâhun vâde-i ihsânına

İ'tibâr olmaz ekâbir kısmının peymânına

Şâne-âsâ şerha şerha eylemek sînem benüm
Hîç düşer mi ol saçı 'anber-feşânun şânına

Ayagına yüz sürem derd-i derûnum söyleyem
Sâye-âsâ ol boyı servün düşersem yanına

Gitdi 'akl u cân u dil işüm tamâm oldı benüm
Bakma ey bedr-i tamâm eksiklinün noksânına

Lâ-cerem kıymetde la'l-âsâ olurdu her sözi
Ger Ziyâ'î leblerün vasfın yaza dîvânına

-395-

Fâ'ilâtün Fâ'ilâtün Fâ'ilâtün Fâ'ilün

Bir 'aceb sevdâya düşmişdür bugün ol yüzi mâh
Câmesini gün gibi ag iken itmişdür siyâh

Gördi kim cellâd-ı gam öldürdi ben dil-hasteyi
Kara bahtum gibi mâtem geydi ol nûr-ı İlâh

Bir güneşdür zâtı kim ebr-i siyâh içindedür
Yâ tulû' itmiş karanu gicede şevk ile mâh

Kara tonlu Ka'be hakkı kible-i 'uşşâkdur
Âsitânıdur mahabbet ehline anun penâh

Tan degüldür tâli'üm gibi karalar geyse yâr
Zulmeti çün çeşme-i hayvân idinmiş cây-gâh

'Ömridür 'âşıklarun kim kara günlerle geçer
Câmesin yohsa siyâh itmiş degül ol pâdişâh

Zulmet-i gamda Ziyâ'î mübtelânun cânıdur
Sanman itmişdür libâsın ol şeh-i 'âlem siyâh

-396-

Mefâ'ilün Mefâ'ilün Mefâ'ilün Mefâ'ilün

Ben ol berg-i hazânem örtülüp kalmış gubâr ile
Düşürse bâd-ı himmet bâg-ı vasla rûzgâr ile

Güzâr itmek hisâr-ı vasluna der-bend-i firkatdan
Hemân gelmek gibidür Akhisâra kûh-sâr ile

Letâfetde lebün âb-ı hayâtun 'aynıdur hattun
Müzeyyen sebze-zâr-ı kudret-i Hakdur kenâr ile

Habîbüm hüsn ile mümtâz u ben 'aşk ile müstesnâ
Belâ bu bizden artuk Kays u Leylâ iştihâr ile

Kişi çün sevdügiyle haşr olur mahşerde yâ Rabbi
Ziyâ'î bendeni haşr eyle bir zîbâ nigâr ile

-397-

Mefâ'îlün Mefâ'îlün Mefâ'îlün Mefâ'îlün

Vefânun bilürin nâm u nişânı yok güzellerde
Hemân bî-hûde bir efsânedür söylendi illerde

Gedâlar kaldı mahrûm ebed pâ-mâl-i derd oldı
Visâlün gibi bî-mânend-i mansıb nâ-mahallerde

Vefâsız dil-rübâlar derdini her bâr çekmekden
Yeg idi ger vücûdum mahv olup gitse ezellerde

Dem-i vuslatda bu Şîrîn kelâmı söylemiş Hüsrev
Leb-i cânâneye nisbet halâvet yok 'asellerde

Letâfetde sözin âb-ı hayât itmek midür kasdı
Ki çok anar Ziyâ'î la'l-i cânânı gazellerde

-398-

Mef'ûlü Mefâ'îlün Mef'ûlü Mefâ'îlün

Ey dil evi derd ile vîrâne misin yohsa
Zulmet ile harâb olmuş kâşâne misin yohsa

Leylâyı koyup gitdün agyâr ile ey Mecnûn
Sahrâda ne istersin dîvâne misin yohsa

Geh yanumdasın gâhî yirden yire düşmekde
Şem'-i ruhına ey dil pervâne misin yohsa

Oldun reh-i dil-berde ey dil yine hâk-âlûd
Câm-ı mey-i 'aşk ile mest-âne misin yohsa

-399-

Fe'ilâtün Fe'ilâtün Fe'ilâtün Fe'ilün

Ne belâ çekdüğüm anlatmaga imkân olsa
Yâra bir bir dimege derdümi dermân olsa

Bilmese 'aşkumızı duymasa esrârumızı

Kâşki cümle cihân ahmak u nâdân olsa

Sînemi tîg ile yarup beni öldürse hemân
Ya'ni kurtarsa gamumdan beni yârân olsa

Her kişi vuslat ümîdiyle olurdu 'âşık
Dil-berün derdini çekmek eger âsân olsa

Biri olmaya Ziyâ'î gibi gül-zârunda
Bülbülün ey gül-i nev-reste hezârân olsa

-400-

Fâ'îlâtün Fâ'îlâtün Fâ'îlâtün Fâ'îlün

Taş bagırlı yâr bahsin eylemek a'dâ ile
Fî'l-mesel taşla döğüşmek gibidür a'mâ ile

Aldı dil tıflın dudagın gösterüp ol dil-firîb
Yohsa oglancuğı aldar bilmezin helvâ ile

'Âşık olur seyr iden dîdârını hikmet bu kim
'Âşık itmişdür beni dîdâr-ı nâ-peydâ ile

Vâ'izâ ürkütme lutf eyle gelen müminleri
Mescidi lâzım mı toldurmak bu hûy u hây ile

Şöyle mest olmuş Ziyâ'î câm-ı 'aşk-ı pâk ile
Ol seher-gâh-ı kıyâmetde meger kim ayıla

-401-

Mefâ'îlün Mefâ'îlün Mefâ'îlün Mefâ'îlün

Var ey bâd-ı sabâ hâl-i dili dil-dâra 'arz eyle
Harâb oldu vilâyet zulm ile hünkâra 'arz eyle

Gönül vîrânedür ey cân haber-dâr eyle cânânı
Harâb oldu mahabbet hânesi mi'mâra 'arz eyle

Helâk itdi rakîbün kahrı ey âh-ı seher-hîzüm
'Urûc it 'arşa derdüm Hazret-i Kakhâra 'arz eyle

'Adû-yı gam beden burcına çıkdı âgâh it
Hisâra girdi düşmen var meded diz-dâra 'arz eyle

Helâk oldu Ziyâ'î hançer-i hicrân ile ey dil
Cefâ tîgin gidersün ol şeh-i gaddâra 'arz eyle

-402-

Fâ'îlâtün Fâ'îlâtün Fâ'îlâtün Fâ'îlün

Vaslın ihsân itmez ol yâr hicrân ehline
Anı bilmez mi ki Hakk lutf eyler ihsân ehline

Lâyık-ı dîdâr-ı dil-dâr it mahabbet ehlini
Yâ İlâhî rahmet eyle cümle îmân ehline

Bî-huzûr olur görenler derdüm ey Yûsuf-likâ
Hüzni Ya'kûbun elemdür cümle Ken'ân ehline

Rûmilinde vasf-ı hüsnün gibi olmaz ber-güzâr
Vasf-ı zülfün tuhfedür şâhum Karaman ehline

Vasf ider zülf ü zenahdânun Ziyâ'î lâ-cerem
Bir garîb eglencedür zencîr ü zindân ehline

-403-

Fâ'îlâtün Fâ'îlâtün Fâ'îlâtün Fâ'îlün

Bilürin kim ugramaz kat'â rakîbün boynına
Tîg-i hûn-rîzün senün ben bî-nasîbün boynına

Ka'be-i kûyun tavâf itmek hatâdur tîg ile
Hây kiblem ol günâh olsun rakîbün boynına

Zeyn ider gerdânın ol meh sanmanuz incü ile
Çok yetîm asıldı kaldı ol garîbün boynına

Gerden-i cânâneye zînet viren incü degül
Katre katre dizilür yaşum habîbün boynına

Hâl sanma merdüm-i çeşm-i 'alîlümdür benüm
Düşdi ol 'Îsâ-nefes tâze tabîbün boynına

Dir görenler gerdenümde gîsû-yı meftûlünü
Geçdi zencîr ol garîb-i bî-şekîbün boynına

Ey Ziyâ'î şem'-i kâfûra düşen pervânedür
Meh ki tokunmuş gice ol dil-firîbün boynına

-404-

Fe'îlâtün Fe'îlâtün Fe'îlâtün Fe'îlün

Devlet ireydi hemân Kaysun ezel başına
Başı eger Leylânun irse yolu taşına

Kâse-i Kaysı sıyup n'eyledi Leylâ görün
Hâtır-ı Mecnûnı sır eller üşerler aşına

Nâka-i Leylâ izi tozını bulsaydı Kays
Sürme ider idi hemân dîde-i hûn-pâşına

‘Aynı ile gözlerüm dîde-i Mecnûndurur
Benzemesün gözlerüm yaşı anun yaşına

Sanma Ziyâ’î ser-i Kaysdaki âşiyân
Mihnet-i Leylâ ile geldi belâlar başına

-405-

Mef’ûlü Fâ’ilâtü Mefâ’ilü Fâ’ilün

Gör mâcerâ-yı eşkümi ol âsitânedede
Deryâyı anma kalma bu kuru efsânedede

Gönlüm evinde dîdesinün fikri fi’l-mesel
Benzer belâlu hasteye bîmâr-hânedede

Ol serv sana işigin bekle ey gönül
Hiç böyle togrı yâr bulunmaz zamânedede

Pergâr-veş tolansa n’ola hüsnüni gönül
Çün nokta-i dehânunı gördi miyânedede

Bu şâh-bâz-ı tab’-ı bülendün Ziyâ’iyâ
Mecnûn başında mı büyüdi âşiyânedede

-406-

Mefâ’ilün Fe’ilâtün Mefâ’ilün Fe’ilün

Rakîb mey gibi başa müdâm çıkmakda
N’olaydı cür’a gibi kalmasam ben ayakda

Geçer gamun denizin rûzgâr ile mey içen
Habâb yelkene benzer hemân zevrakda

Bu kanlu yaralarum başda seng-i cevründen
Kırmızı güllere benzer efendi bardakda

Semend-i nâza süvâr oldı ol kadd-i bâlâ
Didi güzellere yâ hû gönüller alçakda

Harâmîdür tagıdur kâr-bân-ı ‘aklı meger
Ziyâ’iyâ mey-i nâb elde hep tutulmakda

-407-

Mef’ûlü Fâ’ilâtü Mefâ’ilü Fâ’ilün

Meydâna girdi şevk ile yalun yarag ile

Pervâneler tutuşmasun inen çerâg ile

Rindân-ı bezm-i bâde zamânun dilîridür
Sâkî yıkardı Rüstem-i Zâlî ayag ile

Recm olur nücûm ile şeytân 'askeri
Agyâr lâyük mı buna taş ile tagıla

Mecnûn başında sanma ki mürg âşiyânıdur
Leylâ velîmesine gelüpdür çanag ile

Dâg-ı dilümde bitdi elemler Ziyâ'iyâ
Ve'l-hâsıl isteyen gelsün orag ile

-408-

Mef'ûlü Fâ'ilâtü Mefâ'ilü Fâ'ilün

Ayırmasa felek beni ol mâhum almasa
N'olaydı böyle âh-ı seher-gâhum almasa

Gitdi diyâr-ı gurbete cân-ı 'âşıkân
Yüzün görünce cânımı Allâhum almasa

Bir kâmeti elif gözi hâ yârı sevmişem
Sayd itmese kimesne anı âhum almasa

Bâd-ı sabâ gibi idicek kûy-ı 'azm-i yâr
Seyl-i sirişküm irişüben râhum almasa

Mezmûm olup Ziyâ'î umar mıydı vaslını
Mezmûm olanları yanına şâhum almasa

-409-

Fâ'ilâtün Fâ'ilâtün Fâ'ilâtün Fâ'ilün

Varmaz idüm kûyına ger vasl-ı dil-dâr olmasa
Cennet ehli cenneti n'eylerdi didâr olmasa

Medh iderdüm zülfünü 'aklum perîşân olmasa
Vasf iderdüm bilüni efkârüm efgâr olmasa

Âb-dâr olmazdı şi'rüm dîde nem-nâk olmasa
Sözde yüz olmazdı ger şevk-i ruh-ı yâr olmasa

Zikr ü fikr ider midüm ol mâhumun mâhiyyetin
Dilde kable'z-zikr eger kim 'aşkı râzı olmasa

Gözleri kurbân ider miydi Ziyâ'iyi eger
Cân-ı 'âşık gibi yârun çeşmi bîmâr olmasa

-410-

Mef'ûlü Fâ'ilâtü Mefâ'ilü Fâ'ilün

Vasl umar iken ol sanem-i bî-vefâ ile
Bir dem irişdi gurbete gitdüm bükâ ile

Dirdüm ki bekleyem yalunuz dergehin velî
Gİtdüm diyâr-ı gurbete yüzbin belâ ile

Sögsün unutmasun meded ol bî-vefâyâ din
Varup niyâz idün bizi ansun du'â ile

El virmedi murâdumuz ol bî-vefâ habîb
Şâd itmedi mahabbeti bir merhabâ ile

Benzi sarardı berg-i hazân-veş Ziyâ'inün
Kalun esen ki gitdi o bâd-ı sabâ ile

-411-

Mefâ'ilün Mefâ'ilün Mefâ'ilün Mefâ'ilün

Gel ey Yûsuf-likâ lutfunla bir gün beyt-i ahzâna
Seni yıllarca görmez merhamet kıl pîr-i Ken'âna

Benüm yâr-ı 'Azîzüm mâlik olmak vaslına bir kez
Deger Ya'kûb u Yûsuf hakkı Mısır u Şâm u Ken'âna

Nedür ey Yûsuf-ı gül-pîrehen bu cevri ü kahr u nâz
Bana itdüklerün mahşer günü girmez mi mîzâna

Sakin magrûr olup ihvân-ı dehrün iltifâtına
Derûn-ı dil mekânundur senün meyl itme yabana

Zenahdânındaki cân u dile dil-ber hitâb eyler
İder ta'bîr-i rû'yâ sanki Yûsuf ehl-i zindâna

Ziyâ'î 'ayn-ı Ya'kûb oldı giryân olmada çeşmün
Düşürdün Yûsuf-ı cân-ı 'azîzi çâh-ı 'isyâna

'Arûs-ı tab'umun bu heft beyti vâsıf-ı Yûsufda
Zelîhâ Yûsufa zeyn eylemiş gûyâ yedi hâne

-412-

Fâ'ilâtün Fâ'ilâtün Fâ'ilâtün Fâ'ilün

Biz ayagı toprakına degmedük yüz sürmege
Her nefes bâd-ı sabâ zülfine lâyıkmı dege

Dîve uymış ol melek korkum budur ey âdemî
Sevse bârî bir perî yâr olsa bizden bir bege

Ol şeh-i hûbân rakîbe kulluk eylermiş görün
Serv-i âzâde ne lâyıkdur pelîde baş ege

Seyr ider agyâr ile tenhâca Hersek illerin
Benzer ol âhû mahabbet eylemişdür her sege

Ey kebûter gel Ziyâ'î nâme uçurmak diler
Kudretün var ise anı şâhine iletmege

-413-

Fe'îlâtün Mefâ'ilün Fe'ilün

Muttasıl derdüm izdiyâd üzre
Gitmedi kaldı gam fu'âd üzre

Tâ murâdum olalı ol pehlû
Uyımadum dahı murâd üzre

Bâd-ı âhumda safha-i gerdûn
Bergdür san ki gird-i bâd üzre

Hüsne nass olmaga kaşunla gözün
Nûndur kim yazıldı sâd üzre

Diller üzre Ziyâ'iyâ gam-ı yâr
Dûddur kim durur bilâd üzre

-414-

Fâ'îlâtün Fâ'îlâtün Fâ'îlâtün Fâ'ilün

Şöyle üşmiş diller ol çeşm-i siyeh-fâm üstine
Gûyiyâ etfâl üşer bir mest-i bed-nâm üstine

Vasf-ı çeşmün tan degül yazsam marîz-i 'aşk iken
Zahmet-i tebden yazarlar çünkü bâdâm üstine

Haste diller cân virürler vuslat-ı cânâneye
Kurılır derviş olanlar hân-ı in'âm üstine

Rast gelse lutf ile agyâra virürmüş selâm
Togrısı söylendi ol serv-i gül-endâm üstine

Ey Ziyâ'î içecek gam gitsün açılsun gönül
Yazalum vasf-ı leb-i cânânı bir câm üstine

-415-

Fe‘ilâtün Fe‘ilâtün Fe‘ilâtün Fe‘ilün

Serv sÛsen kulıdur kendü yürür âzâde
Nakşı gâyet de güzel geydügi ammâ sâde

Ger ser-â-ser arasan ‘âlemi yokdur bedeli
Nedür ol terlük o nâzıklük o rÛy-ı sâde

Seni sevdüm görüp ey sâde geyen nakşı güzel
Bana renk oldu sarardı yüzüm ol sevdâda

Yansun oda başı anun ki yanup yakılmaz
Cümle dünyâya od urdı Odabaşı-zâde

Ey Ziyâ’î geye çün sâdesin ol serv-i sehî
Zevk anun sâyesine girmek imiş dünyâda

-416-

Fe‘ilâtün Fe‘ilâtün Fe‘ilâtün Fe‘ilün

Şerha-i sînem yanında yakmışam dâg-ı siyâh
Didiler şeklin görenler acıyup sînemde âh

Ger safâ-yı hâtır ile kıblem irsem Ka‘beye
Zemzeme şöyle kılaydum kim acırdı kible-gâh

Da‘vî-i hüsn eylesen Mısr-ı melâhatda eger
Şâhid-i Ken‘ân olurdu sana sultânım güvâh

Şimdilik meydân-ı nazmun ben de tîr-endâzıyam
Tîr-i kilkümden sakınmaz mı rakîb-i rÛ-siyâh

Ey Ziyâ’î şîriyem ben bîşe-i nazmun bugün
Şîr-i hÛr bir tıfl esîr itdi ve lîkin bî-günâh

-417-

Mefâ‘ilün Mefâ‘ilün Mefâ‘ilün Mefâ‘ilün

Dimen zulm itdi câdû-yı felek Ferhâd-ı miskîne
Kişi hayrân olıcak cân virür helvâ-yı Şîrîne

Şeh-i iklîm-i istignâ imiş mahbûblar bilsün
Unutsun vasl-ı Leylâyı dinüz Mecnûn-ı gam-gîne

Didüm agyâra meyl eyler misin ey bütlerün şâhı
Didi gelmez sanemden fâ’ide tersâ-yı bî-dîne

İşitdüm pâk-dâmânem diyü da‘vî kılurmuşsın

Seni göz göre cânım koynına komaz mı âyîne

Ziyâ'î bir yana miskîn ü zülfün bir yana miskîn
Buluşdur hayra gir Allâh için miskîni miskîne

-418-

Mef'ûlü Fâ'ilâtü Mefâ'ilü Fâ'ilün

Gezmez erâzil ol şeh-i 'âlî-cenâb ile
Pervîn olur mı kim görine âfitâb ile

Gül yapragıyla yaraşur ey 'andelîb-i cân
Ruhsâr-ı yâr tan mı görünse nikâb ile

Harc itme nakd-i 'ömrünü kasr-ı ümîde hep
Dirler ki Kayseriyye yapılmış hisâb ile

Bagrum bişürdi kanımı içdi benüm o şûh
Hakka ki nûş-ı bâde güzeldür kebâb ile

Ben ey Ziyâ'î kubbe-i çerhün bekâsını
Benzetdüm ol sebâta ki turur habâb ile

-419-

Mef'ûlü Fâ'ilâtün Mef'ûlü Fâ'ilâtün

'Âlem tolar sadâdan dokındugumca tasa
Var ise zerre denlü kalmaz gönülde tasa

Lâzım degül efendi sunmak şarâb-ı nâbı
Kan yударuz dem-â-dem derdünle kâse kâse

Şerh itdügümce derdüm dirler ki kavî-i şârih
Gâyet güzel kazâyâ gelmez velî kıyâsa

Didüm ki mürg-ı diller zülfün şebinde perrân
Didi ki bunca huffâş olmazdı ger yarasa

Olur mı ey Ziyâ'î hiç böyle mâl-hulyâ
Ol sîm-tenlü gelse kol boynuma tolasa

-420-

Fe'ilâtün Fe'ilâtün Fe'ilâtün Fe'ilün

Dil eger kasd-i tekellüm ide ugrar hasra
'Arz-ı hâl itmedi kaldı o ferîd-i 'asra

Yıkdı Bagdâd-ı dili zulm ile ol şûh-ı cihân
Şimdi yapmak mı diler ba'de harâbi'l Basra

Fikr-i zülfün kodı meyl itdi gönül ârızuna
Terk idüp Şâm ilini gıtdi diyâr-ı Mısra

Ey şeh-i mülk-i melâhât sana Hakk virmişdür
Baht u nusret ki nasîb olmadı Buhtu'n-Nasra

Kûy-ı 'aşkunda Ziyâ'î kulunun sultânım
Çok kusûrı var ise gel girelüm bir kasra

-421-

Fâ' ilâtün Fâ' ilâtün Fâ' ilâtün Fâ' ilün

Dergehünde derdüm aglamaga bir dem var ise
Yoluna olsun benüm iki gözüm nem var ise

Kâ'ilem n'eylersen eyle hûr-ı 'aynum uşta ben
Kûyunı koyup cinânı ister âdem var ise

Başka 'âlemdür didiler seyr-i 'iklîm-i 'adem
Virelüm cânân yolına cânı 'âlem var ise

Sâkiyâ şol gül gibi sâgarları nûş idelüm
Gönlümüzde zerre denlü gussa-i gam var ise

Ey Ziyâ'î öyküne diyü dehân-ı dil-bere
Goncenün agzın arar gül-şende şeb-nem var ise

-422-

Fe' ilâtün Mefâ' ilün Fe' ilün

Kandur çeşm-i mesti her demde
Var mıdur böyle hûnî 'âlemde

Hastedür kim harâret ile yatur
Fikr-i çeşmün derûn-ı sînemde

Ne harâmîdür ol siyeh çeşmün
Ki komaz 'akl u fikri âdemde

Âh kim haste çeşmi cânânun
Kodı ben mübtelâyı mâtemde

Mey-perest olmasaydı hûnî gözün
Kanuma kanmazıdı her demde

Nîm-hâb olmasa o çeşm-i siyâh
Gazab itmezdi böyle 'âlemde

Kodı çeşm-i siyâhun ey âfet
Bu Ziyâ'îyi zulmet-i gamda

-423-

Fe‘ilâtün Mefâ‘ilün Fe‘ilün

Hâlsiz dil aldı bir güzel yine
Şâhdur dehr-i sâde-rûlarına

N’ola hâl olmasa ‘izârında
Nokta konmaz cemâl mushafına

Hâl u hattdan ‘izârı sâde güzel
Tan degül ger güneş gibi görine

Hâlden hâlîdür velî zenbûr
Kondugın görmedüm gül üzerine

Merdüm-i çeşmüm ey Ziyâ’î ne var
‘Ârız üzere konsa ben yerine

-424-

Mef‘ûlü Mefâ‘ilü Mefâ‘ilü Fa‘ûlün

Ta‘cîl ile geldi irişüp yaza benefşe
Diler ki saçun vafını hep yaza benefşe

Umar ni‘am-ı vaslunı tayandı ‘asâya
Oldı sanasın sâ‘il-i dervâze benefşe

Ferhâd gibi tîşe-i gonçe ile efendi
Kasd eyledi kûhsârı gelüp kaza benefşe

Bâga sakın ey kebk-i derî itme güzer
Bâl u per ile benzedi şeh-bâza benefşe

Sanman ki gül-istânda mutî‘ olmadı yâra
Boynın eger ol serv-i ser-efrâza benefşe

Zülfün dagıdır ‘ârızına ol şeh-i hûbân
Mushafda komışlar sanasın tâze benefşe

Her beyti Ziyâ’înün olur bîkr-i safâ-bahş
Gûyâ takınur başlayuban nâza benefşe

-425-

Mef‘ûlü Fâ‘ilâtü Mefâ‘ilü Fâ‘ilün

Tagıldı gitdi bir yana sabr u karâr ise
Sâgar gibi elümde degül ihtiyâr ise

İrdi dem-i bahâr uyan ey mîr-i 'âşıkân
Yir yir açıldı bâgda zülf-i nigâr ise

Unutma eski kulunam ey nev-cevân ben
Terk it rakîb-i kâfiri gönlünde var ise

Sahrâya varmasun koyup ey Leylâ kûyunı
Mecnûn-ı nâ-murâda eger 'aklı yâr ise

Mahzûn olur hazân iricek Ziyâ'iyâ
Bî-behreyüz geçer bizi vakt-i bahâr ise

-426-

Fe'îlâtün Mefâ'îlün Fe'îlün

Cân hevâda gezer ten alçakda
Zülf-i yâr ile dil mu'allakda

Hızr u İdrîs vaslun ister iken
Biri yelmekde biri uçmakda

Kâmetün Sidre gabgabun cânâ
'Arş kandîli hod mu'allakda

Beni ref' eyle ey nesîm-i seher
Kalmışam ben gubâr-ı toprakda

Ol yalun yüzlü ey Ziyâ'î müdâm
Bizi hicrân odına yakmakda

-427-

Mef'ûlü Fâ'îlâtü Mefâ'îlü Fâ'îlün

Gül gonçesi dikilmedi bâgun miyânına
Peykân-ı tîr-i mihnet anun irdi cânına

Virmezdi nakd-i encümi dünyâya âsumân
Âhir boyandı gözgöre âhum duhânına

Misvâk sanma sûfi bugün hüsnini görüp
Engüş-t-i hayretini koyupdur dehânına

Vasf itdi seg-i rakîb ol âhûyı şöyle kim
Döndi sözi cihânda geyik dâstânına

Ben bî-nişâmı itdi nişân ey Ziyâ'î çün
Tîr-i ecel demidür irişse nişânına

-428-

Fe‘ilâtün Mefâ‘ilün Fe‘ilün

Ragbetüm kılca yok mı yanında
Bir bahâne çü yok miyânında

Dehenün bûsesin dirîg eyler
Hiç vefâ yogimiş dehânunda

Kapışur hâk-i pâyun iki gözüm
Kapıcılardur âsitânında

Hüsnüne gırra olma kim ey mâh
Bir gün olur zevâli anun da

Sözlerün ey Ziyâ‘î yakdı beni
Yohsa sûzun mı var zebânunda

-429-

Mef‘ûlü Fâ‘ilâtü Mefâ‘îlü Fâ‘ilün

Her kim mütâla‘a kıla hüsnün kitâbına
Her fende tan mı kâdir olursa cevâbına

Bir yüzi kara zengîdür engel ne kılayın
Yârun takıldı gitdi o zengî rikâbına

‘Uşşâk anulsa ben kulına virmeyüp vücûd
Sayar hemân o gonca-dehân yok hisâbına

Dil-haste görse düşde seni ey tabîb-i cân
Uyandugında degmez imiş ıztırâbına

Def‘-i sudâ‘ için gözümün yaşı var iken
Meyl itmezin Ziyâ‘î bu dehrün gülâbına

-430-

Mefâ‘îlün Mefâ‘îlün Fa‘ûlün

Gönül meyl itdi kadd-i dil-rübâyâ
Giriftâr oldı bir uzun belâyâ

Temâşâ kıl ki benzer dest-i yârun
Hilâle barmagı ol aya aya

Alurlar vasl-ı yârı nakd-i câna
Satılır mülk-i ‘âlem yok bahâyâ

Bu devr içre dükenmez cevri yârun
Müseleldür eli gayrû‘l-nihâye

Ziyâ'î gibi bir kem-ter garîbem
Nazar kıl pâdişâhum ben gedâya

-431-

Fâ' ilâtün Fâ' ilâtün Fâ' ilâtün Fâ' ilün

Gırra olmışdur ol âfet hüsn-i bî-hemtâsına
Ol sebebden mâ'il olmaz 'âşık-ı şeydâsına

Geldi fâlumda elif takdîre oldum muntazır
Rast geldüm togrusı yârun kad-i bâlâsına

Teng idi hicr-i dehânundan bana şehri-i vücûd
Geldi ol demler ki 'azm idem 'adem sahrâsına

Cân kenâr özlerdi ammâ bir muhâlif rûzgâr
Saldı gönlüm zevrakın derd ü belâ deryâsına

Öldüğinden sonra güftârı Ziyâ'î hastenün
Fi'l-mesel benzer halâvetde öli helvâsına

-432-

Mef'ûlü Fâ' ilâtü Mefâ'ilü Fâ' ilün

'Aşk ehlinün murâdını dâ'im Hudâ vire
Ol ser-keşün visâlini dahı bana vire

Virse Hudâ didüm bana bâlâ-yı kaddüni
Hışm ile bakdı didi ki Allâh belâ vire

'Ayyûka âhumı çıkarurdum gamunla âh
Korkum bu ki fenâsına çerhün fenâ vire

Kasrun öninde secdeyi dil eksik itmesün
Kasr-ı salât câ'iz olur mı mücâvire

Hâlet-fezâ gerek mey-i sâfi Ziyâ'iyâ
Sâkî gerek ki âdeme bir hoş safâ vire

-433-

Mefâ'ilün Fe' ilâtün Mefâ'ilün Fe' ilün

'Aceb mi 'ârif el üstinde tutsa esrârı
Anunla seyr ider ey dil hayâl-i dil-dârı

Sebeb nedür resen-i zülfe eyledün ber-dâr

Günâhı yog iken ey bî-vefâ dil-i zârı

Rakîbe el virüp itdünse merhabâyı eger
İl ıssı duymadın eyle efendi inkârı

Mey-i sabûhı getür 'âşık-ı seher-hîzem
Kadeh du'âsın o şevk ile okıyam bârî

Ziyâ'iyâ gevher-i nazmı pây-mâl eyle
Diyârumuzda bulunmaz güher harîdârı

-434-

Fe' ilâtün Fe' ilâtün Fe' ilâtün Fe' ilün

Ol yüzi şem'-i münîr okıyalı Mısbâhı
Bizi pervâne-sıfat yakmagadur ilhâhı

Vechi var cân dise cânâna eger âşıklar
Odur la'l ü dehân u sühanı ervâhı

Rindler 'îd olıcak kûy-ı harâbata gider
Tut ki bayrâm ayıdur mey-gedenün miftâhı

Zülfün altında femün nükteleridür bir bir
Ki Şeb-istân-ı hayâlinde yazar Fettâhı

Sâkî-i bezm-i ecel câm-ı mahabbet ki sunar
Râhat-ı rûh-ı Ziyâ'î olur anun râhı

-435-

Fâ' ilâtün Fâ' ilâtün Fâ' ilâtün Fâ' ilün

Gerçi kim bin cân deger cânânumun bir bûsesi
Degmede degmez ana 'uşşâkun ammâ degmesi

Rûy-ı zerdüm dir görenler hâk-i pây-ı yârda
Topraga bâd-ı hazân iletdi berg-i nergisi

Cân-ı bîmâr âteş-i gamdan olupdur sûhte
Oldı var ise hayâl-i hâlün anun noktası

Âşiyân-ı murg ile Mecnûn niçe fahr itmesün
Başına cem' oldı Leylâ kûyınun hâr u hası

Bir tabîbe derd-i 'aşkun çâresin sordum didi
Ey Ziyâ'î 'âkıbet teslîm-i cândur çâresi

-436-

Fâ' ilâtün Fâ' ilâtün Fâ' ilâtün Fâ' ilün

Sanmanuz bîhûde efgân eylerüm bülbül gibi
Da'vî-i 'aşk eylerem ben şahidüm var gül gibi

Ey perî-peyker olan 'aklum dahı tagılmasun
Çözme bu gîsû-yı 'anber-bûyunı sünbül gibi

Tan degüldür olmasa ruhsârun üzre hâl eger
Rûmilinde hâsıl olmaz dâne-i fülful gibi

Kâh olur kim mest-i câm-ı 'aşka bir hâlet gelür
Derd-i serdür ol dahı başdan humâr-ı mül gibi

Sünbülü görsem Ziyâ'î dir perîşân-hâl olur
Bir belâdur ol dahı başdan bana kâkül gibi

-437-

Mefâ'îlün Mefâ'îlün Mefâ'îlün Mefâ'îlün

Şeh-i gam dergehinde merdüm-i çeşm oldı subaşı
Ziyâde olsun anun yâ İlâhî dem-be-dem yaşı

Ne derd olur bu kim derd-i derûnum âşikâr eyler
Bana yaşı düşer gözden sirişk olsa eger yaşı

Yüzini düşürür mihrün yire ruhsârı cânânun
Meh-i bedri hilâl eyler o mâh-ı enverün kaşı

Niçe kez âsitân-ı yârı silmişdür süpürmişdür
İki çeşmüm iki sakkâsı bâd-ı âh ferrâşı

Belâ-yı yâr ile ayırmaga kasd eylemiş düşmen
Ziyâ'î'nün velî anunla hoşdur tâ ezel başı

-438-

Fâ'îlâtün Fâ'îlâtün Fâ'îlâtün Fâ'îlün

Bâg-ı 'âlemde işitsem ol gülün güftârını
Görsem ol serv-i revânun şîve-i reftârını

Dil mahabbet kûyını zabt itdi agyâr eylemez
Bir sipâhîdür ki serbest eylemiş tûmârını

Zâhidâ zühdün metâ'ın alana sat çünkü ben
Mey-furûş-ı 'aşk ile itdüm şîrâ' bâzârını

Şem'-i sûzân gibi geh handân u geh giryân olur
Lâ-cerem bilmez edânî 'âşikun esrârını

Va'de eylersin visâle lîkin itmezsün vefâ
Yâr-ı sâdık dostum ferdâya salmaz yârını

Kaşların vasfın Ziyâ'î şöyle tahrîr itdi kim
Yiridür mihrâblarda yazsalar eş'ârını

-439-

Mefâ'îlün Mefâ'îlün Mefâ'îlün Mefâ'îlün

Gel ey hûbânun âb-ı rûyı ten hicrünle çâk oldı
Hevâ-yı 'aşk ile cân âteş-i gamdan helâk oldı

Siper kılmaga cismüm cân atardum ey kemân-ebrû
Velî tîr-i müjen gitdükçe gâyet sehm-nâk oldı

Felekde kehkeşân u yiryüzinde sanma yollardur
Zemîn ü âsumân tîg-i gamunla sîne-çâk oldı

Umarken meyve-i vaslın nahîf oldum muhassal bu
Vücûdum bir nihâl için cihân bâğında tâk oldı

Yetiş gel ey tabîb-i cân u dil kim kûşe-i gamda
Ziyâ'î haste derd-i hasretünle derd-nâk oldı

-440-

Mefâ'îlün Mefâ'îlün Mefâ'îlün Mefâ'îlün

Hayâli gam şebinde cânı tâlân eyledi kaçdı
Harâmîdür giceyle şehri vîrân eyledi kaçdı

Hayâli gâyet oldı gözden eşküm eyleyüp hûnîn
Yirinde tut ki merdüm-zâdedür kan eyledi kaçdı

Başum kesse dökülse kanum agramazdum ol mikdâr
Ki mey döküldi sûfî câmı pinhân eyledi kaçdı

Yakam çâk itdügine muhtesib derdüm yok oldur derd
Şarâb u câmı sûfî zîr-i dâmân eyledi kaçdı

Devâ-yı derd-mendân eyler iken ol tabîb-i cân
Ziyâ'î hastesin derd ile nâlân eyledi kaçdı

-441-

Fe'îlâtün Mefâ'îlün Fe'îlün

La'lün eşküm şarâba döndürdi
Yakdı bagrum kebâba döndürdi

Beni hicrânun âteşe düşmiş
Mûy-ı pür-ıztırâba döndürdi

Kodı mâtemde hasret-i zülfün
Beni gurbet gurâba döndürdi

Agların inlerin döner yürürin
Beni 'aşkun dolâba döndürdi

Bâd-ı âhum Ziyâ'iyâ felegi
Bî-karâr âsiyâba döndürdi

-442-

Mefâ'îlün Mefâ'îlün Fa'ûlün

Egerçi bâga ezhâr-ı nev irdi
Bana ne sünbüli yarar ne verdi

Dil ü 'akl aldı şimdi cânım ister
Bana ol bî-vefâ bilmem ne virdi

Mu'arrâdur dikilmek töhmetinden
Libâs-ı 'aşkun olmaz hîç neverdi

Mahabbet bilmeyen hîç bâlig olmaz
Geçerse sâl-ı heşti dü neverdi

Şu kim 'aşkun gamından bî-haberdür
Sen ana dime âdem câ ne virdi

Bihamdi'llâh murâdı hâsıl oldu
Visâl-i dil-rübâyâ cân iverdi

Gönül mest-i mey-i 'aşk oldu benzer
Rakîb ile müdâm eyler neverdi

Halâs oldu belâsından cihânun
Ziyâ'î cânını cânâne virdi

-443-

Fâ'ilâtün Fâ'ilâtün Fâ'ilâtün Fâ'ilün

Bezm-i gamda mutrib-i nâ-sâza din n'eyler defi
Sayhatî min hüznü hicrânü'l-habîbi yektefi

Ol melek seyrine gelmiş saf saf olmuşdur bu halk
Kimse görmüş var mı ola böyle çok âdem safi

Çün gelürsün katlüme bârî yüzün göster didüm
Didi menhîdür alup gitmek gazâyâ mushafi

Hây sultânüm niçe bir bana bu zulm-i sarîh
İtsen olmaz mıydı gâhî bana bir lutf-ı haff

Âsitânunda Ziyâ'î kimdür eylersen su'âl
Ehl-i şevkün şâhı şâhum kullarınun ez'afi

-444-

Fe'îlâtün Mefâ'ilün Fe'ilün

Sâkî mi mey mi duhter-i rez mi
İtdiren meclis ehline rezmi

Başın ortaya kor surâhî müdâm
Ki kıla mest ahâlî-i bezmi

Terk ider cân vücûd kişverini
'Adem iklîmine gibi 'azmi

Hatun i'râbı mushaf-ı hüsnün
Hâller noktası femün cezmi

Ey Ziyâ'î solar kalur mı hemân
Gül-i bâg-ı ümîd açılmaz mı

-445-

Mefâ'ilün Mefâ'ilün Mefâ'ilün Mefâ'ilün

Bana sor gayra sorma derd-i gîsû-yı perîşânı
Uzun gice belâsın bilür ancak hastenün cânı

Çeküp kullâb-ı zülfünle şehâ deryâ-yı hayretden
Kenâr-ı vasla mâhî-veş çıkardun cân-ı lertzânı

Gice ser-mest olup ayagina dâmen gibi düşdüm
Seher ol şevk ile gül gibi çâk itdüm girîbânı

N'ola tavr-ı cünûnı ihtiyâr itsem ki seyr itdüm
Atar ol şûh bir dîvâneye seng-i firâvânı

Ziyâ'idür cünûn iklîminün sultânı sultânüm
'Aceb şâhâne tertîb itdi dîvâne bu dîvânı

-446-

Fâ'ilâtün Fâ'ilâtün Fâ'ilâtün Fâ'ilün

Bilmezem ol bî-vefâ niçün bana el virmedi
Çünkü virdüm ben dil ü cânı ana el virmedi

Îd-gehde öpmege cânân elin kıldum du'â
Kaldum ayakda bana dest-i du'â el virmedi

‘İd eriřdi her kiři yâr ile eyler merhabâ
Tâlib oldum ben de ammâ merhabâ el virmedi

Rindler pîr-i mugândan hep el aldılar bugün
Mest ü bed-nâm oldılar devlet bana el virmedi

Ey Ziyâ’î al ele dünyâyı bir gün darb-ı dest
Her denîye el virür ammâ bana el virmedi

-447-

Fâ‘ilâtün Fâ‘ilâtün Fâ‘ilâtün Fâ‘ilün

Dil bugün bâzâr-ı dehr içinde olmaz müşteri
Atlas-ı gerdûnun ey mâh olsa Pervîn Müşteri

‘Aşk-ı cânânı ne bilsün anı hîç işitmeyen
Gevher adın bilmeyen şâhum ne bilsün gevheri

Keşf-i esrâr eylesem hayrân iderdüm ‘âlemi
Saklamazdum degme câhilden degül ammâ yiri

Hasret-i rûyunla eşküm bir akar sudur latîf
‘Aynı ile iki çeşmümdür iki nîlüferi

Ey Ziyâ’î her sözün bir gevher-i nâ-yâbdur
Şimdi bir bâzâra düşdün kim bulunmaz müşteri

-448-

Fâ‘ilâtün Fâ‘ilâtün Fâ‘ilâtün Fâ‘ilün

Çık salın servüm benüm seyr idelüm refâtârını
Söyle ey gonçe-dehân gûş idelüm güftârını

Kaşların üzre perîşân eyleme zülfeynüni
Hây kâfir asma mihrâb üstine zünnârını

Su gibi taş yasadunup toprak döşensin muttasıl
Cân u dilden her kim eyler ârzû didârını

Şerbet-i la‘lün ‘atâ kıldukda her dil-hasteye
Ey tabîb-i cân meded unutma ben bîmârını

Bir perî teshîrine benzer mukayyedsin yine
Ey Ziyâ’î sihr-i mutlak eyledün eş‘ârını

-449-

Mefâ‘ilün Mefâ‘ilün Mefâ‘ilün Mefâ‘ilün

Benüm servüm türâb-ı sâye-i şimşâdunam şimdi
Ezel handân idüm ammâ senün nâ-şâdunam şimdi

Ezelde âşinâlık kıldugun gitmiş mi yâdundan
Yüri bî-gânelerle var biliş ben yâdunam şimdi

Ne lâzım okımak efsâne-i Ferhâd u Şîrîni
Benüm Şîrîn-kelâmum ben senün Ferhâdunam şimdi

Ezelden inkiyâdum var güzeller hüsnine ammâ
Ben ey mahbûblar şâhı senün münkâdunam şimdi

Ziyâ'iyem kesilmem haşr olunca 'aşk-ı pâkünden
Egerçi sîne-çâk-ı hançer-i pülâdunam şimdi

-450-

Mef'ûlü Fâ'ilâtü Mefâ'ilü Fâ'ilün

Âdem cihânda ger ola 'âlî vü ger denî
Gerdûn elindedür anun elbetde gerdeni

Bu cevr ü bu cefâ ile bu zecr-i hicr ile
Öldürmez ise yâr beni öldürün beni

Durmaz rakîbe kâmet-i bâlâyı 'arz ider
Bir gün belâya ugradur ol şîve-kâr anı

Yârun gözükdî diyü ne ta'n itdiler bana
'Uşşâkuna gözüksen olur göreyin seni

Silse gözün yaşını demidür Ziyâ'iyâ
Hûn-ı sirişk-i dîdeni seyl-âb iden kanı

-451-

Fe'ilâtün Mefâ'ilün Fe'ilün

Seyr iden dir visâl-i cânânı
Çıkar âhir bunun da hicrânı

Çın seher zülfine tokındı güneş
Şâmı feth itdi Rûm sultânı

Eşk-i çeşmüm hayâl-i zülfi ile
'Aynı ile Benefşe lîmânı

Haşiy-i kâğıd üzre yazsak olur
Vasf-ı şimşâd-ı kadd-i cânânı

Dehenün kim Ziyâ'î vasf eyler
Sırr-ı gayb anlar ehl-i hâl anı

-452-

Fâ' ilâtün Fâ' ilâtün Fâ' ilâtün Fâ' ilün

Bir güzel çübânı gördüm Hazret-i Mûsâ hakı
İbn-i Meryem dînidür dîn-i dem-i 'Îsâ hakı

Kışlasam kûyunda didüm ten bulurdı tâze cân
Râzî olmam didi 'Îsâ itdügi ihyâ hakı

Hîle kurdum koynına girmek tedârik eyledüm
Duydı atası anası Âdem ü Havvâ hakı

Cân virürdüm ger beni koç gibi kurbân eylese
Eylemez zulm ile katl itmek diler Yahyâ hakı

Ey Ziyâ'î ol siyeh-pûşun saçı sevdâsına
Karalar geysen gerekdür Ka'be-i 'ulyâ hakı

-453-

Fe' ilâtün Fe' ilâtün Fe' ilâtün Fe' ilün

Yârum agyâra enîs olmasa hoş hem-dem idi
Ol perî uymasa şeytâna melek âdem idi

Göz göre 'aşkumun esrârını ifşâ kıldı
Ko yıkılsun sanemâ eşk-i revânun nem idi

Ey gözüm nûrı benüm dîde-i pür-hûnumdan
Sana kan aglayubilsen ne mübârek dem idi

Mülk-i hicrâna eger olmasa âhir tebdîl
'Âlem-i vuslat efendi ne güzel 'âlem idi

Ey Ziyâ'î sözümün sûzı çerâg-ı kudret
Kuşça cânun yakılurdı ana pervânem idi

-454-

Mefâ' ilün Mefâ' ilün Mefâ' ilün Mefâ' ilün

Beni kûy-ı belâda ol Ganî sanman fakîr itdi
Diyâr-ı 'aşka ser-tâ-ser ben ednâyı emîr itdi

Safâ-yı câm-ı sahbâyı cihân bezminde benden sor
Niçe kez pâdişâhum Tanrı hakkıçün fakîr itdi

'Abîr-i bûy-ı zülfünsüz türâb itdi bana cânâ
O kim topragını firdevs-i a' lânun 'abîr itdi

Ne tîr-endâz olur ol âfet-i devrânı seyr eylen
Kemân itdi kadüm âh-ı derûnum dahı tîr itdi

Ziyâ'î zulmet-i çâh-ı firâk içinde gam yokdur
Ana kim lutfunı Hallâk-ı 'âlem dest-gîr itdi

-455-

Mef'ûlü Fâ'ilâtün Mef'ûlü Fâ'ilâtün

Yayıldı eşkümün hep dünyâya mâcerâsı
Bildürdi halka gizlü sırrum o kan olası

Câm-ı lebin sunınca bin cân alur ol âfet
Bir cân imiş turalum anun tolu bahâsı

İşün tamâm olupdur didi o mâh ayıtdum
'Uşşâkun ey efendi eksük degül belâsı

Ol serv-kad kim olmaz gönlüm gamından âzâd
Gül-geşt-i gül-şen eyler geymiş yeşil libâsı

Şi'r-i Ziyâ'î gerçi rengîndür be-gâyet
La'lün anılsa olur rengîn-ter edâsı

-456-

Mefâ'ilün Fe'ilâtün Mefâ'ilün Fe'ilün

Be hey belâlu güzel pür-belân unuttun mı
Diyâr-ı hicre düşen mübtelân unuttun mı

Bize kıyarsın inen hey nedür bu kâfirlik
Sanemlerün begi yohsa Hudân unuttun mı

Meded meded bizi yâd eyle dest-gîr ol gel
Bu bahr-ı gamda kalan âşinân unuttun mı

Nesîm-i âhun ile ey gönül çü berg-i hazân
Der-i nigâra varurdun hevân unuttun mı

Ziyâ'iyâ kanı ol kan akıtdugun demler
O hûnî ile geçen mâcerân unuttun mı

-457-

Fâ'ilâtün Fâ'ilâtün Fâ'ilâtün Fâ'ilün

Perde-dâr olmuş ruh-ı cânâna yelken takyesi

San şafak olmuş meh-i tâbâna yelken takyesi

Baş koşaldan başı üzre bend-i zülf-i yâr ile
Oldı zâhir kıpkızıl dîvâne yelken takyesi

Şem'-i ruhsâr-ı nigâra yanmaga kâsd eylemiş
Bâl u per açmakdadur pervâne yelken takyesi

Al tûtî serv-i ra'nâ üzre konmuş sanasın
Kadd-i yâr üstindeki merdâne yelken takyesi

Ey Ziyâ'î gûyiyâ bir şâh-ı güldür kadd-i yâr
Sûretâ benzer gül-i handâna yelken takyesi

-458-

Mefâ'îlün Mefâ'îlün Mefâ'îlün Mefâ'îlün

O zâlim kim tahallüs eylemişdür kendüye Cevrî
Cefâsı hâtır-ı vîrânede boynumdadur cevri

Ne dil kurtuldı derdünden ne mahlas buldı cevrenden
Anun kim mahlası Cevrîdürür cevri ü cefâ tavrı

Temâşâ eyler idüm ey sanemler bir vefâsızdan
Havâle kıldunuz ben mübtelâyâ cevrünüz fevrî

Vefâsına bu fânî dehrün aslâ i'tibâr itmem
Benüm bu hâtır-ı vîrânüm içre var iken cevri

Ziyâ'î zulmet-i zulm içre kaldı cümle şevk ehli
Olaldan Edrine şehrinde Bakkaloglunun devri

-459-

Fe'îlâtün Fe'îlâtün Fe'îlâtün Fe'îlün

Bir mubârek dem irüp gördi gözüm bayrâmı
Kimseler gördi mi âyâ bu şerîf eyyâmı

Rûze-i hicrün ile mâh-ı neve döndi tenüm
Vaslun ey kaşı hilâl olmaya mı bayrâmı

Bana ey Leylî-sıfat hürr-nekeşdür Mecnûn
Götürür kâse ki başında gör ol bed-nâmı

Lerze eyler dil ü cân görse o nâzik bedeni
Görelî kâsesini yok felegün ârâmı

Bezm-i 'âlemde Ziyâ'î-i mey-âşâm gibi
Kâse-bâzum seni vasf eyleyemezdi Câmî

-460-

Mef'ûlü Mefâ'îlü Mefâ'îlü Fa'ûlün

Hurşîd-i ruhun gördi gözüm kamaşayazdı
Cân sandı ten-i hastesini sarmaşayazdı

Ey dürr-i girân-mâye kenâr olmadı rûzı
Deryâ-yı gamun gerçi başumdan aşayazdı

İtdüm başumun kâ'ide-i cerrini icrâ
Ahz itdi anı âb-ı revânlar taşayazdı

Ger mertebemüz kişver-i gurbetde sorarsan
Bir mertebeye varduk ecel yaklaşıyazdı

Bir bir göresin ölmez isen şimdi Ziyâ'î
Anı ki ezel Kâtib-i Kudret başa yazdı

-461-

Mef'ûlü Fâ'ilâtü Mefâ'îlü Fâ'ilün

Lâyık mı her dem akıdasın eşk-i dîdemi
Annaz mısın ezel sen ile sürdügüm demi

Kul mıdur âh-ı sîne gözüm yaşı câriye
Bâzâr-ı 'aşkda gel e gör hâce-i gamı

Zülfün ki dâm kurdı dile dâm-ı 'ömrüme
Kaldı esîr-i bend-i belâ cânun eyle mi

Ey kârbân-serâyına konup göçen kişi
Hiç fikr ider misin 'acebâ hâl-i 'âlemi

Ben şâh-bâz-ı evc-i cünûnem Ziyâ'iyâ
Mecnûn başında yapdum ezel âşiyânemi

-462-

Fe'ilâtün Fe'ilâtün Fe'ilâtün Fe'ilün

'Âkıbet gâyeti bu cevr ü cefânun yok mı
Söyle ey gonca-dehen yohsa dehânun yok mı

Yâr vasfını mı işitdün ki sükût itdün
Ey sanem da'vî-i hüsn itmege cânun yok mı

Ne kadar taş isen ol seng-dilün derdinden

Dilde ey seng-i siyâh sûz-ı nihânun yok mı

Gırra olma sakın ey dehr döner bu devrân
Nev-bahârun var ise vakt-i hazânun yok mı

Ney gibi inledüğün her nefes ey pîr-i felek
Mâh-ı tâbân gibi bir tâze cevânun yok mı

Vahşiyem dirsın eyâ bâg-ı cinân tâvusı
Gül-şen-i hâtırumuzda cevlânun yok mı

Kangı meh şevke seni yakdı Ziyâ'î gibi gel
Söyle ey şem'-i ziyâ-bahş zebânun yok mı

-463-

Mef'ûlü Fâ'ilâtü Mefâ'ilü Fâ'ilün

Pervâne hâlini bilürin zerre bilmedi
Ol kim çerâg-ı hüsnine yanup yakılmadı

Yıllardur ki âhumı gûş itmedi benüm
Demlerdürür ki yâşımı dil-dâr silmedi

Çok demler oldı 'âşık-ı sâdık geçer sana
Miskîn benefşe kara saçundan kesilmedi

Âb-ı hayat katresidür leblerün senün
Hızr u Sikender içmedi hergiz içilmedi

Şevk-i ruhun çün oldı delîli Ziyâ'înün
Tutdı reh-i mahabbeti yolın yanılmadı

-464-

Mef'ûlü Fâ'ilâtü Mefâ'ilü Fâ'ilün

Yâ Rabb 'izâr-ı yâr mı 'Azrâ didükleri
Mecnûn iden midür beni Leylâ didükleri

Yâ Rabbi çekdügüm bu belâ-yı siyeh midür
Anup diyâr-ı 'aşkda sevdâ didükleri

Ey dil 'izâr-ı yârda zülf-i siyâh imiş
Firdevs içinde sâye-i Tûbâ didükleri

Zülf ü dehân u çehresidür seyr idün gelün
Reyhân u gonçe vü gül-i hamrâ didükleri

Dirler gezer rakîb ile tenhâda her gıce
Gerçek mi ki o mâhuma âyâ didükleri

Bilmez miyüz ki Kâf-ı 'ademdür güzer-gehüm
Tab'um degül midür hele 'Ankâ didükleri

Vasf-ı lebünde şî'r-i Ziyâ'î akar sudur
Bu heft beyt imiş yedi deryâ didükleri

-465-

Mef'ûlü Fâ'ilâtü Mefâ'ilü Fâ'ilün

Tîg-i elem dirîg ki başumdan inmedi
'Ömrüm günü zevâle irişdi tolinmedi

Gönlüm sovutdı ol sanemün serd oldugı
Hayfâ ki nâr-ı 'aşkına gönlüm ısınmadı

Ol kaşları kemândan usandı gönül velî
Sanman ki tîr-i hicr ile bagrum delinmedi

Âb-ı hayât idi lebi ben dirisi idüm
Âhir elüm yudum ki melâlüm bilinmedi

Gönlüm kesilmedi o sanemden Ziyâ'iyâ
Tîg-i kazâyâ ugradı kat'â sakınmadı

-466-

Fe'ilâtün Fe'ilâtün Fe'ilâtün Fe'ilün

Zevki kahpe felegün olsa ne var erzânî
Katı mezmûm olur ammâ olicak erzânı

Kalkup eylerdi siper cismine tîr-i gama cân
Lîk ok darb ile dirler ki deler kalkanı

Hâl u hatdan n'ola hâlî ise ruhsâr-ı nigâr
Hiç olur mı ki gele Rûma Habeş sultânı

Mushaf-ı 'aşk hakı ey yanagı zü'n-nûreynüm
Direm eşkümüzün her biri bir 'Osmânî

Bu gice kıl bizi ihyâ demidür ey 'Îsâ
Bu Ziyâ'î-i marîzün hele yokdur cânı

-467-

Fâ'ilâtün Fâ'ilâtün Fâ'ilâtün Fâ'ilün

Câh ile mesrûr ider dehr-i denî her câhili
Kâm ile illâ ki buluşdurmaz Allâh kâmili

Nakd-i cân harc itdüm ancak derdi tahsîl eyledüm
Bâg-ı ümmîd-i visâln harca degmez hâsılı

Anı teşbîh eyleyen kimdür dehân-ı yâra kim
Gonca-i gül-zâr-ı dehrün agzı var yokdur dili

Gözlerüm çok yaşamışdur hâk-i pâyunda senün
Âsitânunda efendi âhumun çokdur yili

Niçe kez devr eyleye dolâb-ı 'âlem döne çerh
Zâhir olunca Ziyâ'î gibi merd-i kâmili

-468-

Mef'ûlü Fâ'ilâtü Mefâ'ilü Fâ'ilün

Kılmaz sitâresiz umarın ben müfellesi
Ol kim bezer nücûm ile tâk-ı mukarnesi

Etrâf-ı dîdeden görinen kirpügüm degül
Deryâ kenârınun görünür hâr ile hası

Uşşâk alâyına girişür katle kâsd ider
Âdemler öldürür o perînün girişmesi

Mecnûnun oldı ey saçı Leylî ki başına
Mürg âşiyânın aldı gör âvâre nergisi

Beş beyti bir nefesde ki didi Ziyâ'iyâ
Beş yılda dimeye ana kimse muhammesi

-469-

Fâ'ilâtün Fâ'ilâtün Fâ'ilâtün Fâ'ilün

Kulluk eyler gayra gördüm sevgilü sultânımı
Çâh-ı kahra saldılar ol Yûsuf-ı Ken'ânımı

Öldüğümde korkarum agyâra yâr olur habîb
Bir ölümlü hasteyem bi'llâhi beklen cânımı

Yâ İlâhî yâr ile agyârı dem-sâz eyleme
Son nefesde saklagıl şeytândan îmânımı

Var ise pîr-i mugân zann eylemişlerdür beni
Mey döküldi nev-cevânlar içmek ister kanımı

Şâh-ı 'aşkem ey Ziyâ'î şimdi hazz eyler gören
Sonra câhiller bozarlar korkarum dîvânımı

-470-

Mef'ûlü Fâ'ilâtün Mef'ûlü Fâ'ilâtün

Eflâke çıkdı âhum bir demde menzil aldı
Üftâde eşküm ammâ bir yirde yolda kaldı

Ol kim serîr-i hüsnün şâh-ı sitem-geridür
Peyk-i dili ezelde şeh-ı belâya saldı

Gün yüzlü mâhum ile ben sohbet itdügümde
Zühre bakup irakdan göklerde çeng çaldı

Şeh-bâz-ı 'aşk irişdi mürğ-ı huzûrum uçdı
Şîr-ı belâ yetişdi âhû-yı zevküm aldı

Şi'r-i Ziyâ'î tan mı olursa dürr-i manzûm
Gavvâs olup ezelden deryâ-yı 'aşka taldı

-471-

Fâ'îlâtün Fâ'îlâtün Fâ'îlâtün Fâ'îlün

Dostlar dimem ki halka âşikâr eylen beni
'Âşık-ı bî-çâreyem ma'lûm-ı yâr eylen beni

Âb-ı rûyum saklayup kan aglar isem dem-be-dem
Eşk-i çeşmüm gibi gark-ı cûy-bâr eylen beni

Vazgeçersem sevmeden ol taş bagırlu kâfiri
Ey müselmânlar anun çün seng-sâr eylen beni

Bu yakınlarda vefât eylerse ger pîr-i mugân
Lâyıkem anun yirine ihtiyâr eylen beni

Nerde mâ'ildür güzeller ey Ziyâ'î söyle kim
Yirlere çalun meded tek bunda zâr eylen beni

-472-

Fe'îlâtün Fe'îlâtün Fe'îlâtün Fe'îlün

Nâr-ı gam şöyle yakar bu ten-i vîrânemüzi
Rahm ider bizi görince göyünür şem'ün özi

Bezm-i gamda inen incinme begüm inler isen
Neyi dinlerdi kişi dinlemese nâlemüzi

Yakmasun âhum odı gökde 'arûs-ı 'aşkı
Eşk gark eylesün taht-ı serâda o gözi

Eşk mey nâlelerüm bezm-i gama sâz yeter
Mest-i câm-ı ezelem Zühre götürsün kopuzı

Kanmadı kanına ben teşne dilün hây meded
Dem-be-dem kanum ier hıřm ile mest-âne gözi

Yüz kulum var dir idi sencileyin evvelde
řimdi hatt geldi yüzine hele kalmadı yüzi

Kafes-i gamda Ziyâ'î seni tûtî-mânend
Yâr gûyâ mı iderdi řekker olmasa sözi

-473-

Mefâ'îlün Mefâ'îlün Mefâ'îlün Mefâ'îlün

Boyı řimşâd u serv ü nâr u nemi yohsa 'ar'ar mı
Gözi cellâd u mest ü cân-figeni yohsa 'abher mi

Be hey kardeş terâzû-yı ta'akkul birle vezn itdüm
Güzellikde benüm sultânuma Yûsuf berâber mi

'Aceb Ashâb-ı Kehf andukları ehl-i tevârhün
Zenahdânunda hâb -ı râhata varan gönüller mi

Haber vir ey sabâ şâd it beni Allâh için güldür
Dimez mi ol güler yüzlü garîbüm dahı aglar mı

Alup gitdi metâ' -ı sabr u fikr ü 'akl u idrâki
Ziyâ'î bilmem ol cevvar cânum almak ister mi

-474-

Fe'îlâtün Fe'îlâtün Fe'îlâtün Fe'îlün

Neye boyandı saçun kim kara magbûn oldu
Kime ter düşdi lebün böyle diger-gûn oldu

Zülf-i Leylâ eserin sünbül-i sahrâda görün
Kays 'azm itdi beyâbânlar Mecnûn oldu

Kaldı alakda rakîb itmedi a'lâya su'ûd
ok zamân geçmedi bu iş geçeli dün oldu

Ey gazâlum seni yanumda görenler dirler
Tutdı Mecnûnla enîs ol gözi âhû n'oldı

Zahm-ı tîgün elif yanına zahm-ı tîrün
Nokta řeklinde düşüp gam bir iken on oldu

Sîm-i eşküm gibi âhir yire girer turalum
Bir kiři mâlik-i gencîne-i Kârun oldu

Bir yana haste Ziyâ'î teb-i hicrûnle zebûn
Ta'n-ı tâ'in sanemâ bir yana tâ'ûn oldu

-475-

Fe‘ilâtün Fe‘ilâtün Fe‘ilâtün Fe‘ilün

İreli ürd-i behişt irdi behişt âsârı
Cennet-i ‘adne cihân döndi akar enhârı

Ne revâdur gülesin sen anun agladugına
Bülbül zâr ide gül-zârda ey gül-zârî

Lebüne benzer idi ey gül gül-zâr-ı cinân
Gonçenün olsa eger böyle güzel güftârı

Kaldı büstân-ı tahayyürde ta‘accüb iderek
Togrusu serv-i sehî gördi çün ol reftârı

Ey Ziyâ’î lebidür gonca-i bâg-ı firdevs
Bâg-ı ‘adnün gül-i bî-hârı anun ruhsârı

-476-

Mefâ‘ilün Mefâ‘ilün Mefâ‘ilün Mefâ‘ilün

Hırâmân ol kad-i bâlâ irişdi rif‘atün geldi
Uyan ey baht-ı hâb-âlûdum uşta devletün geldi

Melâmet ‘askerine kendüni aldurma sabr eyle
Tabîb-i cân irişdi haste cânım sıhhatün geldi

Perîşân olmasun gönlün gel e bâd-ı melâletden
Açıl ey gonca-i cân kim riyâh-ı râhatun geldi

Niçe bir cür‘a-veş ayakda kalmak pây-mâl olmak
Şarâb-ı hoş-güvâr irişdi sâkî hürmetün geldi

Ziyâ’î câm-ı gül-fâm iç ki devr-i verd-i ra‘nâdur
Bahâr-ı behre-bahş ile evân-ı ‘işretün geldi

-477-

Fe‘ilâtün Fe‘ilâtün Fe‘ilâtün Fe‘ilün

Ruhların görmeyeli sûz-ı nihânum yog idi
Sözün işitmeyeli dilde figânum yog idi

Esb-i âsîbüne ey şâhum süvâr olmayalı
‘Arsa-i derd ü gamunda cevelânum yog idi

Dem-be-dem künc-i ‘ademde niçe kanlar yutdum
Sanmanuz ol kûşede gonca-dehânum yog idi

Rahm-ı mâderde iken rahmı yok âfet işidüp
Kanlar içdüm niçe dem çıkmaga cânım yog idi

Şevkine yanmalı ben o meh-i çâr-dehün
Ey Ziyâ'î bilürin nâm u nişânım yog idi

-478-

Mefâ'îlün Mefâ'îlün Mefâ'îlün Mefâ'îlün
Benem dârü'ş-şifâ-yı 'aşkınun bîmâr-ı gam-hârı
Bana kalsun Sipâhî-zâdenün var ise tîmârı

Melâmet tekyesinün ihtiyâr abdâlıyam ben de
Mahabbet cür'a-dân-ı sînedür eksilmez esrârı

Şeb-i vaslun bilür mi kadrini ey mâh-ı tâbânım
Firâk eyyâmının yıllarca olmayan dil-efkârı

Dehânundan bana bir bûse ihsân eyle lutf eyle
Gel ey 'âşıklarun dünyâ serâyında yogı varı

Senün şâhânedür esbâb-ı hüsnün tan mı dirlerse
Sana nisbet metâ'-ı Yûsuf-ı Ken'ân bâzârı

Libâs-ı 'aşk derd ehline pîrâhendür âteşden
Derûn-ı ehl-i derdün var kıyâs it niçedür nârı

Gam-ı hicrân-ı cânân ile bagrında ta başlar var
Ziyâ'îdür bugün derd ehlinün 'âlemde serdârı

-479-

Fâ'îlâtün Fâ'îlâtün Fâ'îlâtün Fâ'îlün

Cânuma kâr itdi gam cânânım incinmiş gibi
Kulına ol zulmi çok sultânım incinmiş gibi

Tâli'üm yokdur güneş yüzlülere meyl itmede
Yıldızım düşmüş meh-i tâbânım incinmiş gibi

Nîl-i eşküm korkarın dil Mısırını eyler harâb
Ey birâder Yûsuf-ı Ken'ânım incinmiş gibi

Çâre yok bu derd-i bî-pâyâna bilmem n'eyleyem
Bir belâdur âfet-i devrânım incinmiş gibi

Ey Ziyâ'î böyle bülbül gibi nâlân oldugum
Bu ki dirlen ol gül-i handânım incinmiş gibi

-480-

Mefâ'îlün Mefâ'îlün Mefâ'îlün Mefâ'îlün

Harîm-i kûyuna varmaga bir mahrem bulunmaz mı
Delîl olmaga cân-ı hasteye âdem bulunmaz mı

Totalum itmedük cânân ile 'âlemde bir 'âlem
'Adem iklimine vardukda bir 'âlem bulunmaz mı

Niçe demlerdür eşküm yirine kan akdı cismümden
Nigâra mâcerâmı diyecek bir dem bulunmaz mı

Şikâyet kılmaga derd-i derûnumdan ana bir bir
Belâ-yı 'aşka düşmiş bana bir hem-dem bulunmaz mı

Em eyle çâre kıl kim semm-i gam anı helâk eyler
Ziyâ'î hasteye la'lünde bir emsem bulunmaz mı

-481-

Fe'îlâtün Fe'îlâtün Fe'îlâtün Fe'îlün
Hakka lâyıık nem ola dest-i du'âdan gayrı
Dest-gîrüm kim ola lutf-ı Hudâdan gayrı

Hat-ı dil-ber geleli nesne yazılmadı benüm
'Amelüm defterine hatt-ı hatâdan gayrı

Râ-yı ebrûnı göreliden dil-i sûfiye bugün
Nesne gelmez bilürin râ-yı riyâdan gayrı

İreli râyiha-i zülf-i 'abîr-efşânun
Nesneye yok hevesüm iş bu hevâdan gayrı

Ey Ziyâ'î seveliden o kad-i bâlâyı
Togrısı göremedüm nesne belâdan gayrı

-482-

Mefâ'îlün Mefâ'îlün Mefâ'îlün Mefâ'îlün

Dirîgâ fânîdür mahbûb-ı dehrün hüsn ile ânı
Cihânda âferîn ol 'âşık kim bakmaya anı

Tamâm olur işi mir'ât-ı hüsne gırradur çün kim
Kusûrın bilmemiş eylen temâşâ mâh-ı tâbânı

Reh-i 'aşkıında Hallâk-ı cihânun subh-ı sâdıkdur
Anun çün mihri ile çâk ider her gün girîbânı

Kaşına meyl iden 'uşşâkun âyâ var mıdur 'aklı
Leb-i la'line cân viren muhibbün var mıdur cânı

Kazâ-yı dehrden yügrük olanlar geçdiler bir bir
Semend-i tab' ile şimdi Ziyâ'î tutdı meydânı

-483-

Mefâ'îlün Mefâ'îlün Fa'ûlün

Yine sevdi gönül bir bî-vefâyı
Kadine mâ'il oldı gör belâyı

Ögerken Sidreyi göge çıkarduk
İdüp nisbet o kadd-i müntehâyı

Kadi vasfında ol serv-i revânun
Görün niçe bülend itdüm edâyı

Murâd oldur çü vasl-ı dil-rübâdan
El üstinde tutalum merhabâyı

-484-

Fâ'ilâtün Fâ'ilâtün Fâ'ilâtün Fâ'ilün

Şâh-ı destûrunla silsen yaşum ey hüsn ahteri
Gerçi kim kamusunun muhtârı la'lün cevheri

Gül-şen-i hüsnünde zâr olsun hezârân 'andelîb
Şem'-i ruhsâruna yansun var ise cinnün peri

Bir kabâ-yı âsumânîdür bu çerh-i lâciverd
Keh-keşân ana miyân-gerdür Şüreyyâ ülkeri

Göz göre her rind-i mey-hâr ayagın almakdadur
Bilmezin n'eyler gelüp her meclise rez duhteri

Çıksa Yûsuf gibi bâzâra ol Yûsuf-cebîn
Gün yüzine ol mehün bir hayli oldı müşterî

'Âşık olan cennet-i kûyunda ey hûr-ı cemîl
La'l-i nâbun var iken 'aynına almaz kevseri

Ey Ziyâ'î sanki bir havz-ı müdevverdür felek
Ebr mevcidür meh ü hurşîd iki nîlüferi

-485-

Mef'ûlü Fâ'ilâtü Mefâ'ilü Fâ'ilün

Şevkini kimse bencileyin zâhir itmedi
Didüm o mâh-çehre didi zâhir itmedi

Gel âhir eyle cevvrünü ey bî-vefâ didüm
Ahir kılam didi n'ideyin âhir itmedi

İki iken rakîbün efendi bir it didüm
Redd itdi ikisin dahı iki bir itmedi

Tab‘um semendi ile suhan ‘âleminde ben
Seyr itdügüm diyârı begüm sâ‘ir itmedi

Ashâb-ı şevk içinde bu muhrik edâları
Evvel Ziyâ‘iyâ hele bir şâ‘ir itmedi

-486-

Fâ‘ilâtün Fâ‘ilâtün Fâ‘ilâtün Fâ‘ilün

Yanaram ‘aşkunla ben pervâne görmezsem seni
Yakıluram âteş-i süzâna görmezsem seni

Taga düşüp yâr olam vahşilere Mecnûn-sıfat
Hasretünle olurum dîvâne görmezsem seni

Mest-i ‘aşk olup dem-â-dem derd ile kanlar yutam
Ger bu dem ey gözleri mest-âne görmezsem seni

Gül-şen-i kûyundan ayru hâr-ı hicrâna düşüp
Başlayam bülbül gibi efgâna görmezsem seni

Şol Ziyâ‘î gibi şevk-i şem‘-i ruhsârunla ben
Atıluram âteş-i hicrâna görmezsem seni

-487-

Mef‘ûlü Mefâ‘ilü Mefâ‘ilü Fa‘ûlün

Ümmîd-i lebünle şu ki sahbâ-yı ter aldı
Hayr idemedi kendüzine derd-i ser aldı

Kasdi var imiş kabrümüze gelmege yârun
Bâd-ı seher ayagı tozından haber aldı

Yaşum gibi kûyına akup seyl o perînün
Pâyına yüzün süremedi çok keder aldı

Evsâf-ı nebât-ı hat-ı la‘lün çü mükerrer
Bu tûtî-i dil agzına gûyâ şeker aldı

Vasf-ı lebüni kim ki Ziyâ‘îden işitdi
Şâd olsa n’ola câna deger bir güher aldı

-488-

Fe‘ilâtün Fe‘ilâtün Fe‘ilâtün Fe‘ilün

Evvel ol şûh-ı cihân eşkümi seyl-âb itdi
Sonra bu çeşm-i sitem-dîdemi gark-âb itdi

Rahm iderdi bize cânân ezel ammâ şimdi
Selb-i rahm eyledi bilmem ne ki îcâb itdi

Çün cefâ-kâr degül dirsüz ol ebrûsı kemân
Yâ niçün tîr-i cefâsın bize pertâb itdi

Kûyun ümmîdi beni sâkin-i mescîd kıldı
Kaşların fikri beni mâ'il-i mihrâb itdi

Şevke geldi sanemâ midhat-i dendânunda
Nazm-ı pâkini Ziyâ'î dür-i nâ-yâb itdi

-489-

Mefâ'îlün Mefâ'îlün Fa'ûlün

Bugün ol mâhumun mihr-i cemâli
Komaz cânumda bir zerre mecâli

Firâk-ı yâra sabr itmez mi 'âşık
Husûsâ var iken vasl ihtimâli

Be-gâyet dil-güşâ vü cân-fezâdur
Gül eyyâmı hevânun i'tidâli

Nigârâ boynuma bend eyle zülfün
Benüm boynuma var ise vebâli

Ziyâ'îden ma'ârif öğren ey yâr
Huz ü'l-'ilme min efvâhi'r-ricâli

-490-

Fe'îlâtün Mefâ'îlün Fe'îlün

Râ-yı ebrûnı âlemün mâhı
Dir gören el hilâl va'llâhi

Rast gelse Hicâz-ı kûyunda
Sana 'uşşâk-ı bî-nevâ gâhî

Senün asla kulagina girmez
Çıksa 'ayyûka 'âşıkun âhı

Mülk-i Ken'ândur senün hüsnün
Zenahun anda Yûsufun çâhı

Kullarun çok Ziyâ'î de biridür
Ey melâhat serîrinün şâhı

-491-

Mef'ûlü Fâ'ilâtü Mefâ'ilü Fâ'ilün

İtsem ziyâfet ol şeh-i 'âlî-cenâbumı
Pergâle-i cigerden iderdüm kebâbumı

Mahmûrlukdan aglamazın derd-i ser bu kim
Bir katre kalmadı gice dökdi şarâbumı

Benzetdi nâr içinde düşen mûya hâlümü
Fıkr-i miyânun ile gören ıztırâbumı

Hâk-i mezâr-veş gönül alçaklugın kılup
İtsün du'â ziyâret idenler mezârımı

Rûşen bu kim sitârem açıldı Ziyâ'iyâ
Gördüm seherde karşıdan ol âfitâbumı

-492-

Fâ'ilâtün Fâ'ilâtün Fâ'ilâtün Fâ'ilün

Turmadun peymâna içdün gayr ile peymâneyi
Bilmedün yolsuzluk itdün hürmet-i mey-hâneyi

Gayr ile ey şem'-i bezm-ârâ görürdük itdügün
Bezm-i gamda nâr-ı gayretdür yakan pervâneyi

Uyku almış mest iken yârân koyup gitmiş beni
Gösterün Allâh için bilmem reh-i mey-hâneyi

'Aklum aldı bir perî vâ'iz kerem kıl söyleme
Dinlemez dîvâne olan degme bir efsâneyi

Vâ'iz olmuşdur Ziyâ'î müjde ey pîr-i mugân
Âşikâr itmek gerekdür gül gibi peymâneyi

-493-

Mefâ'ilün Mefâ'ilün Mefâ'ilün Mefâ'ilün

Dil-i âşüfteyi mehcûr kıldı yine ol hûrî
Yine cândan usandurdı o meh cevri ile mehcûrî

Ezel bezminde câm-ı 'aşk ile mest eyledün cânı
Ferâmûş itme câm-ı vaslunı şimdi o mahmûrî

Visâlün mevsiminde zülf ü hattun görelüm zîrâ
Bahâr irse zuhûr eyler cihânun mâr ile mûrî

'Aceb mi destüni yâd eyleyüp kör olsam aglarken
El için ağlayan gözsüz kalur dirler gözüm nûrî

Ziyâ'î gice vasf-ı gerdeninde yazdum
Yanup yakıldı karşımda bir iki şem'-i kâfûrî

-494-

Mefâ'îlün Mefâ'îlün Mefâ'îlün Mefâ'îlün

Yüzün gördüm kasâvet bu dil-i dîvânedan gitdi
Ne tan gitse kasâvet bilmezsin 'aklum neden gitdi

Bahâr irdi yine âvârelik vakti zuhûr itdi
Bihamdi'llâh şitânun şiddeti gül-zârdan gitdi

Didüm dil kaçdı cevründen senün ey bî-vefâ dil-ber
Tebessüm kıldı ol meh nâz ile didi kaçan gitdi

Bana zulm oldu dil gitdi didüm bir bûse vir bârî
Didi ol cânımın cânı olan oldu giden gitdi

İkâmet menzili sanma Ziyâ'î dâr-ı dünyâyı
Serây-ı kârvândur bu konan göçdi gelen gitdi

-495-

Mef'ûlü Mefâ'îlü Mefâ'îlü Fa'ûlün

Zemm eyleme gül-şende esen bâd-ı sabâyı
Men' itme mahallende görüp âh-ı gedâyı

Bî-dillere lutf eyle cefâ itme esirge
Câ'iz degül incitmek efendi fukarâyı

Ey rûh-ı mahabbet umarın vaslunı bir gün
Rü'yâda niçe görmüş idüm Şeyh Vefâyı

Ben mâ'il idüm çehren ile zülfüne cânâ
Fark itmez iken dahı gözüm ag u karayı

Der-gâhuna kimdür dir isen hâlin iden 'arz
Dârende-i fermân-ı hümâyûn Ziyâ'î

-496-

Fe'îlâtün Fe'îlâtün Fe'îlâtün Fe'îlün

Bâg-ı hüsnünde senün ey boyı şimşâd-ı sehî
Tan mı sîb-i zenahun meyveleri olsa bihî

Salınur mıydı benüm cânuma bin dürlü belâ
Togrılıkla seni ger sevmesem ey serv-i sehî

Kirpigünle kaşuna yokdur efendi mânend
Ne güzel tîr ü kemândur bu zihî sun' zihî

Bilmezin niçe tolar şevkün ile hâne-i dil
Hum-ı hum-hâne tehî câm-ı safâ-bahş tehî

Âhir olunca şehâ 'ömri Ziyâ'î kulunun
Bî-nihâyet gamunı çeksün ilâ âhirihî

TARİHLER

-1-

Târîh-i Cîsr-i Mostâr
Mef'ûlü Mefâ'îlün Mef'ûlü Mefâ'îlün
Kavs-i kuzahun 'aynı bir köpri binâ itdi
Var mı bu cihân içre mânendi hey Allâhum
'İbretle bakup didi târîhini bir 'ârif
İl geçdüğü köpriden biz de geçerüz şâhum
(974)

-2-

Târîh-i Vefât-ı Keyvân Beg
Mefâ'îlün Mefâ'îlün Fa'ûlün
Emîn-i memleket merhûm Keyvân
Cinân içinde gitdi tutmaga cây
Didi çün gördi 'ömri âhir olmuş
Dürüldi defter-i 'ömrüm meded hây
Didi hâtif anun mevtine târîh
Ecel çaldı elinden defterin vây
(977)

-3-

Târîh-i Vefât-ı Peder
Fe'ilâtün Fe'ilâtün Fe'ilâtün Fe'ilün
Pederüm terk-i cihân itdi Ziyâ'î dilerin
'Afv olup ma'siyeti cennet ü rahmet bulsun
Ey Ziyâ'î beni hasretde kodı dünyâda
Pederüm terk-i cihân eyledi târîh olsun
(980)

-4-

Târîh-i Cülûs-ı Pâdişâh-ı 'Âlem-penâh
Mefâ'îlün Mefâ'îlün Fa'ûlün
Murâd üzre Murâd ibn-i Selîm Hân
Cihân mülkinde buldı 'izz ü câhı
Devâm-ı devletini ber-mezîd it
Serîr-i saltanatda yâ İlâhî
Cülûs-ı tahtına bir mîr-i meclis
Didi târîh heft iklîm şâhı
(982)

-5-

Târîh-i Vefât-ı Merhûm Müftî Hâce Çelebi
Fâ'ilâtün Fâ'ilâtün Fâ'ilün
Semi'nâ mâte müftî'z-zamân

Feerzâhu fetevvebehu tamâm

(982)

-6-

Târîh-i Vefât-ı Emrî Çelebi

Fe'îlâtün Fe'îlâtün Fe'îlâtün Fe'îlün

Kodı Emrî suhan iklîmini ol dem hâtif

Didi târîhin anun kanı emîr-i şu'arâ

(983)

-7-

Târîh-i Vefât-ı Emrî Çelebi

Mefâ'îlün Mefâ'îlün Fa'ûlün

İrişdi emri Allâhun müverrih

Didi târîh kanı şâ'ir Emrî

(983)

-8-

Mostâra Gelen Nâzır suyına Târîhdür

Mef'ûlü Fâ'îlâtün Mef'ûlü Fâ'îlâtün

Bu âb kevser-âsâ şehri müşerref itdi

'Ukbâda sâhibinün firdevs ola mekânı

Şehrün yüzi suyudur hem 'aynı Selsebîlün

Yazdılar ana târîh âb-ı hayât-ı sâni

(983)

-9-

Mustafâ Begün Plevnede Binâ Eyledügi Câmi'-i Şerîfün Târîhidür

Fâ'îlâtün Fâ'îlâtün Fâ'îlâtün Fâ'îlün

Mustafâ Beg bir güzel hayr işledi Allâh için

Yapdı bir câmi ki mislin görmemişdür dehr-i dîn

Bî-kusûr oldı kusûr-ı cennet-âsâ her yeri

Kubbesi tâk-ı sipihr-âsâ düşüpdür nîl-gûn

Câmi'ün bünyâdı bir yılda tamâm oldı kamu

Şâd olup mü'minler oldı gebr ü tersâ ser-nigûn

Hep tamâm oldukda âvâz-ı bülend ile hatîb

İndi minberden didi târîhini yüzekkirûn

(984)

-10-

Târîh-i Vefât-ı Behlûl Beg

Fâ'îlâtün Fâ'îlâtün Fâ'îlâtün Fâ'îlün

Ravza-i firdevse 'azm itdi yine Behlûl Beg

Nefret itdi hâsılı bu mülk ü bu mahûlden

'Âkılâne didi bir mecnûn anun târîhini

Ey dil-i dîvâne gâhî 'ibret al Behlûlden

(987)

-11-

Târîh-i Vefât-ı Şemsî Pâşâ

Fe'îlâtün Fe'îlâtün Fe'îlâtün Fe'îlün

Felegün hâlini hiss eyledi Şemsî Pâşâ

Kodı zevk ü basar u sem'î ü şemm ü lemsi

Şems-i 'ömrine zevâl irdi Ziyâ'î ol ân

Didi târîh yine gitdi cihânun şemsi

(988)

-12-

Târîh-i Vefât-ı Merhûm Sinân Beg
Mef'ûlü Fâ'ilâtü Mefâ'ilü Fâ'ilün
Virdi Hudâ-yı mâlike cân-ı 'azîzini
Ken'ân-ı 'adn Yûsufî Mısr-ı cinân begi
Hâtif du'â idüp didi târîh-i mevtini
Firdevs-i 'adne gönder İlâhî sen uc begi
(989)

-13-

Bosna'da Mehmed Beg Tîmâr Defterdârı Olduğına Târîhdür
Fe'ilâtün Mefâ'ilün Fe'ilün
Çün Mehmed Beg oldı defter-dâr
Güni 'îd ü gamı ba'îd olsun
Didi dâ'î Ziyâ'î târîhin
'Ömri vü devleti mezîd olsun
(990)

-14-

Târîh-i Va'ziyye
Mef'ûlü Mefâ'ilün Mef'ûlü Mefâ'ilün
İtdükde Ziyâ'îyi takdîr-i Hudâ vâ'iz
Hâtif işidüp didi târîhini va'ziyye
(991)

MU'AMMALAR

-1-

Be-nâm-ı Memî
Mefâ'ilün Mefâ'ilün Fa'ülün
Kanı kimdür yolında virmeyen cân
Dehânına şarâb aldıkda cânân

-2-

Be-nâm-ı Kubâd
Fe'ilâtün Mefâ'ilün Fe'ilün
Niçe hâlet zuhûr ide rûşen
Kad-i dil-berde ikiden birden

-3-

Be-nâm-ı Şânî
Mefâ'ilün Mefâ'ilün Fa'ülün
Benüm bir nâleme olmaz mu'âdil
Ger olursa figânı üçyüz ey dil

-4-

Be-nâm-ı Şeylî
Fâ'ilâtün Fâ'ilâtün Fâ'ilâtün Fâ'ilün
Seyr idüp bâg u bahârı tan mı hayrân olsa dil
Kudretin Bârî Ta'âlânun görür her şeyde bil

-5-

Be-nâm-ı 'Îzârî
Fe'ilâtün Mefâ'ilün Fe'ilün
Çekmişem çok cefâ-yı dil-dârı
Çekmeseydüm 'azabda bârî

-6-

Be-nâm-ı 'Alî

Mefâ'îlün Mefâ'îlün Fa'ûlün
Ruhun kim ana 'âlem müşterîdür
Hûr u mâh-ı tamâm u Müşterîdür

-7-

Be-nâm-ı Resm

Mefâ'îlün Mefâ'îlün Mefâ'îlün Mefâ'îlün
Çü 'akl-ı mû-şikâf anda kalur hayrân-ı dem-beste
Kalup n'eyler hayâl-i zülf-i yârumda dil-i haste

-8-

Be-nâm-ı Hüsâm

Fe'ilâtün Fe'ilâtün Fe'ilün
Beni aglatdı hayâl-i müjgân
Göze çöp düşse olur yaşı revân

-9-

Be-nâm-ı Sadr u Sun'

Fâ'ilâtün Fâ'ilâtün Fâ'ilün
Yâd idüp ebrunı mâh-ı nev müdâm
Kapun öninde gelüp virür selâm

-10-

Be-nâm-ı 'Alî

Mefâ'îlün Mefâ'îlün Mefâ'îlün Mefâ'îlün
Gice âhum od urdı câme-i çerhe degül encüm
Gören anı felekde her taraftan deh düşer şâhum

-11-

Be-nâm-ı Şems

Fâ'ilâtün Fâ'ilâtün Fâ'ilâtün Fâ'ilün
Keşf ola dersen eger kim sana nâm-ı nâzenîn
Evvelâ ol niyyet için yılda çek bir erba'în

KIT'ALAR

-1-

Mefâ'îlün Mefâ'îlün Fa'ûlün
Dimen nev-restedür ol serv-i bâlâ
Kıyâmet koparur eylen temâşâ
Yürür mahcûb egerçi gonca-âsâ
Açılır giderek ol verd-i ra'nâ

-2-

Mefâ'îlün Mefâ'îlün Mefâ'îlün Mefâ'îlün
Yüzi suyu serâyun zann iderler bend başıdur
Mahallende gözi baglu garîbün gözi yaşıdur
Külüngüm tîşe-i âhumdur ey şîrin-dehen şimdi
Bana Ferhâddan kalmış teberün tag başıdur

-3-

Fâ'ilâtün Fâ'ilâtün Fâ'ilâtün Fâ'ilün
Sevdüğüm ol âfeti hep halk-ı 'âlem bildiler
Hep elem çekdüklerüm Allâhu â'lem bildiler
Duydılar ol la'l-i rengîne benüm dil virdüğüm
Kandan akar eşkümün hûnı dem-â-dem bildiler

-4-

Fe'îlâtün Fe'îlâtün Fe'îlâtün Fe'îlün
Keskin olmasa kılıç âdeme sözün yegdür
Mihnet-i dostdan ise şefkat-i düşmen yegdür
Fi'l-hakîka eri olmasa sözünün âdem
Râh-ı insâfda andan zen-i reh-zen yegdür

-5-

Mef'ûlü Fâ'îlâtü Mefâ'îlü Fâ'îlün
Bir pîşe öğren olma tehî akça pul kazan
Tâ pişe matbahunda pilavun kazan kazan
Görmez misin bir akça alur sâ'il-i mezâr
Yigirmisin otuzın alur makbere kazan

-6-

Fâ'îlâtün Fâ'îlâtün Fâ'îlâtün Fâ'îlün
Bâg-ı behište 'izârun bir kızıl güldür hemân
Nâle eyler bu dil-i şûrîde bülbüldür hemân
Penbe-i dâgum ki rengîn oldı kandan câ-be-câ
Bâg-ı dilde saçma bir katmer karanfildür hemân

-7-

Mef'ûlü Mefâ'îlü Mefâ'îlü Fa'ûlün
Çün nazm-ı bedî'ümde beyân ola ma'ânî
İzhâr ider iklîm-i suhanda leme'ânı
Eş'âr-ı Ziyâ'ide 'aceb câzibe vardur
Lutf eyle begüm gayra kıyâs eyleme anı

-8-

Fâ'îlâtün Fâ'îlâtün Fâ'îlün
Sihr kâr itmez efendi saçuna
Ejder olur çü 'asâ-yı Mûsâ
N'ola sihr eylese fir'avn rakîb
La tehâf inneke ente'l-a'lâ

-9-

Fâ'îlâtün Fâ'îlâtün Fâ'îlün
Lâle-âsâ rızkını taşdan çıkar
Sînen üzre kalmasun dâg-ı belâ
Hânına ihvânun olma kâse-lîs
Leyse li'l-insâni illâ mâ se'â

-10-

Müstef'îlâtün Müstef'îlâtün
Lutf eyle dinle pend-i latîfi
Lutf eyle dâ'im her şahsa cânâ
Ol şahs olursa dilden muhibbün
Artar muhibbün lutfunla zîrâ
Ger ittifâkî olursa düşmen
Ol itdügün lutf olur müdârâ

-11-

Fâ'îlâtün Fâ'îlâtün Fâ'îlâtün Fâ'îlün
Ey karanu gicelerde seyr-i kûh-istân iden
Sanma bî-hûde çürük ağaçda görürsen ziyâ
Şevk-i yâr ile Ziyâ'î idicek teslîm-i rûh
Yongası tabutınun taga dökülmiş câ-be-câ

-12-

Fa'ûlün Fa'ûlün Fa'ûlün Fa'ûl
Didüm geçdi gamzen okı cânuma
Didi anma anı mezâ mâ mezâ
Didüm agladursın beni dem-be-dem
Didi kim anılmaz geçen mâcerâ

-13-

Mefâ'îlün Fe'îlâtün Mefâ'îlün Fe'îlün
Ocaga yansun odun gelmez oldu bâzâra
Odun gelen odunundan olur olınsa ricâ
Bir iki yarma odun bulmaga mecâlüm yok
Görün ne yarmalar urdı felek bu yirde bana

-14-

Fe'îlâtün Mefâ'îlün Fe'îlün
Yâra düşdükce âşinâ düşerin
Hergiz ammâ rakîbe düşmen dost
Dostlar başdan anı fikr eylen
Dost düşmen olur mı düşmen dost

-15-

Fâ'îlâtün Fâ'îlâtün Fâ'îlâtün Fâ'îlün
Bana bir mansıb nasîb olmadı çekdüm çok nasîb
Bî-cihet kaldum harâb oldu dirîgâ şeş-cihât
Âhir ölüp dirilüp bir dirlik ıssı olmadum
Bilmezin yohsa bu halk içmiş midür âb-ı hayât

-16-

Mefâ'îlün Mefâ'îlün Mefâ'îlün Mefâ'îlün
Niçe yıldur ki tahsîl-i kemâl ü ma'rifet kıldum
Umardum merdüm-i kâmil diyü halk eyleye ragbet
Belâ bu kim kemâlüm gördi her biri hasûd oldu
İhânet kıldılar gitdi olanca hürmet ü 'izzet

-17-

Fâ'îlâtün Fâ'îlâtün Fâ'îlâtün Fâ'îlün
Başun için koma ayakda elüm tut serverâ
Rûzgâr itdi beni kış günlerinde teng-dest
Tan degül dökse yüzüm suyun yire fakr u fenâ
Oldı gönlüm şîşesi seng-i havâdisden şikest
Kahr u mihnet hasretâ derd ü gam olmışdur nasîb
Defter-i nahnü kasemnâda bana rûz-ı elest

-18-

Fâ'îlâtün Fâ'îlâtün Fâ'îlün
Âhiret hakkıyçün ey hûr-ı cinân
Kûyunı seyr eylemek dünyâ deger
Kıymet-i eyyâm-ı vaslı bilmeyen

Bir iki gün eylesün 'azm-i sefer

-19-

Fe'îlâtün Mefâ'ilün Fe'ilün
Ne 'aceb hâli var bu gül-zârün
Hârlar pençesindedür güller
Derd-i dilden hezâr zâr itse
Bülbül-i zâra öte dur dirler

-20-

Fe'îlâtün Mefâ'ilün Fe'ilün
Dil uzatsa 'aceb mi sÛsen-vâr
Tab'-ı rûşen-nihâda münkirler
Tâb-ı hûrşîd-i 'âleme ne ziyân
Ana inkâr iderse şeb-pere ger
Ger müzemmem dir ise müşrikler
Zât-ı pâk-i Muhammede ne zarar

-21-

Mefâ'ilün Mefâ'ilün Mefâ'ilün Mefâ'ilün
Rakîb-i zâg ak atlasla siyeh ferâce geydükçe
Görenler dir ki şer ormanınun bu sagsaganıdır
Yanına ol humânun varsa reng-â-reng câmeyle
Sanurlar büstân-ı hÛsninün ağaçkakanıdır

-22-

Mef'ûlü Fâ'ilâtü Mefâ'ilü Fâ'ilün
İblîs ü nefsi şirretini eylesün ba'îd
Der-gâh-ı Hakka şâm u seherde du'â budur
Nefsümle her ne itsem iderdüm Ziyâ'iyâ
İblîse n'eyleyem ki görünmez belâ budur

-23-

Fe'îlâtün Mefâ'ilün Fe'ilün
Câm-ı 'aşkunla oldı mest-âne
Ol müdâmı gönül hemîşe çeker
Derdi âyâ nedür Ziyâ'nün
Ki ayakdan müdâm şîşe çeker

-24-

Fe'îlâtün Fe'îlâtün Fe'ilün
Nagme-i bülbül-i bâg-ı kÛyun
Kelimâtun gibi rûh-efzâdur
Fi'l-mesel âb u hevâ-yı kÛyun
Âb-ı Hızr u nefes-i 'Îsâdur

-25-

Fe'îlâtün Mefâ'ilün Fe'ilün
Tâlib-i vaslun iktizâsı müdâm
Yel gibi kÛyun içre yelmekdür
Togrısı bezm-i vasl olurdu velî
Sohbet ol serve rast gelmekdür

-26-

Fe'îlâtün Fe'îlâtün Fe'îlâtün Fe'ilün
BÛse-i la'l-i leb-i yâra elÛm irmiş iken
Bir taraftan çıkageldi n'ideyüm 'âşıklar
BÛselik hoşça makâm idi ve lîkin 'uşşâk

Gâhice rast gelür sonra hüseyñiye çıkar

-27-

Mefâ'îlün Mefâ'îlün Mefâ'îlün Mefâ'îlün
Nazîri yok bahâr eyyâminun ancak budur 'Îsâ
Temâşâ eyleyen terk-i temâşâ-yı cinân eyler
Yürî vâ'iz degül mümkün işitmek cennet evsâfın
Sular çağlar nesîm-i subh eser bülbül figân eyler

-28-

Fe'îlâtün Fe'îlâtün Fe'îlâtün Fe'îlün
Niçe nâ-puhte ile sohbet-i hâs eyledügin
Bilürüz künhi ile biz de 'abes kaynamazuz
Eylemiş bir kaç ocak erleri küllî zevkün
Duymuşuz kıssayı hep biz de kömür çiyneüz

-29-

Fâ'îlâtün Fâ'îlâtün Fâ'îlün
Ey Ziyâ'î mâlik-i mâl olmaduk
Âlemün gâyet fakîrû'l-hâliyüz
Hırsumuzdan her metâ'ı medh ider
Çarsû-yı 'unsurun dellâhyuz

-30-

Fe'îlâtün Mefâ'îlün Fe'îlün
Gam-ı gamzenle muztarib düşdi
Dil-i bîmâra gelmez âsâyış
Gönlüm ararsın ey cihân-ârâ
Bilmem ammâ nedür bu ârâyış

-31-

Mefâ'îlün Mefâ'îlün Fa'ûlün
Bu cânsız cisme ey rûh-ı musavver
Tesellî nutkın it ihyâya mahsûs
Degüldür mürde ihyâ eylemek çün
Mücerred Hazret-i 'Îsâya mahsûs

-32-

Fe'îlâtün Mefâ'îlün Fe'îlün
Ey Ziyâ'î bu şehh halkında
Bana hîç şefkat u 'inâyet yok
Belki bunlar ya ma'rifetsizdür
Bende yâ zerre kâbiliyyet yok

-33-

Fe'îlâtün Mefâ'îlün Fe'îlün
Diler isen ki el vire dünyâ
Ya müzevvir ya bârî mashara ol
Fi'l-mesel kahbedür zen-i dünyâ
Kuçılur mudhik ü müzevvire ol

-34-

Fe'îlâtün Mefâ'îlün Fe'îlün
Kıl 'atâ ol devât-ı ma'hûdı
Keremünden eyâ emîr-i kerem
Kâtib-i defter sıfâtun iken
Ne revâdur ki bî-devât kalam

-35-

Fe‘ilâtün Mefâ‘ilün Fe‘ilün
Ka‘be hakkı cefâ-yı ‘uşşâka
Âzer eyle Halîlüm İbrâhîm
Nâr-ı Nemrûddur firâkun odı
Hây nûr-ı Celîlüm İbrâhîm
-36-

Fâ‘ilâtün Fâ‘ilâtün Fâ‘ilün
Sırr-ı ‘aşkı ey dil izhâr eyleme
Eyleme ol âteşe âhun duhân
Her kişiyi vâkîf itme sırruna
Râhatü’l-insân fî samtü’l-lisân
Küllî sırrın câveze’l isneyni şa‘
İmdi ey dil sırrını eyle nihân
-37-

Fe‘ilâtün Fe‘ilâtün Fe‘ilün
Didiler bir gice Mecnûna gelüp
Seni Leylâdan ayırdı gerdûn
Âh idüp Hakka tevekkül kıldı
Didi e’l-leyletû hublâ Mecnûn
-38-

Fâ‘ilâtün Fâ‘ilâtün Fâ‘ilâtün Fâ‘ilün
Ey Ziyâ‘î görmedi ben gördüğüm mihnetleri
Ser-be-ser dünyâ serâyın geşt ü seyrân eyleyen
Birkaç ahmak câhile şimdi imâm itdi beni
Şeyh-i San‘âmı ezel hınzıra çübân eyleyen
-39-

Fâ‘ilâtün Fâ‘ilâtün Fâ‘ilâtün Fâ‘ilün
Hasret-i bezm-i visâlünle gözüm kan aglasun
Dem-be-dem pür hûn olup peymâne şeklin baglasun
Kâkülün zencîrine men‘ itme baglansun gönül
Ey perî günden güne dîvâne şeklin baglasun
-40-

Fe‘ilâtün Fe‘ilâtün Fe‘ilâtün Fe‘ilün
Subh-dem hasret-i vasl ile nesîm-i âhum
Korkarın yıka hisâr-ı felegün güngüresin
Rûz-ı vaslın anıcak ol günü görmemi didüm
Nâz idüp ol meh ayıtdı o kadar gün göresin
-41-

Fe‘ilâtün Fe‘ilâtün Fe‘ilâtün Fe‘ilün
Yârun alnında yine yara yiri var gördüm
Hârdan zahm irişmiş gibi gül-berg-i tere
Didüm âyâ nedür alnunda bu yara didi yâr
Cây-ı engüşt-i nebîdür ki tokınmış kamere
-42-

Fe‘ilâtün Fe‘ilâtün Fe‘ilâtün Fe‘ilün
Mektebi ‘akıl olan ana görür mi ma‘kûl
Kayd-ı ta‘lîme ne lâyıık düşe bir dîvâne
N’idüğün bilmez iken sarfdan asla maksûd
Fi‘l-i yef‘al ta‘lîmin ider sıbyâna
-43-

Fe‘ilâtün Mefâ‘ilün Fe‘ilün
Sürh pîrâhen ile sebz kabâ
Gonçe-mânend geydi cânâne
Cism-i pâki terakkî bulmuşdur
Gonçe-veş sıgmaz oldu kaftâna
-44-

Mefâ‘ilün Mefâ‘ilün Fa‘ülün
Mu‘allimlikde buldum Sa‘dî irdüm
Gül-istân-ı visâl-i dil-rübâya
O gül yüzlü güzel ben bülbülinden
Gül-istân başladı minnet Hudâya
-45-

Fe‘ilâtün Fe‘ilâtün Fe‘ilâtün Fe‘ilün
Cân belâda ten elemde gönül âh eylemede
Mübtelâ-yı derd garîbe ser-i bî-devlet ise
Zahmete girme cefâ eyleme didüm didi yâr
Sen de sabr eyle cefâma ne kadar zahmet ise
-46-

Fe‘ilâtün Mefâ‘ilün Fe‘ilün
Ey Ziyâ‘î şu‘arâ içre bizüm
Dilümüz yok yakışur güftâra
Seng-dil câhile pend olmagiçün
Sözümüz yok yazacak dîvâra
-47-

Mefâ‘ilün Mefâ‘ilün Mefâ‘ilün Mefâ‘ilün
Ziyâ‘î hirmen-i hirmâna düşmiş kâha dönmişdür
Vusûli yok muhassal çokdur mahsûl-i maksûda
Bu dem derd ile merdümlük midür aglayu göndermek
Revâ mı çekdüğüm zahmetler olmak cümle bî-hûde
Ne lâyük halk-ı ‘âlem benzede devletlü sultânım
Beni Firdevsîye sultânımı Sultân Mahmûda
-48-

Mefâ‘ilün Mefâ‘ilün Fa‘ülün
Kemâl ü ‘ilm ü ‘irfân ehline hîç
Nasîhat olmaya bundan ziyâde
Sakın nâ-cins ü bed-asl u denîden
Husûsâ kim ola Debbâg-zâde
Derisin darb idüp kılsun dibâgat
Gurûrundan girü başlar ‘inâda
-49-

Fe‘ilâtün Fe‘ilâtün Fe‘ilâtün Fe‘ilün
‘Acebâ kâkülünü çevre kim itdi tâhrîk
Didüm âhun yine bâdîdür o tahrîke didi
Bir vefânı görelüm sana mahabbet ideli
Didüm ol mâh-veşe hubbuke yu‘mîke didi

-50-

Fe‘ilâtün Mefâ‘ilün Fe‘ilün
Bâg-ı hüsnünde meyveler çokdur
Seyr için bâga girsen olmaz mı

Ey gül-istân-ı behçetün servi
Bana şeftâlû virsen olmaz mı

-51-

Fâ'îlâtün Fâ'îlâtün Fâ'îlâtün Fâ'îlün
Benden evvel sihr iderdi sâhir-i fir'avn-vâr
Gerçi kim nazm ile inşâda zamânun şâ'iri
Hadd-i i'câza iletdüm ben de nazm-ı pâkümü
Mu'ciz-i Mûsâ mıdur gel gör ya sihr-i sâhiri

-52-

Fe'îlâtün Fe'îlâtün Fe'îlâtün Fe'îlün
Beni bir yirlere düşürdi felek hak bu ki ben
Yimezin gussa hakikatde beni gussa yidi
Dest-gîr ol ki hakikatde ben ol a'mâyem
Çağırur çâha düşüp yâ reculen huz bi-yedi

-53-

Fe'îlâtün Fe'îlâtün Fe'îlâtün Fe'îlün
Nâleden bendeni men'itme benüm sultânüm
Çünkü eglencesi yok âh u figândan gayrı
Hasretünle n'ola dökülse dem-â-dem yaşum
Nesi var yüze gelür 'âşıkun andan gayrı

-54-

Mef'ûlü Fâ'îlâtü Mefâ'îlü Fâ'îlün
Fecr ile zuhr u 'asr ile şâm u 'işâ kılur
Şark ehli Rûm u Mısr ile Şâm u Habeş dahı
Şeytân bize 'adâvet iderse namâz için
Ragmına kılalum anı gavgaya beş dahî

-55-

Fe'îlâtün Mefâ'îlün Fe'îlün
Mâ-sadak düşme it gibi ifke
Dilüne alma kizb-i nâ-pâki
Râstî sıdk-ı nüsha kâfidür
Nassu veylün liküllü effâki

-56-

Mefâ'îlün Mefâ'îlün Mefâ'îlün Mefâ'îlün
Dilâ kesb-i kemâl it fârig ol 'örf ü izâfetden
Ki dâ'u'l-cehli dâ'un muhlikün ve'l-'ilmü keşşâfi
Müderrislik olaydı ger sakal u taylasân ile
Keçi lâzım gelirdi kim diye tefsîr-i Keşşâfi

MÜFRED VE MATLA

-1-

Mef'ûlü Fâ'îlâtü Mefâ'îlü Fâ'îlün
Didüm şehâ rakîbden a'lâ itün olmaya
Güldi ayıtdı hazretünüzden yeg olmaya

-2-

Mef'ûlü Mefâ'îlün Mef'ûlü Mefâ'îlün
retBen mushaf-ı ruhsârün hıfz itmiş idüm cânâ
Mecnûn dahı okurdu ve'l-Leylî izâ yegşâ

-3-

Bir şûh-ı cevri-pîşe
Zülfine gönlüm bilâ-sebebe

-4-

Mef'ûlü Mefâ'îlü Mefâ'îlü Fa'ûlün
Dîvâne olıgör yûri sahrâya ne minnet
Mecnûn olıgör mihnet-i Leylâya ne minnet

-5-

Fâ'ilâtün Fâ'ilâtün Fâ'ilâtün Fâ'ilün
Ugramasun kabrûme mecnûn rakîb-i bed-nihâd
Makberüm taşından anı taşa tutmakdur murâd

-6-

Fe'ilâtün Mefâ'ilün Fe'ilün
Suya gitdi rakîb-i bed-ef'âl
Didiler Bûharâya gitmişdür

-7-

Mef'ûlü Fâ'ilâtü Mefâ'îlü Fâ'ilün
Sultân-ı mülk-i derd ü gamem lîkin ey nigâr
Taht-ı tasarrufumda degül mülk-i ihtiyâr

-8-

Mef'ûlü Mefâ'îlü Mefâ'îlü Fa'ûlün
Bu zâl-ı zamân bana 'atâ kılsa birâder
Tut kim ögi atâsı ögey oğluna eyler

-9-

Fe'ilâtün Fe'ilâtün Fe'ilâtün Fe'ilün
Sarıdur benzüm didüm derdün bana hem-râhdur
Didi kim ma'zûr tut sârî-bâzun Allâhdur

-10-

Fe'ilâtün Fe'ilâtün Fe'ilâtün Fe'ilün
Yapışur destüne hınnâ ne güzel el eyler
Sarmaşur boynuna zülfün ne 'aceb hâl eyler

-11-

Mef'ûlü Mefâ'îlü Mefâ'îlü Fa'ûlün
Gül-berg didüm yokdur ey gül ruhuna benzer
Ter düşdi o gül-çehre didi varak-ı diger

-12-

Mefâ'ilün Mefâ'ilün Mefâ'ilün Mefâ'ilün
Lebün şevki beni mest itdi münkirler idüp tahkîr
Şarâb içdün diyu hadden ziyâde itdiler ta'zîr

-13-

Mefâ'ilün Mefâ'ilün Mefâ'ilün Mefâ'ilün
Yolında oldugum dîdâr-ı yâra hasretümdendür
Seg-i dil-dâr ü agyâra niyâzum hayretümdendür

-14-

Mefâ'ilün Mefâ'ilün Mefâ'ilün Mefâ'ilün
Dirîgâ her muhibbün bir habîbi var benüm yokdur
Meded her derd-mendün bir tabîbi var benüm yokdur

-15-

Fe'ilâtün Fe'ilâtün Fe'ilâtün Fe'ilün
Hâne-i gayra didüm at sürme ey şatranc-bâz
Didi ol şâh-ı kamer ruh tutmazın ta'lîmdür

-16-

Fe'îlâtün Fe'îlâtün Fe'îlâtün Fe'îlün
Leb-i dil-ber severüz 'âşık-ı ser-gerdânuz
Biz güzel gözlemeden hazz iderüz hayrânuz

-17-

Fe'îlâtün Fe'îlâtün Fe'îlâtün Fe'îlün
Bir lugaz söyle didi sâ'ir ola ol rakîb
Didüm eyi bir lugaz aksi gibi maksûdun

-18-

Fâ'îlâtün Fâ'îlâtün Fâ'îlâtün Fâ'îlün
Olsa bulsa tohmını ekdikde dih-kân-ı ezel
Hây u hûdan gayrı nesne biçmemişdür mâ-hasal

-19-

Fe'îlâtün Fe'îlâtün Fe'îlâtün Fe'îlün
Bâğı şol denlü güneş yakdı ki güneydi üzüm
Yaş yirine mey-i gül-gûn akıdur iki gözüm

-20-

Fe'îlâtün Fe'îlâtün Fe'îlâtün Fe'îlün
İster iken vaslını gitdi dil ü 'akl ile cân
Eyler imiş âdeme az tama' çok ziyân

-21-

Fe'îlâtün Fe'îlâtün Fe'îlâtün Fe'îlün
Gönlüm alsun o sanem hayrına bir deyr itsün
Bir nefes gönlüme degmen ki alan hayr itsün

-22-

Mef'ûlü Mefâ'îlü Mefâ'îlü Fa'ûlün
Taş atdı habîbüm bana sevk itdi rakîbüm
Tokındı bana elüni gönlümce yaşasun

-23-

Fe'îlâtün Mefâ'îlün Fe'îlün
Kâ'ilüz seng-i cevrüne cânâ
Bilürüz gerçi düşmez üstümüze

-24-

Mef'ûlü Fâ'îlâtü Mefâ'îlü Fâ'îlün
Kat'â rakîb kurımaz âhdan
Çalsam cihânda bârî ol iti kılıç ile

-25-

Fe'îlâtün Fe'îlâtün Fe'îlün
Kuzı büryânına meyl itdi rakîb
Yidi andan ötüri niçe bere

-26-

Mefâ'îlün Mefâ'îlün Mefâ'îlün Mefâ'îlün
Gice mey sohbetinde la'l-i cânân agzuma geldi
Safâdan öleyazdum şöyle kim cân agzuma geldi

-27-

Mef'ûlü Fâ'îlâtü Mefâ'îlü Fâ'îlün
Mülk-i bekâda 'akl za'im eşk 'askeri
Çeşm subaşıdur âh-ı derûnum ocag eri

-28-

Fâ'îlâtün Fâ'îlâtün Fâ'îlâtün Fâ'îlün

Çün beni lâ-ya'kil itdün kes meded ibrâmuni
Sâkiyâ mest oldum ayruk sunma içmem câmunı
-29-

Fâ'ilâtün Fâ'ilâtün Fâ'ilâtün Fâ'ilün
Hayra yazsun şerrini anun Kirâmen Kâtibîn
Kim du'â ile anarsa iş bu hattun kâtibin